

则



清 張廷玉 等撰

華 書

中

局

卷一九〇至卷二〇一(傳)

明是名一一个人

列傳第七十八

楊廷和 梁儲 蔣冕 毛紀 石珠 兄玠

文簡暢有法。 十九,先其父成進士。改庶吉士,告歸娶,還朝授檢討。 楊廷和,字介夫,新都人。 好考究掌故、民瘼、邊事及一切法家言,鬱然負公輔望 父春,湖廣提學僉事。 廷和年十二舉於鄉。 廷和 爲人美風 姿, 性沉靜詳審,爲 成化十四年,年

閣大學士,參預機務。 斥佞幸,件劉瑾,傳旨改南京東部左侍郎。 俸二級。 修會典成,超拜左春坊大學士,充日講官。 弘治二年進修撰。 尋以成孝宗實錄功還之。 明年加 憲宗實錄成,以預纂修進侍讀。 少保兼太子太保。 明年加光祿大夫、柱國、遷改吏部尚書、武英殿大學士。 五月遷南京戶部尚書。 正德二年由詹事入東閣,專典誥敕。 **運摘** 會典小誤,奪廷和與大學士李東陽等 改左春坊左中允,侍皇太子講讀。 又三月召還,進棄文淵 以講筵指

列

谨 寘 罪,瑾伏誅,廷 鐇 時 反 瑾 以 横 誅 益 瑾爲 甚 和等 一,而 八名。 焦芳、張 乃復論功進少傅兼太子太傅、謹 廷和等草赦詔 綵爲中外媾。 , 請擢 廷和 邊將 仇 與東陽委曲 鉞 身殿大學士,予一子 以離 贼 其 黨 間 , 鉞 小 果 有 執 劑 中 寘 救 書含 鐇 m 已。 會 人。 安化 張 永發

時業已行,果不 錦 已,又用 衣 衞 流 千戶 賊 學士 劉六、劉七、 陳霽言, 辭,特加 能平敗。 調 齊彦名反,楊 少師、太子太師 諸邊兵討 廷和 請逮中錫 河南 一清薦馬 賊趙遂等,而薦彭澤為 華蓋 下獄 殿大學士。 中 以陸完代之,而 錫討之。 東陽 廷和 總制。 言:「中錫 致政,廷和 斬 故 受财 賊平 , 逐爲首 文士也, 論 縱 贼 功,錄廷 者參將桑玉。 不任 和 此。

和日 制。 誠 從 澤旣 子聚自 : 「以君才,賊不足平,所戒 張 永 一發復留,乃歎曰:「楊公先見,吾不及也 旣 去瑾 以戰 功封 而 驕,捕得 伯耳,且非永誠 男子臂龍文者以爲功,援故太監劉永誠 者班 師早耳。」澤後 身受之也」,乃止。 一破誅本恕等卽班師,而餘黨復蝟起不可 彭澤將西討鄢本恕,問 例,覬 封侯。 計 廷和言「永 廷 和 廷

作、減 旋復起之,三疏解,始許。 祭祀 、崇兩宫孝養。 乾清宮災,廷和請帝避殿,下詔罪己,求直言。 一織造,凡十餘條,皆切至。 勤 日講。 閣臣之得終父母喪者,自廷和始也。 復 面奏開言路,達下情,還邊兵,革宮市,罷皇店,出 帝不省。 尋以父卒乞奔喪,不許。 因與其僚上疏,勸帝早朝晏罷,躬 三請乃許,遣中官護行。 西僧、 九廟

列傳第七十八 楊廷和

旗 復 帳 與 迎 大 服 學 甫 廷 関 士 和 蔣 日 冕馳 召至。 此里俗以 至居庸 帝方 欲 施之親 獵 身 宣府,使使 出 塞 舊耳。 請。 場廷和羊酒、 帝 天子至尊, 令谷 大 用 不 扼 銀幣。 · 敢瀆 關 門 一獻。」 廷和 乃 歸 帝 o 疏 再使使 謝, 帝 命 因 迴變 諭 淸 意, 迴 日 變, 羣 執 臣 不 不 從, 製

義 廷 7 和 錢 當 亦 寧. 不 廷 江 和 能 柄 執 彬 奏。 政,帝恒不 輩 ·, 恣 以是邑邑不 横 甚 視朝,恣游 廷 和 自 得, 雖 大同、宣府、延綏間,多失政。 不 數移疾乞骸 爲下、然亦 不 骨, 能 帝 有 所 亦 裁禁, 不 聽。 以是得稍自安 中官谷大用、魏彬 廷和未嘗不 ·諫,俱 張 不 聽

乃

已。

請 部 恩 將 師 帝 貴 與 尙 錄 軍 欲 戚 鎭 書 前 俱 帥 大 御 或 子 劉 臣 罷 驅 師 史 公朱壽 復 加加 春 錦 親 鎭守、撫、按悉聽節 征 理 衣 淮 不許。 東閣 衞 , 廷和 往諭 發寧王宸濠反謀 副 統各京邊將士南討。 ", 收其 **誥敕,以廷和** 千戶,辭。 等力阻 廷 和 護 方引疾不 之。 衞 時廷 屯 制。 錢寧輩 帝乃 田。 私 入,帝遂傳旨行之。 命 和 其 廷 自 於是 當 鄕 而 草大 和 稱總督 猶 人, 安邊伯許泰為威 命 庇 與 切 г 將 大 之, 養之。 學 官 軍 軍務、威武 詆淮 賴義 征 士 毛紀 南敕 離 い、射 廷和 時十四年八月也。 間。 論,謝 居守。 (武圖) 馬都尉 大將 謝 廷和 罪, 將軍 以乾清、 軍 弗肯,帝 催元 請 乞罷,不 .([] 總兵官、後軍 如 等往,未 宣宗 心恚。 坤 左 都督劉 寧二 諭趙王 至 會推 宮工 都 而 師 暉 故 督府 梁儲等 南京 爲平 一成, 事 反。 推 太 吏 贼

帝 帝 旣 歸, 南 駐蹕 兩更歲朔。 通州 廷和等舉故事 廷和頗以鎭靜持重,爲中外所推服。 , 請帝還大內御殿受俘,然後正<u>宸</u>濠等誅,而 凡請 迴變者數十疏,皆不復

趨

召

廷

和等至通州受事,即行在執宸濠等僇之,駕乃旋。

舉皇明祖訓示之曰:「兄終弟及,誰能瀆焉。興獻王長子,憲宗之孫,孝宗之從子,大行皇帝 十四四 之,中官奉遺詔及太后懿旨,宣諭羣臣,一如廷和請,事乃定。 之從弟,序當立。」梁儲、蔣冕、毛紀咸贊之,乃令中官入啓皇太后,廷和等候左順門下。 竭 矣 日 明 丙寅,谷大用、張永至閣,言帝崩於豹房,以皇太后命,移殯大內,且議所當立。 , 請捐萬金購之草澤。 廷和心知所謂,不應,而微以倫序之說風之, 彬等唯唯。 年 正月,帝郊祀,嘔血輿疾歸,逾月益篤。 時帝無嗣。 司禮中官魏彬等至閣言,國醫 廷和

門、京城九門及南北要害,廠衞御史以其屬扞掫。傳遺命罷威武營團練諸軍,各邊兵入衞 速繫囚,放遣四方進獻女子,停京師不急工務,收宣府行宮金寶歸諸內庫。 國,豹房番僧及少林僧、敎坊樂人、南京快馬船、諸非常例者,一 者俱重質散歸鎮,革皇店及軍門辦事官校悉還衛,哈密、土魯番、佛郎機諸貢使皆給賞遣還 廷和遂以遺詔令太監張永、武定侯郭勛、安邊伯許泰、尚書王憲選各營兵,分布皇城四 切罷遣。 又以遺詔釋南京 中外 大悅

時平廣伯江彬擁重兵在肘腋間,知天下惡之,心不自安。 其黨都督僉事李琮尤狠點,

狀, 嚴 彬 與 勸)擒 亦 有 同 彬 以 矣。」 從旁贊決 官 連 乘 危 一蔣冕 間 語 ||彬旣 廷 以 忧之。 毛紀 和 其家衆 誅, 以其弱 因 中外 俾 及司 彬 反 洋 心 不不 可 禮 相 動, 脅 彬等入白皇太后。 中官溫 慶 勝 也, 惟 則 銳 因 北 走 力言江彬 題 祥 大 塞 匹 行銘 外。 人 謀。 無罪 旌 彬 良久未報 張永 與與 猶 豫 彬 廷 未 伺 |祥 和 決。 知 廷 面 及 其 折 於是廷 他 意, 和 之。 中 亦 官張 冕盆自危。 冕日 密 和謀 爲 銳 [二]今日 備 以 、陳嚴等為詳言江 皇太 司 頃之,嚴至日 必了此, 禮 后 魏 旨 彬 捕 者, 誅 乃臨 彬, |彬 故 彬 反 與 逐

萬 蠹 攄 載 登 中 且 人 兼 引 衞 頌 政 極 '言欲去 後 干 釐 出 廷 廷和 支 用 當 和 餘 抉 E 大 總朝 功 石 且 人,布 詔 學士俸 面 帝 ٠, 盡 中 奏上,問 其 政 御 而 亦 中 經 所 列 諸 幾四十 ٠, 便者數事 貴、義子、傳陞、乞陞 筵 裁 在 失 賜 汰錦衣 位 延 誰 職之徒衛廷和 敇 :欲削 日,興 旌 和 諭 o 知 諸 詔草者。」

」冕、紀 經筵事 廷和 世 衞 至是加 子始 内 日 次骨,廷 往往 監 入京 左柱國。 修 局 ___ 切 武 者 師 旗 恩俸 宗 梭 即帝位。 和 亦 4. 實錄, 齓 I 相 入 帝召 繼 朝 得官者大半皆 役 齬 爲 有 發危言, 動 充 對者三, 廷和 挾 數 稱 總裁。 自 士 上 可 四 草上登極詔書,文書房官 意。 其 萬 伺 慰勞備 廷 人語塞。 輿 斥 八千七百,減 今亦新 和 、旁者。 去。 先已 至 中 天子 加 已而 外稱 事 廷 特 聞 和 漕 意 進, 詔 記記 新 糧 耶 益 下 天子 一欲有所 以營卒百 百 ? , 品滿 正 忽 五 吾 ·聖人, 十三 德 儕 至 發 賀 中 閣 九

事事有 持論 談此曹,則國法不正,公道不明,九廟之靈不安,萬姓之心不服,禍亂之機未息,太平之治未

 瓊力自辨,得減戍邊。 臻。」帝乃籍沒其貲產。 復奏改之掌詹事司誥敕。人或謂廷和太專。 令,明賞罰,專委任,納· 益不撓,卒以是忤帝 給事、御史交章論王瓊罪狀,下詔獄。瓊迫,疏訐廷和以自解。 所持諍。 錢寧、江彬雖伏誅,而張銳、張忠、于經、許泰等獄久不決。 或疑法司承廷和指者。 !諫諍,親善人,節財用。語多剴切,皆優詔報可。 廷和復疏請敬天戒,法祖訓,隆孝道,保聖躬,務民義,勤學問,愼 意 然廷和以帝雖沖年,性英敏,自信可輔太平, 會石珤自禮部尚書掌詹事府,改吏部,廷和 法司當瓊奸黨律論死, 及議「大禮」,廷和 廷和等言:「不

安門入居文華殿。 祖訓兄終弟及之文,告於宗廟,請於慈壽皇太后,迎嗣皇帝位。 草言「奉皇兄遺詔 如 命禮官議興獻王主祀 禮 部 先是,武宗崩,廷和草遺詔。言皇考孝宗敬皇帝親弟興獻王長子某,倫序當立。 所 世宗覽禮部 具儀 世宗不 入奉宗祧」,帝遲回久之,始報可。 翼日,百官三上箋勸進,俟令旨兪允,擇日 狀,謂「遺詔 稱號 聽。 乃御 廷和檢漢定陶王、宋濮王事授尚書毛澄曰「是足爲據,宜尊孝 行 以吾嗣皇帝位,非爲皇子也。」及至京,止 殿受箋, 由大明門直入,告大行 越三日 · 遣官往迎帝 ·即位。 旣令禮官上禮儀狀,請 几筵, 其箋文皆循皇子 母 城 日 興獻妃。 中 外。 刨 帝 廷 位。 和 未幾, 嗣 遵奉 固 由

不

聽

子 宗 崇仁王 国 皇考,稱 爲 興 獻 王 王 奉 爲 皇叔 獻 王 考 祀 興 有 或 異 大王 議 一,母 者 卽 妃爲 奸 邪 皇 當當 叔 斬 母 ு 興 或 進 太 士 妃,自 張 璁 與侍 稱 姪 郎 皇 王 帝 一費言, 名 , 別 帝 立 盆 入 繼 E

統

非

爲

人

後。

費微

言之,

廷

和

恐其

,撓議,

改瓚

官南京

聖德 **父**瞽 皆 益 他 和 不 不 日 卒 無累 亦 瞍 悅 皇 合 五. 嗣 肯 , 命 典 也。 月 繁衍 禮 順帝: 澄會廷 聖 博考典禮 三代 孝 惟宋 指。 ,仍以第二子爲 有 以後,賢莫如 光矣。」澄 臣議 乃下 儒 ,務求至當 程 上 廷 頤 濮議 臣 如 等亦 再 廷 **減興獻** 漢 議 和 最 光武 再 廷和 得 言。 王後,而 義 廷 執 理 和 帝 未聞 冕、 奏。 之正 偕蔣冕、 不 、紀復言 悅。 改封 追崇其所 帝 留 可 崇 然 中 為萬 毛紀 三三代 仁王 毎召 不 生 下。 奏言:「 世 爲 廷和從容賜 父 法 以前 親 南 王 頓 前 至 , 則) 聖莫 君 興 代 也。 天 獻 入繼 茶慰諭,欲 如 理 王 惟 舜 人情, 祀, 之君 皇上 未 雖 , 聞 取 兩 崇 追 有 追崇 全 法 一崇所 仁王 所 無 二君 更定 失。」 其 主 生 所 則 ·)廷 帝 牛

母, 敕, 宜 從。 蓋 **令**尊父 + 不 月 廷 惟 和 張 降 母 日 璁 其 爲 上 秀才 服 帝 一疏謂 后。 而 安 叉 當繼 異 知 廷 其 或 和 統,不 家 名 退 也 而 事 體 Ŀ 繼 奏日 臣 嗣 不 復 敢 持 帝 ₹禮 謂 阿諛順旨。」 入。 造 司 爲 禮 無 所後 太監持示 何 者爲 仍封還 帝 御 纹 廷 文 母, 手詔。 華 和 一言此 殿 m 召 以 廷 羣臣亦皆執前議 其所 議遵 和 生者爲 冕 祖 訓 紀 據古 伯 授 叔 以 帝 纹 手

宗爲 大義 立 和 言:「 廟 了,臣等 皇考, 章 迨 陵 漢宣帝 九 了,皆未 月 慈 不 得辭 母 壽皇太 繼孝昭後 嘗 妃 其責。」 追拿。 至京 后 爲 , 諡 帝自定 今若加· 聖 因 自 母 史皇孫 請 儀 皇字》 斥 興獻帝 由 罷。 王 中 夫 與孝廟 ·門入, 廷臣諍 人 后 日 認 為本 、慈壽 悼考、悼后、光武 者百餘 見太 ·生父 並 、廟,復 Ξ 人。 母 是忘 不 帝不 中諭 稱 上 皇 得已, 所後 欲 繼元帝 加 而 稱 乃以嘉靖 重 興 鉅 獻 本 ·生,任 鹿 南 后 元 年 私 頓 爲 詔 恩 君 稱孝 以 而 E 廷 棄

太 論 和 恣 定策 部 輕 一, 加 無 當 九 是 功 人 卿 廕 時 対封 臣 皆 几 禮 品京 與 廷 廷 和 和 言官史道、 冕、紀 先後 職 世 封還 襲, 伯 復辭。 御 曹嘉 簢 批 者四 歲 遂 會滿四考,超 交劾廷和 祿千石 , 執奏幾三十疏, 廷 0 和 拜太傅,復 帝 固 爲 辭。 薄 調道、 帝 改廕 常 四 忽忽有 辭 嘉 錦 衣 以安 丽 衞 止 所恨。 指 廷 特 揮 和 然 賜 使, 左右 敕 意 復 旌 辭 內 因 異 移 乘 錫 帝 矣 間 以 言 賞 尋 廷

聽,顧 遣官 例,不知洪武以來何嘗有之,創自成化、弘治耳。 財 帝 請毋 二三邪 織 頗 事 遣 齌 佞之言是聽,陛 醮。 帝 工 部 趣 廷和 及給 念急, 力言 事、御史言之, 且 下能 戒 不 毋瀆擾執 可,引梁武、宋徽爲喻,優旨報納。 獨 與二三邪佞 皆不 拗。 聽, 廷 和 共治祖 趣 憲宗、孝宗愛民節財美政非一,陛下不 力爭,言:「臣等與 內閣 宗天下哉? 撰 敕 廷 和 且陛下以織 江左比歲不登,中 、舉朝 等 不 奉命 大臣、言官言之不 ,因極言民 造為累 朝 官 取 困

列

以 法,獨法其不美者,何也? 取信。」因請究擬旨者何人,疑有假御批以行其私者。 即位一韶,中官之倖路絀塞殆盡,天下方傳誦聖德,今忽有 帝爲謝不審,俾戒所遣官毋縱 此,何 肆而

已,不能 止也。

勛 撰愼率羣臣伏闕哭爭,杖謫雲南。 使之命。 之去。四責以因辭歸咎,非大臣道。 、鄉人侍讀葉桂章與彭澤弟沖交關請屬,俱逮下詔獄。 廷和 給事、御史請留廷和,皆不報。 先累疏乞休,其後請益力。 旣 而王邦奇誣訐廷和及其次子兵部主事惇、壻修撰金承 然猶賜 又以持考獻帝議不合, 疏語露不平。 三年正 廷和去,始議稱孝宗爲皇伯考。 極書, 給輿廩郵護如 鞫治無狀,乃得解 例, 申前 [] [] 於是, 錦衣 廷和子修 月,帝聽 公衞指揮

時對曰:「可支數年。由陛下初年詔書裁革冗員所致。」帝慨然曰:「此楊廷和功,不可沒也。」 當僇市,姑削 七 年,明倫大典成,韶定議禮諸臣罪。 職爲民。 明年六月卒,年七十一。居久之,帝問大學士李時太倉所積幾何, 言廷和謬主濮議,自詭門生天子、定策國老,法

隆慶初,復官,贈太保,諡文忠。

終,卒安社稷者,廷和力也,人以東陽爲知言。 初,廷和入閣,東陽謂曰:「吾於文翰,頗有一日之長,若經濟事須歸介夫。」及武宗之

弟廷儀,兵部右侍郎。 子順、惇、孫有仁、皆進士。順自有傳。

梁儲, 字叔厚, 廣東順德 受業陳獻章。 舉成化十四年會試第 , 選庶吉士,

修,尋兼司經局校書。

修會典, 尙 {典 ·書兼文淵閣大學士,入參機務。 小 弘治 疵, 儲坐降右侍郎。 遷少詹事,拜 四年進侍講。 吏部右侍郎。 改洗馬、侍武宗於東宮。 孝宗實錄 屢加· 成, 正德初, 復尙 少傅、太子太傅,進建極 書, 改 左,進尚書,專典語敕,掌詹事 尋 册封安南,却其饋。 加太子少保,調 殿 南京 久之, 擢翰林學士, 同 吏部 府。 瑾 誅 劉 以以 瑾 吏 摘 {會

宗室賢者居京師, 寧宮,又營太素殿、天鵝房、船塢,儲偕同官斬貴、楊一淸 年,楊 廷和遭喪去,儲爲首輔。 備儲貳之選,皆不報。 進 少師、太子太師 其秋, 清罷,蔣冕代之。 切諫。 華蓋殿 明 年 大學 春,以國 至 士。 明 年,貴 時方 本未定, 亦能 建乾清、 毛 請 坤 擇

騎幸昌平。 官 至 左順 帝 好微行,嘗出西安門,經宿返。 門,明告以郊祀畢幸南海子 次日,儲、冕、紀始覺,追至沙河不及,連疏請回鑾,越十有三日乃旋。 觀獵。 儲等諫,不聽,然猶慮外廷知。 儲等暨廷臣 · 諫 皆不 納。 是春,從近倖言召 八月朔,微服 儲 等以 從 數 國 百

入

閣

命谷 無儲 大 副,而帝盤游不息, 用 守 關 無縱 廷 臣 中外危疑,力申建儲之請,亦不報。 出 。至遂由宣府抵 大同 , 遇寇 於應州 九月,帝馳 幾殆 出居庸關 儲等憂懼, ,幸宣府, 請 回 戀

請召 之。 當是時,帝失德彌 廷 和還朝,儲遂讓 甚。 羣 而 處 小 漢下。 竊 權 澗 鳳陽守備 風朝 政, 中官丘德及鎮守 人情惶惶。 儲懼不克任,以延和 延綏、寧夏、大同 宣府諸 服闋,屢

益急。

章十

餘上,帝

不

爲

動,歲除竟駐

宣府

中官皆乞更敕 書 **棄理民事**, 帝許之。 儲等極言不 可 ,弗聽。

儲 順。 君, 儲 大將軍壽 兵官朱壽統 等疏 、紀泣諫, 況鐵 奈何謬自貶損。 臣等斷 十三年七月,帝從江彬言,將偏 數十上,悉置不省。 券 肅清邊境,令加封鎭國 必有冤死之文,陛下 六師往征, 不敢阿意苟從,取他 衆亦泣, 帝意不 旣封國 令內閣 公, 可回。 草敕。 ·壽福 公。 日戮 則將授以誥券,追封三代,祖宗在天之靈亦肯 已而 游塞上。 身亡家之禍也。」不報。 儲、紀上言:「公雖貴、人臣耳。 無疆,何甘自菲薄,蒙此不祥之辭。 閣臣 紀 不可, 亦引 託言邊關多警,命總督軍務、 疾,儲獨廷爭累 帝復集百官左順門 帝逐歷宣府、大同,直 日, 帝竟不 陛下承祖宗業,爲 面 諭。 名旣 威武大將軍、 聽。 廷和 不正,言自不 如陛 踰 抵延綏。 月, 冕在 下 貶損 天下 帝以 總

秦王 清關 中閒田 爲牧地,江彬、錢寧、張忠等皆爲之請。 帝排羣議許之,命閣臣草制。

列

也,念 爲言 不 益 廷 可 謹 和 得 冕引 其 會諸 已。」帝 册 、土廣 收聚 疾 曹 饒,藩封得 1多諫 奸 帝 駭 怒甚 日 人, 毋多蓄士 若是: 者,乃 0 儲度不 之,多蓄 止 其可 一馬,毋聽 虞 山 士馬,富 ·爭,乃上制草曰:「太祖高皇帝著令,茲土不 事 遂 狂 寢。 人謀 而 且. 不 明 驕 ·軌,震 年 好奸 帝 人 將 誘 及 南巡。 〉邊方, 爲 不 軌, 危我 言官伏闕 不 利宗 社 稷, 諫,儲 社 是時 畀藩封。 王 冕 雖 一个得 欲 紀 保親 地 亦以 非 宜 吝 親

中, 之宜 不 儲 禮 乞還乘 ·敢起 、冕益懼,手疏跪泣行宮門外, 若懸人首狀, 儲 寧 輿。 也。」帝不得已,許不日還京,乃叩頭 、冕計 Ì 儲 等請 一宸濠 疏八 此 如宣宗 反,帝 議 九上, 行,則 人情益驚。 南征,儲、冕扈從。 征高 帝殊 回 [鑾盆 煦故事,罪 無還意。 儲、冕危言諫、帝 無日, 歷未至 人旣得,卽 極 是秋,行 一酉。 陳不 在道 出 帝遣 可, 聞賊滅,連疏請駕旋。 頗 在 日班師。 心動。 疏三上始得請。 人取疏 有物若 而 豕首墮帝前, **入** 叉因郊 羣 小猶 諭之起。 期改卜, 帝 · 欲導帝游浙西,泛江、漢。 以宸濠械 抵揚州、帝議 色碧, 11[] 頭言:「未奉命旨, 四 方 又進御婦 將 災異、邊警, 至,問 南 京行 人室 處 置 郊

蔣冕自 一遂與定國公徐光祚等迎世子安陸邸。 帝崩 助 ,楊廷和等定策迎興世子。 而 慮儲老或憚行, 乃佯惜儲憊老, 故事,當以內閣一人 既卽位,給事中張九敍等劾儲結納權奸,持祿固 阻 其行 儲奮 與中貴勳戚偕禮官往。 曰:「事孰有大於此者, 廷 敢 和 欲留 以 憊

列傳第七十八 蔣冕

桂萼等言, 寵。 儲三疏求去,命賜敕馳傳,遣行人護行,歲給廩隸如制。 儲立身輔政,有干公議,因錄上兩京言官彈章。 帝念先朝舊臣,特贈太師,諡 卒,子鈞奏請贈諡。 吏部侍郎

文康。

餘 人。事發,武宗以儲故,僅發邊衞立功。 先是,儲子次據爲錦衣百戶。居家與富人楊端爭民田,端殺田主,次據遂滅端家二百 後還職,累冒功至廣東都指揮僉事。

蔣冕,字敬之,全州人。兄昇,南京戶部尚書,以謹厚稱。 **屬舉成化二十三年進士,選**

庶吉士,授編修。 弘治十三年,太子出閤,衆司經局校書。

邊功,大行陞賞,冕及梁儲亦廕錦衣世千戶。兩人力辭,乃改文廕。 識,雅負時望。十一年命兼文淵閣大學士,預機務。 正德中,累官吏部左侍郎,改掌詹事府,典誥敕,進禮部尚書,仍掌府事。冕清謹有器 明年改武英殿,加太子太傅。近倖冒

宿 王 衛單弱,經行邊徼,寧不寒心。請治左右引導者罪。」不報。十四年扈帝南征還,加少傅 以大將軍禮見,陛下何辭責之。曩睿皇帝北征,六軍官屬近三十萬,猶且陷於土木。 帝之以威武大將軍行邊也,冕時病在告,疏諫曰:「陛下自損威重,下同臣子,倘所過諸

兼 太 子 太 傅、 部 尙 書 謹 身殿 大學士。 帝崩, 與 楊 廷 和 協 誅 江

遣 議 階 官 不 平 織 御 世 史張 宗 造 諸 止 江 卽 南 給 鵬 位 事 疏 命 議 評大臣賢否,請 御史皆言其 冕草敕。 定 策 功 分加 冕以 伯 不 爵 江 可 罷 南 去。 冕 固 一辭。 被災。具疏請 帝 御 改廕 沙 史 命。 趙 永亨 鴻 錦 臚 衣 此 諭 詆 世 石珤 帝 指 留 :不從, 揮 再下 不 叉辭 可 優詔, 敕亦 掌 銓 乃廕 久 衡 始 不 起 進。 五. 冕、 視 HH 珤 事 文 帝 逐 職, 責 嘉靖 求 其違慢, 去 仍 進 年 朝

冕

引

罪

而

所 嗣 而 示 弟 張 回 之名 位 璁 繼 詞 光武 、柱萼。 統 后 及廷 大禮 一一一一 之承 自 承 不 中興,本非承統平帝,而止立四親廟於章陵。 容 漢 祀 和 二議 之義。 紊, 一,與 祧 罷 至 物 踐 政 今,未有為 起,冕固 、武宗 情 故但 人,冕當 阼,皆指宗 甚 今 乃 兄武宗,考孝宗,母 皇帝遺詔 沸,冕乃抗 執 國 欲爲 本生 ,帝愈欲 爲人後之說,與延和等力爭之。 祀 本生父 父母立 • 丽 疏 則 言。 尊崇 極 將 母立 諫 一廟 無所 {禮 日二 所 爲 大內者。 昭 前奉先 生。 受命。 運、而 À 陛下 後 逐 者惟大宗, 殿 嗣 禮 於孝廟、武 今旣 漢宣帝為 侧 承 部 尙 う臣 丕基 受 書汪 宋英宗父濮安懿王,亦止卽園立廟 命於武宗 雖 帝始 以大宗尊之統 廟皆稱 叔 至 固 俊 一思,斷 祖昭帝後, 因 以 而 倫 忧 婉諭 嗣 序素定 白當 斷 冕 皇帝, 知 一繼以 而 其不 止 為武宗 也, 用 立所生父廟 称臣 漁護 席書代之, 印。 然 亦 主宗 之後。 非 稱御名,以 自古人 冕執 聖 廟 母 於葬 祭祀 特 昭 諓 且 君 兄 型 召 不

得疏不悅,猶以大臣故,優詔答之。 廟,天本晴明,忽變陰晦,至暮風雷大作。 安,雖聖心亦自不能安也。 陛 夫情旣 一不悅,遂令馳傳歸,給月廩、歲夫如制。 下先年有旨,立廟安陸,與前代適同,得其當矣。 重於所生, 義必不專於所後,將孝、武二廟之靈安所托 邇者復允汪俊之去,趣張璁、桂萼之來,人心益駭。 未幾,復請罷建廟之議,且乞休,疏中再以天變爲言。帝 天意如此,陛下可不思變計哉。」因力求去。 豈可旣奉大宗之祀,又兼奉小宗之祀。 乎! 竊恐獻帝之靈亦將不能 是 日廷議建 帝

職閒住,久之卒。隆慶初復官,諡文定。 還守之不移。代廷和爲首輔僅兩閱月, **冕當正德之季,主昏政亂,持正不撓,有匡弼功。世宗初,朝政雖新,而上下扞格彌甚,** 卒齟齬以去,論者謂有古大臣風。明倫大典成,落

益

修撰,充經筵講官,簡侍東宮講讀。 毛紀,字維之,披縣人。成化末,舉鄉試第一,登進士,選庶吉士。 會典成、遷侍讀。CE」武宗立、改左諭德、坐會典小誤、 弘治初,授檢討,進

降侍讀。 孝宗實錄成,擢侍講學士,爲講官。

正德五年進學士,遷戶部右侍郎。 十年由東部左侍郎拜禮部尚書。 烏思藏入貢,其

列

紀佐 **誥敕**, 貴、楊 再 歲 四 糧 使言有活 疏 用 إال 舟 雅州 辭 楊 兵, 車 掌詹事 趸 廷 凊 費 流贼 和 出 佛 皆 以百 境,過 居 能 切諫、不報。 府。 甫 守。 前 萬 苹 知 長 計。 ,蠻寇復起。 十二年兼東閣 駕旋、晉少保、戶部尚書、武 漏 河 腷 紀等上言:「 西 行 郊祀 帝遣 數月 畢 中 困 而 大學士入預機 · 清 官劉允迎之, 竭 後 自京師 之餘, 至。 動朝講, 至鳥 無有 重 叉 加 英殿 郵 思藏 務。 攜錦衣官百三十, 以 此累,恐生意 驛、村市。 儲 二萬餘 大學士。 其秋加太子太保, 嗣 未建,乞早定大計, 里,公私 世宗卽位,錄定策功 外變。」 切資 衛卒及 費, 煩 疏 費, 改文淵閣 再 取 私 上, 不 亦 辨 僕 不 匹 Ή 內閣 隸 聽)勝言。 Ш 數千人,芻 分加 梁儲 帝 尋改理 四 南 伯 且 Ш 靳 征 連 自

闕哭 格 於笞罰 議 聖 如 如故。 平 初 諭 爭者,俱 嘉靖 或 帝 廷臣、動至數百、乃祖宗來所未有者,亦皆出自中旨,臣等不得則聞。 召 家 欲去本生之稱,紀與 初 慰留雖切,詰責隨加。 對 政 ,帝欲追尊興獻帝,閣臣執奏, 司司 事 逮繫,紀具疏乞原。 商 禮傳諭,不知 確 可否, 然後施行。 其幾似乎商確 石珤合疏爭 臣雖有體國之心,不能自盡。 帝怒,傳旨責紀 此誠 之。 件旨。 內閣職業 矣,而皆斷自聖 帝 召見平 要結 三年, 也, **朋奸**,背 廷和 臺, 臣 心,不蒙允納,何 愚不能 委 一、冕相 |朱司馬光告||神宗日:『陛下所 君 曲 報 諭 仰副 繼去 私。 意, 紀乃 紀終 明 國、紀爲首輔、復執 命。 上言 宣召 可否之有。 不 邇 從。 日三日 者大 l徒勤, 朝 禮 曩蒙 臣 扞 至 伏

列傳第七十八 石琉

辨忠邪,以養和平之福。」帝銜紀亢直,允其去,馳驛給夫廩如 以 以 奸,背君報私,正臣平日所 祿位自榮,而 用臣,蓋察其狂直,庶有補於國家,若徒以祿位榮之而不取其言,是以官私非其人也。 日靦顏朝宁間哉。 不能救正 乞賜骸骨歸鄉里,以全終始。尤望陛下法祖 ,是徒盜竊名器以私其身也。』 痛憤而深疾者。 有一於此,罪何止罷黜。 臣於陛下, 敢舉以爲告。 放事 一典學,任賢納諫,審是非, 今陛下以之疑臣 夫要結別 厂尚可 fi

年八十,撫按以聞。 後 明倫大典成,追論奪官。 紀 有學識,居官廉靜簡 詔遣官存問,再賜夫廩。 久之, 延和、 冕皆淪喪, 紀以恩詔敍復, 帝亦且忘之。 二十一年, 重。 與廷和、冕正色立朝,並爲縉紳所倚賴。 又三年卒。贈太保,諡文簡。子渠,進士,太 其代冕亦僅三月。

僕

卿。

石琉,字邦彥,藁城人。父玉,山東按察使。「も」琉與兄玠同舉成化末年進士,改庶吉

士,授檢討,數謝病居家。

改 禮部,進左侍郎。 孝宗末、始進修撰。 武宗始遊宣府,路上疏力諫,不報。 正德改元,擢南京侍讀學士。 歷兩京祭酒,遷南京吏部右侍郎。召 改掌翰林院事。 廷臣 諫南巡,禍

將不測,珤疏救之。十六年拜禮部尚書,掌詹事府。

闕 見黜 里 及 ,時望大孚,而 世宗立,代王瓊爲 東嶽 事竣還家,屢乞致仕。 內閣楊廷和有 吏部尚書。 所不悅。 自羣 言官 小 竊柄 甫二月,復改掌 ,銓政混濁。 一重,交章請留,乃起赴官。 了詹事 府,典誥敕。 嘉靖 三年五 元 年遣祀 月詔以

吏部

尚書銀

文淵閣

大學士入參機務

動於 間,但知希合取寵,不復爲陛下體察。茲孟冬時享在邇,陛下登獻對越,如親見之,寧不少 之,終有不安於心者。心所不安而不以言,言恐觸忤而不敢盡,則陛下將焉用臣,臣亦何以 之。 之說,干不易之典哉。」帝得奏不悅,戒勿復言。 仰報君父哉。 、中乎? 無何,「大禮」議定,紀去位。 帝 欲以奉先殿側別 夫事亡如事存。陛下承列聖之統,以總百神、臨萬方、焉得不加慎重、顧聽細人 夫孝宗皇帝與昭聖皇太后,乃陛下骨肉至親也。 建 室祀獻帝,琉抗疏言其非禮。及廷臣伏闕泣爭,珤與毛紀助 **饰復諫曰:「大禮一事已奉宸斷,無可言矣。** 今使疏賤讒佞小人輒行 但臣 反覆思 解

史楊秦、葉忠等交諫,忤旨奪俸。 及世廟成,帝欲奉章聖皇太后謁見,張聰、桂萼力主之。 明 年建世廟於太廟東,帝欲從何淵言、毀神宮監、伐林木,以通輦道。 給事中衞道繼言之,貶秩調外。 禮官劉龍等爭不得,諸輔臣以 **近**復抗章,極言不可,弗 給事中韓楷,御

是也。 臣豈不知君命當承,第恐上累聖德,是以不敢順旨曲從,以成君父之過,負覆載之德也。」奏 陛下爲天地百神之主,致母后無故出入太廟街門,是坤行乾事,陰侵陽位,不可之大者也。 孝有大於從令者。 為言,帝不報,趣具儀。時乃上疏曰:「陛下欲奉皇太后謁見世廟,臣竊以爲從令固孝,而 日忽倡 且太廟尊嚴,非時享給祭,雖天子亦不輕入,況后妃乎? 此議?彼容悦佞臣豈有忠愛之實,而陛下乃欲聽之乎? 聖祖神宗行之百五十年,已爲定制,中間納后納妃不知凡幾,未有敢議及者,何至今 臣誠不敢阿諛以誤君上。竊惟祖宗家法,后妃已入宮,未有無故復出 應輩所引廟見之禮,今奉先殿 且陰陽有定位,不可侵越。

奸人王邦奇計楊廷和,誣晦及宏爲奸黨,兩人途乞歸。 璁、萼輩亦不悅。 帝言。帝見爲迂濶,弗善也。議「大禮」時,帝欲援以自助,而陆據禮爭,持論堅確,失帝意, 太子太保至少保。 臣誼,一切恩典皆不予。 **珤爲人清介端亮,孜孜奉國。數以力行王道,清心省事,辨忠邪,敦寬大,毋急近效爲** 璁、粤朝夕謀輔政,攻擊費宏無虛日,以珤行高,不能有所加。 七年冬卒、諡文隱。隆慶初、改諡文介。 歸裝樸被車一輛而已。都人歎異,謂自來宰臣去國,無若暗者。自 帝許宏馳驛,而責临歸怨朝廷,失大 至明年春,

務 悉中機宜、為) 字邦秀。 都御史戴珊所委寄。 弘治中,由汜水知縣召爲御史。 嘗因災異,劾南京刑部 出覈大同軍儲,按甘肅及陝西,所條 尚書翟瑄以下二十七人。 上邊

喜,璽 掌院事。 別部 相攻,外缺貢市,遺所以左侍郎兼愈都御 正 書嘉勞,召還。 德 中 御史李隱劾玠夤緣,不報。 累官右副 左都御史陸完遷,廷推代者,三上悉不用,最後推断,乃以爲右都御史 都御史、巡撫大同、召拜兵部右侍郎。 史往遼東巡視 海西部長 出關 撫諭、皆受約束。 數犯邊,泰寧三衞 帝 大 與

執奏。 半。王 貢資。 賜敕 瓊欲以哈密事害彭澤,玠獨廷譽之。 廷臣 劉德守涼州,請帶食茶六百引。 年 馳 拜戶部尚 傳給廩隸如故事。 一諫南巡跪闕下、諸大臣莫敢言、玠獨論救。 帝初出居庸,玠切諫。 書。 中官史大鎭雲南,請獨領銀場務。 家居二年卒,贈太子少傅。 及在宣府,需銀百萬兩, 新皆執不可。西僧<u>國教王</u>請船三百艘販載食鹽,[5] 奸民欲牟鹽利者,賄朱寧為請,行 羣小激帝怒,嚴旨責令自陳,遂引疾 杜甫鎭湖廣、詩借鹽船稅銀爲進 玠持不可。 帝 弗從, **玠不可**,連章 、乃進其

) 所有操行,居官亦持正。 其爲都御史時,胡世寧論寧王,玠與李士實請罪世寧,以是爲

が所機

危定傾,功在社稷,即周勃、韓琦殆無以過。儲雖蒙物議,而大節無玷。 清忠鯁亮,皆卓然有古大臣風。 無土崩之虞,宗藩叛而無瓦解之患者,固賴廟堂有經濟之遠略也。 贊曰:武宗之季,君德日荒,嬖倖盤結左右。 自時厥後,政府日以權勢相傾。 廷和爲相,雖無能改於其德,然流賊熾而 或脂韋淟涩、持祿自固。求 至其誅大奸,決大策,扶 蔣冕、毛紀、石珠,

校勘記

如諸人,豈可多得哉。

而安邊伯許泰爲威武 副 將軍 許泰、本書卷一六武宗紀、 卷一〇八外戚恩澤侯表及武宗實錄

卷一九七正德十六年三月庚申條均作「朱泰」。 許泰原姓許、武宗賜姓朱、見本書卷三〇七江林

傳附許泰傳。

與孝廟慈壽並 慈壽並焉」。「孝」「考」形近 原作「與慈壽考廟並」。 而譌了孝廟」又與「慈壽」倒置。 世宗實錄卷九正德十六年十二月戊戌條 作「而與孝廟 據實錄改。

<u>~</u> = ∪ 慈壽皇太后爲聖母 慈壽、原作「慈聖」、據上文及本書卷一七世宗紀、卷一一四孝宗張皇后傳,

列傳第七十八 校勘記

世宗實錄 卷 一〇嘉靖元年正月庚午條改。

24

三年正月帝聽之去 本書卷一一〇字輔年表作 「二月致仕」。 世宗實錄卷三六繫此事於三年

二月丙午。

二 九月帝馳出居庸關至無縱廷臣出 本書卷一六武宗紀及武宗實錄卷一五二均繫此事於八月辛

未。

八六〕 遷侍讀 世宗實錄卷三〇〇嘉靖二十四年六月丁酉條作「晉侍講」。

<u>-</u>--父玉山東 按察 使 明史考證橢逸卷一五日:「按班父玉會任山西按察使。 共兄玠以正德四年

擢是職,相去僅二十年,人以爲世美。 見列卿記。 此作『山東』誤。」

請船三百艘版載食鹽 三百艘,本書卷三三一護教王傳及武宗實錄卷一六四正德十三年七月

丙午條均作 「三十艘」。

M 九 **山** 賄朱寧爲請 朱寧,本書三〇七錢寧傳作一錢寧」,武宗賜姓朱。

明史卷一百九十一

列傳第七十九

毛澄 汪俊弟偉 吳一 鵬 朱希周 何孟春 豐飢 子坊

徐文華 薛惠 胡侍 王祿 侯廷訓

毛澄,字憲淸,崑山人。舉弘治六年進士第一。 授修撰。 預修會典成,進右諭德,直講

東宮。武宗爲太子,以澄進講明晰稱之帝。帝大喜。方秋夜置宴,卽徹以 武宗立,進左庶子,直經筵。以母憂歸。正德四年,劉瑾摘會典小疵貶諸纂修者秩,以 場。

澄爲侍讀。 服闋還朝,進侍講學士。再進學士,掌院事,歷禮部侍郎。日

等請用常服,不許。 出居庸,幸宣府,久留不返。 十二年六月拜尚書。三其年八月朔,帝微行。 七月,帝自稱威武大將軍朱壽,統六師巡邊。 澄等頻疏諫, 悉不報。 澄率侍郎王瓚、顧淸等疏請還宮。 明年正月,駕旋,命百官戎服郊迎。 逐幸<u>宣府,抵大同,歷山</u> 旣叉

列傳第

七十

九

毛澄

五〇五三

寧居 聖體 精 從簡 及 西 躬 誠 至 勞 略 榆 執 則 今兹 頓 玉 感 林 小根 梒 臘 之行 朔 ,怠慢則 澄 本空虛,遙望清塵,憂心如醉。 上帝前 省 等 牲 屢疏 ,又已半歲。 闕 禍 一、陛下 馳 生。」今六龍 而 諫。 不行 何以 至十二月,復偕廷臣上疏曰:「去歲 宗廟 ,遂二年矣。 自安。 退騁,旋軫 、社稷享祀 且邊 歲律將周 地荒寒,隆 伏耐趣駕速還,躬親祼享,宗社 海田 之禮 並 萬一冰 ,郊禋已卜。 係攝行 冬尤甚。 萬壽 雪阻違,道途 正 臣 皇祖 月 等處重城,食厚祿,仰思 正 以 旦、 之訓 來, 一梗塞,元正上日 冬至朝賀之儀悉 變輿數駕, 曰:『凡祀 臣民幸甚。」不 天地, 不 遑 不

祖 老 未建,欲逼告名山大川,用祈 遣往 臣 宗 所為哉。」因歷 等莫知 之業 兩畿 上四四 所指。 ·,九州四海但知陛下有皇帝之號。今日『總督軍務、威 ,瞻東嶽,奉安聖像,祈 年二月,駕甫還京,卽諭 陳五不 夫出此旨者,陛下也。 可。 亦不報 默 相,則遣使走幣,足將敬矣。 福安民。」燈等駭愕,復偕廷臣 禮部:「總督軍務威武大將軍、總兵官、 加 此號者,陛下也。 不知受此號者何人。 何必躬奉神像,獻寶香,如佛 武大將軍、太師、鎭國公」者, .上言:「陛下以天地之子,承 太師、鎭國公朱壽 如以皇儲

將 刨 賜宸濠死。 宸濠 反江西 燈據漢庶人故事,請還京告郊廟, ,帝南征示威武,駐蹕留都者踰歲。 獻俘行戮。 澄屢請 回 變。 不從。 及駕返通州, 中官王堂鎭浙江,請 用 江彬

建 生 洞 西番闡化王使者乞額外賜茶九萬斤,隨皆力爭。 不聽。 王瓊欲陷彭澤, 澄獨 其

至, 將謁 武宗崩 有議 澄偕大學士 用 天子禮者。 梁儲 澄曰:「今卽如 壽寧侯張 鶴齡、 此, 駙馬崔元、 後何 以 加? 太監韋霧等 豈勸進、 迎世宗於安 辭讓之禮 当當 陸 旣

伯、叔 父, 與 謂 父也。 母 義 仁王 「皇叔 曰 一, 而 未當 濮 考漢 厚 世宗踐 王 漢安 父某 母 謂 宜 。乃立濮 炫 時 興 所 尊 繼 大司 成 へ 懿王 生 獻 國 興王 以高 帝 阼 爲 大王 正 空 立定 甫六日,有旨議 妃 事 伯、叔父 官 後,襲興王主祀事。 王 師 正 一則正 壹 大爵,稱王 丹 陶王爲皇太子,立楚孝王孫景爲定陶王 相等。 廟 以爲恩義備至。 凡祭告興獻王及 母, 統 ,以宗樸爲濮國公奉濮 旣明,而 陛下 此生人之大倫 伯 興獻王主祀及尊稱。 宜稱孝宗爲皇考, 而 所 不 生亦 名。 又考宋濮安懿王之子入繼仁宗後,是爲 上箋於妃,俱自稱姪皇帝某, 今陛下入承大統,宜 范鎭 尊崇極矣。』今興獻王於孝宗爲弟,於 也 王祀。 亦言:『陛下旣考仁宗,若復 然所 改 五. 生之義,至尊至大, 稱興 程 月七 頤之言曰:『為 獻 奉 如 日戊午,澄大會文武 \pm 定 爲『皇叔 陶王 祀。 則 故 正 事 父 人後者,謂 共王者, 宜別 統 興 以 以 、私親,恩禮 獻 英宗。 立 益 濮王 大王 唑 殊 王第二子崇 皇太子 羣 稱 下爲 所後為 臣, 爲考,於 司馬 妃 本生 本 日 Ŀ 皇 父 光 生

了可以爲萬世法。」議上,帝怒曰:「父母可更易若是耶**」**命再議。

考前代典禮,再議以聞 名,尊崇之典已至,臣等不敢復有所議。」因錄程頤代彭思永議濮王禮疏進覽。帝不從,命博 皇帝於宗藩尊行,止稱伯父、叔父,自稱皇帝而不名。 於稱號,陛下宜稱爲皇叔父興獻大王,自稱姪皇帝名,以宋程頤之說爲可據 獻王子惟陛下一人,既入繼大統,奉祀宗廟,是以臣等前議欲令崇仁王厚炫主興獻王祀。至 了月二十四日乙亥,

澄復會廷臣上議曰:「禮爲人後者爲之子,自天子至庶人一 今稱興獻王爲皇叔 父 也。 大王,又 本 朝之制, 也。 自 稱

莫詳於宋 以 況陛下養以天下,所以樂其心,不遠其志,豈一家一國之養可同 諸王皆莫得而並之矣。 然 一禮者。 加皇字於叔父之上,則凡爲陛下伯、叔諸父皆莫能與之齊矣。 證乃復會廷臣上議曰:「臣等會議者再,請改稱興獻王爲叔父者,明大統之尊 其他推尊之說,稱親之議,似爲非禮。推尊之非,莫詳於魏明帝 程頤之議。 至當之禮,要不出於此。」并錄上魏明帝詔 興獻王稱號旣定,則王妃稱號亦隨之,天下王妃亦無以 書 日語哉。 加大字於王之上,則天下 之詔。 此孔子所 稱親之非, 同 無二也。 謂 其尊矣。 事之

至八月庚辰朔,再命集議。 當是時,帝銳意欲推崇所生,而進士脹聰復抗疏極言禮官之謬。帝 蹬等乃復上議曰:「先王制禮,本乎人情。 心動,持蹬等疏久不 武宗旣無子嗣,

門入大明 其月,帝 廟皇妃宜稱皇太妃,則 言、「王妃 又鮮兄弟,援立陛下於憲廟諸孫之中。 可復顧 以 涎 東門、帝又不 母妃將至, 私親哉。」疏入, 生 獻王,實陛 可。 下禮官 在 陛 下 所自 下宜 澄等執議 帝不懌, 諓 其 稱太皇太妃。 出。 儀。 復留中。 如 但旣承大統,則宜考孝宗,而 初,帝乃自定其儀,悉由中門入。 是武 **證等請由崇文門入東安門,帝不可** 宗以陛下爲同堂之弟,考孝宗,母慈壽 會給: 如此,則彝倫旣 事 中邢寰請議憲廟皇妃邵氏徽號, 正 恩義 母慈壽太后矣。孝宗於憲 亦篤。」疏 0 乃議 入, 由正 ",無可 報聞。 澄 陽左 疑

悖 乎 義 以 爭,又偕 廷 加 乃疏 採 議 興 與論 爲言,會朝 獻 言三臣等一得之愚,已盡於前議。 時尊崇禮猶未定,張璁復進大禮或問, 意循環 \pm 以 九 則有 號 聞 卿 慊 日 臣亦 喬宇等合諫, 之。 密 興 證等知勢不可已,謀於內閣,加稱興王爲帝, 如爲后,而以皇太后懿旨行 、獻帝 勿股肱在。 *Ž* 十二月十一日己丑復 諫者,事 ",妃曰 帝皆不允。 興國太后,〇〇 臣等有司, 獲止 明年,嘉靖改元 傳輸 未敢擅任。」帝遂於十月二日庚辰,以慈壽皇太后旨 兹欲仰慰聖心, 皇妃邵氏亦尊爲皇太后,宣示中外。 帝益嚮之。 加 稱皇帝 正月,清寧宮後三小 使宜於今而不戾乎情, 至九月末,乃下澄等前疏, 內閣 楊 廷和等封還 御批 宮災。四 顧 合乎古而 ")澄抗 帝 更令博 雖 澄復 疏 勉 之。 從 無

澄端 列 傅 有 第 學 七 -|-九 論 事侃侃不撓。 Ŧ 澄 帝欲推尊所生,嘗遺中官諭意,至長跪稽首。 澄駭愕,

上,帝輒慰留不允。 急扶之起。 金界澄 澄 其 奮然 人日 日 二上意 二年二月疾甚,復力請, · 「老臣悖耄,不能隳典禮。 也。 上言 \neg 人孰 無父母, 乃許之。 獨 有 奈何使我不 舟至 去,不與議已耳。」抗 興濟 獲伸 而 卒 Ë, 必 祈 公易 流引. 議。」 疾至五六 因出

旨,而思禮 先是,論定策功,加澄太子太傅,廕錦衣 不衰。 既得疾,遺醫診視,藥物之賜時至。 世指 揮 同 其卒也,深悼惜之。 知, 力辭 不受。 帝雅敬憚澄 贈 少傅,諡文簡 ,雖數件

編 修。 侍讀學 汪俊,字抑之,弋陽人。 正 德 士,擢 中 ,與修孝宗實錄,以不附劉 禮部右侍郎。 父鳳,進士,貴州參政。 嘉靖元年轉 述 て焦芳,調南京 吏部左侍郎。 俊舉弘治六年會試第一,授庶吉士,進 工部員 、外郎。 遊、芳敗、召復原官。

間,猶嗣孝昭。 臣 部 七十有 份 孰謂 書。 時 議 是時 三人上議曰:「祖訓『兄終弟及』,指同產言。今陛下爲武宗 興獻王尊號,與尚書喬宇、毛澄輩力爭。 與人爲後,而滅武宗之統也。 獻 光武中興,猶考孝元。 王已加帝號矣,主事 柱萼復請稱皇考。 魏明 儀禮傳曰:『為人後者,孰後? 帝韶皇后無子,擇建支子,以繼大宗。 澄引 疾去,代者羅欽順不至,乃以俊爲禮 章下廷議 三年二月,三俊集 親 後大宗也。』漢宣起民 弟,自宜 考孝宗明 孰謂 入繼 廷

他八十餘疏二百五十餘人,皆如臣等議。」 正統,大義豈敢有違。第本生至情,亦當兼盡。其再集議以聞。」俊不得已,乃集羣臣 斯亂大倫。』殆爲今日發也。 統、豈得盡絕於私恩。故所繼、主於大義、所生、存乎至情。至於名稱、統緒所繫、若其無別、 言『禮官執者不過前宋濮議』。臣等愚昧,所執實不出此。蓋宋程頤之議曰:『雖當專意於正 陛下,何忍不繼其統』。臣等謂陛下旣稱武宗皇兄矣,豈必改孝宗稱伯,乃爲繼其統乎? 安得復爲立後』。臣等謂陛下自後武宗而上考孝宗,非爲孝宗立後也。又言『武宗全神器授 之主與爲人後者異也。 顧 私 議上,留中。 親,非以生前爲子者乃爲人後,身後入繼者不爲人後也。 夢言『孝宗旣有武宗爲之子, 而特旨召桂萼、張璁、席書於南京。 宋范純仁謂英宗親受詔爲子,與入繼不同,蓋言恩義尤篤,尤當不 謹集諸章奏,惟進士張璁、主事霍韜、給事中熊浹與傳議同,其 請 加

奉藩 獻帝不得迎養壽安皇太后於藩邸,陛下得迎興國太后於大內,受天下之養,而尊祀興獻帝 祀獻皇。 皇帝,興國太后爲本生母章聖皇太后,擇日祭告郊廟,預詔天下,而別諭建室奉先殿側,恭 皇字,以全徽稱。 安陸 修等復爭曰"「陛下入奉大宗,不得祭小宗,亦猶小宗之不得祭大宗也。 ,則不得祭憲宗。今陛下入繼大統,亦不得祭興獻帝。 議上,復留十餘日。至三月朔,乃詔禮官,加稱興獻帝爲本生皇考恭穆獻 越旬有五日,乃下諭曰:「朕奉承宗廟 是皆以禮抑情者 昔興獻帝 也。 然興

列

容飾以 合禮。」 以 天子之禮樂,則人子之情獲自盡矣。 爲詞 一帝日 其 、令陳狀。」 俊具疏引罪。 但欲奉先殿側 別建一 室,以伸追慕之情耳。 乃今聖心無窮,臣等敢不將順,但於正統無嫌,乃爲 乃嚴旨切責,而趣立廟益急。 迎養藩邸、祖宗朝無 修等乃 上議 此 曰「立 例,何

廟大內,有干

·正統。

臣實愚昧

,不敢奉詔

世之譏。 之廟,俟他日襲封興王子孫世世獻饗,陛下歲時遣官持節奉祀,亦足伸陛下無窮至情矣。」 廟 太后附 大内 帝仍命遵前旨再議,脧遂抗疏乞休。再請益力,帝怒,責以肆慢,允其去。 帝 葬初畢,神主無薦享之所而設也。 不納 則從古未聞。 陛下有可以爲麂、舜之資,臣等不敢導以衰世之事。 而 令集 廷臣 惟漢哀帝爲定陶恭王立廟京師。 大議 俊等復上議曰「謹按先朝奉慈別殿、蓋孝宗皇帝爲孝穆皇 當時藏者,皆據周制特祀姜嫄 師丹以爲不可,哀帝不聽,卒遺 請於安陸特建獻帝 而言。 至爲本 召席書未 百世不遷 · 生 立 後

鵬署事。 明倫大典成,落俊職,卒於家。 隆慶初,贈少保,諡文莊

學宗洛、閩,與王守仁交好,而不同其說。

學者稱石潭

先生。

俊行誼修潔,立朝光明端介。

弟偉,字器之。 山庶吉士授檢討。 與俊皆忤劉瑾、調南京禮部主事。 **瑾誅,復故官。**屢

唐、張璁等議行,猶持前說不變。轉官左侍郎,爲陳洸劾罷,卒於家。 時故視、可持去。」俊罷官之歲、偉亦至吏部右侍郎、偕廷臣 遷南京國子祭酒。武宗以巡幸至,率諸生請幸學,不從。 ,數爭「大禮」,又伏闕力爭。 江彬矯旨取玉硯,偉曰:「有秀才 及席

除,起故官。 郎。 疏乞留之。 遷禮部郎中。 吳一鵬,字南夫,長洲人。弘治六年進士。選庶吉士,授編修。 正德初,進侍講,充經筵講官。劉瑾出諸翰林爲部曹,一鵬得南京 **瑾**誅,復爲侍講。 進侍講學士、歷國子祭酒、太常卿。 戶部尚書周經以讒去, 並在南京。 刑部 員 外

鵬署部 『繼統公,立後私』。 嗣所以承宗, 之,從古以來未有也。 陵及京師 世宗踐阼,召拜禮部右侍郎。 事,而帝越建獻帝廟甚亟。 者。 統之與宗初無輕重。 第歲時遣官致祀,尋亦奏罷。 又曰『統爲重,嗣爲輕』。 臣等寧得罪陛下,不欲陛下失禮於天下後世。今張璁、桂萼之言日 尋轉左。 况當我朝傳子之世,而欲傲善、舜傳賢之例,擬非其倫。 一鵬集廷臣上議曰:「前世入繼之君 然猶見非當時,取議後代。 數與尚書毛澄、汪俊力爭「大禮」。 竊惟 正統所傳之謂宗,故立宗所以繼統,立 ,間有爲本生立 若立 廟大內而 俊去國 親享 廟

列

傅

傷君臣之義。往且勿問,其奉先殿西室亟修葺,盡朕歲時追遠之情。」時嘉靖三年四月也。 本生皇考寢園,遠在|安陸,於卿等安乎。命下再四,爾等欺股沖歲,黨同執違,敗父子之情, 速罷建室之議,立廟安陸,下聰、「專等法司按治。」帝報曰:「朕起親藩,奉宗祀豈敢違越。但 聖心。乃謂臣等留一皇字以覘陛下,又謂『百皇字不足當父子之名』,何肆言無忌至此。乞 皇伯考者。 又謂『孝不在皇不皇,惟在考不考』,遂欲改稱孝宗爲皇伯考。臣等歷稽前古,未有 惟天子稱諸王曰伯叔父則有之,非可加於宗廟也。 前此稱本生皇考,實裁自 神主稱

願陛下率先羣工,救疾苦,罷營繕,信大臣,納忠諫,用回天意。」帝優詔報之。 秋冬雷電雨雹十八,暴風、白氣、地裂、山崩、産妖各一,民饑相食二。非常之變,倍於往時。 頃之,一鵬極陳四方災異,言:「自去年六月迄今二月,其間天鳴者三,地震者三十八,

故也。 安陸。 太宗重留都,皆以王業所基,永修世祀。伏乞陛下俯納羣言,改題神主,奉安故宮,爲百世 踰 其觀德殿中別設神位香几以慰孝思,則本生之情旣隆,正統之義亦盡。」奏入,不納。 且安陸爲恭穆啓封之疆,神靈所戀,又陛下龍興之地,王氣所鍾。 月,手敕名奉先殿西室爲觀德殿,遂命一鵬偕中官賴義、京山侯崔元迎獻帝神主於 一鵬等復上言:「歷考前史,並無自寢園迎主入大內者。 此天下後世觀瞻所係,非細 **慮使者爲道途患,疏請禁約,帝善其言而戒飭之。** 故我太祖 重中都,

受,則不書卽位。 之議 是以陛下爲不得正始也。 後二月, 斷 此 自 還 無從授受, 聖 朝,則廷 i) 正,正 今陛下承武宗之遺詔,奉昭聖之懿旨,正合春秋之義。 統 臣已伏闕哭爭,朝事大變,而給事中陳洸壽張尤甚。 其說尤爲不經。 本 生,昭然不紊。 院本小人,不痛加懲艾,無以杜效尤之漸。」不 謹按春秋以受命爲正始,故魯隱公 而恍妄謂陛下誕生於孝宗沒後 \equiv 聽。 上無所承, 年,嗣 鵬抗 而洸謂孰從授受, 疏 位 日 於 内 、武宗沒 一大 所 禮

廣參政。 大 璁、桂萼新用事 故。 (臣王瓊等不職,一鵬與焉,遂乞致仕。 尋以省墓歸,還朝仍典誥敕。 其年 九月, 丁素衡 一鵬以本官入內閣專典語敕兼掌詹 一鵬異己,乃出爲南京吏部尚書, 未幾,出理部事。 給廩如故事。 事 前 府 卒贈太子太保,諡文端。 此典內閣語敕者,皆需 加 事。 太子 少保。 武宗實錄 居二年, 成,進尙書,領 次柄 南京官劾諸 子子孝,湖 政。而 職 張 如

疵 治 ,降修撰。 九年進士。 朱希周,字懋忠,崑山人,徙吳縣。 |孝宗實錄成,復官。 孝宗喜其姓名,擢 爲第 久之,進传讀學士,**擢南京**吏部右侍郎。 。授修撰,進侍講,充經 高祖吉,戶科給事中。父文雲,按察副使。希周舉弘 筵講官。 劉瑾摘 閱 五. 年,召爲 修會典 禮 小

列

部右侍郎。

寓焉。 部事。 詔爲虛文,不足信天下,祭告爲瀆禮,何以感神祇。 周率郎中余才、汪必東等疏諫曰:「陛下考孝宗、母昭聖三年矣,而更定之論忽從中出,則明 其安議。 太常官一人同入內敎習。 時方議「大禮」,數偕其長爭執。 何嫌於此,而必欲去之,以滋天下之議。」 而帝方營觀德殿,令協律郎崔元初習樂舞生於大內。四太常卿汪舉劾之。 而是時張璁、桂萼已召至,益交章請去本生之號。帝悅從之,趣禮官具上册儀。希 希周上言:「太常樂舞有定數,不當更設。」帝不從。學復爭,帝責 會左侍郎吳一鵬奉使安陸,尚書席書未至,希周獨理 且本生非貶詞也,不妨正統,而親之義 帝遂令

王時中 齊迎,乃克成禮。 是時庶僚緊獄者猶未釋,希周上言:「諸臣狂率,固不可宥。 詔獄。明日,上章聖皇太后册文,希周及尚書秦金、金獻民、趙鑑、趙璜、侍郎何孟春,都御史 公等能坐視乎。」亦偕羣臣跪伏以請。帝聞,大怒,命希周與何孟春等俱待罪,而盡繫庶僚於 時羣臣諫者甚衆,疏皆留中,遂相率詣左順門跪伏。 - ,大理少卿張縉、徐文華俱不赴。 乞早寬縲絏、用襄大典。」不納。「大禮」遂自此定矣。 帝怒,責陳狀。 希周等伏罪,復嚴旨譙責乃已。 希周走告諸閣臣曰:「羣臣伏闕, 但今獻皇帝神主將至,必百官 山

其明年,由左侍郎遷南京吏部尚書。 |嘉靖六年,大計京官,南六科無黜者。 桂萼素以

示公,設舉曹皆不肖,亦但去一二人塞責乎。」因力稱疾乞休。 可去者。 臣以言路私之固不可,如避言路嫌,誅責之,尤不可。 禮縣希周,且惡兩京言官嘗劾己,因言希周畏勢曲庇。希周言「南京六科止七人,實無 溫旨許之,仍敕有司歲給夫 且使舉曹皆賢,必去一二人

太子少保。瀕殁,屬諸子曰:「他日儻蒙易名典,勿犯我家諱。」乃避「文」,諡恭靖。 林居三十年,中外論薦者三十餘疏,竟不復起。性恭謹,不妄取予。卒年八十有四。贈

毓秀亭、乾清宮西室,役軍九千人,計費百餘萬。抗疏極諫。清寧宮災,陳八事,疏萬餘言。 之門,學問該博。第弘治六年進士,授兵部主事。言官龐泮等下獄,疏救之。詔修萬歲山 進員外郎、郎中,出理陝西馬政,條目畢張。還,上釐弊五事,並劾撫臣不職 何孟春,字子元,郴州人。祖俊,雲南按察司僉事。父說,刑部郎中。孟春少遊李東陽

府,增五長官司、五守禦所。錄功,廕一子,辭不受。 駕幸宣府,馳疏諫。 E 一德初,請釐正孔廟**祀典,不果行。出爲河南參政,廉公有威。** 尋以右副都御史巡撫雲南。討平十八寨叛蠻阿勿、阿寺等,奏設永昌 擢太僕少卿,進爲卿。

淮北河水大溢,漂沒田廬人畜無算。 世宗即位,遷南京兵部右侍郎,半道召爲吏部右侍郎。 孟春做漢魏相條奏八事,帝嘉納焉。 會蘇、松諸府旱潦相繼,而江、 尋進左侍郎。尚

書喬宇罷,代署部事。

先是,「大禮」議起。孟春在雲南聞之,上疏言

父母、叔父母之文,而無世叔考、世叔妣之說。 決、豈非皇叔考之稱有未當者乎? 聖人制禮,尊無二上,若恭敬之心分於彼,則不得專於此故也。 則殺其服,而移於所後之親,蓋名之不可以二也。 以期也。不二斬也」,「重大宗者,〇降其小宗也」。夫父母,天下莫隆焉。 (藥曰「何以三年也。受重者,必以尊服服之」。「爲人後者,爲其父母報」、「中」傳曰「何 得失之迹具載史册。 **尊其父祖,犯義侵禮。** 號於恭王,抑情守禮。 大王妃」。 臣閱邸報,見進士屈儒奏中請尊聖父爲「皇叔考興獻大王」,聖母爲「皇叔母興獻 得旨下部,知猶未奉兪命也。臣惟前世帝王,自旁支入奉大統,推尊本生, 宣帝不敢加號於史皇孫,光武不敢加號於南頓君,晉元帝不敢加 宋司馬光所謂當時歸美,後世頌聖者也。 司馬光所謂取譏當時,見非後世者也。 抑臣愚亦不能無疑。 禮,生曰父母,死曰考妣,有世 今欲稱興獻王爲皇叔考,古典何據。 爲人後者爲之子,不敢 今者廷臣詳議,事猶未 儀禮喪服「爲 哀、安、桓、靈乃追 復顧私親。 至繼大宗 人後者」

者,皆先皇帝之德,孝宗之所貽也。 陛下稱先皇帝爲皇兄,誠於獻王稱皇叔,如宋王珪、司馬光所云,亦已愜矣。 親屬 英宗時有請加濮王皇伯考者,宋敏求力斥其謬。 不正之號,非臣所願於陛 授之大業。 不然,何也。天下者,太祖之天下也。自太祖傳至孝宗,孝宗傳之先皇帝,特簡陛下, 冠於 卽稱 爵位之上者。 皇叔父,於義 獻王雖陛下天性至親,然而所以光臨九重,富有四海,子子孫孫萬世南面 亦未安也。 然則皇叔父之稱,其可復加先朝已諡之親王乎。臣伏覩前 下也。 臣故願以漢宣、光武、晉元三帝爲法,若非古之名, 經書稱伯父、叔父皆生時相呼, 然則皇叔考之稱,豈可加於與獻王 及其旣歿, 而議者或 從無通

本生 同。 將順之說,招徠罷閒不學無恥之徒,熒惑聖聽,此所謂 去本生二字。「伊尹謂『有言逆於心,必求諸道。 若諸臣匡拂,累千萬言。此所謂逆於心之言也,陛下亦嘗求諸道否乎? 聖 何彼言之易行,而 及孟春官吏部,則已尊本生父母爲興獻帝、興國太后,繼又改稱本生皇考恭穆獻皇帝 母章聖皇太后。 **璁方盛氣,列上禮官欺妄十三事,且斥爲朋黨。** 此言之難入也。」遂發十三難以辨折應,疏入留 孟春三上疏乞從初詔,皆不省。於是帝益入張璁、桂萼等言, 有言遜於志,必求諸非 遜於志之言也,陛下亦嘗求諸非道否 **、道』。邇者,大禮之議,邪正** 孟春偕九卿秦金等具 中。 一二小 八疏,略 復欲

譚纘 郎馬理、徐一 華復相號召。 鵬、黃重、李錫、趙漢、陳時明、鄭自璧、裴紹宗、韓楷、黃臣、胡納,云凡二十有一人,御史則 桐、葉桂章、王三錫、余承勳、陸釴、王相、應良、王思,檢討金皐、林時及愼、元正,凡二十有 賈詠,學士豐熙,侍講張璧,修撰舒芬、楊維聰、姚淶、張衍慶,編修許成名、劉棟、張潮、崔 蘇民、金瓚,府丞張仲賢,通政參議葛確,寺丞袁宗儒,凡二十有三人,翰林則掌詹事府侍郎 御史王時中、張潤、寺卿汪舉、潘希曾、張九敍、吳祺,通政張瓚、陳霑,少卿徐文華及張縉 給事中張翀等遂遮留羣臣於金水橋南,謂今日有不力爭者,必共擊之。孟春、金獻民、徐文 王時柯 二人,給事中則張翀、劉濟、安磐、張漢卿、張原、謝蕡、毛玉、曹懷、張嵩、王瑄、張凝、鄭一 之,此國朝故事也。」修撰楊愼曰:「國家養士百五十年,仗節死義,正在今日。」編修王元正 益 胸胸。 · 、 藍田 、余翺、葉奇、鄭本公、楊樞、劉穎、祁杲、杜民表、楊瑞、張英、劉謙亨、許中、陳克宅、 翀、張錄、郭希愈、蕭一中、張恂、倪宗嶽、王璜 會朝方罷,孟春倡言於衆曰:「憲宗朝,百官哭文華門,爭慈懿皇太后葬禮,憲宗從 `詹事、翰林、給事、御史及六部諸司、大理、行人諸臣各具疏爭,並留中不下,羣情 、張鵬翰、林有孚,凡三十人,諸司郎官, 鳴、劉勳,主事應大猷、李舜臣、馬冕、彭澤、張鵑,司務洪伊,凡十有二人,戶部 於是九卿則尚書獻民及秦金、趙鑑、趙璜、兪琳,侍郎孟春及朱希周、劉玉,都 吏部則郎中余寬、党承志 、沈教、鍾卿密 、胡瓊、張濂、何鰲、張 、劉天民,員外

列 傳 第 七 + 九 何 孟 春

跪

伏不

起

俱跪伏 主事 胡璉、 劉 鸞、高登、程旦、尹嗣忠、郭日休、李錄、周詔、戴亢、繆宗周、丘其仁、俎琚、張希尹 廷松、熊宇、何鰲、楊濂 張澯,主事 夫,檢校丁律,凡三十有六**人**; 則 仁, 寺副 良、鄭漳 二十 淑 郎 伍 相 、郭持平、余禎、陳賞、司務李可登、劉從學、凡二十人、刑部則郎中相世芳、張峩 中黃待顯、唐昇、賈繼之、楊易、楊淮、胡宗明、栗登、党以平、何巖、馬朝卿,員外郎 有七人,工部則郎中趙儒、葉寬、張子衷、汪登、劉璣、江珊,員外郎金廷瑞、范鏓、龐淳 范錄、[10]陳力、張大輪 餘福 左 、萬潮, 、顧可 王 値門。 張鏜 聢 、張鳳來、張羽、車純、蔣珠、鄭騮,凡十有五 劉道,評事陳大綱、鍾雲瑞 久、婁志德,主事徐嵩、張庠、高奎、安璽、王尚志、朱藻、黃一道、 員外郎劉璋、楊儀、王德明,主事 、豐坊、仵瑜 帝命司禮中官諭退,衆皆曰:「必得兪旨乃敢退。」自辰至午, 、劉仕、蕭樟、顧鐸、王國光、汪嘉會、殷承敍、陸銓、錢鐸、方一蘭,凡 、丁汝夔、臧應奎,凡十有二人,兵部則郎中陶滋 、葉應聽、白轍、許路,員外郎戴欽、張儉 禮部則郎中余才、汪必東、張應、張懷,員外郎翁磐、李文中 、王光濟、張徽、王天民、鄭重、杜鸞, 汪溱、黃嘉賓、李春芳、盧襄、華鑰 人"大理之屬則寺正 劉 士奇,主事 一、 質 縉 凡再傳諭,猶 毋德純、蔣同 凡十有 陳儒 ,司務金中 、姚汝阜、 祁 鄭 詹潮、 敕、趙 曉 陳 脂 申

帝大怒,遣 錦衣先執爲首者。 於是豐熙、張翀、余翺、余寬、黃待顯 、陶滋、相世芳、

遂稱燕泉先生云。 伏罪,言:「聰等所條者,於未進之日先以私稟示人,且有副本存通政司,故臣等知之。 政,變亂是非。且張璁等所上十三條尚留中未發,安得先知?其以實對。」於是孟春等具疏 郎張琮,復以孟春爲左,蓋賸員也。 宜 加察,辨其孰正孰邪,則臣等雖死亦幸。」帝怒不已,責孟春倡衆逞忿,非大臣事君之道,法 忝從大臣後,得與議禮之末。 竊以聰等欺問,故昌言論辨,以瀆天聽,罪應萬死。 謫戍,始下孟春等前疏,責曰:「朕嗣承大統,祗奉宗廟,尊崇大禮,自出朕心。孟春等毀君害 純八人,並緊詔獄。 下官若干人,自己而令孟春等待罪。翼日,編修王相等十八人俱杖死,自己熙等及慎、元正俱 |重治,姑從輕奪俸一月。旋出爲|南京工部左侍郎。故事,南部止侍郎一人,時已有右侍| **外之,卒於家。** 楊愼、王元正乃揻門大哭,衆皆哭,聲震闕廷。 隆慶初,贈禮部尚書,諡文簡。 孟春屢疏引疾,至六年春始得請。 孟春所居有泉,用燕去來時盈酒得名, 帝益怒,命收繫五品以 及明倫大典成,削其 惟望聖明 臣等

遜第一等事於人,非夫也。」年十六喪母,水漿不入口數日,居倚廬三年。 豐熙,字原學,鄞人,布政 司慶孫 也。 幼有異禀。 嘗大書壁間曰:「立志當以聖人爲的。 弘治十二年舉殿

試第二。 孝宗奇其策,賜 第一 人袍帶龍之。 授編修,進侍講,遷右諭德。 以不附劉瑾、出掌

南京翰林院事。父喪闋,起故官。

宗 不允。 衞。 累聖德哉。」不得命,相率伏哭左順門。 乃以一二人妄言,欲去本生之稱,專隆鞠育之報。 士,方獻夫 廟 (神人之主,必宗廟之禮 世宗卽位, 旣而 爲侍讀學士,熈昌言於朝曰:「此冷褒、 尊稱禮定, 進翰林學士。 ト日上 恭穆獻 皇帝 諡 加隆, 興獻王「大禮」議起,熙偕禮官數力 斯繼統之義不 遂下詔獄掠治, 册。 失。 段猶流也、吾輩 熙等疏 臣等聞 若乖先王之禮, 貽後 復杖之闕廷,遣戍。 命, 諫曰:「大禮之議 驚惶 問 可 爭。 與 知 並 及召張璁、桂萼爲學 攸措。 列 世 『耶』抗疏請 頒 熙得福 一之譏, 天下三年矣, 竊惟 豊 不 唑 建 下為 重

十,給事中田濡復請矜宥,卒不聽。 旣 璁等得志,乃相率請釋謫戍諸臣罪, 居十有三年,竟卒於戍所。 皆首及熙、帝不聽。 隆慶初,贈官賜 最後謹 身殿災,熙 恤 年 且

知。 通 顯。 発歸_c 子坊,字存禮。 十七七 坊博學 年詣 闕 E 工文、兼通書 舉鄉試第一。 書、言建明堂事,又言宜加獻皇帝廟號稱宗,以配 法 而 嘉靖二年成進士。 性狂 誕。 熙旣卒,家居貧 出為南京吏部考功 乏, 思 效張璁、夏言片言取 上帝,世宗大悦。 主事。尋謫 通州

列

幾,進號睿宗,配饗玄極 付史館。 待命久之,竟無所進擢,歸家悒悒以卒。 殿。 其議蓋自防始,人咸惡防畔父云。 晚歲改名道生。別爲十三經訓詁,類多穿 明年復進卿雲雅詩 章,詔

或謂世所傳子貢詩傳,亦坊爲纂也。

西苗 阿維等倡亂 徐文華,字用光,嘉定州人。 ,偕巡撫魏英討之,破寨六百三十。 正德三年進士。 授大理評事。 璽書獎勞。 擢監察御史,巡按貴州。乖

誠發 變,皆自今日始矣。」不納。 有 紀極。 、憤、言甫脫 江 西 副 顧又置世寧重法,杜天下之口,奪忠鯁之氣,弱朝廷之勢, 使胡世寧坐論寧王宸濠繋詔獄,文華抗疏救曰:「世寧上爲聖朝, 口,而禍患隨之,亦可哀 也。 寧王威燄 日以 張,隱患 啓宗藩之心,招意外之 日以甚。 失今不 下爲宗室, 戢,容

竭

間投隙 之家 下後 世 不 帝遣 取 ,豈細故哉。 則 再 中官劉允迎佛烏斯藏,文華力諫。 可 酏 醮之婦。 誰 爲陛下進此者,罪可 今昂兄弟子姪出入禁闥,陛下降絀等威, 陛 下萬乘至尊,乃有此舉,返 族也。 不報。 萬 一防閑闊路,不幸有李園、呂不韋之徒乘 之於心則不安,宣之於口則不順,傳之天 馬昂納妊身女弟於帝,又疏諫曰:「中人 與之亂服雜坐,或同臥起,壞

祖宗法、莫此爲甚。 馬姬專寵於內,昂等弄權於外,禍機竊發,有不可勝言者。 乞早誅以絕

禍源。」亦不報。

阿帝意,遂奏文華言非是。命下詔獄,黜爲民。時正德十一年十月也。 祔食,凡五事。考證經義,悉可施行。帝怒,賣其出位妄言,章下所司。 文華旣數進直言,帝及諸近倖皆銜之。會文華條上宗廟禮儀,祧廟、禘祫、特享、出主、 禮官屬於經術,又

月。 敬皇帝、武宗毅皇帝,猶兩全無害也。」疏入,命再奪俸。 文華諫曰:「孝宗有祖道焉,不可以伯考稱。武宗有父道焉,不可以兄稱。不若直稱曰孝宗 左。 曰:「祖訓如是,古禮如是,璁等言當。書曰大臣事君,當將順其美。」議乃定。及改題廟主, 已,席書、張璁、桂尊、方獻夫會廷臣大議,文華與汪偉、鄭岳猶力爭。武定侯郭勛遽 時方議興獻帝「大禮」,文華數偕諸大臣力爭。明年七月復倡廷臣伏闕哭諫,坐停俸四 世宗卽位,起故官,歷河南按察副使。嘉靖二年舉治行卓異,入爲大理右少卿, 尋轉

諸 法官獄。 六年秋,李福達獄起。主獄者聰、博、獻夫,以議禮故憾文華等,乃盡反獄詞,下文華與 獄具、賣文華阿附御史殺人、遺戍遼陽。遇赦、卒於道。 隆慶初,贈左愈都御史。

不變。 自 大學 其被譴不 士毛紀、侍郎何孟春去位、諸大臣前爭「大禮」者或依違順旨,文華顧堅守前議 以罪,士論深惜之。

列傳第七十九 徐文菲

薜蕙,字君采,亳州人。年十二能詩。 舉正德九年進士,授刑部主事。 諫武宗南巡,受

杖奪俸。旋引疾歸。起故官,改吏部,歷考功郎中。

嘉靖二年,廷臣數爭「大禮」,與張璁、桂萼等相持不下。口己憲撰爲人後解、爲人後辨及

辨璁、博所論七事,合數萬言上於朝。解有上下二篇,推明大宗義。 其辨曰:

陛下繼祖體而承嫡統,合於爲人後之義,坦然無疑。乃有二三臣者,詭經畔禮,上

惑聖聰。夫經傳纖悉之指,彼未能覩其十一,遽欲恃小慧,騁夸詞,可謂不知而作者也。 適子,當絕父嗣以後大宗否。」「戴聖云」「大宗不可絕。禮言適子不爲後者,不得先庶子 族無庶子,則當絕父以後大宗。」晉范汪曰:「廢小宗,昭穆不亂。 其曰「陛下爲獻帝不可奪之適嗣」。按漢石渠議曰:「大宗無後,族無庶子,己有一 廢大宗, 昭穆亂

也。 先王所以重大宗也。 而 禮適子不爲後,庶子得爲後者,此非親其父母有厚薄也,直繫於傳重收族不 豈得不廢小宗以繼大宗乎。」 夫人子雖有適庶, 其親 親之心

同耳。 今之言者不知推本祖禰,惟及其父母而止,此弗忍薄其親,忍遺其祖 也。

其曰「爲人後者爲之子,乃漢儒邪說」。按此踵歐陽修之謬也。夫「爲人後者爲之

附會,眩於名實,苟不辨而絕之,殆將爲後世禍矣。 統 亦自度其說之必窮也,於是又爲遁辭以倡之曰:「夫統與嗣不同,陛下之繼二宗,當繼 奉其祀乎。其言之悖禮五也。 考之祀,故立後以奉之。今所後旣不得而子,則祖考亦不得而孫矣。豈可以入其廟而 乎?其言之悖禮三也。又立後而不爲之子,則古立後者,皆未嘗實子之,而姑僞立是 也。 人也。是聖人爲教人以立後,而實則無後焉耳。其言之悖禮四也。夫無後者,重絕祖 其言之悖禮二也。且爲人後者不爲之子,然則稱謂之間,將不曰父,而仍曰伯父、叔父 昆弟、昆弟之子若子」。其若子者、由爲之子故耳。傳明言「若子」、今顧曰「不爲之子」、 子」,其言出於公羊,固漢儒所傳者。然於儀禮實相表裏,古今以爲折衷,未有異論者 母之喪服之,非爲之子而何?其言之悖禮一也。傳言「爲所後者之祖父母妻,妻之父母 而 不繼嗣。」此一言者,將欲以廢先王爲人後之義與。則尤悖禮之甚者也。然其牽合 藉若修之說,其悖禮甚矣。禮「爲入後者,斬衰三年」,此子於父母之喪也。以其父 由此觀之,名漢臣以邪說,無乃其自名耶?抑二三臣者

者,統可以絕,則嗣可以不繼也。是則以繼統故繼嗣,繼嗣所以繼統也。故禮「爲人後」, 言繼嗣也。「後大宗」,言繼統也。統與嗣,非有二也,其何不同之有?自古帝王入繼 夫禮爲大宗立後者,重其統也。重其統不可絕,乃爲之立後。至於小宗不爲之後

是惡知禮與春秋之意哉! 其君父,亦將使人之尊己也。如此則義禮明,而禍亂亡。今說者謂『倫序當立斯立已』, 君。 子,苟不受命於君父,亦不敢自成尊也。 也 者,必明爲人後之義,而後可以繼統。蓋不爲後則不成子也。若不成子,夫安所得統 而 繼之。 ,不亦善乎。抑成子而後繼統,非獨爲人後者爾也。 故穀梁子曰「臣子必受君父之命」。斯義也,非直尊君父也,亦所以自尊焉耳。蓋尊 故爲後也者成子也,成子而後繼統,又將以絕同宗覬覦之心焉。 春秋重授受之義,以爲爲子受之父,爲臣受之 禮無生而貴者。雖天子諸侯之 聖人之制禮

若晉之哀帝、唐之宣宗是也。其或諸王入嗣,則未有仍考諸王,而不考天子者也。陛下 不正之舉,故曰悖禮之尤者也。 天倫不先於武宗,正統不自於獻帝,是非予奪,至爲易辨。而二三臣者猥欲比於遭變 先君之嗣。 先君於己則考也,己於先君則子也。故不可考後君,而亦無兩統二**父之嫌,** 若夫前代之君,間有弟終而兄繼,姪終而伯叔父繼者,此遭變不正者也。[12]然多

其他所辨七事,亦率做此。

文選郎夏良勝及蕙。 書奏,天子大怒,下鎭撫司考訊。已,貰出之,奪俸三月。會給事中陳洸外轉,疑 良勝已被計見斥,而應故在。時亳州知州顏木方坐罪,乃誣應與休同 事山

年相關通,疑有奸利。章下所司,蕙亦奏辨。帝不聽,令解任聽勘。蕙遂南歸。 兼翰林檢討。帝猶以前憾故,報罷。而應亦卒矣。 吏部數移文促邁起。慮見聰、傳等用事、堅臥不肯起。十八年詔選宮僚、日刊擬應春坊司直 旣而事白,

蕙貌臞氣淸,持已峻潔,於書無所不讀。學者重其學行,稱爲西原先生。

者,又有胡侍、王祿、侯廷訓云。 當是時,廷臣力持「大禮」,而應、博建異議,舉朝非之。其不獲與廷議,而以聰、博得罪

據所奏,反覆論辨,凡千餘言。帝怒,命逮治。言官論救,謫潞州同知。瀋府宗室勛注以事 慽之,奏<u>侍</u>試諸生題譏**刺,且誇**「大禮」。 逮至京,訊斥爲民。 胡侍,寧夏人。舉進士。歷官鴻臚少卿。 張璁、桂萼旣擢學士,侍劾二人越禮背經。因

選。疏奏,即棄官歸。 以主其祀,不當考獻帝,伯孝宗,涉二本之嫌。宗藩子有幼而岐嶷者,當養之宮中,備儲貳 王祿、新城人。舉於鄉、爲福建平和知縣。 命按臣逮治,亦斥爲民。 嘉靖九年疏請建獻帝廟於安陸,封崇仁王

不當私藩邸舊臣,語最切直。除南京禮部主事。嘉靖三年冬,「大禮」定,廷訓心非之。私 侯廷訓,樂淸人。 與張璁同郡,同舉進士,而持論不合。初釋褐,即上疏請考孝宗,且言

列傳第七十九 薛蕙

僉事。 刊所著議禮書,潛寄京師,下詔獄拷訊。子一元,年十三,伏闕訟冤,得釋。 以貪虐,被劾爲民。 一元舉進士,官至江西布政使。 後起官至漳南

宗長育宮中,名稱素定。而世宗奉詔嗣位,承武宗後,事勢各殊。 可據,求無得罪天下後世,而未暇爲世宗熟計審處,準酌情理,以求至當。 贊曰:「大禮」之議,楊廷和爲之倡,舉朝翕然同聲,大抵本宋司馬光、程頤濮園議。然英 諸臣徒見先賢大儒成說 爭之愈力,失之

校勘記

年閏

兀

月己酉條都作「吏部侍郎」。

二年六月壬戌條

改。

愈深,惜夫。

- 歷禮部侍郎 禮部侍郎,武宗實錄卷一五〇正德十二年六月壬戌條、 世宗實錄卷二六嘉靖二
- 十二年六月拜尚書 六月、原作「五月」,據本書卷一一 七卿年表、武宗實錄卷一五〇正德十
- = 加興獻王號曰興獻帝妃曰興國太后 興國太后,本書卷一七世宗紀、世宗實錄卷七正德十六年

{宗 {宗 {紀 十月庚辰條都作「興獻后」。 及世宗實錄卷一二嘉靖元年三月壬戌條。 按嘉靖元年世宗始改稱其母尊號 此在正德十六年「十月二日庚辰」, 爲「興 國 太后」, 見本書卷一七世 應作 與獻

24 清寧宫後三小宮災 清寧宮,原作「寧清宮」,據世宗實錄卷十嘉靖元年正月己未 條、 卷五

二頁三二五一改。 明會典卷七一有「清寧宮」。

五 三年二月 二月,原作「正月」,據世宗實錄卷三六嘉靖三年二月戊申條、 國権卷五三頁三二九

ブベ 拹 律郎 崔 元初習樂舞生於大內 崔元初, 世宗實錄卷四○嘉靖三年六月辛丑條作「崔元祁」。

爲,原作「謂」,據明史稿傳七六何孟春傳、儀禮喪服改。

ス 重 大宗者

儀禮喪服作「持重於大宗者」。

へれ

胡

納

明史稿傳七六何孟春傳作「胡訥」。

-1-

爲

其父

母

報

五改。

(0)范錄 班史稿傳七六何孟春傳作「范祿

|靖三年七月戊寅條都作「五 命收繫五品以下官若干人 品。 Ŧi. 品 按世宗實錄 原作 四四 稱「四品以上姑於午門前宣諭停俸 明史稿傳七六何孟春傳、世宗實錄卷四 一五品以下各杖 嘉

之。」作「五 品」是,據改。

列 僔 第 七 + 九 校 勘 記

編修王相等十八人俱杖死 十八人,本書卷一九二王思傳、郭楠傳、世宗實錄卷四六嘉靖三年

十二月辛卯條,都作「十七人」。 本書卷一七世宗紀所記亦止十七人。

嘉靖二年廷臣數爭大禮與張璁桂萼等相持不下 二年,明史稿傳七六薛蕙傳、 世宗實錄卷四

○嘉靖三年六月庚戌條都作「三年」。按桂萼上書言大禮,在嘉靖三年正月, 二月,世宗召張

聰、桂萼於南京、始與廷臣爭大禮。 二年、桂萼尚未上書、作「三年」是。

間有弟終而兄繼姪終而伯叔父繼者此遭變不正者也 兄終弟及」是明之「祖訓」,不能說是「遭變不正者」。 弟終而兄繼,原作「兄終而弟繼」。 明史稿傳七六薛蕙傳作「弟終而兄繼」, 按

是,據改。

口 十八年 韶選宮僚 宮僚指東宮屬僚、原與作「官僚」,據明史稿傳七六薛憲傳、世宗實錄卷二二

一嘉靖十八年二月癸丑條、國権卷五七頁三五七〇改。

明史卷一三九十二

列傳第八十

楊愼 王元正 王思 王相 張 狮 劉 濟 安磐 張 漢 卿 張原

毛 玉 裴紹宗 王時柯 余翱 鄭木公 張日韜 胡瓊 楊准

申良

張澯 仵瑜 臧應奎 胡璉 余禎 李可登 安璽 殷承敍

郭楠 俞敬 李繼先 王懋

疾歸 撰。 楊愼 丁繼母憂, 字用修,新都人, 服闋起故官。十二年八月,武宗微行,始出居庸關, 少師 廷和子 也。 年二十四,舉正德六年殿試第 愼抗疏 切 _<u>,</u> 諫。 授翰林修 蕁 移

世宗 嗣位,起充經筵講官。 常講舜典、言三聖人設贖刑、乃施於小過、俾民自新。 若元

列傳第八十 楊愼

惡大奸,無可贖之理。」時大璫脹銳、于經論死,或言進金銀獲宥,故及之。

衣冒溫官。及是伺諸途,將害愼。愼知而謹備之。至臨淸始散去。扶病馳萬里,憊甚。 月,又偕學士豐熙等疏諫。不得命,偕廷臣伏左順門力諫。帝震怒,命執首事八人下詔獄。 陛下旣超擢夢輩,不以臣等言爲是,臣等不能與同列,願賜罷斥。」帝怒,切責,停俸有差。踰 學術不同,議論亦異。 戍所,幾不起。 再杖七人於廷。愼、元正、濟並謫戍,餘削籍。愼得雲南永昌衞。先是,延和當國,盡斥錦 此 於是慎及檢討王元正等城門大哭,聲徹殿庭。帝益怒,悉下詔獄,廷杖之。閱十日,有言前 朝 龍 嘉靖 · 羣臣已散,愼、元正及給事中劉濟、安磐、張漢卿、張原,御史王時何實糾衆伏哭。乃 三年,帝納 桂萼、張璁言、召爲翰林學士。 臣等所執者、程頤、朱熹之說也。夢等所執者、冷褒、段猶之餘也。今 **愼偕同列三十六人上言:「臣等與夢輩** 抵

巡撫遣四指揮逮之還。嘉靖三十八年七月卒,年七十有二。 葬,葬訖復還。 奴及步卒百餘,馳赴木密所與守臣擊敗賊。八年聞廷和計,奔告巡撫歐陽重請於朝,獲歸 五 一年聞廷和疾,馳至家。廷和喜,疾愈。 自是,或歸獨,或居雲南會城,或留戍所,大東咸善視之。及年七十,還獨, 還永昌,聞尋匈安銓、武定鳳朝文作亂,率僮

惟幼警敏,十一歲能詩。 十二擬作古戰場文、過秦論,長老驚異。入京,賦黃葉詩,李

狀。 皆成誦。惟驚異,益肆力古學。旣投荒多暇,書無所不覽。嘗語人曰:「資性不足恃。 總裁蔣冕、費宏盡付稾草,俾削定。嘗奉使過鎭江,謁楊一淸,閱所藏書。叩以疑義,一淸 星也。〕衆不能對。愼曰:「柳星也。」歷舉周禮、史記、漢書以復。預修武宗實錄,事必直書。 東陽見而嗟賞,令受業門下。 德業,當自學問中來。」故好學窮理,老而彌篤。世宗以議禮故,惡其父子特甚,每問愼作何 詩文外,雜著至一百餘種,並行於世。隆慶初,贈光祿少卿。天啓中,追諡文憲。 閣臣以老病對,乃稍解。慎聞之,益縱酒自放。明世記誦之博,著作之富,推慎爲第 在翰林時,武宗問欽天監及翰林:「星有注張,又作汪張,是何 日新

子之歌以諷。竟以爭「大禮」,謫戍茂州卒。 王 元正,字舜卿、盩屋人。與愼同年進士。由庶吉士授檢討。 隆慶初,贈修撰。 武宗幸宣、大,元正述五

王思,字宜學,太保直會孫也。 正德六年進士。 改庶吉士、授編修。

筛於近習,政柄不移於左右,則紀綱立,而宰輔得行其志,六卿得專其職。 九年春,乾清宮災。 思應詔上疏曰:「天下之治賴紀綱、紀綱之立係君身而已。 今者內閣執奏方 私恩不

治之實,宰輔不得而知也。聞見之非,嗜好之過,宰輔不得而知也。 |順門,又不時召對便殿。 今每月御朝不過三五日, 每朝進奏不踰一二事。 其養德之功, 求 堅,而或撓於傳奉,六卿擬議已定,而或阻於內批,此紀綱所由廢也。 生民愁苦之狀,盜賊縱橫之由,豈能一一上達。伏願陛下悉遵舊典,凡遇宴閒,少賜召問, 本,用舍不以讒移,刑賞不以私拒,則體統正而朝廷尊矣。祖宗故事,正朝之外,日奏事左 勿以遇災而懼,災過而弛,然後可以享天心,保天命。」 天下之大,四海之遠, 惟陛下抑私恩,端政

之憂,凛若朝夕。夫勇不可好,陛下已薄有所懲矣。至於荒志廢業,惟酒爲甚。 來,於茲九年。朝宁不勤政,太廟不親享。兩宮曠於問安,經筵倦於聽講。 即不幸變起倉卒,何以備之。此臣所大憂也。」疏入,留中者數日,忽傳旨降遠方雜職,逐謫 酒嗜音,峻宇雕牆,有一於此,未或不亡。』陛下露處外宮,日湎於酒。 政令出於多門。 爲天下萬世自重。近者道路傳言,虎逸於柙,驚及聖躬。臣聞之,且駭且懼。陛下卽位以 二端:嗜酒而荒其志,好勇而輕其身。由是,戒懼之心日忘,縱恣之欲日進,好惡由乎喜怒, 其年九月,帝狎虎而傷,閱月不視朝。思復上封事曰:「孝宗皇帝之子惟陛下一人,當 紀綱積弛,國是不立。士氣摧折,人心危疑。上天示警,日食地震。宗社 **厮養雜侍,禁衞** 揆厥所自,蓋有 書曰。古廿

冰, 舟飄巨石上,緣石坐浩歌。 思 年少氣銳,每衆中指切人是非。已悔之,自斂爲質訥。 家人後至,聞歌聲乃儀舟以濟。 及被謫、怡然就道。 王守仁講學贛州,思從之 夜 過瀧

遊及守仁討宸濠,檄思贊軍議。

恩於先朝譴責之臣,抑末矣。」帝不允,因命近日遷俸者,皆不得辭。 奸,莫若省覽奏章,召見大臣,勿使邪僻阿徇之說蠱惑聖聽,則堯、舜之治可成。不然,縱加 世宗嗣位,召復故官,仍加俸一級。 思疏辭,且言三陛下欲作敢言之氣, 尋充經筵講官。 以防壅蔽之

罷歸 卒。 申良、張燦、主事安璽、作瑜、臧應奎、余禎、殷承敍、司務李可登、 隆慶初,各廕一子,贈官有差。 思與同官王相,給事中張原、毛玉、裴紹宗,御史張曰韜、胡瓊,郎中楊淮、胡璉,員 嘉靖三年與同官屢爭「大禮」,不報。 時脹聰、桂萼、方獻夫爲學士,思羞與同列 不許。 其年七月,偕廷臣伏左順門哭諫。 思贈右論德。 帝大怒,繫之詔獄,杖三十。 凡十有七人,皆病創先後 踰旬, 疏 再杖 外郎

能似伯玉,則改齋其人也。」改齊者,思別號也 思志行邁流俗,與李中、鄒守益善。 高陵呂柟亟稱之,嘗曰:「聞過而喜似季路,欲寡未

王相, 字懋卿, 鄞人。 正德十六年進士。 由庶吉士授編修。 豪邁尙 志節 事親篤孝。

列

家貧屢空,晏如。仕僅四年而卒。

則心懷顧望,不恤封疆。不可不亟罷。」後張字敬爲相,竟罷諸鎮守,共論實自翀發之。 往歲宸濠謀叛,鎮守太監王宏反助為逆,內臣果足恃耶。時平則坐享尊榮,肆毒百姓,遇變 祖、太宗舊制。 內外鎭守官涖任,率貢馬謝恩,翀皆請罷之。帝雖是其言,不能從。尋言:「中官出鎭,非太 致他物。 世宗卽位,詔罷天下額外貢獻。 張翀,字習之,

潼川人。

正德六年進士。

選庶吉士,

改刑科給事中。引疾歸,

起戶科。 四方效尤,何所抵極。願守前詔,無墮奸謀。」不聽。寧夏歲貢紅花,大爲軍民害, 酬言:「陛下韶墨未乾,旋即反汗,人將窺測朝廷,玩侮政令。且陽 景帝遭國家多故,偶一行之。謂內臣是朝廷家人,但有急事,令其來奏。 其明年,中都鎮守內官張陽復貢新茶。禮部 名貢茶,實雜 請遵詔

陛下爲其愚弄,而已得肆其奸欺。 典,講誦科儀,賞資踰涯,寵幸日密。此由先朝罪人遺黨若太監崔文輩,挾邪術爲嘗試計。 下寧遠君子而不忍斥其徒,寧棄讜言而不欲違其教,亦謂可以延年已疾耳。 屢遷禮科都給事中。又言:「頃聞紫禁之內,禱祠繁興。乾清宮內官十數 輩,究習經 干撓政事,牽引羣邪,傷太平之業,失四海之望。 側聞頃來嬪御 竊計陛

列傳第八十 張翀

妄之術,甚非古帝王求福不回之道也。」 小人窺 ,充塞閨幃,一二點慧柔**曼**者爲惑尤甚。 見間 隙,遂以左道蠱惑。 夫以齋醮爲足恃而恣欲宮壼之間,以荒淫爲無傷 由是,怠日講,疏召對,政令多僻,起居愆度。 而 邀福 邪

萬千,或一椽而廢財十百。死亡枕藉之狀,呻吟號嘆之聲,陛下不得而見聞。 資;教化未聞,成偷薄之習。是民不可謂不失職也。 部 也。 於飛燕,或點慧不下於婉兒,內以移主上之性情,外以開近習之負倚。是女謁不可謂不盛 謂不崇也。 奪於監門之羣咻。 允戴保奏添,鎭戍方裁而更聽趙榮分守。 職歟?宮壼崇歟? 肆毒螫,或 靈 (議)而 王英改問於錦衣、關節通而于喜竟漏於禁網。 第奸之銳、雄,公肆**路遺而**逃籍沒之律;極惡之鵬、鎧,密行請託而逋三載之誅。 嘉靖二年四月,以災異,偕六科諸臣上疏曰:「昔成湯以六事自責曰:『政不節歟? 民失 (讒行於外、顯逞擠排、上以汨朝廷之是非、下以亂人物之邪正。 用 奉聖、保聖之後,先女寵於册后,莊奉、肅奉之名,聯殊稱於乳母。 王 槐 諛佞之謀[°] 是政不可謂節也。 女謁盛歟?苞苴行歟。戆夫昌歟。』今誠以近事較之。 重臣批答,乏體貌之宜,而入羣小惎間之論 末作競於奇巧,遊手半於閭閻。耕桑時廢,缺俯仰之 韶核馬房矣,隨格于閻洪之一言,韶汰軍匠矣,尋 是苞苴不可謂不行也。 兩宮營建,採運艱辛。 是讒夫不可謂不 或譖發於內,陰 獻廟主祀,屈府 或一木而役夫 快船 或承恩漸 是宮壼不可 方滅而 錢 隣 神

政,楊廷和等在內閣。 納。」其年冬,命中官督蘇、杭織造,舉朝阻之不能得。 昌 報聞,不罪也。 也 凡此、皆成湯之所無、而今日之所有、是以不避斧鉞之誅、用附責難之義。 羣小雖已用事,正論猶仲,潛前後指斥無所避。 帝雖不見用,然亦嘗 時世宗 望陛下採 初

佞,變亂宗廟 下 以朋言亂政,命奪俸。 獄,翀等抗疏抹。 及明年三月, が離間 帝以桂萼言,銳欲考獻帝,且欲立廟禁中,翀復偕同官力諫。 宮闡,祗毁詔書,中傷善類。 及張璁、桂萼召至、翀與給事三十餘人連章言:「兩人賦 旣又助尚書喬字等再疏爭內殿建室之議,被詔切讓。 望亟出之,爲人臣不忠之戒。」皆 性 呂桃、 奸邪,立心懷 示 帝 於是責 鄒守益

官 等陷 璁 署名者凡二百二十餘 上亦云是者,即撲殺之。」聰等以其語聞。 書秦金請命官往勘,帝是之。 諭之不退,遂震怒。 義 帝愈欲考獻帝 闿 .忠 | 孙居戍所十餘年,以東宮册立恩放還,卒。 ,改孝宗爲伯考,翀等憂之。 人。 先逮諸曹爲首者八 帝皆留中不報。 翀等乃取廷臣劾夢等章疏,送刑部令上請, 廷臣相 顧 帝留疏 駭 人於詔獄, 七月戊寅,諸臣相 歎 會給事中張漢卿劾席書振荒不 不下,而責刑部尚書趙鑑等朋 諸曹乃各具 **翀與焉。** 一疏, 率伏左順門 尋杖於廷,謫戍瞿塘衞,而 力言孝宗不 且私 怨請。 相語 邪 法,戶部尚 可 帝 心害正, 翀 稱伯考, 兩遣· E 一一倘 中

疏請回變。 左、右布政使倪天民、陳達。 濟,字汝楫,騰驤衛人。正德六年進土。由庶吉士授吏科給事中。 詔封許泰、江彬伯爵,又與諸給事中力爭,皆不報。世宗卽位,出核甘肅邊餉。 吏部請黜之,帝不許。濟疏爭,不省。帝幸宣府、楡林,濟皆 山西巡撫李鉞劾

奏革凉州分守中官及永昌新添遊兵。再遷工科左給事

 $\dot{\dot{\mathbf{H}}}$

陽鳳 死。 奏上得報,已及日旰,再請而後行刑,則已薄暮,殊非與衆棄之之意。乞自三請後,鼓下不 黨王欽等,皆以從逆論斬,鵬等夤緣中人冀脫死。濟上言:「自來死囚臨斬,鼓下猶受訴詞, 濟索原奏、壽不 有詔復官。 得受詞 坐罪,已下刑部。 濟力爭,不聽。 嘉靖改元,進刑科都給事中。主事陳嘉言坐事下獄,濟疏救,不許。 暉 奪 鵬、欽等罪甚當,幸陛下勿疑。」詔自今以申酉行刑。 職 甘肅 "隆受訊 與,濟亦不肯簽發。 總兵官李隆嗾亂軍殺巡撫許銘, 故事、廠衞有所逮、必取原奏情事送刑科簽發駕帖。 帝受文憩,移之鎭撫。 伏辜。 兩人列詞上。 濟率六科爭之,不聽。 逮入都,營免赴鞫。 帝先入壽言、竟詘濟議。中官崔文僕李 鵬等竟緩決,欽後以中旨免 都督劉 濟皆力陳不可,帝從 千戶白壽齎帖至, 廖鵬父子及錢寧 暉 以奸黨論成,

五〇八九

列

傅

第

八

+

劉

湾

奴何 而已。 臣 詔 戚 質成,或主平反。 史黃國用皆逮下詔獄,戍最而謫國用。 腕 初不 獄,而法司幾成虛設。 . 重殿 奴 濟請幷治光祚,章下所司。給事中劉最以刻中官崔文調外任,景賢復劾其違禁,與御 定國 以最等視之,奚啻天淵,而罪顧一律,何以示天下。」帝怒,奪濟俸一月。 與知,爲聖政累非淺。 也 公徐光祚規占民田,嗾灤州民計前永平知府郭九阜。太監芮景賢主之,緹騎 人死,帝命釋之。濟執奏曰:「萬言縱奴殺人,得免爲幸,乃幷釋壓等,是法不行於 權臣不得以恩怨爲出入,天子不得以喜怒爲重輕。 如最等小過耳,羅織於告密之門,鍛鍊於詔獄之手,旨從內降,大 且李洪、陳宣罪至殺人,降級而已。 法司爭不得,濟言:「國家置三法司,專理刑獄,或主 王欽兄弟黨奸亂政,謫戍 自錦衣鎭撫之官專理 后父陳萬言 逮

本, 爭 謫戍遼東。 者多得 郎中林應 濟 在 諫 罪。 十六年册立皇太子, 赦諸謫戍者, 濟不與, 卒於戍所。 垣久,言論侃侃,多與權幸相枝柱,直聲甚震,帝滋不能堪。「大禮 驄, 濟疏救修撰呂柟,編修鄒守益,給事中鄧繼 不聽。 旣而遮諸朝臣於金水橋,伏哭左順門,受杖 曾, 御史馬明 、關廷。 隆慶初復官,贈 衡 朱淛 越十二日 議起, 陳逅、季 再杖, 太常 廷臣

少卿。

安磐,字公石,嘉定州人。弘治十八年進士。改庶吉士。正德時,歷東、兵二科給事

乞假去。

力爭,事得且止。

獻,諡法也,不可加於生存之母。本生、所後,勢不俱尊。大義私恩,自有輕重。」會廷臣多 世宗踐阼,起故官。帝手詔欲加興獻帝皇號,磐言三興,藩國也,不可加於帝號之上。

許任爲錦衣指揮。 察預防,天下事毋令若輩再壞。」帝納其言,命錦衣官密訪緝之。中官張欽家人李賢者,帝 恐言官發其奸,故摭拾細事,意在傾排。帝置不問。尋因事言:「先朝內外巨奸,若張忠、劉 嘉靖元年,主事霍韜言,科道官褻服受詔,大不敬。 磐極言不可,不聽。 | 響偕同官論解先以議禮得罪名教,

等議黜百之,刑部謂情狀未明,宜俱逮治。帝兩宥之,奪百之俸三月,贈一月。 說,而陰與銳交關,爲銳再起地。」百之情得,乃誣慰因請屬不行,挾私行謗。吏部尚書喬字 大義,勸銳卻其飢遺。今銳以是免死,儀功不錄,無以示報。」譬疏言:「百之儉邪,陽爲儀遊 錦衣千戶張儀以附中官張銳黜革,御史楊百之忽爲訟冤,言:「儀當宸濠逆謀時,首倡

且連類以進,伺便以逞。臣故曰文可斬也。」疏入,報聞。 下,欲行香則從之,欲登壇則從之,欲拜疏則又從之。無已則導以遊幸、土木,導以征伐,方 夤緣冒遷,旣經降革,乃營求還職。導陛下至此,使貽譏天下後世,文可斬也。|文嘗試陛 佛西域。十數年間糜費大官,流謗道路。自劉允放,而饋南囚,供億減,小人伏。奈何甫及 一年,遂襲舊轍。不齋則醮,月無虛日。此豈陛下本意,實太監崔文等爲之。文鐘鼓厮役, 頻興齋醮,磐叉抗言:「曩武宗爲左右所蠱,命番僧鎖南綽吉出入豹房,內官劉允迎

女,期服未滿,宜更其期。舊儀,駙馬見公主行兩拜禮,公主坐受,乖夫婦之分,亦當革正。」 帝以遺旨格之,相見禮如故。 法司。不聽。永福長公主下嫁,擇昏於七月下旬。 磐言:「長公主於孝惠皇太后爲在室孫 戶部主事羅洪載以杖錦衣百戶張瑾下詔獄,「日醫與同官張漢卿、張逵、葛鴟等請付之

領,亦已幸矣,尚敢肆然無忌,屢瀆天聽,何爲者哉。且陛下收已渙之人心,**奠將危之國脈,** 之,無有解脫,謂之『種妖言』。數十年內,死者填獄,生者冤號。今不追正其罪,使得保首 其緝妖言也,或用番役四出搜愚民詭異之書,或購奸僧潛行誘愚民彌勵之敎,然後從而掩 奸盜也,或以一人而牽十餘人,或以一家而速數十家,鍛鍊獄詞,付之司寇,謂之『鑄銅板 錦衣革職旗校王邦奇屢乞復職,磐言:「邦奇等在正德世,貪饕搏噬,有若虎狼。

嚴究治、絕禍源。」帝不能從。其後邦奇卒爲大厲如磐言。 實在登極一詔。 若使此輩攘臂一朝壞之,則奸人環立鑑起,隄防潰決,不知所紀極矣。 宜

說之自相矛盾者也。」不聽。 不可入太廟矣。夫孝宗旣不得考,恭穆又不得入,是無考也。 帝驛召席書、桂萼等,磐請斥之以謝天下,且言:「今欲別立一廟於大內,是明知恭穆 世豈有無考之太廟哉。 此其

歷兵科都給事中。 以率衆伏闕再受杖、除名爲民。 卒於家。

事中。 倖、廣儲積、愼刑獄三事,深切時弊,不報。武宗將南巡,偕同官伏闕諫。 撫李鐸言,發帑金二十萬優卹宣府軍民。 張漢卿、字元傑,儀封人。正德六年進士。授魏縣 以漢卿言,併發十三萬於大同。 知縣,徵拜刑科給事中。 世宗嗣位、從巡 屢遷戶科都給 嘗陳杜僥

額外侵占者,盡以給民。王言一布,天下孰不誦陛下之仁。 '張希尹勘上 嘉靖元年冬,與同官上言:「陛下軫念畿輔莊田之害,遣官會勘。 涿州薰皮廠、安州鷹房草場,詔旨留用。 所司執奏,迄不肯從,非所以全 乃者給事 中夏言、御史樊繼祖 敕自正德以後投獻及

列

陳萬 銀十五萬 大旱,帝將鬻淮 舊恩,妄求冤革,是復蹈永成、 大信昭至公也。 言請營新第,旣又乞莊田,內官吳勳等請督蘇州織造,漢卿皆極 、浙餘鹽及所沒產,易銀振之。 皮廠起於馬永成、鷹房創於谷大用、皆奪民業為之。 大用故轍也。 乞盡還之民,而嚴罪俊、 漢卿言:「易銀緩,非發帑 諫。 **幂爲欺罔者戒。」后父** 今馬俊、趙霦恃蕃邸 金不可。」帝爲發 不納。 應天諸府

罪也。 聞。 郡邑小民將安取哉。今東南洊饑、民至骨肉相食,而搜括之令頻行,臣等竊以爲不可。」報 數,欲行京倉撥補,是欲耗太倉之粟也。 方躬行節儉,而中官梁棟等奏營造缺珠寶,是欲括戶部之銀也。 已,又劾席書振濟乖方,乞遣官往勘,正共欺罔罪。 未幾,復偕同官言:「今天下一歲之供,不給一歲之用,加以水旱頻仍,物力殫屈。 夫內庫不足,取之計部,計部不足,取之郡邑小民, 帝方眷書甚,驛召爲禮部尚書,不 梁政等又以蠲免三分之 陛下

如默、賈準等會薦天下遺賢,及漢卿,終不召。 初 了.興獻帝議加皇號,漢卿力爭,至是又倡**衆伏**闕。 兩受杖,斥爲民。 二十年,言官邢

於民者十百,進於上者一二,朝廷何樂於此而受之。人君馭下惟賞與罰。 令假以自殖,又十倍於上供。民旣困矣,而貢獻者復巧立名目,爭新競異,號曰『孝順』。 民何以貧。守令之裒斂,中臣之貢獻,爲之也。比年軍需雜輸十倍前制,皆取辦守令。 獻、明賞罰、廣言路、進德學六事。中言:「天下幅員萬里,一舉事而計臣輒告匱,民貧故也。 不封侯腰玉。或足不出門而受賞,身不履陳而奏功。 一十卒所由解體也。」疏入,權倖惡之,傳旨謫新添驛丞。 字士元,三原人。正德九年進士。 授吏科給事中。 禦敵者竟未沾恩,覆軍者多至逃罪。 疏陳汰冗食、愼工作、禁貢 **邇者庸才厮養莫** 取

貴皆震懾。 强占民地,定國公徐光祚子、外戚玉田伯蔣輪、昌化伯邵蕙家人擅作威福。事雖不盡行,權 原先後論之,皆奪職閒住。 丞,又以外戚蔣泰等五人爲錦衣千、百戶,原抗疏極言,請行裁節。 嘉靖初,召復兵科,仍加俸一級。南寧伯毛良殺其子,錦衣掌印指揮朱震等多違縱,自己 帝進張鶴齡昌國公,封陳萬言泰和伯,世襲,授萬言子紹祖 未幾,劾建昌侯張延齡 一向寶

此

原與毛玉、 卿 進戶科右給事 裴紹宗、 中。 圧思、圧相、胡瓊等妻子流離狀、請卹於朝。 **臧門哭**,再被杖, 創重卒。 貧不能歸葬。 不許。 久之,都御史陳洪謨備 隆慶元年贈光祿 陳

炒

年,由行人擢南京吏科給事中。 去,起南京兵科。御史林有年諫迎佛鳥思藏下獄,压抗疏救之,有年得薄罰。 顯僇,以謝萬姓。羣盜擾山東、河南,玉請備留都。 服闋,除吏科。 毛玉,字國珍,更字用成,雲南右衞軍家子也,其先良鄉人。弘治十八年進士。正德五 劉瑾旣敗,大盜鑫起。压言大學士焦芳、劉宇實亂天下,請 已而盗果渡江,以備嚴不敢犯。 叉以繼母艱 外艱

有萌芽。 世宗即位逾年,興邸諸內官怙帝寵,漸驕佚。 压卽抗疏歷敍**武**宗時事,勸帝戒嗜欲,杜請託,以破僥倖之門,塞蠱惑之隙。 又故太監谷大用、魏彬等相次謀復起,事

斥罷。 者也。 斥玉,其同官倫以謀亦助爲言。給事中張原以庶僚聚訟,朝廷爲之多事,重損國體,乞身先 王珪之論房玄齡等,本朝解縉之論黃福等,皆承君命而品藻之,未有漫然恣其口吻,如嘉 御史曹嘉素輕險,做宋范仲淹百官圖,分廷臣四等,加以品題。 压亦上疏求去,言:「宗魯等知朋友私恩, 不顧朝廷大體。 玉復言嘉背達成法,變亂國是,乞斥。帝從其言,貶嘉於外。御史許宗魯爲嘉訟,請 臣一身所係絕微,公論所 給事中安磐疏駁之,言

帝俱從之。 活。 關 甚大,乞罷臣以謝御史。」帝皆慰留之。 且言宸濠稱亂, 再遷左給事 山 左右 中。 貪賂釀成之。 尋伏闕爭「大禮」,下獄受杖,竟卒。 因劾守臣不死事者, 時宸濠戚屬連逮者數百人,压奉命往訊,多所全 而禁天下有司與藩府交通 後贈光祿少卿。

裴紹宗,字伯修,渭南人。 正德十二年進士。 除海門知縣。 武宗南巡,受檄署江都事,

權倖憚之,供億大省。

紹宗 視朝 撰唐阜亦言之。 目不蔽於淫邪,左右不惑於險佞,則君志素定,治功可成。」帝嘉納之。 郊丘,君臣之情必通於宴享。 下所當釋思祖述。 力諫。 了親歷田野,服浣濯衣,種蔬宮中,毀鏤金牀,碎水晶漏,造觀心亭,揭大學衍義之類,**陛** 世宗卽位,召入爲兵科給事中。 嘉靖二年冬,帝以災異頻仍,欲罷明年郊祀慶成宴。 竟得如禮。 而二三大臣尤宜朝夕納海,以輔養聖德。 明年,以伏闕受杖卒。 往以 國戚廢大禮,今且從吉,宜卽舉行,豈可以災傷復免。」修 即疏請法祖定制,言:「太祖貽謀盡善。 贈官如毛玉 陛下日御便殿,親儒臣,使耳 紹宗言:「祭祀之禮莫重於 帝欲加興獻帝皇號, 如重大臣,勤

事,再予杖,除名。 書、方獻夫辭職,除張璁、**桂萼**別任,則是非不認,人情悅服。」 忤旨切責。 未幾,有伏闕之 羣賢獲罪,恐海內聞之,謂陛下好諛惡直。願採忠讜之言, 消朋比之禍,特寬邁等而聽**席** 擊以議禮迎合,傳陞美官。」薛蕙、陳相、段續、胡侍等,連章論劾,實出至公。今佞人超遷而 王時柯,字薂英,萬安人。正德十二年進士。授行人。嘉靖三年擢御史,疏言:「桂萼

宗卽位,時柯、關皆復官,贈時柯光祿少卿。 司 禮太監張佐蒙蔽罪。 時御史疏爭「大禮」居首者余翺,字大振,定遠人,正德中進士。嘉靖二年爲御史,嘗劾 明年七月,與時柯等被杖戍邊。居戍所十四年。 皇子生,赦還。

親賢者正位東宮,繫天下望。不報 鄭本公,朔州衞人。 正德九年進士。 歷御史。 武宗不豫,國本未建,本公請慎選宗室

八年營構,一旦告成。陛下居安思危,當遠臺小,節燕遊,以防一朝之患。重妃配,廣繼嗣 世宗嗣位,及冬而乾清宮成,帝由文華殿入居之。本公上言:「事之可思者有六。

以爲萬世之計。 持聖心,遠貨色,毋溺于鴆毒。 慎終如始, 兢兢業業, 常若天祖之臨。 重興作,惜財力,永鑒于先朝。」帝嘉納之。 求言益切, 訪 政益勤, 用防壅蔽之 踰月, 帝欲

加興獻帝皇號,本公力言不可。

切責。二年十月,時享太廟,帝不親行。本公與同官彭占祺極言遣代非宜,報聞 嘉靖改元,出按遼東。 **劝罷副總兵張銘**、 都指揮周輔。 還朝,論救給事中劉最,

中而 若是酷也。」不納。 『嗣皇帝』,於獻帝之廟,又當何稱?愛敬精誠,兩無所屬, 中,本公言最切 人連章言、「傳首爲亂階,聰再肆欺罔,黃綰、黃宗明、方獻夫、席書連彙接踵。 言亂政,奪俸三月。其年六月,以席書爲禮部尚書,召張璁、桂萼入京。 爲不經。 之姪,興獻王之子。臨御之日,則爲孝宗之子,興獻帝之姪。 下。 明年三月,帝欲考興獻帝,立廟禁中。 行取之旨,已罷再頒。 獻帝之靈旣不得入太廟,又空去一國之祀而託享于大內焉。陛下享太廟,其文曰 中 已,偕廷臣伏闕哭諫。 大臣因此被逐,言官由之得罪,雖往日瑾、彬之奸,流禍 繫獄,廷杖還職。 本公偕同官力爭,謂:「陛下潛邸之日,則爲孝宗 獻帝將蹙然不安。」帝怒,責其 當是時,爭「大禮」者,諸御史 可兩 言決也。 本公偕同官四十四 至立廟大內,實 尚書之命, 由 朋

尋遷通政 列 傅 第 多議。 八 + 王 九 年 時 不調,以疾請改南京。 柯 酁 本 公 乃授大理寺丞,稍遷南京太僕少卿。 五〇九九 謝病

歸。二十年,言官邢如默、賈準等會薦,詔用不赴,卒。

去,曰韜遂死。彬亦戒其黨毋擾,山是常以南諸府得安。 |彬黨果大至,索曰韜,誤截御史舟。|郊使嚴補截舟者,而陰令緩之。 史東郊行部過常州、謂曰:「事迫矣、彬將以他事縛君。」命曰韜登己舟先發,自以小舟尾之。 獨秣,亦無以辦。」言**已,彬黨**疑有他變,乃稍退,馳使告彬。 邁之境上,曰:「常州**比歲災,物**力大屈,無可啗若曹。 行 曰:「彬黨至,若等力與格。」又釋囚徒,令與丐者各具瓦石待。 州縣。 張曰韜,字席珍,莆田人。正德十二年進士。授常州推官。 將抵常州、民爭欲亡匿。時知府暨武進知縣咸入觀,日韜兼綰府縣印,召父老約 府中惟一張推官,一錢不入,卽欲具 日韜卽上書巡按御史言狀。 已,彬黨果累騎來。 武宗南巡,江彬縱 其黨恐御史上聞,咸散 父老直 其黨橫 御

弄威福。 有羣小蒙蔽於內,而大臣能盡忠於外者。 情民,是明知織造之害矣。 旣知之,而猶不已,實由信任大臣 世宗即位,召爲御史。楊廷和等之爭織造也,日韜亦上言:「陛下旣稱閣臣所奏惟愛主 陛下奈何任其逞私,不早加斥逐哉。 崔文輩二三小人嘗濁亂先朝, 今復蒙惑聖衷, 竊 臣聞織造一官,行金數萬方得之。旣營之以 .弗專,而羣 小爲政也。自古未

重貲,而欲其不責償於下,此必無之事也。」帝不能用。

席書以中旨拜尚書,日韜與同官胡瓊各抗疏力爭。 旣受杖,猶占疏劾奸人陳洸罪。 未

幾,竟死。隆慶初,追贈光祿少卿。

胡瓊,字國華,南平人。正德六年進士。 由慈谿知縣入爲御史。 歷按貴州、浙江有聲。

哭諫,受杖卒。後贈官如曰韜。

有供飽,淮悉絕之。 積弊殆盡。 賣屋以斂。 金與淮同里,為經紀歸其喪。後贈太常少卿。 楊淮,字東川,無錫人。正德十二年進士。 繼監潍、通二倉,罷中官茶果之供,除囤基及額外席草費。 公勤廉慎,爲尚書孫交、秦金所重。伏闕受杖,月餘卒。 授戶部主事,再遷郞中。始監京倉,革胥徒 最後監內庫,奄人例 囊無一物,家

至黃縣,俘斬數百人。 申良、字延賢、高平人。登鄉薦、授招遠知縣。山東盜起、良豫爲戰守具。 已,復至,再破走之。 歷知諸城、良鄉。 權貴人往來要索,良悉拒之。 盗至,追擊

進安吉. 遷常州 「知州 同 知,入爲戶部員外郎。 錦衣 葉瓊倚錢寧勢奪民田,良讞還之民。 與淮俱杖 死。 贈太僕少卿。 瓊因嗾奸人誣奏良, 招遠民懷其政, 事竟 繪像祀之。 得白。 稍

張澯,字景川,廣東順德人。

「子寧忠貫日月,太宗謂『若使子寧在, 之矣,何外親末屬,尚以奸惡賜配,百年不宥哉。〕疏雖不行,中外皆壯之。 祖 善昭, 四川 調臨江 通判。 殿固當用之』。 先是,練子寧親黨戍臨江者八十餘人,善昭上書曰: 仁宗亦謂『方孝孺等忠臣』。 夫旣忠

贖哈密 |元昊,寧獨澤也。」不肯署。 燦自廣昌遷禮部主事,監督會同館。 成當顯 燦登正德九年進士,授建平知縣。 擢。 城 印爲澤罪,嗾番人在館者暴澤過惡,誘燦爲署牒,且曰:「澤所爲,南宋覆轍也。 潔力拒曰 下王公誤矣。 尋進員外郎,受杖死。 澤與土魯番檄 尙 ·書王瓊與都御史彭澤有隙,以澤遣使土魯番許金幣 件巡江御史賀洪, 具在,豈宋和戎比。 改調 廣昌。 訟洪罪,洪坐削籍。 昔范仲淹亦嘗致書 事

件瑜,字忠父,蒲圻人。父紳,工部主事。 瑜少有志操, 正德十二年釋褐, 即謝病去。

起補禮部主事,復引疾歸。世宗踐阼,起故官。疏陳勤聖學、篤親親、開言路、敬大臣、選諍

臣、去浮屠、拯困窮、重守令、修武備、儲人材十事。 已,竟死杖下。

入爲禮部主事,未幾杖死。應奎受業湛若水之門,以聖賢自期。嘗過文廟,慨然謂其友曰 力裁損之。中官遣卒譁於部,叱左右執之,遁去。 臧應奎,字賢徵,長興人。正德十二年進士。授南京車駕主事。進貢中官索舟踰額, 父所生母卒, 法不得承重, 執私喪三年。

「吾輩歿,亦當俎豆其間」,其立志如此。

主事余順,字興邦,奉新人。正德九年進士。 郎中胡璉,字重器,新喻人。正德六年進士,官刑部。 司務李可登,字思善,輝縣人。弘治末鄉 嘗諫武宗南巡受杖。

。俱官兵部。回登素慷慨,以忠義自許,竟如其志。

穆宗嗣位,贈璉太常少卿,燦太僕少卿,瑜、應奎、承敍、璽、禎光祿少卿,可登寺丞。 戶部主事安璽,宛平人。正德十六年進士。刑部主事殷承敍,江夏人。正德九年進士。

世宗卽位,請召還直臣舒芬、王思、黃鞏、張衍瑞等。 郭楠,字世重,晉江人。正德九年進士。授浦江知縣。 從之。 課最,入爲御史。 嘉靖元年,核餉兩廣。

列傳第八十 張燦 郭楠

劾

總兵官撫寧侯朱麒貪懦,這詔爲戒飭。 主事陳嘉言忤中官,不宜逮繫。 帝怒, 育其俸、 專上章,請退朝之暇延見大臣,· 如祖宗故事。 且

者未 乞復生者之職,卹死者之家,庶以收納 示 納。 必悖。 諸 臣伏闕爭「大禮」,皆得罪。 既至,下鎭撫獄掠治,復廷杖之,削其籍 今羣臣伏闕 呼號,或榜掠殞身 楠方巡按雲南、馳疏言:「人臣事君、阿意者未必忠、犯顏 人心, ,或問關 全君 臣之義。」帝大怒,遣緹騎逮治,言官論救 謫戍,不意聖明之朝,而忠良獲罪若此。

不勝惓惓。」帝皆不省。 其身,使人臣 在 可 苟默自容。 廟 獄 人子至情,誠不容已。 見矣。 游將訊。 ,正宜赦過宥罪,章大孝於天下。 獄者亦垂亡矣。 先是,諸人旣死,廷臣莫敢上聞。 諸臣跡雖狂悖,心實忠誠。 乞錄卹已死,赦還謫戍,追復去國諸臣,而在位者委任寬假之,使各陳邊計。臣愚 今日大同告變,曾無一人進一疏、畫一策者,則小 無復以言爲諱,宗社之幸也。」通政司經歷李繼先亦 其呻吟袵席, 創 羣臣一時冒觸天威,重得罪譴,死者遂十餘人。大臣紛紛去位,小臣 望霽雷霆之威,施雨露之澤。 重不能起者,又不 今聞給事裝紹宗、編修王相、主事余顧等俱已死,熙等 後府經歷俞敬奏言:「學士豐熙等皆以冒觸宸嚴,繫 知凡幾。 ·大之臣,志不奮而氣不揚,亦 竊惟獻皇帝神主已奉迎入 上言:「陛下追崇尊號,乃 已死者恤其後,垂亡者宥

優邱,贈官錄廕。」帝大怒,謫懋四川高縣典史。逾數日,而楠疏至。帝益怒,遂逮治削籍。 明 六年春,以災變修省,從吏部言量與楠一官,得吉水教諭。 「年三月,御史王懋言:「廷臣以議禮死杖下者十有七人,其父母妻子顚沛可憫, 乞賜 終南寧知府。

宗初政,侃侃鑿鑿,死節官下,非徒意氣奮發立效一時已也。 身,抑何慘也。楊愼博物洽聞,於文學爲優。王思、張翀諸人,或納諫武宗之朝,或抗論世 贊曰:「大禮」之爭,羣臣至臧門慟哭,亦過激且戆矣。然再受廷杖,或死或斥,廢錮終

校勘記

戶部主事羅洪載以杖錦衣百戶張瑾下詔獄 稿傳七三孫交傳及傳八四安磐傳改。 張瑾,原作「張僅」,據本書卷一九四孫交傳、明史

錦衣掌印指揮朱震等多違縱 朱震,明史稿傳八四張原傳作「朱宸」。

劾總兵官撫寧侯朱麒貪儒 卷二○○姚鏌傳,明史稿傳五○朱謙傳,武宗實錄卷八六正德七年四月癸卯條,世宗實錄卷 朱麒,原作「朱麟」,據本書卷一〇七功臣世表、卷一七三朱謙傳、

校勘

列

傳第八十

g.

明史卷一百九十三

列傳第八十一

費宏 弟寀 從子懋中 子懋賢 世父瑄 翟鑾 李時

顧鼎臣 嚴訥 袁煒 李春芳 孫思誠等 陳以勤

趙貞吉殷士儋高儀

費宏,字子充,鉛山人。 甫冠,舉成化二十三年進士第一,授修撰。 弘治中,遷左贊善,

直講東宮、進左諭德。

府鄒平王子當選當襲父爵、日為弟當涼所奪且數年矣。 郎、尋轉左。 武宗立,擢太常少卿, 五年進尙書。 帝耽於逸樂、早朝日講 兼侍講讀。 預修孝宗實錄。 俱 廢。 宏因當潩奏辨, 宏請勤政、務學、納諫, 充 日講官。 正德二年拜禮部右侍 據法正之。 報聞。魯 當涼

八十一 费宏

列

傳第

怒,誣宏受賂,宏不爲動。明年冬十二月命宏兼文淵閣大學士參預機務。 尋加太子太保、

武英殿大學士,進戶部尚書。

贼宏。 家,劫掠遠近,衆至三千人。宏馳使愬於朝。 罪。 是宸濠與寧合,而恚宏。寧數偵宏事無所得。 歸,杜門謝客。 故。」完曰:「今恐不能不予。」宏峻却之。及中官持奏至閣,宏極言不當予,詔卒予之。 也,知之以告宏。宏入朝,完迎問曰:「寧王求護衞,可復乎。」 宏曰:「不知當日革之者何 屯田,輦白金鉅萬,徧賂朝貴,寧及兵部尚書陸完主之。 宏從弟編修深,其妻與濠妻,兄弟 中旨責陳狀、宏乞休。命幷宗致仕。 倖臣錢寧陰黨<u>宸濠,欲交歡</u>宏,飽綵幣及他珍玩。 拒却之,寧慚且恚。 **懺等遂據險作亂,率衆攻費氏。索宏不得,執所與訟者支解之,發宏先人塚,毀其** 宸濠復求與通,宏謝絕之,益怒。會宏族人與邑奸人李鎭等訟,宸濠陰令鎭 寧遣騎伺宏後,抵臨清,焚其舟,資裝盡 下巡撫孫燧按狀,始遺兵剿滅 以御史余哪嘗刻寀不當留翰林, 宸濠謀復護衛、 即指爲宏 艘。 宏 於

臣力與帝爭,帝不能堪。宏頗揣知帝旨,第署名公疏,未嘗特諫,以是帝心善之。 體,明習國家故事。 去位,宏爲首輔。 宸濠敗,言者爭請召宏。世宗卽位,造行人卽家起宏,加少保,入輔政。宏持重識大 加少師兼太子太師、東部尚書、謹身殿大學士、委任甚至。戶部議督正德 與楊廷和、蔣冕、毛紀同心協贊,數勸帝革武宗弊政。「大禮」之議,諸 及廷和等

列傳第八十一 費宏

時逋 同兵變,張璁請討之。 數經讞不誅,罪無可辨者遽傳旨獲免。干和召怨,自非一端。」帝引咎褒答,然不能 **冗食日增,京營無十萬之兵而赴工不已。 直臣得罪未見原,言官舉職乃被詰** 「陛下用度無節,工役不休。 徐圖之。」事果旋定。 一賦,宏偕石珤、賈詠請斷自十年以後。從之。帝以四方災異,敕羣 。宏曰:「討而勝,玉石俱焚,不勝,彼將據城守,損威重多矣。 畿內土地半成莊田,內庫收納要求踰倍。 臣修省。 太倉無三年之積 律所當行者 宏等因言: 用也。大 莫若觀 ımı

粤逐與 | 萼由 | 萼用 事。 應、

傳滋害宏龍,

傳言:「詩文小技,不足勞聖心,且使宏得馮龍靈,

凌壓朝士。」

示置不 製七言一章,命輯倡和詩集,署其衡曰「內閣掌參機務輔導首臣」。其見尊禮,前此 不爲 上稟聖 郎署 宏上書乞休,略曰:「夢、璁挾私怨臣屢矣。 事。 宏為 應毀宏於帝,言宏納郎中陳九川所盜天方貢玉,受尚書鄧璋賕謀起用,幷及其居鄉 兩京鄉試考官則怨,不爲教習則 人和易,好推穀後進。 入翰林、縣至詹事、舉朝惡其人、宏每示裁抑、聰、博亦大怨。 書弟檢討春,故由他曹改用。及武宗實錄成,宏議出爲僉事, 裁, 非 可 專擅。 粤、 其於「大禮」不能强諫,亦未嘗附離。 璁日攘袂捡掔, 又怨。 **覬覦臣位。** 不與經筵講 夢、聰疑內閣事 臣安能 官則怨,不與修獻皇帝實 屬 與小 臣 操縱, 而是時席書、張璁、桂 帝嘗御 人相齮蛇, 書由是憾 抑 平臺,特賜御 知臣 未有 下采物 祈賜骸 錄 省。 也。 則

閣,間 子懋良 大學士廷和等,幷誣宏。 亦連疏乞休,帝輒下優詔慰留,然終不以譴璁、夢。於是奸人王邦奇承璁、夢指,上書汙故 骨。」不允。及應居兵部,宏欲用新寧伯譚綸掌奮武營,應遂劾宏劫制府部。 一歲萼亦入矣。 坐罪 下吏,攻之益力,復錄前後劾疏上之。不得請,則力求罷,詆宏尤切,章數上。宏 **宏竟致仕去。**時六年二月也。十月, 應遂以尚書、大學士入直內 無何,又因宏

卒,年六十有八。帝嗟悼,賻卹加等,贈太保,諡文憲。 師。 輔元臣」。數有咨問,宏亦竭誠無隱。承聰、導操切之後,易以寬和,朝士皆熹樂之。未幾 自是眷遇益厚。偕本時召入無逸殿,與周覽殿廬,從容笑語,移時始出。賜銀章曰「舊 使中使勞以上尊御饌,面諭曰:「與卿別久,卿康健無恙,宜悉心輔導稱朕意。」宏頓首 十四年,傳旣前死,應亦去位,帝始追念宏。四月再遣行人卽家起官如故。七月至京

子懋中由進士及第爲編修,宏長子懋賢方改庶吉士,父子兄弟並列禁近。深官至少保、禮 部尙書,諡文通。 宏三入內閣,佐兩朝殆十年。中遭讒構,訖以功名終。其自少保入也,弟寀爲贊善,從 懋中終湖廣提學副使。懋賢歷兵部郎中。

宏世父瑄,成化十一年進士。弘治時爲兵部員外郎。貴州巡撫謝泉、總兵官吳經等奏

爛土苗反,僭稱王,乞發大軍征討。以兵部尚書馬文升請,令暄與御史鄧庠往按。 反狀,撫定之。劾恳、經及鎭守中官張成罪。遷貴州參議以終。 白齿無

翟鑾,字仲鳴,其先諸城人。曾祖爲錦衣衞校尉,因家京師。 舉弘治十八年進士, 改

庶吉士。正德初,授編修。劉瑾改翰林於他曹,以鑾爲刑部主事。 中貴人多譽變者,帝遂踰次用之。楊一清以變望輕,請用吳一鵬、羅欽順。 嘉靖中,累遷禮部右侍郎。六年春,廷推閣臣。帝意在張孚敬,弗與。命再推,乃及 旋復官,進侍讀 帝不許,命

時日:「所擬不 所佛。 天下。」帝曰:「大用亂政先朝,正奸黨也。」鑾曰:「陛下,卽天也。 密封言事,變獨無所言。詰之,則頓首謝曰:「陛下明聖,臣將順不暇,何獻替之有。」帝心愛 變以吏部左侍郎兼學士入直文淵閣。尋賜銀章曰「淸謹學士」。 一清、萼、字敬先後罷,鑾留獨秉政者兩月。其後李時、方獻夫入,位皆居鑾上,鑾亦無 變初入閣,一清、謝遷輔政,旣而字敬與桂萼入,鑾皆謹事之。 帝數召時、變入見,嘗問:「都察院擬籍谷大用貲產,當乎。」時、變皆北人,與中貴合。 中律。」鑾曰:「按律,籍沒止三條,謀反、叛逆及奸黨耳。不合三尺法,何以信 春生秋殺,何所不可。」帝 字敬、萼皆以所賜銀章

列傳

卒從重擬。

入閣。 武將更咸受節制。 有警,議遣重臣巡視, 言等因薦變充行邊使。十八年二月改兵部尚書兼右都御史, 諸邊文 丁生母憂歸。 在大同與總督毛伯溫議築五堡,自過甘肅與總督劉天和議拓嘉峪關,皆受廕敍。 且齎帑金五十萬犒邊軍,東西往返三萬餘里。明年春入京,遂命以原官 服闋,久不召。夏言、顧鼎臣居政府,變與謀召己。會帝將南巡,慮塞上

解。 讚亦發變請屬私書,帝皆不問。會變子汝儉、汝孝與其師崔奇勛所親焦淸同舉二十三年進 鑿以資地居其上,權遠出當下,而嵩終惡變,不能容。 御史趙大佑刻變私同年,東部尚書許 及鄉試主考諭德泰鳴夏、贊善浦應與「三詔獄,並杖六十,褫其官。 士,嵩遂屬給事中王交、王堯日刻其有弊。帝怒,下吏部、都察院。 帝益怒,勒變父子、奇勛、清及分考官編修彭鳳、歐陽喚爲民,而下主考少詹事江汝壁 二十一年,言罷,變爲首輔。時已加少保、武英殿大學士,進少傅、謹身殿。嚴嵩初入, 鑾疏辨,引西苑入直自

衰。 俱櫜鞬郊迎,恒恐不得當變意,饋遺不貲。 又爲其子所累,訖不復振。踰三年卒,年七十。 初輔 政,有修潔聲。 中持服家居,至困頓不能自給。 事竣、歸裝千輛、用以遺貴近、得再柄政、聲譽頓 穆宗卽位,復官,諡文懿。 其用行邊起也,諸邊文武大吏

李 時, 字宗易,任 丘 人。 父棨, 進士, 萊州知 府。 時舉弘治十五 年進士, 改庶 吉

編 修 0 正 德 中 ·, 歷 侍 ·讀、右 諭 德。 世宗 嗣 位 , 爲 講 官 **尋遷侍讀** 學 士。

擇,終 益 事 尙),咸 以 書。 計 嘉 未嘗 好 爲 帝 靖 更張 忠。 旣定尊親 顯 年 爭 擢 賜銀章曰「忠敏安愼」, o 所 禮 以故 建諸 禮 部 右 帝 典 慨 侍 愛其 禮 然 郎 一成 有 〈恭順 狹 他 俄 小前 人 以 發端,而時傅 憂 (俾密 四 人之志, 歸。 方 封言 上 服 一点 除 欲 小。 瑞 ",為戶 會成 裁 軱 定舊章 久而 拜疏 部 之。 右 失之,請罪,帝 請賀。 或廷 侍 成 郎 入議不 帝 朝 復改 謙 制 合, 讓 作。 禮部,葬代方 再 率 賜 計 具 焉 張学 必 兩端 再請 敬 献夫 待帝 夏言 山 是 爲 自 用

於 陳 利 雟 害 + 興革。 年七月,四 Щ ,時等力陳不可。 帝 以 [郊成,加太子太保。 建言乃科道專責,寢不行。 巡檢徐震奏於安陸 雷震午門,彗 光禄 建京 師, 寺廚役 星 見東井, 時等駁其 王福 時請敕 、錦衣 非 制 逐 衛千戶陳昇 臣 工修省, 議 改州 爲 請 令言官 承 遷 天府 顯陵 指

詩 宮保官尊 武定侯 其 秋 ¨, 反 郭 柱 粤卒 勛 居 及 變 九 ,命時兼文淵閣大學 上。 卿 翰林俱入侍。 兩 人皆謙 遜, 無齟 講畢,帝退御 土 語。 入參機務。 帝 御 無逸 图 時張 風 亭賜宴。 殿 一、召時 孚敬已罷 坐講無逸篇 自是,數召 翟 變獨 變 見,諮謀 相 講 時 图} 後 政 風 入,以 七月

明 年春 字 敬還內閣,事取獨裁,時不敢有所評 議。 未幾,方獻夫 入, 與時 亦相 彗

列

刑獄三事,頗及「大禮」大獄廢斥諸臣。帝優詔褒答之,然卒不能用也。給事中魏良弼、御 星復出,帝召見時等,諭以引咎修省之意,從容語及乏才。時等退,條上務安靜、惜人才、愼

師、吏部尙書、華蓋殿大學士。會夏言入輔,時不與抗,每事推讓言,言亦安之。帝待時不 設四輔,以臨清為南,昌平為北,薊州、保定為東西,各屯兵一二萬。今若於昌平增一總兵, 如字敬、信,然少責辱,始終不替,字敬、信亦不敢望也。十七年十二月卒官,贈太傅,諡 可南衞京師,北護陵寢。」帝乃下廷臣勘議,於沙河築澤華城,爲置戍焉。 屢加少傅、太子太 陵,道沙河,帝見居民蕭索,愴然曰:「七陵在此,宜加守護。」時對曰:「昔丘濬建議,京師當 主事應。對曰:「事應之說起漢京房,未必皆合。惟在人君修德以弭之。」帝稱善。 殿,接膝咨詢。時雖無大匡救,而議論恒本忠厚,廷論咸以時爲賢。客星見天棓旁,帝問所 史馮恩先後劾吏部尚書汪鐵,觸帝怒,時皆爲論救。 字敬謝政,費宏再入,未幾卒,時遂獨相。時素寬平,至是益鎭以安靜。帝亦恒召對便 十二年, 字敬復入, 變以憂去, 獻夫致仕。 時隨字敬後, 拱手唯諾而已, 以故字敬安 扈蹕謁

顧鼎臣,字九和,崑山人。弘治十八年進士第一。授修撰。 正德初,再遷左渝德

從之。 郎。 詹 事 帝好 嘉 詞臣 靖 事 長 初 以青詞結主知,由鼎臣倡也 生術 直 中劉世揚、李仁劾鼎臣汙佞。 一經筵。 一,內殿設齋醮。 進講范浚心箴,敷陳剴 鼎臣進步虛詞七章,且列上壇中應行事。帝優韶褒答,悉 帝下世揚等獄,以鼎臣救,得薄譴。 切。 帝悅,乃自爲註釋,而鼎臣特受眷。 拜禮部右侍 累官

極 有期功服,當辭。 張孚敬主用兵,鼎臣言不可,帝嘉納。 「詆其非,乃已。 改 吏部左侍郎,掌詹事府。 乃上言:「古禮,諸侯絕期。今公卿即古諸侯,請得毋避。」禮部尚書夏言 尋進禮部尚書,仍掌府事。 請令曾子後授五經博士, 比三氏子孫, 從之。 十三年孟冬,享廟,命鼎臣及侍郎霍韜捧主。二人 京師淫雨, 四方多水災,鼎臣請振饑弭盜, 大同 軍變,

臣屬 抑承學而用崑。」帝下承學詔獄,鼎臣不問。 **|李時爲首輔,夏言次之,鼎臣又次之。時卒,言當國專甚,鼎臣素柔媚,不能有爲,充位而** 帝將南巡,立皇太子,命|言扈行,鼎臣輔太子監國。 ,調刑部主事陸崑爲吏部。 十七年八月,以本官兼文淵閣大學士入參機務。尋加少保、太子太傅、進武英殿。 潮言:「兵部主事馬承學恃鼎臣有聯,自詭必得銓曹,臣故 十九年十月卒官,年六十八。贈太保,諡文康。 御史蕭祥曜劾吏部侍郎張潮受鼎

無城 鼎 言於當事 臣 官 侍 從 爲築 時 城。 憫 東南賦役失均,屢陳其弊,帝爲飭撫按。 後倭亂起, |崑山 獲全,鄉 人立 洞 祀 焉。 巡撫歐陽 鐸釐定之。 崑山

進士, 訥 疏 陳民 嚴訥,字敏卿,常熟人。 改庶吉士 歷太 困 常 ,請蠲貨。 少 ,授編修**,遷**侍讀。 、卿,禮部左、右侍郞,改吏部,皆兼學士,仍直 帝得疏感動, 舉鄉試,以主司試錄觸忌,一 三吳數中倭忠, 報如 其語。 尋與李春芳入直西苑。 ,歲復 大禮、民死徙幾半,有司徵 一榜皆不得會試。 西苑。 所撰青詞皆 撰青詞, 嘉靖二十年成 一稱旨 超授翰林 斂益急

朝 雜 並 房 用 法,州 嵩敗,朴 禮 部 謁 尚書郭朴遷吏部,遂以訥代之。 、縣吏 私 瓜。 典銓猶未能盡變。 政績異者破 慎擇曹郎,務抑 格超擢,銓政一新。 訥 奔競,振沲滞。 雅 意自 飭, 朴遭父喪,復代爲吏部尚 徐階亦推 尋錄供奉勞,加太子太保 又以資格太拘, 心 任之。 訥 人才不能 乃與朝 書。嚴嵩當國,吏道汙 悲, 士約,有事白於 做先朝三途

居 西苑 其年冬十一月,遂乞歸。 四 四 年,袁煒罷, 廬皆在 一苑中。 命兼 踰年,世宗崩,遂不復出。 訥晨 武英殿大學士入參機務。 出 理部事,暮宿直廬,供奉青詞, 以代 者郭 朴 小心謹畏,至成疾久不 未至。仍掌 一銓政。 帝

有 濟 訥 吾掌 也。 旣 歸 銓 家居二十年卒,年七十有四。 里,父母皆在。 二年,適華亭當 晨夕潔餐孝養,人以爲榮。 國 事 無阻。 贈少保,諡 A. 所 任 選郎 文靖。 賢、舉無失人。」華亭謂徐階,選郎則 **酬嘗語人曰三銓臣與輔臣** 必 同 心乃

陸

光

祖

仍 甫 修 加 史包孝所 撰 命入直。 俸二等,俄進左侍郎。 兩 月 全 袁煒,字懋中,慈谿 元立掌南京翰林院,帝特用 手 刻, 詔 牌自供奉以後,六年 拜 帝宥 禮部右侍郎。 不罪。 人。 明年二月調 進侍 嘉靖十七年會試第一,殿試第三,授編修。 明年,加太子賓客氣學 讀。 中進宮保、尚書,前 煒。 **外之**,簡直西苑。 更部、雜官供奉如 **煒疏辭,願以** 未 故官供奉。 士,賜一品服。 有 撰青詞, 故。 也。 踰月遷 最 帝 稱旨。 禮 大喜,立擢 三十九年,復以供奉恩 部尚 三十 **雄性行** 害,加太子少保, 牌侍講 五. 年, 示 羈,爲御 閣 學士。 臣 推

累加 同。 遂 下 以 以 少傅爺 臣等不 代 父事天,以兄事日,羣陰退伏,萬象輝 先是二月朔,日食微陰,煒言不當救護。 山 太子 勝欣忭。」疏入,帝益喜。 及七月朔,又日食。 太傅、建極殿大學士。 曆官言食止一分五 其冬,逐命以戶部尚書兼武英殿大學士入閣典機務。 四十四年春,疾篤,請假歸, 華。 禮部 是以太陽晶明,氛祲銷爍,食止一分,與不食 尚書吳山 杪,例発救 不從,得譴去。 護。 牌 乃 阿 道卒,年五 帝意上疏言:「陛 帝聞煒言善之,

列

師,諡文榮。

貓 死,命儒臣 煒 才思敏捷。 撰詞 帝中夜出片紙,命撰青詞,舉筆立成。遇中外獻瑞,輒極詞頌美。 以醮。 **煒詞有「化獅作龍」語、帝大喜悅。** 其詭詞媚上多類此。 以故帝 帝畜

急枋用之,恩賜稠疊,他人莫敢望。

亦盡竄改之。 <u>伏</u>志,諸學士呈稿,煒竄改殆盡,不以讓階。 諸學士不平, 階第曰任之而已。 訥 不堪,以故人皆畏而惡之。 、郭朴及煒爲「青詞宰相」。 自 嘉靖中年,帝專事焚修,詞臣率供奉青詞。 煒自負能文。 見他人所作,稍不當意,輒肆詆誚。 而煒貴倨鮮淟,故出徐階門,直以氣凌之。 工者立超擢,卒至入閣。 館閣士出其門者,斥辱尤 與階同總裁承天 時謂李春芳、嚴 其後煒死, 階

考故事,爲書上之。諸吉凶大禮及歲時給賜,皆嚴爲之制。 如 大被帝眷,與侍讀嚴訥超擢翰林學士。尋遷太常少卿,拜禮部右侍郎,俱兼學士,直西苑 故。 李春芳,字子實,揚州興化人。嘉靖二十六年舉進士第一,除修撰。簡入西苑撰青詞, 佐理部事、進左侍郎、轉吏部、代訥爲禮部尚書。 時宗室蕃衍, 帝嘉之,賜名宗藩條例。 歲祿苦不繼。

太子太保。 四十四年命兼武英殿大學士,與訥並參機務。 世宗眷侍直諸臣厚,凡遷除皆出

特旨。春芳自學士至柄政,凡六遷,未嘗一由廷推。

廉 潔過之。 春芳恭慎,不以勢凌人。居政府持論平,不事操切,時人比之李時,其才力不及 時徐階爲首輔,得君甚。 春芳每事必推階,階亦雅重之。 隆慶元年春, 有詔修 也, 而

翔 鳳樓,春芳曰:「上新卽位,而遽興土木,可乎。」事遂止

爲拱逐,拱益 出其上,春芳不能與爭,謹自飭而已。 春芳愕然,三疏乞休,帝不允。 稱帝意。 擠,幾不発。 疏詆之,春芳求去益力。 師,進吏部 人言罷,春芳歎曰:除公尚 齊康之劾徐階也,語侵春芳。 贈太 時同 尙 師 書,改中極 一張,修階故怨。|春芳嘗從容爲階解,拱益不悅。 而 諡 列者陳以勤、張居正。 春芳歸,父母倚無恙,晨夕置酒食爲樂, 文定。 一殿,度拱輩終不容己,兩疏請歸養,不允。 賜敕乘傳,遣官護行,有司給夫廩如 ·爾,我安能久,容旦夕乞身耳。」居正遽曰:「如此, 旣而趙貞吉入代以勤,剛而 春芳疏辨求去,帝慰留之。及代階爲首輔,益務以安靜, 以勤端謹, 俺答款塞求封,春芳偕烘、居正卽帝前決之。 而居正恃才凌物,視春芳蔑如 鄉里豔之。 負氣。 故 時春芳已累加少師兼太子太 事 南京給事中王禎 0 及高拱再入直,凌春芳 父母殁數年乃卒, 年七 闥 一歲,拱復爲居正所 庶保令名。」 也。 希拱意, 會貞吉 始階以

孫思誠,天啓六年官禮部尚書,尋罷。 崇禎初,坐頌璫閒住。

封淮府,國變得不與。福王時,請追諡開國名臣及武、熹兩朝忠諫諸臣,於是李善長等十四 論其失策。以久旱請寬刑,忤旨,貶浙江按察司照磨。 思誠孫淸,字映碧。崇禛四年進士。 由寧波推官擢刑科給事中。 未赴,憂歸。 起吏科給事 熊文燦撫張獻忠,清 中。 俄出

,陸震等十四人,左光斗等九人,並得諡

春芳曾孫信,廣東平和知縣。 城破,與二子泓遠、淑遠同時死。

遷修撰,進洗馬。 意也。 大人何?」拱故爲謔語,以勤正色曰:「國本默定久矣。生而命名,從后從土,首出九域,此君 戶部,得幷給三歲資。 祿外,例有給賜,王亦不敢請。 陳以勤,字逸甫,南充人。嘉靖二十年進士。 故事,諸王講官止用檢討,今兼用編修,獨異他邸, 時東宮位號未定, 羣小多搆釁。 然世蕃常自疑, 積三歲, 邸中窘甚。王左右以千金賄嚴世蕃, 世蕃喜, 以屬 一日屛人語以勤及高拱曰:「聞殿下近有惑志,謂家 世宗於父子素薄,王歲時不得燕見。常 選庶吉士,授檢討。 此相意也。 **外之,充裕王講官** 殿下每謂首輔社

臣,君安從受此言。一世蕃默然去,裕邸乃安。

士,掌翰林院。 爲講官九年,有羽翼功,而深自晦匿,王嘗書「忠貞」二字賜之。父喪除,還爲侍讀學 。進太常卿,領國子監。 **擢禮部右侍郎,尋轉左,改吏部,掌詹事** 府

攬權、用人、接下、聽言。其言攬權、聽言尤切,詔嘉其忠懇。 穆宗即位,以勤 自以潛邸舊臣,條上謹始十事,曰定志、保位、畏天、法祖、愛民、崇儉

廣用 院議行贓吏一 所舉措,卒爲內侍所阻,疏亦留中。 殿。 穆宗朝講希御, 人,練民兵,重農穀。帝嘉之,下所司議。 隆慶元年春,擢禮部尚書兼文淵閣大學士,入參機務。累加少傅兼太子太傅,改武英 事而已。 政無所裁決,近倖多緣內降得厚恩。 四年,條上時務因循之弊,請慎擢 高拱掌吏部,惡所言侵已職,寢其奏,惟都察 以勤請勵精修政。 用, 酌久任, 帝心動,欲有 治贓吏,

罷。 勤與拱舊僚, 貞吉其鄉人,而居正則所舉士也, 度不能爲解, 恐終不爲諸 比,亦無私人,竟階與拱去,無訾及之者。及拱再入,與趙貞吉相 國門,歎曰三南充,哲人也。」以勤歸十年,年七十。 遂進兼太子太師、吏部尚書,賜敕馳 初,以勤之入閣也,徐階爲首輔,而拱方嚮用,朝士各有所附,交相攻。 傳歸,詔 其子編修于陛侍行。 復頒上方銀幣, 軋,張居正復中 後二年,拱被逐,倉 人所容, 力引疾求 命于陛馳歸賜之, 以勤 構之。以 中立無所

列傳第

八

+

陳以勤

且敕有司存問。 又六年卒。贈太保,諡文端。 于陛別有傳。

靖十四年進士,選庶吉士,授編修。 趙貞吉,字孟靜,內江人。六歲日誦書一卷。及長,以博洽名。最善王守仁學。 時方士初進用,貞吉請求眞儒贊大業。執政不懌,因

遣官宣諭諸將,監督力戰,退敵易易耳。」時帝遣中使瞷廷臣,日中莫發一語,聞貞吉言,心 戰,以輕 壯之,諭嚴嵩曰:「貞吉言是,第不當及周尚文、沈東事耳。」召入左順門,令手疏便宜。立 請急歸。 即復命。帝大怒,謂貞吉漫無區畫,徒爲尚文、束游說。下之詔獄,杖於廷,謫荔波典史。 謁嚴嵩。 擢 正殿、下詔引咎。錄周尚文功以勵邊帥,出沈束於獄以開言路,輕損軍之令,重賞功之格, 貢 左諭德兼監察御史,奉敕宣諭諸軍。給白金五萬兩,聽隨宜勞賞。初,貞吉廷議罷,盛氣 .則必入城,倘要索無已,奈何。」徐階曰:「君必有良策。」<u>貞吉曰:「爲今之計,</u>請至尊速御 俺答薄都城,謾書求貢。詔百官廷議,貞吉奮袖大言曰:「城下之盟,春秋恥之。旣許 其權,且不與一卒護行。 還朝遷中允,掌司業 嵩辭不見,貞吉怒叱門者。 事。 時敵騎充斥,貞吉馳入諸將營,散金犒士,宣諭德意,明日 適趙文華至,貞吉復叱之。嵩大恨。及撰敕,不令督

稍遷徽州通判,進南京吏部主事

職,今貞吉與左侍郎劉大賓廷推不及,是不職也,宜罷。」於是二人皆奪官。 吉曰:「督餉者,督京運乎,民運乎?若二運已有職掌,添官徒增擾耳。況兵之不練,其過宜 益怒。令都給事中張益劾應亮,調之南京,而改用僉都御史霍冀。 不在是,卽十戶侍出,何益練兵?」嵩怫然罷。 四十年遷至戶部右侍郎。廷議遣大臣赴薊州督餉練兵,嵩欲用貞吉,召飲示之意。貞 會嵩請告,吏部用倉場侍郎林應亮。 益叉言:「督餉戶部專 比嵩出,

部尚書。旣行,帝念之,仍留直講。 再謨稱旨,命充日講官。貞吉年踰六十,而議論侃直,進止有儀,帝深注意焉。 隆慶初,起禮部左侍郎,掌詹事府。穆宗幸太學,祭酒胡杰適論罷,以貞吉攝事。 尋遷南京禮 講人

燕如 失律,祖宗法具在。 任事,惟陛下主之。」帝益喜。會寇入大同,總兵官趙尚失事,總督陳其學反以捷聞,爲御史 加太子太保 宦所發。 三年秋,命兼文淵閣大學士參預機務。貞吉入謝,奏:「朝綱邊務一切廢弛,臣欲捐 貞吉欲置重罰,兵部尚書霍冀僅議貶秩。 今當事者屈法徇人,如公論何。臣老矣,效忠無術,乞賜罷。」不許。 貞吉與同官爭不得,因上言:「邊帥 饿

貞吉以先朝禁軍列三大營,營各有帥,今以一人總三營,權重難制。 傳 第 八 + 趙 貞 古 因極言其弊,請分

總督,權太重,宜三營各設一大將,而罷總督,以文臣爲總理。報可。 頗不然其言。延臣亦多謂强兵在擇將,不在變法。冀等乃上議三大營宜如故,惟以一人爲 五營,各統以大將,稍復祖宗之舊。帝善之,命兵部會廷臣議。尚書霍冀前與貞吉議不合,

貞吉。貞吉亦疏辨求去。詔留貞吉,褫冀官。其後營制屢更,未踰年卽復其舊,貞吉亦不 · 爭也。 俺答款蹇求封,貞吉力贊其議。 初,給事中楊鎔劾冀貪庸。帝已留冀,冀以鎔貞吉鄉人,疑出貞吉意,疏辨乞罷,且詆

當,忠邪不分,致蹇言路,沮士氣,非國家福也。」帝不從。拱以貞吉得其情,憾甚。 樹衆黨。」 疏入,竟允貞吉去,而拱握吏部權如故。 供欲去貞吉所厚者,貞吉亦持拱所厚以解。 道。貞吉與同事上言:「頃因御史葉夢熊言事忤旨,陛下嚴諭考覈言官,幷及陞任在籍者。 使,臣眞庸臣也。 僅以考察一事與拱相左。 爲憾也,嗾門生給事中韓楫劾貞吉庸橫,考察時有私。貞吉疏辨乞休,且言:「臣自掌院務, 應考近二百人,其中豈無懷忠報主謇諤敢言之士。今一以放肆奸邪罪之,竊恐所司奉行過 先是,高拱再入閣卽掌吏部。貞吉言於李春芳,亦得掌都察院。 若洪者,斯可謂橫也已。 其他壞亂選法,縱肆作奸,昭然耳目者,臣噤口不能一言,有負任 臣放歸之後,幸仍還拱內閣,毋令久專大權,廣 於是斥者二十七人,而拱所惡者咸與。 拱以私憾欲考察科 及考察, 拱猶以

張居正名輩出貞吉後,而進用居先。咸負才好勝不相下,竟齟齬而去。 貞吉學博才高。 然好剛使氣,動與物迕。 九列大臣,或名呼之,人亦以是多怨。 萬曆十年卒,贈少 高洪、

保,諡文肅

官。 殷 凡關君德治道,輒危言激論,王爲動色。遷右贊善,進洗馬,直論如故。 士儋,字正甫,歷城人。嘉靖二十六年進士。選庶吉士,授檢討。久之,充裕王講

節用,筋內外臣工講求民瘼。 書,掌詹事府事。 四時無輟,幷進講祖訓及大學行義、貞觀政要。帝嘉納之。 隆慶元年擢侍讀學士,掌翰林院事,進禮部右侍郎,未幾改吏部。 其冬,還理部事。四年正月朔望,日月俱食。 報聞。以舊恩,進太子太保。 時寒暑皆罷講,土儋請如故事, 士儋疏請布德、緩刑 明年春, 拜禮部尚 、納諫、

自甘州徙蘭州, 必得,士儋持之甚力。 薨,無子。 以將軍攝府事。 始世宗定宗藩條例,親王無後,以兄弟及兄弟之子嗣,不得以旁繼。 其大母定王妃請以輔國將軍縉燈嗣,禮部議縉燈實懷王從叔,不可承祧。 實內 及帝卽位,王妃復請,前尚書高儀執不可。 地。 帝以肅藩越在遠塞,不王無以鎭之,遂許縉熉嗣。 且請別選郡王賢者理府事,毋遂私請,壞條例。」而帝意堅不可奪。 **縉墳重賄中官,屬宗人爲奏,祈** 士儋爭曰:「肅府 嘉靖末,肅 詔許 懷王

列

|儋乃請封爲郡王,諸宗率以此令從事,帝終不許

定舊儀行之。十一月命以本官兼文淵閣大學士入閣辦事。 故事, 郊畢, 舉慶成宴。 自世宗倦勤, 典禮人廢。 帝卽位三載, 俄俺答封事成, 猶未 舉行, 進少保, 士儋始考 改武

士儋, 允。 故怨拱及四維 素善張四維,欲引共政,而惡士儋不親己,不爲援。 力,乃賜道 起,詬拱曰:「若逐陳公,逐趙公,復逐李公,今又爲四維 出 一儋指, 居正從旁解, 始土儋與陳以勤、高拱、張居正並爲裕邸僚、三人皆柄用、 士儋面詰楫曰:「聞君有憾於我,憾自 而 贈太保、諡文通。 拱 門生都給事中韓楫復揚言脅之, 益 里費,乘傳歸, 相 構。 四維父擅鹽利,爲御史郜永春所刻。 亦醉 御史趙應龍遂劾士儋進由 丽 **外之,改諡文莊。** 對。 有司 給廩 御史侯居良復刻士儋始 隸 如故 可耳, 士儋 事。 陳洪,不可以參大政。 家居十一年卒。 亦疑出拱指。 毋爲他人使。」拱曰:「非體 士儋遂藉太監陳洪 事已解,他御史復及之。 進 逐我,若能 不正, 故事,給事 士儋仍尚書,不能無望。 求 時居正垂沒,四維爲政, 常有 退不勇。 Ŧj, 此 士儋再辨 座 中朔望當入閣 取中旨入閣,以 耶。」奮臂欲 士 儋再疏請 洪、 上儋 求 四維 去,不 勃

疑

拱

怨

益

毆

然

會

將軍 會御史傅龍 缺,儀堅持 芝宮 林院。 臣,儀屢請。 合祀 乃會廷臣 一十萬 醴 縉 慣 請 襲 王 部 穆宗 專祀,當 隆慶二年正月饗太廟,帝將遣代,儀偕僚屬諫,閣臣亦以爲言,乃親祀 如 高 禮 洪 儀, 召爲太常卿 尙 部 武 即位 書。 議:天地分祀 不可。 字子象,錢塘 儀 以 制,御史張檟請易皇極諸殿名, 四年,每歲暮類奏四方災異,遇事秉禮循法,居職 力爭。 廢;孝潔皇后當祔 先帝 ,諸大典禮皆儀所酌定。 一爵,儀執不從。 時撰文叩壇事劾儀,儀四疏求去,乃加太子 ", 掌國 初, 不必改;既祭先農,不當復 人。 世宗崇道教,太常多濫 子 監 嘉靖 事 廟, 太子 0 二十年進士。 擢 別祀孝烈於 禮部 生七齡, 世宗遺命,郊社及祔享祔葬諸禮,悉稽祖制更定。儀 右侍郎, 盡復其舊,儀皆持不可。 儀疏請出閣, 、他所。 選庶吉士,授編 員, 所穀 改 儀奏汰四十八 吏部, 西苑"帝 帝皆報 帝命待十齡 教習庶吉 甚稱。 少保馳傳 可。 社 修。 、帝稷、睿宗 人。 旣 帝踐阼四月,未召 歷侍講學士,掌 引疾章六上,卒見留。 而 士。 歸 行 中官李芳復 寺卿陳慶奏供 之。 如禮。 匹 十五五 明堂配 詔 年代 慶府 取 南京 請 光 天 事乏 (與压 高 輔 對 祿 天 翰 銀 拱 或 地

列

傳

第

+

髙

僟

Ħ

閣 辦 事 歸 o 踰 年, 月 用 一个 高 崩 拱 預 薦, 顧 命以故官侍東宮講讀,掌詹事府。 命。 及拱為張居正 所 逐,儀已病,太息 六年四日 而 E 月 詔 未幾 兼 文 /淵閣 卒。 大學 贈 太子太 士入

保、諡文端。

(儀性 簡 靜 :,寡嗜慾,室無妾媵。 舊廬燬於火,終身假館於人。 及沒,幾無以殮。

損 美,繼登相位。 得発乎。 清譽。 顧鼎臣等雍容廟堂, 李時、翟鑾皆負才望,而 費宏等皆起家文學,致位宰相。 終明之世,稱岸、平者,數以勤父子。 可謂 變晚節 極 遭逢之盛。 不 振。 宏却錢寧,拒宸濠,忤張、桂, 貞吉負氣自高 而 陳以勤 天之報之,何其厚哉。 誠 心輔導, ,然處傾 軋之勢, 獻 再躓 納 良 再 多。 刨 起, 委蛇, 終亦 後賢濟 無 庸

校勘記

魯府鄒平王子當潩當襲父爵 當潤 原作「當漢」,據本書卷一〇一 諸王 证表、 明史稿表

王世表及傳七二費宏傳改。

與總督毛伯溫 議築五堡 五堡,原作「長堡」。據明史稿傳七二李時傳附翟變傳、世宗實錄卷二

八月甲午條、國權卷五八頁三六六〇改。

(三) 浦應麒 原作「浦應麟」,據明史稿傳七二李時傳附翟變傳、 世宗實錄卷二八九嘉靖二十三年

五一二九

明史卷一百九十四

列傳第八十二

喬宇 孫交子元 林俊 子達 張黻 金獻民 秦金 孫柱

趙璜 鄒文盛 梁材 劉麟 蔣瑤 王廷相

成化二十年進士,授禮部主事。 喬宇,字希大,山西樂平人。 弘治初, 祖毅,工部左侍郎。父鳳、職方郎中。 王恕爲東部,調之文選,三遷至郞中。 皆以淸節顯。 門無私謁。 宇登

擢太常少卿。

部左、右侍郎。 兵,習戰鬭,土木繁興,織造不息,凡十事。帝不省。久之,改兵部,參贊機務。 同列言視朝不勤,經筵久輟,國本未建,義子猥多,番僧處禁寺,優伶侍起居,立皇店,留邊 武宗嗣位,遣祀中鎮、西海。 劉瑾敗,大臣多以黨附見劾,字獨無所染。拜南京禮部尚書。 還朝,條上道中所見軍民困苦六事。已,遷光祿卿,歷戶 乾清宫災,率 以帝遠遊塞

列傅第

八十

__

喬宇

五二三二

而 監 國 無 人, 請早建儲貳。 帝將自擊寇,宇復率同列諫。 皆不

與濠 地 險易, 通 人,懸首江 未幾 為爲 置戍守。 ,寧王宸濠 預 伏 上。 死士。 綜理 宸濠失內應,且 反,揚言旦夕下南京。 宇刺得其情,詰瑯 周密, 內外宴然。 知有 備,不敢東。 用事者,瑯懼不敢動。 指揮楊銳有才略,署爲安慶守備。 宇嚴爲警備,而 攻安慶,銳固守不得下。 談笑自 宇乃大索城中,斬所伏壯士 如 0 時攜客燕城外,密察 鎭守中官劉 未幾敗 瑯

臣 府問 守備太監 三請 府 宇。 以宇言復,乃已。彬矯旨有所求,日數十至,宇必廷白之,彬亦稍稍止。彬欲譖去宇。 帝 回變,又自伏闕請。 至南京、詔百官戎服朝明年正旦。 王偉者,初爲帝伴讀,帝信之,每從 字曰:「守備者,所以謹非常。禁門鎖鑰,孰敢索,亦孰敢予,雖天子詔不可得。」都 駕旋、扈至揚州。 宇不可,率諸臣朝服賀。 中調護,故彬謀不行。 明年加太子太保。 論保障功,復加少保。 帝駐南京九月,宇倡諸 江彬索城門諸鑰,都督

與 名籍, 爲伯、 望治。 林俊、彭澤、孫交,皆海內重望,帝亦委任之。 世宗卽位,召爲 字不可。 與見供事 帝性剛 者不同。 無何,詔進壽寧侯張鶴齡爲公,封后父陳萬言爲伯,授萬言子紹祖尚寶丞。 好自用,宇所執漸不 吏部尙書。 點罰之有差,皆怨宇。 宇自爲選郎,有人倫鑒,及是銓政一淸。 見聽。 興府需次官六十三人,乞遷敍。 帝欲封駙馬都尉崔元爲侯、外戚蔣輪、邵喜 凡為權倖所黜者, 皆起列庶位,天下欣欣 帝求治銳甚。 宇言 1此輩虚 隸

驟,而 宇言:「累朝太后戚屬無生封公者,張巒亦歿後贈,今奈何以父贈爲子封。 子授尚寶非制。 願陛下守典章,以垂萬世。」帝並不從。 史道計楊廷和,宇言道挾私, 萬言封伯視巒更

遂下之詔

獄。

曹嘉助道劾字,宇求罷,帝命鴻

臚趨

視

事

宗來所未有。 天下萬世 帝廟 書,謫馬明衡、季本、陳逅,召張璁、桂萼、霍韜,舉措 則 大禮」者呂柟、鄒守益於獄。 干 宇遇 於大內,字等復連章諫。 正統,非所以 公議,內離骨肉,外間君臣,名爲効忠,實累聖德。 事不可,無不力爭,而爭「大禮」尤切。 乞令俊與書各仍舊職,宥明衡等,止璁、萼毋召。」尋復請罷璁、萼、書,而出 重宗廟,正名分。 特旨用席書爲禮部尚書,字又偕九卿言:「陛下罷汪俊,用席 及禮官請稱獻帝為 帝欲加興獻帝皇號,宇言加皇於本生之親, 乖違, 本生考,帝改稱本生皇考,又詔 人心駭愕。夫以一二人邪說, 且書不繇廷推、特出 內降,此 建獻 祖

皆出迎、舉手 字,字自以 責。 夫一 預其 宇遂乞休,許之。 會璁、萼至京,詔皆用爲學士。 間,即不 疾求去耳。」後明倫大典成,追論前議,奪官。 加 額日 爲淸議所齒。 馳傳給夫廩,猶如故事。 活我者,公也。」 況學士最清華,而 字等又言:「內降恩澤, 先朝率施於佞倖小人。 御史許中、劉隅等請留字,帝曰:「朕非不 俾萼等居之,誰復肯與同列哉。」帝怒,切 楊一清卒,宇渡江弔之。 南都父老 若士大 用

Щ 水,嘗陟太華絕 身殁,二妾劉、許皆從死。 宇幼從父京師,學於楊一淸。 頂。 遇虎,僕夫皆驚仆,宇端坐不動,虎徐帖尾去。 穆宗即位,復官,贈少傅,諡莊簡。 成進士後,復從李東陽遊。詩文雄 **售,兼通篆籀。** 家居澹泊、服御若寒 性好

初, 歲遣隆慶諸衞軍採薪炭。其後罷之,令歲輸銀二萬兩,軍重困。交奏免之。 卿,提督四夷館。 恕入吏部,薦授稽勳員外郎,歷文選郎中。居吏部十四年,於善類多所推引。 正德初,擢光祿卿。三年進戶部右侍郎,提督倉場,改吏部。 孫交,字志同,安陸人。成化十七年進士。授南京兵部主事,爲尚書王恕所知。弘治 大同有警,命經略黃花鎭諸邊。 增垣塹,廣樹藝,制敵騎馳突。 尚書張綵附劉瑾,交數規 遷太常少 永樂時,

交區 八年六月,中旨與禮部尚書傅珪並致仕。 以太平倉賜倖臣裴德,雲南鎮守中官張倫請採銀礦,南京織造中官吳經奏費乏,交皆力爭。 切。 畫適宜。 **綵怒,調之南京。 谨敗,召拜戶部尚書。時征討流寇,調度煩急,仍歲凶,正賦不足,** 四方告饑,輒請蠲租遣振,以故民不至甚敝,而小人用事者皆不便之。 []]言官多請留,不報。 帝欲

世宗在潛邸知交名,甫卽位,召復故官。 首請帝日讀祖訓,言動悉取準則,經筵日講 列傳第八十二 孫変

淸 寒暑 諫 靈 等 氣 勿輟 所 然 而 事 沮 止 涉 具 交言 帝 中 載 官者, 褒 皇陵碑 納 「宮府異 焉。 帝 亦 或議 不 事 同,令出 能 办 遷顯陵 盡從 止 也。 復反,非 武宗侈汰 天壽 嘗會廷 111 新 、之後, 交言 政 臣 所 議 Ľ Щ 宜 庫 發 一。不 內帑 藏 凌 殫 事 聽 給 虚 重, 軍 太祖 廩 交 裁定 官 欲 俸 逐仁祖 食, E 報 定 經 可 於 制 鍾 爲 Щ 宿 中 官 弊爲 慮 梁 泄

乞汰 馬 洲 九 數 --中 罷 行杜 官 如 九 中 三十七人,一 初 官 其 詔 監 侵耗。 且 侵奪 册 督 盡 得 倉場者,初 歸 公私 預 不從 欲 侵 守土 奪 盡 地 去之, 事,而 地。 無算。 止 數 報 安川 並臨清、徐 許。 人,正德 帝 卽 夤 叉論 位 緣 , 中 御馬 命 復 、 淮諸 增 留 故 至 十八 監內 五. 倉 交劾 + , 人,如 臣 五 . 宜 JII 人。 切 如 勿遣 弘 命如 祖 以交言罷 治 制 時 前 , 帝 毋 ō 詔 令自 監收 E 撤 復 正 今毋 過 傳 德 半,其 奉 # 更 , 至六十二人,交 並 加 上 後復 令戶 林 面 苑 已 漸 部 内臣 增 守珠 通 知 至

擅 地 房 + 地 答禁衞 舊籍 頃 錦 |交言:「先帝以||別房故, 貽 給 衣 多以 官。 豹房,餘令 百 戶 帝怒, 張 奏請投獻,數多妄報 瑾率校尉 逮下詔 百戶趙愷 支俸通 獄 等 謪 外 佃 禍 倉 也。 無窮。 如 , 交與林 故。 横 新籍 取 奉 洪等欲修 狼 俊、 少,以奉命清核,田多除豁 詔 藉, 上各宮莊 喬宇先後論 主 復 事 以開 羅 洪 田 載欲 數, 游 救, 獵 視 一按之。 之端,非 不納 舊 籍 不 也。」帝意稍解,令考 瑾紿請受杖,奏洪 御馬 同, 臣等所 帝 監 詰 閻洪 敢 公開。」 其故。 公乞外豹 詔 交 以 載

成、弘問籍以聞。

令子編修元侍行,有司時存問,給食米與隸,復賜道里費。卒年八十,諡榮僖。

所賜,吾敢奪耶?」 乎。與獻王素愛重凌,嘗割陽春臺東偏地益其宅。後中官言孫尚書侵地,世宗曰:「此先皇 交言論恂恂,不以勢位驕人。清愼恬慤,終始一致。初在南京,僚友以事簡多暇,相率

元,進士,終四川副使。 謹厚有父風。

考訊。 路久塞,兩人直聲震都下,爲之語曰:「御史在刑曹,黃門出後府。」尋以正月朔星變,帝感 湛。 事涉權貴,尚書林聰輒屬俊治之。上疏請斬妖僧繼曉並罪中貴梁芳,帝大怒,下詔 林俊,字待用,莆田人。成化十四年進士。除刑部主事,進員外郎。 後府經歷張黻教之,並下獄。太監懷恩力教,俊得謫姚州判官,黻師宗知州。 性侃直,不隨俗浮 時言 獄

悟,復俊官,改南京。

奪 俊 命焚之,得金悉以償民逋。 從子宣 弘治 |撫官,劫其印數年。 元年用薦擢雲南副使。 俊檄諭之,遂歸印。 又毁淫祠三百六十區,皆撤 鶴慶玄化寺稱有活佛,歲時集士女萬人,爭以金塗其面。 進按察使。 其材修學宮。干崖土舍刀怕愈欲 五年調 湖廣。 以雨雪災異上

恋 疏 、襄、德府故事,一切省儉,勿用琉璃及白石雕闌,請著爲例。 陳 時 政 得失。 又言德安、安陸建王府及增修吉府,工役浩繁,財費鉅萬,民不堪命。乞循 不從。

允。 巢,武請自効,悉擒賊黨。 儲, 江。 乞休,薦時中自代。不許。 減織造,清役占,汰亢員**,止工作**,省供應,節賞賜,戒逸欲,遠佞幸,親賢人。 又請豫教皇 怒,伺其 屢裁抑之。 因薦侍郎謝鐸,少卿儲瓘、楊廉,致仕副使曹時中,處士劉閔堪輔導。 乃更定要約,庶務一新。王府徵歲祿,率倍取於民,以俊言大減省。 十四年正月朔,陝西、山西地震水涌。疏述古宮闈、外戚、內侍、柄臣之禍,乞罷齋醮, 九 年引疾,不待報徑歸。久之,薦起廣東右布政使,不拜。 過,無所得。 王請易琉璃瓦,費二萬。俊言宜如舊,毋涉叔段京鄙之求,吳王几杖之賜。 會俊以聖節按部,遂劾奏之,停俸三月。 詔即以俊代邦問, 俊引朱熹代唐仲友、包拯代宋祁事, 力辭。 江西新昌民王武爲盜,巡撫韓邦問不能靖,命俊巡視。身入武 尋以母 。起南京右僉都御史,督操 寧王宸濠貪暴,俊 報聞。 已,屢疏

武宗卽位,言官交薦,江西人在朝者合疏乞還俊。乃進右副都御史,再撫江西,遭父

列

僔

騎出 其營, 莫能 賊遁 斬琯首,賊遂移江津, **猛發土兵,令** 彭世麟 及,復大破之。 敏等追敗之門鎭子, 憂不果。 入民家,焚之盡斃。 遇蔭兵, 譬曉利害, 做 所擒。 會保 E 德 副使何珊、李鉞等敗之去。 俊論功進右都 敗走。 寧 四 遂移師擊瀘州 賊 年 藍 起撫四 羅拜 逐擒廖惠。 廷 官軍乘勝進圍 分七營,將攻重 瑞 約 乘勝搗老營,指揮汪洋等中伏死。蔭復進,去賊十五]][鄢 降。 御史。 賊 本 眉州 淫雨 曹甫, 恕、廖惠等繼 而廷瑞奔陝西 甫 黨 人劉 失期, 之,俘及焚死者二千有奇。 慶。 且遣人招 捷聞 烈倡 方四亡命思南,三復攻南川、綦江 復叛去,攻陷 俊發酉陽 ,璽書獎勵 起, 亂, 西鄉,越漢中三十六盤,至大巴山。 諭。 敗而 勢益張, 《播州土兵助蔭,以元 | 甫佯聽令, 使弟琯 逃, ō 通 江 轉寇巴州 諸不逞假 俊擊敗之龍灘河,遣 已,本恕、廷瑞爲 其 名剽掠。 猝遇之華壟 劫 如故。 日拖 ,以窺瀘州。 里。 俊繪形 破其 永順 甫以數十 指揮李蔭 ,單輿抵 官軍 知府 (四營。 土 捕 追 張

於是俊 致仕 事吳景 俊 言官 戰 前 在 後被 歿。 軍 交請 ٠, 與總督洪鍾議 |緇慚, 切 責。 不報。 欲委罪俊, 比方四敗,賊 俊歸,士民 多左。 逐刻俊累報首 且盡,俊辭 中貴子弟欲冒從軍功, 號哭追送。 加 功, 秩 賊終不滅, 時正 及 賞,乞以舊職 一德六年十一 輒禁止。 加鑿 歸 井 月也 毁寺 御史俞緇 田 詔 逐僧徒,迫爲賊 不 許 走避 辭 談、聽其 一財,而愈

世宗卽位,起工部尚書,改刑部。 在道數引疾,不許。 因請帝親近儒臣,正其 心以出號

學故 令,用渾樸爲天下先,初詔所革,無遷就以廢公議。 事 以諫。 朝有大政,必侃侃陳論,中外想望其風 俊時年已七十,寓止朝房,示無久居意。 采。 旣抵京師,會暑月經筵輟講, 數爲帝言親大臣,勤聖學,辨異端 舉祖 宗勤

節

財用

帝憚其言直,乃不問 付推問者。文先朝漏奸,罪不容誅,茲復干內降。臣不忍朝廷百五十年紀綱,爲此輩壞亂。」 部治未決,而中旨移鎭撫司。修留不遣,力爭不納。 民 以 同 宫 罪,請斬以謝天下。 刑獄付法司,以緝獲奸盜付鎮撫。訊鞫旣得,猶必付法司擬罪。 田萬餘頃。 府異體也,乞下法司公訊,以昭平明之治。 中官葛景等奸利事覺,爲言官所糾,詔下司禮監察訊。修言內臣犯法,法司不得訊,是 皆不聽。 廖鵬、廖鎧、齊佐、王囐論死,屢詔緩刑,俊乞亟行誅。 中官崔文家人李陽鳳索匠師宋鈺賄不獲,這一嗾文杖之幾死,下刑 都督劉暉下獄,俊當以交結朋黨律,言與許泰 明日又奏,帝怒責陳狀。俊言:「祖宗 未有奪取未定之囚,反 叉劾谷大用占

俊 以耆德起田間, 持正不避嫌,既屢見格,遂乞致仕。 詔加太子太保, 給驛賜隸廩

如

舜 至宋理宗事凡十條, 俊 數爭「大禮」,與楊廷和合。 以上。 及「大禮」議定,得罪者或杖死。 嘗上言推尊所生有不容已之情,有不可易之禮 四年秋,俊從病中上書言: 因 「輯堯、

列

傳 第

復上書請懋學隆孝,任賢納諫,保躬導和,且預辭身後卹典,遂卒。 病待盡,無復他望,敢效古人遺表之意,敬布犬馬之心。」帝但下所司而已。 旣 但言送問而已。今一概打問,亦非故事。 令去衣,致末年多杖死。 臣及見廷杖二三臣,率容厚棉底衣,重氊疊裹,然 「古者鞭撲之刑,辱之而已,非欲糜爛其體膚而致之死 去者禮致,未去者慰留。 臣又見成化、弘治時,惟叛逆、妖言、劫盜 碩德重望如羅欽順、王守仁、呂柟、魯鐸輩, 自去歲舊臣斥逐殆盡,朝署爲空。 且沉臥,久乃得痊。 也,又非所以加於 下詔 年七十六。 正德朝,逆瑾 獄, 宜列置左右。 士大夫也。成化 始命打問, 叉明 乞聖明留念, 年, 竊權,始 疾革, 臣衰 他犯

辭 政諫,以禮進退,始終一節。 後 一年,明倫大典成,追論俊附和 隆慶初,復官、贈少保、諡貞肅 廷和, 削其官,其子達以士 禮葬之。 俊歷事四朝,抗

達,正德九年進士。 官至南京 吏部郎中。 工篆籀,能古文。

張黻 冰人。 成化八年 進 上。 歷知涪州、宿州, 介特不避權貴。 弘治中,俊蒙顯擢,

而黻老不用。王恕爲之請,特予誥命。

金獻民,字舜舉,綿州人。 成化二十年進士。 除行人。 弘治初, 選授御史,按雲南、順

天,並著風裁。出爲天津副使,歷湖廣按察使。

貴 叉 州 坐湖廣 按察使。 正 德 事 初 一,再下 劉 擢僉都御史、巡撫延綏、歷南京刑部尚書。 瑾 獄,罰贖 亂政,追坐獻民勘天 歸。 踰 年,又以瀏陽民劉道隆獄讞不實,罰米輸塞下。 津地不實,與巡撫柳應辰等檢繫詔獄,斥爲民。未幾, **|**蓮誅, 起

采納。 子 監 室 遷 世 四鎭軍務。 儒。 丘 百戶 一,其占主兵。 刑部尙書。 福 世宗卽位,召爲左都御史。 獻民先後執奏,帝皆不從。 、潘傑等死,詔官其弟姪錦衣。及司禮太監張欽死,以家人李賢承廕,賢死復欲官其 獻民性伉直,有執持,帝或不能從,卒無所徇。 比至蘭州,巡撫陳九疇已破敵,獻民再以捷聞。還京,仍理部事。 執奏奸黨王欽、 獻民因請敕天下鎮巡官預守戰之備, 王銓不宜貸死。 李鳳陽下刑部 土魯番速檀滿速兒寇肅州,命獻民兼右都御史總制陝西 ,程貴下都察院,皆改詔獄,獻民力爭。 皆不納。 且請用賢納諫,罷土木,屛玩好。 帝初卽位,盡斥先朝傳奉官。 尋代彭澤爲兵部尚書。 論功,廢錦衣 五星聚營 帝頗

禁例 ,陛下登極 衣 百戶愈賢,中官泰養子也,以中旨管事,諫官爭之。 有明 賢無公家庸,又非處子姓,猥以厮養竊名器,紊斁典章,不可之大 獻民言:「祖宗有 舊制,孝廟有

列傳

矣。誰生厲階,至今爲梗。望仍斥全等,以息人言,消天變。」言官任洛等亦以爲言,不聽。 宗法,竊爲陛下惜之。明旨不許夤緣管事,而奔競已成風矣;不許比例陳乞,而奏擾已踵至 百餘人,人心稱快。 獻民復奏曰「一令出惟行勿惟反。今以小人奏辨,一旦復官九十餘人,徇左右私,壞祖 獻民言:「全等足不履行陣而坐論首功,身不隸公家 會寧夏總兵官种勛行賂京師,偵事者獲其籍,獻民名在焉。給事蔡經、御史高世魁等 宜納諫官言。」弗聽。 萬一倖端再啓,則前詔皆虛,將來奏擾,有何紀極。」帝竟授全等試百 錦衣副千戶李全、王邦奇等以冒濫汰去,至是奏辨不已,下部覆 而躐躋顯秩。 陛下登極,汰去者三

議起, 初,贈卹如制。 獻民奉命專征,未至其地,掠功妄報,失大臣體,宜奪職閒住,削其世廕。 交章劾之,獻民因引疾歸。居二年,邦奇訐前尚書<u>彭</u>澤,詞連獻民,逮下刑部獄。 獻民數偕廷臣疏爭。 及左順門哭諫,又與徐文華倡之。 帝由此不悅,卒得罪。 詔 可。 初、一大禮) 法司劾 隆慶

秦金,字國聲,無錫人。 弘治六年進士。授戶部主事,歷郞 中。

正德初,遷河南提學副使,改右參政。 守開封,破趙錢於陳橋。 歷山東左、右布政使。

場 承 破 寇躪 砦 湖 蕩 八 後,與巡撫趙璜 -皆 餘 奏還之官 ,斬首二千 級 共拊循, 瘡 降 擒擒 盜 賀 福 璋、 全 及 **痍始起**。 羅大洪復 其黨劉 福 九年 叛 興等。 討 擢右副都御史, 平之。 錄 功,增 郴 俸 州 桂 巡撫湖廣 級, 陽 瑶 龔 廕 錦 福 衣 全 諸 世 稱 王府 王 百 戶 金 所 力辭 先後 據 Щ

得

請。

入

爲

戶

部右侍

郎

管莊 金 西 述 漢盛 祖 之人。」 世 宗 制 卽 以苑 請按 帝 位 稱 面賦 改吏 治。 善,即 貧民,今奈何 帝宥喜, 從其 言官 議 論金無人倫 命都察院禁如 剝民 以 念 鑑, In. 制。 復改戶部, 乞勘 中旨各宮仍置皇莊 正德間 轉左,署部 額外侵占 事。 , 一者,悉 遣 官校 外戚邵喜乞莊 歸 分 其主,而 督。 金言: 盡撤 田,

此 初 初 咸 煩 過 ",聽 貞 聽納 逐 舉 嘉 愼 宜召 庸 天 不 靖二年擢 下 名器不能 回,任 如 能 拭 天 流,朝請暮報。 加 目 和 耆 初 而 望至治。 舊。 南京 也。 如 災眚頻告者, 初 禮部 此 卽 也。 位 內閣 比來 尙 之初, 比來 即位 i擬旨輒· 書 多與詔 「一率諸 事 之初, 凡先 何 涉 也? 戚 中改,至疏 朝 臣 違,百司 畹、宦寺,雖 凡奸黨巨惡俱付三法司。 {詩 日 傷壓、乞陞等官,一切釐革。 上疏曰:「陛下繼統以來,昭德塞違,勵精 『靡不 問遵,萬民 清, 九 徒答溫語, ·有 卿 初, 執 失仰,此詔 奏, 鮮克有終。』陛下 科道 此任 比來輒下鎮撫, 一交章, 賢不 令不 比來 能 能 恩澤 皆曰『業經 如 如 登 初 初 極 過濫,封拜頻 也。 也。 圖 此謹 詔, 「治,動 有旨 卽 刨 國法 百 位 位 度 無 之

等言 太 非 右 下 神 地 不 設 阿 必 不 能 操 之鐏 而 能 齌 如 逐寢 此 外 獨 醮, 初 如 術 廷不 實移於下矣。」章下禮部,尚 運 初 也 此崇 前 而 也。 也。 틴。 詔 知 卽 正道不能如 股肱有? 也。 夫初 此 位 不則宮府之勢隔 之初 'n 惟 政所以 民 政 漢不 託,耳目 ,首命戶部減馬房糧獨之半,且令科道官備 不 初也。 可 清 能 明 如初 7有寄, 日不 者, 卽位 而 也。 信任 書汪俊力 政 在 卽 之初,精 朝 出 即位之初 主威 有所偏 公朝, 廷, 重於九鼎, 、勸帝採納、報 惟 明充盛。 權 ,婦寺之情親而 而左右 造遣 不 可 斥法王、佛子 不 國 比來聖躬 日 預 聞 勢安於 移於 也; 聽受有所蔽,名曰 今政所 左右。 泰山。 覈馬 弗豫,天顏未 國 師 數。 以淆 所謂 禪 自古帝王制御天 功 師 溷者, 政 因 在 復,此 太 比 總攬,而 朝廷者, 、監閣 政 來 嗇精 於禁 在 洪 左

等條 珠 珩 海 莊 以 張 廉 六年春以考察自陳致仕,馳驛給夫廩如制。 地 尋 金皆: 後 璁 就 賜 IE 建 爭 自 魏 改 1執奏, 持。 。金等復以爲言,始報 國 兵 議 之非。 部。 公徐達者,達卒仍 在 不聽。 戶 孫交去,召爲戶部 部 及 ,尤孜孜為 上聖母册, 奸人逯俊等乞兩淮 歸之官,定國公光祚請之,金執 許。 國 金及趙璜等復不 尙 內府諸監局軍匠至數千 書。 永福長公主乞寶坻、武清地 鹽引 帝欲考興獻帝, 歸五年,薦者不已,乃起南京戶部,疏陳利 三十萬,帝許之。 至, 帝 頻詰讓 金偕廷臣伏闕爭,又與何孟春 人,中官梁諫請 不可。 一,以金 金力爭不可,積 金爲 給 4 言頗減。 人樂易。 ·中黃重、御史張 下部採金玉 撫寧、山 失帝旨。 及居官,

老。 民六事。 居 數月,加太子太保,改南京兵部。 尋召爲工部尚書,加太子少保。 踰 帝與張孚敬、李時評諸大臣,以金爲賢, 歲致仕歸。 二十三年卒,年七十八。 贈 少保、諡 類嫌其

端魰。

外。 吳中行 孫柱,以諸生授中書舍人。大學士高拱得罪,倉黃去京師,門生皆避匿,柱獨追送百里 疏論張居正奪情,被杖下詔獄。 柱挾醫視湯藥,遂忤居正,遷魯府 審理。 尋假

考察罷之。

登弘治三年進士,授工部主事。 趙璜,字廷實,安福人。少從父之官,墜江中不死。 改兵部,歷員外 郎 稍長,行道上,得遺金,悉還其主。

而 代之。 出 爲 漢庶人牧場久籍於官,募民佃。 濟南知府。猾吏舞文,積歲爲蠹。 德王府奏乞之,璜勘還之民。閱七年,政績大 」 」 」 環 握 原 民 教 之 律 令 , 得 通 習 者 二 十 餘 人 , 逐 **支**

正德初,擢順天府丞,未上,劉瑾惡璜,坐巡撫朱欽事,逮下詔獄,除名。 **瑾誅,復職。**

著。

部 齋 遷 右 糧 右 侍 愈 帝 郎 都 許 御 總理 之, 史, 璜 巡 河 道 力 撫 爭 宣 得 府。 以邊警 趸。 尋 改理 調 曲 山東。 阜 一畿輔 爲 賊 破,闕 戎 河灘 備 地數百里,賦流民墾而除 里 事定, 林 廟 命振 在 曠 順 野,璜請 天諸府 移 饑,還佐部 縣就 其租 闕 里,從 番 事 僧 乞徵 以充 擢

世 宗 卽 位 ,進左侍 郎, 掌部 事 0 裁宦官賜葬費及 御 用監料價,革 內 府酒醋 麵 局歲徵 鐵

値 逐 臣 謂 宮 尺, 甎 誼。 **六**十萬, 枫 價 旣 書許還民,官不當自鬻,劾璜。 銀 諫 嘉 而 靖 歲 官 帝 中旨 責 鉅 元 璜持 甚損 救踵至,萬言不自安,再請貸。 鵬翰黨庇景嵩,竟斥。 年 萬 璜 令仍舊。 進尙 、國體。 之。 因 請 書。 萬言愬於帝 與石景 尚書 璜言詔 劉 瑾 1彭澤復奏僑 Щ 創玄明宮,糜財數十萬,瑾死,奸人獻爲皇莊。 諸房 下 ,下郎中、員外二人韶 數月 其同 舍並斥賣以資用,可無累民, 璜疏 而 官陳江 非是,僑 忽更,示天 辨,并發景嵩 二人獲釋,工 亦 再辨,帝 以劾璜 下不信, 獄 他 事。 兩 被責,求去。 磺言"「二臣無與,乞罪臣。」 帝不 解之。 亦大減 帝卽 御 史張鵬翰

帝

可之。

給事

中徐景嵩等

言璜摭言官,無大

報

許。

會方修仁壽、清

寧

帝卽位,斥以予

同, 帝納其言。 頻陵 司香內官言陵制 帝欲遷顯陵,璜不可,乃寢。 狹小,請 改營。 視天壽· 韶建玉德殿,景福、安喜二宮,璜請俟仁壽 Щ 諸陵。 璜言陵制與山水相稱,難概

價

詔營后父陳萬言第,估工

給事

中章僑言璜一

舉

聽

其

後

論

陝西 宮 成, 督織 徐議其事,帝不許。 造 皆遣 中 使,璜 皆疏爭。 頃之, 以災異申前請, 營建 世 廟, 中 官 帝始從之, 幷罷仁壽役。 所 派 物 料, 戶 部 多裁省 江西建眞 帝以問 、人府, 璜 璜

言曩造乾淸、坤寧兩宮所積餘貲,足移用,帝遂報可。

嫉 者 课, 璜 為尚 帝意亦 ·書六年,值帝 寖疏。 璜 素與秦金齊名。 初政,銳意 釐剔 中官不敢撓, 考察自陳,與金俱致仕。 故得 舉其 職。 廷臣乞留,不 後論執不已, 許, 諸權倖 馳驛給

官, 未上卒。 璜 有幹局,多智慮。 贈太子太保,諡莊靖。 事棼錯,他人相顧愕胎,璜立辦。 旣去,人爭薦之。 十一年召復故

夫

凜

如

故

事

廖玘,四文盛偕郎中楊茂仁勘實其罪,謫長陵 鄒 文盛,字時鳴,公安人。弘治六年進士。 司香。 除吏科給事中。 杂顏三衞屢擾 遼東巡撫韓重劾鎮守中官 邊,文盛還奏制 馭 六

策。尚書劉大夏深善之,下之邊吏。

田 州 之干城,參政 尋出 竅 邴 廣 糧儲。 武清受濬重賂,以計殺蠻釀成禍亂。 思恩土官岑濬與田州岑猛搆兵,文盛言:「田州廣西之藩蔽, 制敕房供事參議岑業,濬懿親,爲彌 李蠻

列

傅

第

縫 於 中 漏 我 機 事 請 先誅 二人,而 後行 討。」業 有 内 、援,帝 不 聽。 清 尋以 考察 罷

潮 播 斬 遂 乃 州 旁 巡 1-罪,不 擒 雙戰 兵擣 等 州 含 降 撫 ·無算。 重安 據 BnJ 貴 正 督宣 旁 酸木 州 德 樓 香 敍。 馮 與 協 初 一慰楊斌 餘 綸 崖 砦 清平: , 錄 Щ 頃之,改蒞南京 賊 歷 功, 與 齊 擒阿 興隆 虚 戶 凱 苗 , 乘夜 增俸 撫定之。 平。 科都給 里楊 阿旁、 革。 偏 雨附崖登, 等, 弘 移師 橋、平越、新添 阿階 川、湖兵至,抵 有怨。 事 請復設安寧宣 中, 称察院 討平龍頭 廕子錦衣 归 出 弘卒 革稱 拔栅 爲保定 , 王,巡 焚廬含。 龍 編糾 都黎 世 Щ 里諸衛 知 H 下 撫司 諸苗 戶 撫 府,累遷 都蘭 Щ 一門祥 , 壁 賊 以弘子 力 成被 相 奔後 立 解発。 **警殺** 都蓬 調 福 以其患。 永 惟小 建左 Щ, 襲,而錄潮 順 侵帙 密西、 芒部 據絕 徑五 布 保靖 文盛 貴州 政 頂。 大支、 陳聰等 , 使。 上兵討之, 至 賊皆樹 境。 功。 官軍 一,橡 馬羅諸 -[-爲 文盛遣 Щ 尙 亂 乘間 棚 書王 年 湖 尋被 討 以 **砦黑苗** 梯 仰 兵 多議 被之。 瓊 右 籐 攻 協 劾 以 副 木 不 剿 蔡潮 專 龍 都 一以遺 以 能克, 擅 先 御 几 上, 爲 史 詣 JII 後 [37]

書秦金四 金 、趙璜咸稱長 世 宗 罷,召文盛 卽 位,召爲戶部左、右侍郎 者。 代之。 歲餘,以年至,再疏乞歸。 首疏鹽政、錢法 遷南京 + 右 事 卒贈太子 都 御史, 文盛 爲 就改戶 少保、諡 入廉 謹 部 莊簡 ,踆踆若 尙 書。 嘉靖 1無能。 六 年,戶部尙 與 孫交、秦

梁材,字大用,南京金吾右衞人。 弘治十二年進士。 授德清知縣,勤敏 有異政。

畫 之法。 正 德 初 遷浙 遷刑 江 部主事, 右參政,進按察使。 改御史。 出為嘉興知府,調杭州。 鎭守 中官畢眞與宸濠通,將舉城 田 租 例 一參差 派應之。 材 為酌 材 與巡按張 輕 重,立

縉劫持眞,奪其兵衞。尋以憂去。

鏌 御 右 史訝 也 布 政 嘉 使。 其輕,材曰:「如是足矣,急之變生。」諸酋衷甲待變,聞無他廼止。 靖 初, 吏民輸課, 起補雲南。 令自操權衡,吏不 土官相讐殺累年,材召其酋曰:「汝罪當死。 得預。 時天下布政使廉名最著 今貰汝,以牛羊贖。 者 歷貴 二人,材與姚 州、廣東左、

端 兩, 份 中官麥福請盡徵牧馬 三事,其他皆嚴爲節,帝悉報可。 書。 而 六年 宗藩,二武職,三宂食,四宂 所出至二百四十萬。 自外僚登六卿,不滿二載。 拜右副都御史,巡撫江西。 草場租,材不可。 加催徵不 費、五 惟武 自 以受恩深,益盡職。 甫兩月,召爲刑部左侍郎。 前,邊費無節,凶荒又多奏觅, 侍郎王軏清勳戚莊田、言宜量等級爲限。 職別住 通負。 者議停半俸, 帝不納。 乞集 廷臣計畫條請。」於是宗藩、武職 上言。「臣考去年所入止 尋改戶部, 逐代鄒文盛 國計 經費大省,國用亦充。 安所辨。詳求弊 材奏「成 一百三十萬 各議上 爲

敢妄 史 之。 周 郭 班 清 弘 自 禄 丈。 化 乞。 特 有 言 賜 士: 帝 天 畿 外 田 悉可 輔 下 量 楡 土 屯 存 由 之。 田 田 三之一 田 視 , 御 出 或 史督 初 以 非常 减 理, 半 供祀 禄 , IE. 外 宜 事 通 統 復 o 行 間 有 帝 土田。 清 易 命並 丈。 以 僉 清 事 今勳 材 已賜 恐 權 紛 戚 者, 輕 擾 祿已踰 , 額 屯 請 外侵據 政 但 分, H 敕 弛。 所 而 悉還之民,勢豪 陳 司 材 清 乞 請 動 釐 仍 千萬, 籍 用 御 難 稽 史。 請 家 者 乃 申 始 不 禁 御

履

畝

而

勛 責 言 得 例 材 益 外 非 議 故 解 母 竟 開 事 發 喪 如 事 又累 去 勛 例 如 1,下戶、兵二部行 奏。 所請,當歲費 服 萬,較昔已數倍。 除 勛復 起 建 故官。 言三事 銀四十 之。 大同 日 請 ·五萬; 時 益 巡 開 一月增, 修 **漁無樊繼** 礦 建 且 助 冬衣 兩 工 太倉銀 宮、七 祖詩益 餘 例 鹽 取 陵,役京 不 盡輸 軍餉, 內 足供 .]庫 邊,漕 , 一鎭, 材言:「大同歲餉七十七萬 非 軍 七 部 卒 萬 事 得 無論 o 郭 攜 勛 貨物 勛 九 怒, 請 邊 也。」繼 劾 給 材 材 月 糧 議,不盡行, 悞 冬衣。 公。 祖 數請 有奇, 帝詰 材 不

守莊 等 事 4 H 者, 奪 周 材 俸 珫 初 令有司 所 爲 戶部 材 劾 由 納租 下 信,值 此 吏 失帝 帝 於王, 部 勤政,力祛宿 意。 尙 報可 書許讚等請 考尚 o 書六年滿, 王奏不便, 弊, 留之。 多見從。 遂令致仕。 帝不 帝又從之。 及是屢忤 悅, 令與 初, 材 權倖,不 材俱 徽 已去,侍郎唐胄等執初 王 一字莊 對 得 狀。 志,乃乞改南。 者與佃 材引罪得宥, 人訟,材 詔 請車 而 爲 帝 讚 給

大怒,幷責材。 令以右侍郎閒住,而奪冑俸,下郎官詔獄

進,帝 材,帝 端 掌 用,不 六千人。 兼掌 國 計 刑 明 命補 銜之。 宜 、砥節 年,戶 部 藉 郭勛 事 給。 口 部 耗 守公如 遂責材沽名誤事,落職閒住。 籍其不至者,責輸銀雇役, 帝歎曰:「尚書得如材者十二人,吾無憂天 國 勛又以軍不足、籍逃亡軍布棉折餉銀募工。 尙 書李 「儲。」帝從 日,帝眷 廷 相 其奏。 罷。 亦甚厚。 帝念村廉勤,大臣亦多薦者,乃召復故官,加太子少保。 勛 益怒,刻材變亂 其秋,考察京官, 廩食視班軍。 歸, 旋卒, 舊章。 年七十一。 下矣。」大工 廷相嘗量給之,材堅持 特命監之。 材言: 先是,醮壇須龍涎香 隆慶 「今京班軍 頻興,役 有大獄 初, 贈太子太保, 外 四萬餘, 不能決, 衞 不 ,材不以時 子。 班 軍 已 叉命 勛 四 足 刻 萬

宗乃歎 當嘉靖中歲,大臣或阿上取寵,材獨不撓,以是終不容。 曰:「材在,當不至此。」 自材去,邊儲、 國用大窘。

世

稱「江東三才子」。弘治九年成進士。 麟,字元瑞,本安仁人。 世爲南京廣洋衞副千戶,因家焉。續學能文,與顧璘、徐禛 言官龐泮等下獄,麟偕同年生陸崑抗疏救。 除刑 部主 卿

列

事,進員外郎。錄囚畿內,平反三百九十餘人。

糧 士 五. 儲 隱 民 醵 IF. 金贐 德 都 **蓮誅**, 御 初 史 不 進 鄧 受, 起補 郎 璋 爲 中 督 西安 建 師 出 小 爲 劉祠 議 遭 紹 加 父 興 赋 以 府 憂,樂吳興 充 配 知 餉 漢 府。 劉 麟 竉 力 劉 Щ 因 瑾 水 寓 銜 奉父 鹏 會陝民詣 初 不 州 柩 謁 「葬焉) 謝,甫五 與 吳琬 闕 愬 遂 月, 得 施 居 湖 侃 寢 摭 州 、孫 前 孠 錄囚 一元、龍 遷雲 起陝 細故 南 西 霓 按察使,謝 左參政,督 爲「湖南 罷爲民。

病

歸

奏之。 物 衣 因 中 上 節 悉 履 諭 小 嘉靖 吳勳 貯 錦 戶 愈 財 部 後 請 怨 + 衣 堂 捐 初 四 以 帥 中 爲言 事,汰 會 大 天 駱安 外 召拜 津三衛· 帝 庫, 軍 一、逐動 納 前 援 內 司 太僕卿。 諫官言,停 府 官 紅 未給者, 屯 麟致仕 諸 盔 出 田 監 軍 納 課, 例 多 進右 局 悉補給之。 一侵漁 冒 中 以 及 外 請 破 副 久 出 之, 錢, 雜 **|勝請特** 都御史, 庫 麟執 派 儲 顯陵殿閣 中 工役,麟牒停浙江 給 貴 不可。 117 河 除 大 引 巡撫保定六府。 間三衞 恨 ___ 疾歸。 郞官主 雨漏 詔 及顯 量 軍月餉 ", 追 論 給 起 陵 之。 大 銀 一、蘇、松織造,而 工竣,執役者 自 理 麟 , 帝稱 製, 卿, 呈 中官 落職 拜工 徵 善, 後 耿 五 逋 忠守備紫荆多縱,麟 因 部 載 課 成號官。 賜 一給為 以償 尙 上供袍 名節 書。 皆 侍衞 愼 常 服在停中。 麟 報 庫」。 止 可 軍不給 四 擬 司 賚, 已, 財 劾 帝

鹏 清修直節 ,當官不撓。 居工部、為朝廷惜財謹費、僅踰年而罷。 居郊外南坦,赋詩自

娛。 能 搆 守為築一臺,令為搆堂,始有息游 懸 籃 奥於 (梁) 曲 臥 其中,名曰 神樓。 之所。 文徵明繪圖遺之。 家居三十餘年,廷 年八十七卒。 臣頻論 薦。 贈太子 晚好樓 少保, 居,力不 謚

清

惠。

稱 事 有 是, 語問 行伍 瑶,字粹卿, 內 安得 且. 言 府 不 軍 自今如瑶議者,毋 器 「耗。」弁言:「傳奉官及濫收校尉勇 局 歸安人。 軍匠 一六千,中官 弘治十二年進士。 覆奏」。 監督者二人,今增至六十餘 授行人。 元士並宜 釐 正德時,歷兩京 革。 劉 人,人占軍 連雖 誅 御史。 權 匠三十。 猶 在 陳 宧 時 他局 弊七

諸 北 以 賜 進, 狩,此花 鲖 嬖倖皆怒。 得已, 瓜 尋 日.一口 不爲 出 爲 庫 爲獻 已絕,今無以獻。 荆州 懾 無錢,臣 江 Ŧi. 彬欲奪富民居爲威 知 會帝漁 百疋。 府。 一所有惟 築黃潭隄。 獲一巨魚,戲言直 當是時, 叉傳 此。」帝笑而 旨徵 權倖以揚繁華,要求無所不至。 **武副** 調 揚州。 異物,瑤具對 將 遣之。 五. 軍 府 百金,彬卽界瑤 武宗南巡至揚,瑤供御取 府故有瓊花觀,詔 ,瑤執不可。 非揚產。 帝曰:「苧白布 責 彬 (共直。 閉 取 瑶空舍挫 微瑤,民 瓊花。 瑤懷 具 而已,無所贈遺。 且 ,亦非揚產耶? 瑶言自宋徽、欽 其妻簪珥、桂服 辱之,脅以帝所 重困。 駕旋,

.ÿi

瑶 扈 至 籫 應 中 官 丘 得 用 鐵 **絙緊瑶,數日始釋**, 竟扈至臨淸而返。 揚 人見瑤,無不 威泣。迨

遷陝西參政,爭出貲建祠祀之,名自此大震。

與王 留, **令瑤歸** 時 嘉靖 中 席在外,命移殿內,而 初,歷湖廣 候 調。 已,累遷工部尚書。 、江西左、右布政使,以右副都御史巡撫河南。 移皇親於殿右 四郊 工竣,加太子少保。 以讓瑤,日:「親親 不如 西苑宮殿成,帝置宴。 帝命桂萼等覈巡撫官去 、尊賢。」 其重瑶如 此。 見瑤

老 仍, 部 致仕去。 尚書,召改北 歲募民 時 土木繁興,歲費數 充役,費 部。 二百餘萬。 帝幸承天,瑶扈從。 百 萬計。 瑶以爲言, 瑶規 畫咸稱帝意, 京師 因請停不急者。 營建,率役京軍,多爲豪家占匿。 數有齊予。 豪家所匿 以憂去。 軍畢出,募直 久之, 自南京 至是大工頻 一大減。 以

八十九。 **瑶端亮清介。** 贈太子太保、諡恭靖。 旣歸,僻處陋巷。 與尚書劉麟、 顧應祥輩結文酒社,徜徉峴山間。

卒年

以憂去。 王 廷 正德初,服闋至京。 相,字子衡,儀封人。 劉瑾中以罪,謫亳州判官,量移高淳知 幼有文名。 登弘治十五年進士,選庶吉士,授兵科給事中。 縣。

列傳第八十二 王廷相

學校,逮繫詔獄,謫贛楡 矣。」帝切責總督諸臣,悉從其議。 津,使不得西,分 宜,退却者 盜 賊 所至, 召 爲御史,疏言:「大 必 鄉民 斬。 奉牛酒, 扼井脛、天井, 使不得東, 河南 地 丞。 平曠 甚者 、盜四起、將帥 屢遷 ,賊易奔,山 爲効力。 四 已,出按 JII 未能 **愈事,山東** 盜 西 有 而主 平。 陝西,裁抑鎮守中官廖堂 地 生 險 殺 一將以 由將 權 副 阻 使,皆提督學校。 大軍蹙之, 權輕,不 亦 而 縦 將 深 帥 入, 反 能 無之, 禦敵 則賊 將帥 一,被 進退皆窮, 故 兵機 罪 兵不 誣 也。 疏 若陳兵黃河 不 用 時已改督京畿 命。 可 能 不 扼 宜假 鹼 戰 之 擒 便

守備 保。 禄。 草場、蘆課銀率爲中官楊奇、卜春及魏國 解 大勝 鵬 新江 太監 舉 三月入為 尋召 嘉靖二年舉 ·兵柄 賴義 理 、浦子、江淮 院 復 左都御史,疏言南京守備權 事 水增 治 歷兵部左、右侍郎,遷南京 行 卓 五關守臣藉稽察権 廷相 異, 請酌 再遷山東 物 輕 重 右 以 布 公徐 大重, 利, 定 政 船 兵部 使。 鵬 安慶、九江 數, 舉所侵蝕。 不宜令魏國 尚書, 以 丽 右副 大減宣德以後傳旨 藉 參贊機務。 都御史巡撫 春秋閱 以 世官 廷相 視索賂 請, 給事 初 四川 逮問奇、春, 有詔,省進貢快船 中曾忭亦言之,遂 非 , 廷相 祖 討平芒部賊沙 制 皆請革之。 者。 奪鵬 龍 舉

Щ 陵 樹,巡按 居 二年,加 楊 兵部 紹 芳引 尙 盜 書兼前 大祀 神 官,提督 御物 律 惠 斬 營,仍 廷 相言:「大祀 理 院 事。 兩 神 考滿,加太子 御 物 者 指 少保。 神 御在 畿民 內祭器 盜 帷帳 天壽

之物 則白日之玃。 「人事修而 將幸承天 以刺尚書嚴嵩、張瓚輩。帝但諭留而已。 而言。 後天道順,大臣法而後小臣廉。今廉隅不立,賄賂盛行,先朝猶暮夜之私,而今 廷相與諸大臣諫,不納。扈從還,以九年滿,加太子太保。 律文盜陵木者,止杖一百,徒三年。今舍本律,非刑之平。」忤旨,罰俸一月。 大臣汚則小臣悉傚,京官貪則外臣無畏。臣職憲紀,不能絕其弊,乞先罷斥。」 雷震奉先殿,廷相言:

奏列, 職 甚重。 初,廷相請以六條考察差還御史。帝令疏其所未盡,編之憲綱。 及新所定凡十五事以進,悉允行之。及九廟災,下詔修省,因敕廷相曰「御史巡方 卿總憲有年,自定六條後,不考黜一人,今宜痛修省。」廷相惶恐謝 乃取張字敬、汪鋐所

用

勛 劾 鳳 者羣起。 廷相徇私慢 來等論權貴奪民利,章下都察院,廷相檄五城御史覈實,遲四十餘日。給事中章允賢遂 廷相掌內臺最久,有威重。 勛復以領敕稽留觸帝怒,下獄。 上。 帝方詰責,而廷相以御史所覈聞,惟郭勛侵最多。 督團營,與郭勛共事,逡巡其間,不能有所振飭。 責廷相朋比阿黨、斥爲民。 帝令勛自奏,於是劾 越三年卒。 給事中李

所 論駁,然其說頗乖僻。 相博學好 議 論 ,以經術稱。於星曆、輿圖、樂律、河圖、維書及周、邵、程、張之書,皆有 隆慶初,復官,贈少保,諡肅敏。

時爲之歟。 無瑕尤,於前人亦不多讓。 公,懇懇廷諍,意在杜塞倖門,裨 喬宇守南京,從容鎭靜,內嚴警備,可謂能當大事者矣。 蔣瑤爲尚書,功名損於治郡,王廷相掌內臺,風力未著,是殆其 益 國 是。 雖得君行政,未能媲美蹇、夏, 觀字與孫交等砥節奉 要其清嚴不苟, 行

校勘記

- [1] 八年六月中旨與禮部尚書傅珪並致仕 實錄 卷一 0 正德 八年六月辛亥條改。 六月, 原作「五月」。 據本書卷一一一 七卿年表、
- _ 甫黨方四亡命思南 係 長官司、屬湖廣 施州衛軍民指揮使司,位於南川 思南, 原作「恩南 」,據武宗實錄卷七九正德六年 、綦江、瀘州 東 北。 九月乙丑條改。 作「恩南」誤。 按思南
- = 中官崔文家 靖二 年閏 四 人李陽鳳索匠 月己未條同。 師宋鈺 本 ·書本卷金獻民傳及卷二〇六劉世陽傳附趙漢傳作「李鳳陽」。 賄 不 獲 李陽鳳, 明史稿傳七三林俊傳、 世宗實錄卷二六嘉
- 23 劾鎭守中 月癸卯條都作「梁玘」。 官廖玘 廖玘, 本書卷一八四楊守陳傅附楊茂仁傳、 孝宗實錄卷一九〇弘治十五年

ヘミし 請捐天津三衞屯田課及出庫儲給河間三衞軍月餉 傳改。按劉麟巡撫保定等六府,河間府居其一,其事權不涉及河南都指揮使司之河南等衞。作 河間,原作「河南」,據明史稿傳七三劉麟

「河間」是。

明史卷一百九十五

列傳第八十三

王守仁 冀元亨

王守仁,字伯安,餘姚人。

書,坐事罷。旋以會典小誤,降右侍郎。 陳甚切。 度,在講幄最久,孝宗甚眷之。李廣貴幸,華講大學衍義,至唐李輔國與張后表裏用事,指 父華, 字德輝, 成化十七年進士第一。授修撰。

弘治中, 累官學士、少詹事。 帝命中官賜食勞焉。 正德 初,進禮部左侍郎。以守仁忤劉瑾,出爲南京吏部尚 **谨**敗,乃復故,無何卒。 華性孝,母岑年踰百歲卒。 華有器

名守仁,乃言。年十五,訪客居庸、山海關。 守仁娠十四月而生。 祖母夢神人自雲中送兒下,因名雲。五歲不能言,異人拊之,更 時闌出塞,縱觀山川形勝。 弱冠舉鄉試,學大

華已年七十餘,猶寢苫蔬食,士論多之。

八十三 王守仁

列

傳第

五一五九

進。 守仁 顧 益 條 好 言 事 兵 上之。 且. 善 尋授刑 射。 登弘治 部 主 事 十二年進士。 0 決 囚 江 北 使治前 引 疾 歸 威 寧伯 起補 王 兵部 越 葬 主 燙還 事 而 朝 議 方急 西北

棲守仁 考功 謫 貴 郎 例 IE 中 德 酯 **蓮談**,量∶ 液灌 場驛 元 年 南京 冬 丞 太僕少 劉瑾 移廬陵知縣。 龍場萬 逮南京 卿 山叢 就 給 遷鴻 薄 入覲 事 古 中 臚 御 僚雜居。 卿 遷南 史戴銑 京刑部、 等二十餘 守仁 主 因俗化導, 事 , 人。 吏部 守仁抗章教,瑾怒,廷 尙 夷 書楊 八喜, 清改之驗 相率伐 木爲 封。 杖四十, 屋 屢 一,以 遷

隸 蜂起。 大 合樂昌賊 州 帽 龔 詰 之。 福 Щ 兵 謝 部 賊 全 掠 等 芯 尙 隸 戰 大庾、攻南康、赣州、赣縣 書王瓊素奇守仁才。十一年八 Щ 栗不 據 攻剽府 横水、左溪、桶 敢隱,因貰 縣。 而福 其 阎 建 罪 池 大 令調賊, 賊 帽山 主簿 仲容 吳玭戰 賊 據 月擢 詹 猁 師富 右 頭 動 | 僉都 死。 静 等叉 皆 無勿知。 稱 守仁至, 御 王, 起。 史,巡撫南、贛 與大庾 前 於是檄 知 巡撫文森托 左 陳日 右 丽 多贼 能 建、廣東會兵,先討 當是時,南 耳目, 樂昌 疾 避 高快馬、 乃呼 去。 中盜 老黠 志 郴 Щ 賊

疏 親 卒 言權輕, 鲵 明 卒 年 屯 Ė 無以令將士,請給旗牌,提督軍務, 上杭。佯退師,出不 月,督副 使楊璋等破 意搗 賊長富村,三逼之象湖 之,連 破 四 十餘寨 得便宜從 ",俘斬 Щ 事 指 七 于 揮 尚書王瓊奏從其請。 有 覃桓、縣丞紀鏞戰死。守仁 奇,指揮王鎧 等擒 乃更兵 師富

列傳第八十三 王守仁

哨爲營,營有官,參謀二佐之,三營爲陣,陣有偏將 :二十五人爲伍,伍有小甲,二伍爲 隊,隊有 總甲;四 ;二陣爲軍, 隊 爲哨,言 軍 有副將。 哨 有長, 皆臨事委、不命 協哨二佐之,二

於

朝

一,副將以下,得遞相罰治。

走桶 賊倉卒敗走,遇淳兵又敗。 至 迎戰,兩 戬遏其奔軼。[B] 守仁自駐南康,去橫水三十里,先遣四百人伏賊巢左右,進軍 水 以 六千有 一大喜,期仲冬朔降,而珣、文定已冒雨 ,數及守備郊文、汀州知府唐淳、縣丞舒富各 歸。 岡 其年七月進兵 奇。 遂議討橫水、左溪。十月,都指揮許淸、赣州 山舉幟。賊大驚,謂官軍已盡犁其巢,遂潰。 還歪 左溪亦破。 時湖廣巡撫秦金亦破福全。 一幢州 、大庾。 議討冽 守仁以桶岡險固,移營近 諸軍破桶岡, 志山乘間急攻南安,知府季敩擊敗之。 頭賊 奪險入。 其黨千人突至,諸將擒斬之。 志山、貴模、廷鳳 地, 一軍會左溪,吉安知府伍文定、程鄉知 賊阻 諭以 知府邢珣、寧都知縣王 水陣,珣直前 乘勝克橫水,志山及其黨蕭貴模等皆 禍 面縛降。 福。賊首藍廷鳳等方震恐,見使 搏戰,文定與戬 副使楊璋等亦生繁 凡破巢八十有四,俘斬 乃設崇義縣於橫水, 天與 逼之。 各 軍軍 自右出, 縣張 賊方 會橫 日

亦 以五百人降、獨 初, 守仁之平師富也,龍川賊盧珂、鄭志高、陳英咸請降。及征橫水,浰頭 仲容未下。 横水破,仲容始遣弟仲安來歸,而嚴爲 戰守備。詭言珂、志高 賊將黃金巢

縣, 守仁 樂,仲 破 七 仁 醬 也 白 上 叩 É 一、中 留 之日 Ĺ 容 置 衣 將 仲 信 下 襲 戍 贼 容 :「若皆 目. 三利 而 觀 我 衣 疑。 歸 燈 故 斬 奔 樂。 吾民,屯 守仁 爲 崖 自是 | 馘二千 備 下 IE 賜 境內 月三日大享,伏 於 守仁 以 賊招之上。 外 有奇 節 大定 疑疑 物 我 誘 必
繋 餘 乎! 入謝 贼 珂 官軍 甲 等, 奔 一悉引 ō 九 土 進 仲容 而 連山 於 攻, 入祥 陰使 門 率 諸 內外合擊, 符宫, 珂弟 九 Щ 賊 + 横 入,以 集 三人營教場 亙 厚飲 兵待, 數 擒 次 百 食之。 悉擒戮 斬 里 遂 一,陡 無 下 贼 遺。 絕不 令 而 之。 大 散 自 喜 乃 可 以 兵 自 過望, 於 攻。 數 將 下 歲首 人 抵 浰 乃簡 入 益自 賊 立 謁 大 巢 和 張 壯 連 守 平 燈 士

及 平 都 洌 初 御 頭 朝 史,予 廣 議 東 贼 勢强 世: 尙 | 襲錦 未 承 一發廣 檄。 衣 衞 東 守 百 湖 戶 仁 ,,再 所將皆 廣 兵 進副 合 文 剿。 干 (吏及: 后 守仁上疏 偏 裨 小 校,平 止之,不及。 數 + 车 桶 巨 岡旣 寇 , 滅,湖 遠近驚 廣 爲 兵始至 進

持 修 與 衆議日三財若出長江順流東下 平 鄒 伍 · 译 守 文定 + 益 几 謪 徵 华 驛丞 副 調 六 使 月 兵 羅 王 命勘 食, 思 循 李 羅 治器械 福 中, 咸 欽 建 德,郎 叛軍。 舟 ,楫,傳 赴守仁 中曾直 一則南都不可保。 行 檄 至 軍 豐城 暴宸濠罪,俾守令各 0 御史張鰲山、周 御 m 史 寧 謝 王宸濠 源 吾 、伍希 欲 反,知 以計撓之。少遲 魯 儒 評 率 自 、縣顧 吏 廣 事 士 羅 (東還) 必以 勤 僑, 玉。 告。 同 守仁 旬日無患矣。」乃多 知 都 郭 御 守仁急趨吉安, 留留 史王 祥 之紀 鵬 進士 懋 功。 中 編編 郭 因

濠果疑。 論 至,乃悟守仁紿之。七月壬辰朔留宜春王拱樤居守,而劫其衆六萬人,襲下九江、南康,出 籟 遣 。」又爲蠟書遺僞相李士實、劉養正,敍其歸國之誠,令從與早發兵東下,而縱諜洩之。 王守仁、湖廣秦金、兩廣楊旦各率所部合十六萬,直擣南昌,所至有司缺供者,以軍法 間諜,檄府縣言:「都督許泰、卻永將邊兵,都督劉暉、桂勇將京兵,各四萬,水陸並進。 與土實、養正謀,則皆勸之疾趨南京卽大位,宸濠益大疑。十餘日詗知中外兵不

大江,薄安慶。

死。 兵。 之湖 然。今九江、南康已爲賊守,我越南昌與相持江上,二郡兵絕我後,是腹背受敵也。 李楫、萬安王冕、寧都王天與,各以兵來會,合八萬人,號三十萬。或請救安慶,守仁曰 恩,任通判瑞州胡堯元童琦、撫州鄒琥、安吉談儲,推官王暐、徐文英,知縣新淦李美、泰和 搗南昌。 軍 庚戌夜半,文定兵抵廣潤門,守兵駭散。 中,蔑不勝矣。」衆曰「善」。己酉次豐城,以文定為前鋒,先遣奉新知縣劉守緒襲 守仁聞南昌兵少則大喜,趨樟樹鎮。 士 頗 賊精銳悉出,守備虛。 殺掠,守仁戮犯合者十餘人,宥脅從,安士民,慰諭宗室,人 我軍新集氣銳,攻必破。 知府臨江戴德孺、袁州徐璉、贛州邢珣,都指揮余 辛亥黎明,諸軍梯絙 賊聞南昌破,必解圍自救。 登, 心 縛拱條等, 乃 悅 不 其伏 如直 逆擊

居二日,遣文定、珣、璉、德孺各將精兵分道進,而使堯元等設伏。 列 傳 第 八 + Ξ 王 守 仁 宸濠果自安慶還兵

淺, 擒 亦 朝 先 州 翼 Ĉ. 下。 賊 其 圳] 却 陳槐 分 倉卒易 羣. 者 贼 遇 臣 至是,果奏 凡 於 勢,堯元 饒州 黄 三十五 誻 **治**舟遁, 官 軍 家 林城 軍奄至。 殊 渡 築 王 日 死 捷 伏 取 冕 戰 丽 文定 發, 九江 贼 所 賊 以 平。 部 占 賊 宁全 小 復 兵 其前 大 舟 大 追執 京 潰 敗, 建昌 載薪,乘 鋒,賊 師 退保 之。 聞 退保八 一會璵、 變 趨 樵舍 士實 風 諸 利。 字 縱 廣信 大 養正 火, , 腦 珣繞出賊背貫其中,文定、 門 聯 . 震 周 焚 护 宸 朝佐 懼 及降 其 爲 濠 副 方 懼 取 舟 王 賊 陣 盡 瓊 南 按 ٠, 妃婁氏 盡 康 大言 察使楊 發 出 南 金 康、九江 日:「王伯安居南 丙 以下 寶犒 璋等皆就 辰 復 皆投 恩 戦 土 . 兵。 乘之,璉、 水死 官 明 擒。 守仁 軍 日 却 昌 南 德孺 宸濠 宸 遺 Ŀ 康 守 濠 知 游 方 府 張 九 舟 江 晨 斬 撫 兩

成 恨。 通 軍 守仁初 乃起兵。 宸 帝 濠旣 太監 時 已 上宸濠 平,則 親 張 叉 忠、平賊 征 欲 , 令 相 反 自 縦 書。因言:「 與 稱 宸 媢 將 威 濠 功。 軍 武 湖 左 大將 都 中, 且. 覬覦 懼守仁見天 督劉 軍, 待 帝自 者非 暉 率京 將 擒 特 京 邊聽 子 軍數 寧王, 發其 卒數萬南 千, 請黜奸 罪,競 泝 江 下。 爲 而 諛 畫語 上, 命安邊伯 以 旦 抵 謂守仁 天下豪傑 南 昌。 許 先 泰為 諸 與 广。 小户 嬖倖 副 通 將軍, 諸 政 慮 與宸 嬖 事不 〈倖皆 偕提

間 道 超玉 守 乘忠、 山 泰 書請獻俘, 未 先俘宸濠, 1 帝 南 征。 發 南 帝 昌 不 許。 忠、泰以威 至錢 唐遇太監張永。 武 大將軍檄邀 之廣信。 永提督贊畫機密軍 守仁不

忠、泰 予棺, 乃易前奏,言奉威武大將軍方略討平叛亂,而盡入諸嬖倖名,江彬等乃無言。 坐 得 永 嘗 厚甲天下,今所蓄安在。」守仁曰:「宸濠異時盡以輸京師要人,約內應,籍可按也。」忠、泰故 泰已先至,恨失宸濠。故縱京軍犯守仁,或呼名嫚罵。守仁不為動,撫之愈厚。病予藥,死 無不泣 不 困 務,在忠、泰輩上,而故與楊一淸善,除劉瑾,天下稱之。守仁夜見永,頌其賢,因極言江西 一僧寺。 時 永密信,不赴。及是知出帝意,立馳至。忠、泰計沮,不令見帝。守仁乃入九華山,日晏 納宸濠賄者,氣懾不敢復言。已,輕守仁文士,强之射。徐起,三發三中。京軍皆歡呼, 可 敝 時 直 ,不堪六師擾。 《益沮。 遭喪於道,必停車慰問良久始去。 左右之。忠揚言帝前曰:「守仁必反,試召之,必不至。」忠、泰屢矯旨召守仁。 下思歸者。忠、瀑不得已班師。 情耳。」守仁乃以宸濠付永,而身至京口,欲朝行在。聞巡撫江西命,乃還南昌。 帝覘知之,曰:「王守仁學道人,聞召卽至,何謂反。」乃遣還鎭,令更上捷音。 會冬至,守仁命居民巷祭,已,上塚哭。時新喪亂,悲號震野。京軍離家久,聞之 永深然之,曰「水此來,爲調護聖躬,非邀功也。公大勛, 比見帝,與紀功給事中配續、御史章編讒毀百端,獨 京軍調王都堂愛我,無復犯者。忠、泰言:「寧府富 永 知之,但事 守仁

第八十三 王守仁

五一六五

列

傳

當是時,讒邪搆煽,禍變叵測,微守仁,東南事幾殆。世宗深知之。甫卽位,趣召入朝

而大學士楊廷和與王瓊不相能。守仁前後平賊,率歸功瓊,廷和不喜,大臣亦多忌

部 門人方獻夫、黃綰以議禮得幸,言於張璁、桂萼, 仁憤甚。 其 同 尚書 事 功。 論 有 功封 ,三邊總督,提督團營,皆弗果用 功 會 [有言] 時已丁父憂,屢疏辭爵,乞錄諸臣功,咸報寢。 者 特進光祿大夫、柱國、新建伯,世襲,歲祿 ,惟吉安守伍文定至大官,當上賞。 或 哀未 畢,不宜舉宴行賞 者,因拜守仁南京兵部尚書。 將召用,而費宏故銜守仁,復沮之。 屢推兵 其他皆名示遷,而陰絀之,廢斥 一千石。 **免喪**, 然不予鐵券,歲祿 亦不 召。 守仁不赴, 外之, 亦 所善席書及 無存者。 不給。 請歸省。 守 諸

部, 仁在 恐紿我。」陳兵入見。 懼,至是 計 反 《歲遣兵數千防戍。是流官之設,無益可知。 招 總督 尙 撫。 道,疏陳用兵之非,且言:「思恩未設流官,土酋歲出兵三千,聽官征調。 土官,斯 嘉 書 靖六年,思恩、田州土會盧蘇、王受反。 則大喜。 兩廣氣巡 王時中條其不合者五,帝令守仁更議。十二月,守仁抵潯州,會巡按御史石金定 悉散遣 可藉其兵力爲屛蔽。 一諸軍,留永順、保靖土兵數千,解甲休息。 守仁赴南寧,二人遣使乞降,守仁令詣軍門。二人竊議曰:「王公素多詐, 撫。 守仁數二人罪,杖而釋之。 縮因上書訟守仁功,請賜鐵券歲祿,並敍討賊諸臣,帝咸報可。 若改土為流, 總督姚鏌不能定,乃詔守仁以原官兼左都御 且田州隣交阯,深山 則邊鄙之息,我自當之,後必有悔。」章下兵 親入營,撫其衆七萬。 蘇、受初求撫不得,聞守仁至益 絕谷,悉瑤、僮盤據,必 奏聞於朝,陳用兵 既設流官,我 守

列傳第八十三 王守仁

俟有功擢知 十害,招撫十善。 州 而於田州置十九巡檢司,以蘇、受等任之,並受約束於流官知府。 因請復設流官,量割田州地,別立一州,以岑猛 次子邦相為吏目,署州

從之。

受兵直抵八寨,破石門,副將沈希儀邀斬軼賊,盡平八寨。 守仁欲討之,故留南寧。罷湖廣兵,示不再用。伺賊不備,進破牛腸、六寺等十餘寨,峽賊 悉平。遂循橫石江而下,攻克仙臺、花相、白竹、〇古陶、羅鳳諸賊。 斷 藤 峽瑶賊,上連八寨,下通仙臺、花相諸洞蠻,盤亙三百餘里,郡邑罹害者數十年。 令布政使林富率蘇

寒。 萬,僅得一田州, 仁征撫交失,賞格不行。獻夫及霍韜不平,上疏爭之,言三諸瑤爲患積年,初嘗用兵數十 謂守仁自誇大,且及其生平學術。一淸等不知所對。守仁之起由璁、專薦、尊故不善守仁, 國初以來 應。一清雅知守仁,而黃館嘗上疏欲令守仁入輔,毀一清,一清亦不能無移憾。 導遂顯詆守 始,帝以蘇、受之撫,遣行人奉璽書獎諭。 夫大夫出 未有輕 驵 ·議剿者,今一舉蕩平,若拉枯朽。議者乃言守仁受命征思、田,不受命征八 旋復召寇。守仁片言馳諭,思、田稽首。至八寨、斷藤 有 可 以安國家,利社稷,專之可也。況守仁固承詔得便宜從事者乎?守 及奏斷藤峽捷,則以手詔問閣臣楊一淸等, 峽戝, 阻深巖絕岡,

未白。 仁討平叛藩,忌者誣以初同 夫忠如守仁,有功如守仁,一屈於江西 , 贼謀, 又誣其輦載金帛。 ,再屈於兩廣。 當時大臣楊廷 臣恐勞臣 和 、喬宇飾 灰 心,將士解體,後 成 其 事 丁,至今

.西,軍民無不編素哭送者 已病甚,疏乞骸骨,舉鄖陽巡撫林富自代,不俟命竟歸。 行至南安卒,年五十七。

喪

過

江

此

疆

圉

有

事,誰復爲陛下任之」。帝報聞

而 틴

胃。 (集註、或問之類,乃中年未定之說。 教,專以致良知爲主。 茍言笑。游 忽悟格物致知,當自求諸 守仁天姿異敏。 九華歸、 ,築室陽明洞 年十七謁上饒婁諒,與論朱子格物大指。 謂宋周、程 心, 中。 二子後,惟象山陸氏簡易直捷,有以接孟 不當求諸事物,喟然曰:「道在是矣。」遂篤信 學者翕然從之,世遂有「陽明學」云。 泛濫二氏學,數年無所得。 還家,日端坐,講讀五經,不 謫 龍場,窮荒無書,日釋舊 氏之傳。 不疑。 而 其爲

典俱不行。 賊 師 ,擒獲叛 門徒,互 守仁旣卒,桂萼奏其擅離職守。 欲立異以爲高,則 藩,功 相 隆慶初,廷臣 倡 和。 有 足錄,宜免追奪伯爵以章大信,禁邪 才美者樂其任意,庸鄙者借其虛 非朱熹格物致知之論 多頌其功。 帝大怒, 韶贈新建侯, 諡文成。 下廷臣議。 知衆論之不予, 摩。 說 以正 **粤等言:「守仁事不師古,** 傳習 二年予世襲伯爵。 則爲朱熹晚年定論之書。 人心。」 轉訛, 背謬彌甚。 帝乃下詔停世襲, 既又有請以 但討捕 言不稱 號 卹 軬

申前 守仁與薛瑄、陳獻章同從祀文廟者。 頤、程顥 心 **篤行,衆論所歸,亦宜並祀。** 大學士申 且. 孝 友 出處如獻章,氣節文章功業 時行等言。「守仁言致知出 帝皆從之。 帝獨允禮臣議,以追配。 終明 大學,良 如守仁,不可謂禪,誠宜崇祀。」且言胡居仁純 之世、從祀 知出 孟子。 者止守仁等四 及萬曆十二年, 御史詹事講 陳獻章主靜,沿宋儒 人。 周敦

弘繼 業洵 別推 及承勛卒,先進未襲死。 慶 初 ",尋釋。 承勛弟子先通當嗣, 兄業浩時爲總督,所司懼忤業浩,竟以先通嗣。 始守仁 襲新建伯。 |先達妻日||「伯無子,爵自 無子,育弟子正憲爲後。 先通襲伯四年,流賊陷京師,被殺。 萬曆五年卒。 業洵 屢爭於朝, 自以非嫡 子承勛 傳吾夫。 數十年不決。 晚年,生子 嗣 嗣,督漕運二十年。 ,終當歸爵先達,且虞其爭,乃謗先達爲乞養, 由父及子,爵安往。」先進怒,因 正億 崇禎時,先達子業弘復與先通疏辨。 一歲 業弘憤、持疏入禁門訴。 而 子先進,無子,將以弟先達子業 孤。 旣長,襲錦衣副千戶。 育族子 自 刎不殊,執 業洵爲後。 m

而

隆

守仁弟子盈天下,其有傳者不復載。 惟冀元亭嘗與守仁共患難

宸濠懷不 冀元亨,字惟乾,武陵人。篤信守仁學。 ,前,而外務名高,貽書守仁問學,守仁使元亨往。 舉正德十一年鄉試。從守仁於發,守仁屬以敎 宸濠語挑之,佯不喻,獨與

序論學。」忠等大喜,接元亨,加以炮烙,終不承,械繁京師詔獄。 官。已,宸濠敗,張忠、許泰誣守仁與通。詰宸濠,言無有。 之論學,宸濠目爲癡。他日講西銘,反覆君臣義甚悉。宸濠亦服,厚贈遣之,元亨反其贈於 忠等詰不已,曰:「獨嘗遺冀元

見,則囚服見,手不釋麻枲。問其夫學,曰三吾夫之學,不出閨門袵席間。」聞者悚然。 事且白,守者欲出之。曰:「未見吾夫,出安往。」按察諸僚婦聞其賢,召之,辭不赴。 逮也,所司繫其妻李,李無怖色,曰:「吾夫尊師樂善,豈他慮哉。」 獄中與二女治麻枲不輟。 世宗嗣位,言者交白其冤,出獄五日卒。元亭在獄,善待諸囚若兄弟,囚皆感泣。 其被

亦有得於中者歟。 之世,文臣用兵制勝,未有如守仁者也。當危疑之際,神明愈定,智慮無遺,雖由天資高,其 ,某恨公多講學耳。」」桂萼之議雖出於媢忌之私,抑流弊實然,固不能以功多爲諱矣。 贊曰:王守仁始以直節著。比任疆事,提弱卒,從諸書生掃積年逋寇,平定孽藩。 矜其**創獲**,標異儒先,卒爲學者譏。守仁嘗謂胡世寧少 講學,世寧曰:

郴州襲福全等 福全 武宗實錄卷一 郴州, 四九正德十二年五月丁亥條作 原作 「柳州」。 本書卷一九四及明史稿傳七五茶金傳作 一湖廣郴 桂瑤 峒 賊 〕 福 全等 柳州 桂陽瑤襲 按 柳 州

屬廣西、屬縣無桂陽,作「柳州」誤,今改正。

 $\overline{}$ _ _ _ 督副使楊璋等破賊長 正德十二年 八月庚申條及卷一六四正德十三年七月己酉條都作 富村 楊 璋, 原作 胡 璉」。 明史稿傳八〇王守仁傳、 「楊璋」。 按本傳下文也作「楊 武宗實錄卷一 五二

璋」,據改。

□□四隊爲哨 隊,原作「甲」,據明史稿傳八○王守仁傳改。

ZVI 程 鄉 知 縣張 張戬,明史稿傳八○王守仁傳、明史紀事本末卷四八都作「張戢」。

Fī. 功 四 於 五. 地理志廣東惠州府有 下 浰 立和平縣 和平縣,原作「平和縣」。 和平縣, 注云:「正德十二年八月以龍 明史稿傳八〇王守仁傳作「和平縣」。 川縣之和平司置 四 按本書卷 北 有 浰

 $\overline{}$

頭 Щ /三浰水出 焉。 此 言 下 |洌」當即||冽水之一所經之地,所言置縣年月也與傳文記事合。 作

「和平縣」是,據改。

 \Box . プマ レ 文編卷一三一頁一二六七擒獲宸濠捷音疏改。 都指揮余恩 余恩, 原作「佘恩」,據本書卷一一七寧王權傳、 明史稿傳八〇)王守仁傳、 明經世

-饒 州 林城 取 九江 林城、本書卷一一七寧王權傳作「林城」。

列

傳

【ペン 白竹

文編卷一三一頁一二八四八寨斷藤峽捷音疏改。

五一七二

明史卷一百九十六

列傳第八十四

張璁 胡鐸 桂萼 方獻夫 夏言

故師丹、司馬光之論行於彼一時則可。 漢哀帝、宋英宗固定陶、濮王子,然成帝、仁宗皆預立爲嗣,養之宮中,其爲人後之義甚明。 月朔 三載成進士,又三載當驟貴。」聰乃歸。正德十六年登第,年四十七矣。 者爲之子,不得顧私親。夫天下豈有無父母之國哉。。記曰:『禮非天降,非地出,人情而已。』 追尊聖考以正其號,奉迎聖母以致其養,誠大孝也。廷議執漢定陶、宋濮王故事,謂爲 上疏曰:「孝子之至,莫大乎尊親。 張璁,字秉用,永嘉人。 世宗初踐阼,議追崇所生父興獻王。廷臣持之,議三上三却。璁時在部觀政,以是年七 舉於鄉,七試不第。將謁選,御史蕭鳴鳳善星術,語之曰:「從此 今武宗無嗣,大臣遵祖訓,以陛下倫序當立而迎立 **尊**親之至, 莫大乎以天下養。 陛下嗣登大寶,即議 人後

列

竊謂今日之禮,宜別立聖考廟於京師,使得隆尊親之孝,且使母以子貴,尊與父同,則聖考 不失其爲父,聖母不失其爲母矣。」 子之親、建彼父子之號、然後謂之繼統、則古有稱高伯祖、皇伯考者、皆不得謂之統乎。臣 立為 同,非必父死子立也。 義。故在陛下謂入繼祖後,而得不廢其尊親則可,謂爲人後以自絕其親則不可。夫統與嗣不 遺詔 亦 嗣 禮『長子不得爲人後』,聖考止生陛下一人,利天下而爲人後,恐子無自絕其父母之 無後兄之義。且迎養聖母,以母之親也。 養之宮中者較然不同。 直曰『興獻王長子』,未嘗著爲人後之義。則陛下之興,實所以承祖宗之統,與預 漢文承惠帝後,則以弟繼,宣帝承昭帝後,則以兄孫繼。 議者謂孝廟德澤在人,不可無後。假令聖考尚存,嗣位今日, 稱皇叔母,則當以君臣禮見,恐子無臣 若必奪此父 母母

與獻王曰「本生父與獻帝」,璁亦除南京刑部主事以去,追崇議且寢。 避位歸藩。 起擊之,禮官毛澄等執如初。 帝方扼廷議,得璁疏大喜,曰:「此論出,吾父子獲全矣。」亟下廷臣議。 聰乃著大禮或問上之,帝於是連駁禮官疏。廷臣不得已,合議尊孝宗**日**皇考, 會獻王妃至道州,聞尊稱禮未定,止不肯入。帝聞而泣,欲 廷臣大怪駭,交

疏 (日:「陛下遵兄終弟及之訓,倫序當立。禮官不思陛下實入繼大統之君,而强比與爲人後 至嘉靖三年正月,帝得桂萼疏心動,復下廷議。汪俊代毛澄爲禮部,執如澄。璁乃復上

考。若徒爭一皇字,則執政必姑以是塞今日之議,陛下亦姑以是滿今日之心,臣恐天下知 黄宗明、黄綰復合疏力爭。 禮者,必將非笑無已也。」與桂萼第二疏同上。帝益大喜,立召兩人赴京。命未達,兩人及 詔告天下,乘陛下不覺,陷以不孝。禮曰:『君子不奪人之親,亦不可奪親也。』陛下尊爲萬 未盡之心,遂敢稱孝宗爲皇考,稱興獻帝爲本生父。父子之名旣更,推崇之義安在。乃遽 之心,亦日以不帝不皇爲歉。旣而加稱爲帝,謂陛下心旣慰矣,故留一皇字以覘陛下將來 爲孝宗之子,墮禮官欺蔽中矣。」帝益心動,趣召二人。五月抵都,復條上七事。 乘,父子之親,人可得而奪之,又可容人之奪之乎。故今日之禮不在皇與不皇,惟在考與不 恩何由得報?』執政窺測上心,有見於推尊之重,故今日爭一帝字,明日爭一皇字,而陛下 敢忤權臣,此何心也。伏睹聖諭云。『興獻王獨生朕一人,旣不得承緒,又不得徽稱,罔極之 之例,絕獻帝天性之恩,蔑武宗相傳之統,致陛下父子、伯姪、兄弟名實俱紊。寧負天子,不 授二人翰林學士。 撲殺之。萼懼,不敢出。 疏曰:「禮官懼臣等面質,故先爲此術,求遂其私。 及獻帝改稱本生皇考,閣臣以尊稱旣定,請停召命,帝不得已從之。二人已在道,復馳 二人力辭,且請面折廷臣之非。給事御史李學曾、吉棠等言:「聰、傳曲學 璁閱數日始朝。 給事御史張翀、鄭本公等連章力攻,帝益不悦,特 若不亟去本生之稱,天下後世終以陛下 衆洶 洶、欲

之。」帝責以朋奸,亦令對狀。聰、萼乃復列欺罔十三事,力折廷臣。及廷臣伏闕哭爭,盡繫 益眷倚應、萼,璁、萼益恃寵讐廷臣,舉朝士大夫咸切齒此數人矣。 詔獄予杖。死杖下者十餘人,貶竄相繼,由是璁等勢大張。其年九月卒用其議定尊稱。 責學曾等對狀,下續、相詔獄。 阿世,聖世所必誅。以傳奉爲學士,累聖德不少。」御史段續、陳相又特疏論,并及席書。 刑部尚書趙鑑亦請置璁、傳於理,語人曰:「得兪旨,便捶殺

率倚璁言而決。 四年冬,大禮集議成,進詹事兼翰林學士。後議世廟神道、廟樂、武舞及太后謁廟,帝 璁緣飾經文,委曲當帝意,帝益器之。

戴繼先等復交章論不已,皆不聽。 力詆,幷劾吏部尚書廖紀引用邪人。帝怒,切責之。兩京給事御史解一貫、張錄、〔〕方紀達、 月, 璁以省墓請。 聰急圖柄用,爲大學士費宏所抑,遂與萼連章攻宏。 既辭朝,帝復用爲兵部右侍郎,兼官如故。給事中杜桐、楊言、趙廷瑞交章 尋進 聰左侍郎,復與 夢攻貴宏。 帝亦知其情,留宏不卽放。五 明年二月與王邦奇獄, 年七

捧陷楊廷和等,宏及石珤同日罷。

今修大禮全書,元惡寒心,羣奸側目。 去之,將以次去臣等。」澤乃得留。 郎中彭澤以浮躁被斥,聰言:「昔議禮時,澤勸臣進大禮或問,致招衆忌。 居三日,復言:「臣與舉朝抗四五年,舉朝攻臣至百 故要略方進,讒謗繁興。 使全書告成,將誣陷益甚。」 今諸臣

郎 因 劉 引 龍 疾 《求退以 溫 和 (要帝 仁 ,帝優詔慰留 和 以俸 深爭 |瑰言字、 吏部 闕 尚書,推 旦乃 楊 前尚 廷 和 黨 書喬字、楊 而仁和 旦; 亦 不宜 禮部 自薦。帝命大臣 尙 書亦 缺, ·惟 休 侍

致 者,非 奉 詔 不 得推 舉 ,字等遂廢。

罪遠竄 部 兼文淵閣 如 人,璁掌憲,復請考察斥十二人。又奏行憲綱七條,鉗束巡按御史。 方獻 錄 擬 瑰積怒廷臣,日謀 夫署大理 帝益 大學士入參機務了去釋褐六年耳。 璁讒於帝 以爲能,獎勞之便殿,賚二品服,三代封誥。 一,覆讞,盡 ,謂廷臣以 報復。 反其獄,傾諸異 議 會山 心禮故陷 西巡按馬錄治反賊李福達獄,詞連武定侯 勛。 已者。 帝果疑諸臣朋 大臣顏頤壽、聶賢 比 京察及言官互 ,乃命應署都察院, 以下 其年冬,遂拜禮 糾 成被搒掠,錄等 一旦黜 郭勛 御 桂 夢署 部 史十 法 尚 司 讞 坐 刑

書。 | 璁 因引 楊 清爲首 仁宗賜楊士奇等銀章 輔 ,翟鑾亦在閣,帝待 事 市 賜璁二 之不 如 |章,文曰「忠良貞一」, 璁。 嘗諭 璁:「朕有密諭毋泄、朕 曰「繩愆 阿違 與卿帖 一,因 悉親 幷 及

一清等。

苑 爲 空。 璁 乃 請 璁 初 自 講 -1 拜學士,諸翰林恥之,不與並列,璁深恨。 讀 正 以下量才外補,改官及罷黜者二十二人,諸庶吉士皆除部屬 月 一,帝 視朝,見聴、導班兵部尚書李承勛下,意樂之。 及侍讀汪佃 講洪範不稱旨,帝令 清因請加 及知 縣 散 官,乃 由是翰 補 外。

列

復 手 進 敕 少傅爺 加二 人 大太子 太子太傅、吏部尚書、謹身殿大學士。 太 璁辭以未 建青宮,官不當設,乃更加少保策太子太保。明倫大典成,

清遂 威悟 乞休者再 愧沮 且 揮 聶 刺 璁隱情、 立電 罷去,璁爲首輔 能 八年秋 遷刻璁,璁欲置之死。一清擬旨稍輕,璁益恨,斥一清爲 清 再相 璁。 詞 多陰詆 帝手 ,給事中孫應<u>全</u>劾一淸、萼幷及聰,其同官王準復劾聰 頭 頃之,其黨霍韜力攻一清,微爲聰白。聰行抵天津,帝命行 由 ·敕慰留,因 一清,帝乃褒諭璁。 極言璁自伐其能,恃寵不讓,良可歎息。 而給 事 中陸粲復劾其擅作 奸 人鄙 威 私 璁見帝句 參 夫。 福 人齎手敕召還。一 將 ,報復恩怨。 陳璠、宜斥。 清再 忽暴其短,頗 疏 齟齬。指 引 帝大 退, 璁

斷 配 更從祀 社稷,議分祭天地,議罷太宗配祀 魂言亦不 帝自排廷議定「大禮」,遂以制作禮樂自任。 諸 儒,議 盡 入。 祕 德祖 其諫罷太宗配天,三四往復,卒弗能 IE. 太祖南向, ,議朝 議耐穀 H 議 (夕月別建東、西二 大禘 而夏言始用事,乃議皇后親蠶,議勾龍、廉 議帝 止 111 社帝稷,奏必下璁議。 郊, 議 一祀高禖,議文廟設 顧帝取獨 主

夏言恃帝眷,數以事計字敬。 十年二月,璁以 名嫌御諱請更。 字敬銜之,未有以發。納彭澤言搆陷行人司正薛侃,因侃 乃賜名字敬,字茂恭,御書 四 大字賜焉

字敬乃 以害言。 大慚去。 廷鞫事露,旨斥其忮罔。 未幾,遺行人齎敕召之。 御史譚纘、端廷赦、唐愈賢交章劾之。 明年三月還朝 ,言已擢禮部尚書,益用 帝諭法司令致仕, 事。 李時

翟鑾在閣,方獻夫繼入,字敬亦不能專恋如曩時矣。

陳狀 遣 師 列 言:「良 輒 鴻臚齎敕召。 華蓋 文致 ,許之致仕。 八月, 弼 殿大學士。 《其罪,擬旨不密,引以自歸,明示中外,若天子權在其掌握。 以濫 彗星見東井,帝心疑大臣擅政,字敬因求罷。 舉京營官奪俸,由 四 李時請給廩隸、敕書,不許。 月還朝。 六月,彗星復見畢昴間,乞避位,不許。 臣 擬旨,挾私報復。」給事中秦鰲劾字敬强辨飾 再請,乃得馳傳歸。 都給事中魏良弼詆字敬奸,字敬 十二年正月,帝復思之, 明年進少師兼太子太 帝是鰲言、令字敬自 奸,言 官 論

持王 功。 之萼、獻夫、韜、縮等。 命輔臣賦詩。 疏 其後 初 已而子死,請益力。帝報曰:「卿無疾,疑朕耳。」字敬復上奏,不引咎,且歷祗同議禮 不 潞 行。 亂定,代王請**大臣安**輯。 州 陳卿亂,學敬主用兵,賊竟滅。大同再亂,亦主用兵,薦劉源淸爲總督,師久無 学敬及時各爲四首以上。已,數召見便殿,從容議政。十四年春得疾,帝遣中 帝諭令與言交好,而遣黃綰之大同,相機行事。字敬以議不用,稱疾乞休,疏 帝詰責之、乃復起視事。帝於文華殿後建九五齋、恭默室爲齋居所、 夏言遂力抵用兵之謬,請如王言,語多侵孚敬。 字敬怒,

列

十八年二月卒。帝在承天,聞之傷悼不已。 有司 剪鬚療大臣疾者,朕今以己所服者賜卿。」字敬幸得溫諭,遂屢疏乞骸骨。命行人御醫護歸, 官賜尊牢,而與時言,頗及其執拗,且不惜人才以叢怨狀。又遣中官賜藥餌,手敕言:「古有 '給廩隸 如制。 明年五月,帝復遣錦衣官齎手敕視疾,趣其還。行至金華,疾大作,乃歸。

少師羅山而不名。三其卒也,禮官請諡。 破人臣私黨,而己先爲黨魁。 盡,皆其力也。 意不已。 令主非一,若今愛死囚令主矣。當悔不從廷和事敬皇帝耶。」帝故爲 秋高,卒聞延齡死,萬一不食,有他故,何以慰敬皇帝在天之靈。」帝恚,責字敬:「自古强 曰「延齡,守財虜耳,何能反。」數詰問,對如初。 字敬剛明果敢,不避嫌怨。旣遇主,亦時進讜言。 以故終昭聖皇太后世,延齡得長緊。 持身特廉,痛惡贓吏,一時苞苴路絕。 「大禮」大獄,叢詬沒世。 帝取危身奉上之義,特諡文忠,贈太師 他若清勛戚莊田,罷天下鎭守內臣, 及秋盡當論,字敬上疏謂:「昭聖皇太后 而性狠愎,報復相尋,不護善類。欲力 帝欲坐張延齡反, 顧帝始終眷禮,廷臣 重語惕止学敬,而学敬 族其家。 . 卒莫與二,嘗稱 先後 学敬 公殆 春 臣 諍

廣參政,累官南京太僕卿。 時 有胡鐸者,字時振,餘姚人。 鐸與|聰同舉於鄉。「大禮」議起,|鐸意亦主考|獻王,與|瑰合。 弘治末進士。 正德中,官福建提學副使。 嘉靖初,遥湖 璁要

武宗 醴 入廟 與璁同以考獻王爲是,不與同進。 也。」璁議遂上。 之同署,鐸曰:「主上天性固不可違,天下人情亦不可拂。考獻王不已則宗,宗不已則入廟, 一旣定,鐸又貽 上乎, 則當 有 武宗下乎? 桃。 旋被召。 以藩 書勸召還議禮諸 封虛號之帝,而奪君臨治世之宗,義固不可也。 生爲之臣, 死不得赔於君。 鐸方服関赴京,

唿又要同疏,

躁復書謝之,

且與辨繼統之義。

「大 人,養和平之福,聰不能從。鐸與王守仁同鄉,不宗其學, 然其辨繼統,謂國統絕而立君寓立賢之意,蓋大謬云。 然魯嘗躋僖公矣、恐異日不乏夏父之徒 入廟則有位,將位於

桂萼,字子實,安仁人。正德六年進士。除丹徒知縣。 用薦起知武康,復件上官下吏。 性剛使氣,屢忤上官,調青田不

章,遏絕陛下純孝之心,納陛下於與爲人後之非,而滅武宗之統,奪獻帝之宗,且使興國太 妃爲 后壓於慈壽太后,禮莫之盡,三綱頓廢,非常之變也。 孝,故事天明,事母孝,故事地察。未聞廢父子之倫,而能事天地主百神者也。今禮官失考典 與國太后,頒詔天下二歲矣,導與張璁同官,乃以二年十一月上疏曰:「臣聞帝王事父 嘉靖初,由成安知縣遷南京刑部主事。世宗欲尊崇所生,廷臣力持,已稱興獻王爲帝, 乃自張璁、霍韜獻議,論者指爲干進,

列

明甚。 質 別。 久 定 涕 逆箝 受仁宗 一。」帝大喜,明年 欲 稱 以 聖 今陛下 人口 知 請 詔 母, 考興獻 其 庶協 乃者復 親許爲之子,至於封爵, 幾。 致 奉祖訓入繼大統,未嘗受孝宗韶爲之子 連 帝,母興國太后,又何疑。 醴 事 願 庄 得席書、方獻夫二疏。 速 者 天 月手: 事 發 不 ·敢駁 地 明 批 之道。 韶 議行 議。 稱 孝宗日皇伯考,興獻 至朝臣所執不過宋濮議 切念陛下侍興國 悉用 皇子 伏望奮然裁斷,將臣 臣聞 故 非天子不議禮;天下 事, 太后,慨興獻帝 也, 與入繼之主不 帝皇考, 則陛 耳。 別立 下非 按宋 與二臣疏並付 廟 沸 爲 有道,禮樂自 同 范純仁告英宗 祀, 大內,正 人後, ر ــــا 則宋臣之論,亦自有 已三年矣,拊 而 禮官,令臣等面 興國太后 爲 天子 入繼之主也 口『陛下昨 世。 之禮 心 出 臣

皇,惟 臣聞 駭 無 訓 父人矣。 **沒愕,**羣起排擊,帝不爲動。 力抵 道路 陛下承祖宗大統,正遵高皇帝 三月,萼復 在 執政者,至萼遂斥爲不道,且欲不 於考不考。 逆倫 人言,執政窺伺陛 悖義如此,猶 上疏曰: 使考獻帝之心 自古帝 可 下至情 **博復偕聰論列不已,遂召爲翰林學士,卒用其言。** 使與 \pm 斯議哉 制 相傳,統爲重,嗣爲輕。 可奪,雖 不已,则 執 使議。 一與 政 加 加千百字 乃無故任己私,背祖 一皇字而 璁疏並 其言恣肆 微稱,何益 上。 Ę 無忌,朝士尤疾之。 帝益 故高皇帝法前王,著兄終弟及之 夫陛下 大喜,召赴京。初,議禮諸 於孝。 訓,其爲不道,尚可言哉。 之孝其親, 不在於皇不 陛下遂終其身為無 召命下,衆益 **博**自是受知 臣.

特深。

竊 廟 小 禮 以 人 為罰 連章攻費宏幷石琉,齮 復 而 四 小 年 排廷議,希合帝指。 過 春,給事 人 重矣。」萼、璁遂求去,優韶 尙 在, 如 中柯維熊言:「陛下親君子而君子不容,如林俊、孫交、彭澤之去是也。 張 瑰、桂萼之用是也。且 之去 帝益 以爲賢,兩 慰留 今伏闕諸 人氣益盛。 尋進詹事無翰林學 臣 多死徙,而 而閣臣抑之,不令與諸翰林等。 士。 御 史王 議 世 一懋、郭楠 廟 神道及太后謁 又謫 譴, 遠 兩

蠲 城 六年田 垣 給 事 了,停外吏赴部考滿,申聖敬,廣聖孝,凡數 租. 中 陳洸犯重辟,導與尚書趙鑑攘臂爭,爲南京給事中所劾,不問。 ,更登極初**宿弊,**寬登聞鼓禁約,復塞上開中制,懲奸徒阻絕養濟院 事。 多議 行 嘗陳時政,請預 聽窮民耕

給 無 互 廷 道 以 相 和 事御史爭之,並奪俸。 |厭衆心。」 | 轉言: 「詔出憲宗文集。 有超擢巡撫不稱者、憲宗命互劾、去者七人、非考察拾遺比。 糾劾,言路遂清,請舉行如制。」章下吏部,侍郎孟春等言:「憲宗無此詔。 廣植私黨,蔽聖聰者六年,今次第斥逐,然遺奸在言路。 六年三月進禮部右侍郎,兼官如故。 春等乃以御史儲良才等四人名上。帝獨黜良才,而**特旨斥給事**中 春欲 時方京察,南京言官拾遺及專。 媚言官,宜幷按問。」章下部再議, 音 憲 宗 初 帝終然夢言, 年,命 萼上言:「故輔楊 春等言成化中 科道拾遺後, 萼被論報復, 趣令速舉。

列

鄭自璧、孟奇。 且令部院再覈,復黜給事中余經等四人,南京給事中顧溱等數人,乃已。

七年正月,手敕加太子太保。明倫大典成,加少保兼太子太傅。 甫踰月,遷吏部尚書,賜銀章二,曰「忠誠靜愼」,曰「繩愆匡違」,令密封言事與輔臣埓。 其年九月改吏部左侍郎。是月拜禮部尚書,兼翰林學士。故事,尚書無兼學士者,自聘

己,力斷齕。 甚衆,或被陷至謫戍。廷臣莫不畏其兇威。獨疏薦建言獲罪鄧繼曾、季本等,因事貶謫黃 國用、劉秉鑑等,諸人得量移。世亦稍以此賢夢。然王守仁之起也,夢實薦之。已,銜其不附 **萼旣得志,日以報怨爲事。陳九疇、李福達、陳洸之獄,先後株連彭澤、馬錄、葉應驄等** 及守仁卒,極言醜詆,奪其世封,諸卹典皆不予。

帝已疑博,令滌宿愆,全君臣終始之義。 言夢鶴由考選無私。 輔持重,傳、聰好紛更,且惡其壓已,遂不相能。給事中孫應座請鑒別三臣賢否,詆傳最力。 奸狀大露,璁、霍韜力庇勛。 事,於左順門捶殺之,走武定侯郭勛家以觅。勛遂與深相結,亦蒙帝箺典禁兵。久之,勛 勉徇公議,庶不負前日忠。」專益懼。 八年二月命以本官兼武英殿大學士入參機務。初,導、璁赴召,廷臣欲做先朝馬順故 帝終以爲疑,命太醫院更考。言官知帝意已移,給事中陸嚴極論其罪, **萼知帝已惡之,獨疏其兇暴貪狡數事,勛遂獲罪。** 給事中王準因劾萼舉私人李夢鶴爲 <u>博乃大懼,疏辨,且稱疾乞休。</u> 帝報曰:「卿行事須 御醫。 楊一清爲首 詔下 ·吏部

亦 幷言夢鶴與萼家人吳從周、序班桂林居間行賄事。奏入,帝大悟,立奪萼官,以尚書致仕。璁 龍 法當置刑典,特寬貸之。」遂下夢鶴等法司,皆首服。 帝復列二人罪狀韶廷臣,略言:「其自用自恣,負君負國,所爲事端昭然衆見,而萼

召之。 正月得請歸, 卒於家。 事,不恤物議,驟被摧抑,氣爲之懾,不敢復放恣。 鶴、林籍,從周論罪,夢復散官。是時應已召還。 傷 **幺麼敢與聞耶。」幷斯下吏。明年四月還朝,盡復所奪官,仍參機務。** 中、員外皆奪職、命法司會錦衣鎭撫官再讞。乃言夢鶴等假託行私,與萼無與。 無何,霍韜兩疏訟導,言一淸與法司搆成夢贓罪。 帝乃賜敕,令撫按官趣上道。 萼未至,國子生錢潮等復請趣轉。帝怒曰:「大臣進退, 贈太傅、諡文襄 史館儒士蔡圻知帝必復夢,疏頌 居位數月、屢引疾、帝輒優旨慰留。 一清遂去位,刑部尚書周倫調南京,
萼初銳意 功名,勇任 夢功, 請 韶削夢

政。 性猜狠、好排異己,以故不爲物論所容。 夢所論奏,帝王心學論、皇極論、易復卦、禮月令及進禹貢圖、輿地圖說,皆有裨君德時 始與應相得歡甚,比同居政府,遂至相失。

方 獻夫,字叔賢,南海人。 列 傅 第 É + 四 方 獻 夫 生而孤。 弱冠舉弘治十八年進士,改庶吉士。 五. 八五 乞歸養母,遂

T 母憂。 正德 中 ·,授 禮部主事,調吏部,進員外郎。 與主事王守仁論學,悅之,遂請爲弟子。

尋謝病歸,讀書四樵山中者十年。

|嘉靖改元夏還朝,道聞「大禮」議未定,草疏曰:

嘗後孝宗也,而强稱之爲考,豈名實哉!爲是議者,未見其合於禮經之言也。 也 服其服。 乃使絕 而 旦 未當乎名實者,一則守禮經之言,一則循宋儒之說也。臣獨以爲不然。 後可以爲人後,未有絕人之後以爲人後者也。 」。「不可以絕,故族人以支子後大宗也。適子不得後大宗」。爲是禮者,蓋謂有支子 何 先王制禮,本緣人情。 如而 其後而後孝宗,豈人情哉!且爲人後者,父嘗立之爲子,子嘗事之爲父,故卒而 今孝宗嘗有武宗矣,未嘗以陛下爲子。陛下於孝宗未嘗服三年之服,是實未 可以爲人後,支子可也」。又曰「爲人後者孰後,後大宗也」。「大宗者,尊之統 君子論事,當究名實。 、今興獻帝止生陛下一人,別 竊見近日禮官所議,有未合乎人情, 按禮經喪服傳 無支庶,

興獻帝無別子也,其不同者三。豈得以濮王之事比今日之事哉。爲是議者,未見其善 同者一。孝宗有 今日之事 叉按 程 不同。蓋仁宗嘗育英宗於宮中,是實爲父子。 頤濮議謂「英宗旣以仁宗爲父,不當以濮王爲親」。此非宋儒之說不善,實 武宗爲子矣,仁宗未嘗有子也,其不同者二。濮王別有子可以不絕, 孝宗未嘗育陛下於宮中,其不

述宋儒之說也。

後哉 也。 也。 必 欲 是一舉而三失焉臣未見其可也。 夫興獻帝當父也,而不得父。孝宗不當父也,而强稱爲父。 有後者,在不絕祖宗之祀,不失天下社稷之重而已,豈必拘拘父子之稱,而後爲 且武宗君天下十有六年。不忍孝宗之無後,獨忍武宗之無後乎?此尤不 若謂孝宗不可無後,故必欲陛下爲子,此尤不達於大道者也。 孝宗有武宗,武宗有陛下,是不絕祖宗之祀,不失天下社稷之重矣,是實爲有後 武宗當繼也,而 推孝宗之心,所以 通 不得 之 說 有

獻帝 陛下何以爲 王王季,子思以爲達孝。 不當稱帝,此尤不達於大道者也。 且. 天下未嘗有無父之國也。 心哉!臣知陛下純孝之心,寧不有天下,決不忍不父其父也。 豈有子為天子,父不得稱帝者乎。 瞽瞍殺人,舜竊負而逃。今使陛下舍其父而有天下, 孟子曰「孝子之至,莫大乎尊親」。 說者又謂興 周公追王太

位也。 帝 人之私,後世之事也。 而 不 今日之事,臣嘗爲之說曰:陛下之繼二宗,當繼統而不繼嗣。 伏乞宣示朝臣,復稱孝宗日皇伯,興獻帝日皇考,別立廟祀之。 ·稱宗。 夫帝王之體,與士庶不同。 興獻之得稱帝者, 以陛下爲天子也。 繼統者,天下之公,三王之道也。 不得稱宗者,以實未嘗在 興獻之異羣廟,在稱 夫然後合於人 繼嗣者,一

情,當乎名實,非唯得先王制禮之意,抑亦遂陛下純孝之心矣。

廷議。 夫終不自安,謝病歸。 論 四起,獻夫亦力辭。帝卒用諸人議定「大禮」,由是荷帝眷與璁、導埓。四年冬進少詹事。獻 其 疏 說益詳。時已召張璁、桂萼於南京,至卽用爲翰林學士,而用獻夫爲侍講學士。攻者 廷臣 具,見廷臣 方觝排異議,懼不敢上。 爲桂萼所見,與席書疏並表上之。帝大喜,立下

館。 共 明倫大典成,加太子太保。 天下臣子知爲後之議實起於了,宋儒之論實出於了,下洗羣疑,上彰聖孝。」詔下其書於史 脚之奏,與其事始末,及魏明帝之詔,濮園之議,論正以附其後。乞付纂修官,參互考訂,俾 防附之,而光之說惑人最甚。主哀帝議者,葬爲首,師丹、甄邯、劉歆附之,而莽之說流毒最 主爲後之議者,宋莫甚於司馬光,漢莫甚於王莽。主濮議者,光爲首,呂海、范純仁、呂大 、年九月拜禮部右侍郞,仍兼學士,直經筵日講。 還朝未幾,命署大理寺事,與璁、尊覆讞李福達獄。萼等議馬錄重辟,獻夫力爭得減死。 宋儒祖述王莽之說以惑萬世,誤後學。臣等謹按漢書、魏志、宋史,略采王莽、師丹、甄 六年召修明倫大典。獻夫與霍韜同里,以議禮相親善,又同赴召,乃合疏言:「自古力 尋代專爲吏部左侍郎,復代爲禮部尙書。

等二十三人,而黜儲良才等十二人。良才者,初爲御史,以考察黜。 侍郎孟春等爲奸黨,夢因請復其職。 部 取進士之數。 止。 等,以獻夫言多兒逮。思恩、田州比歲亂,獻夫請專任王守仁,而罷鎭守中官鄭潤、總兵官朱 嗣 又因霍韜言、盡汰僧道無牒、毁寺觀私創者。 職,帝乃召潤、騏還。 思、田旣平,守仁議築城建邑, 專痛詆之。 獻夫歷陳其功狀,築城得毋 治尚書。 舒。 璁、萼與楊一清搆,獻夫因災異進和衷之說,且請收召謫戍削籍余寬、馬明衡 獻夫言外戚之封不當世及,歷引漢、唐、宋事爲證。 夫視璁、萼性寬平,遇事亦間有執持,不盡與附會。 萼、璁罷政, 詔吏部核兩人私黨。 帝優詔答之,寬等卒不用。獻夫以尼僧、道姑傷風化,請勒令改嫁,帝從之。 至是斥去,時論快之。 獻夫言:「陸粲等所劾百十人,誣者不少。昔攻 帝欲殺陳后喪,獻夫引禮固爭。尋復代萼爲吏 去之。縉紳之禍何時已。」乃奏留黃綰 萼反陳光獄,請盡逮問官葉應驄 帝善其言,下廷議,外戚遂永絕 安昌伯錢維圻卒,庶兄 上疏武楊廷和,指 輩,而倍 維 吏部 垣請

從。 獻夫遂求 聰、萼旣召還,羽林指揮劉永昌劾都督桂勇,語侵轉及兵部尚書李承勛。又劾御史廖自 坐逮。 退, 已,叉許 帝亦 不允。 兵部郎中盧襄等。 給事中孫應奎劾戲夫私其親故大理少卿洗光、太常卿彭澤, 獻夫請按治水昌,毋令奸 人以蜚語 中善類。帝不

列

傅

第

還故 以平代, 帝 示 官。 聽 邪回之彭澤踰等躐遷太常,及他 獻夫及 都給事中夏言亦刻獻夫壞選法,徙張璁所惡浙江參政黃卿於陝 · 瑰疏辨,因引退。 帝重違二人意,復令卿等如 所私呢 ,皆有**述**,疑獻夫交通 前 擬 賄賂。疏 西 一, 而 入,帝令卿等 用 璁所愛党

行政 官倍 其不 言官 民,毋得譸 欲廣耳 止 臣 願存 俟部 未 縅 之失,甲乃指爲毛舉細故,而頌大臣不已。 頃 口。 聞 Ź, 目 廉遠堂高 問周 獻夫不自得,兩疏引疾。 奏,命削二官出之外。 議大臣,獨夏言、孫應奎、趙漢議及聰、獻夫耳。 張 給事 萬 亂政 知百僚情傷,得獻夫議 一有逆人厠其間,奈何!奏入,帝心善其言,下 中 ,并飭兩京給 之義,俾小人不得肆攻訐。」章下吏部。獻夫等請從甲言 |薛甲言:「劉永昌以武夫劾冢宰,張瀾以軍餘劾勛臣,下凌上替,不 事 部謂 御史及天下撫按官論事,先大體毋責 帝 不懌、報罷。 即報 甲已處分,不復更議。 允,然猶虛位以俟 貪縱如郭勛,亦不欲 於是給事中饒秀劾甲 漢已蒙詰譴,言、應奎所奏皆用人 帝責令置對,停獻夫俸一月,郞 吏部| 再議。 人言。 阿附 小 甲 疵。 ,敕都察院嚴禁吏 具疏 必使大臣横行, 自劉 當 是時 自 永 明 一帝惡 昌後, -知所

以故官兼武英殿大學士入閣輔政。 靉 十年 及門、 秋 了、獻夫潛入西樵,以疾辭。旣而 有 詔召還。 獻夫疏辭、舉 初,賜獻夫銀章曰「忠誠直諒」,令有事密封奏聞。 梁材、汪鋐、王廷相自代。 (使命再 至,云將別用 ,乃就道。 帝手 詔褒答,遺行人蔡靉趣 明 年五月至京,命 獻夫

大稔遂被逮削籍。 下維 中。 或 恩威不測 其時桂萼已前卒。 家,故獻夫掌吏部而彗見。帝怒,下之獄。 會大稔 、少保,乃贈太保,諡文襄。 獻夫飾恬退名,連被劾,中恧。 獻夫緣議禮驟貴。 新庶政,請 性警敏,善屬文。 夏言,字公謹,貴溪人。父鼎,臨淸知州。言舉正德十二年進士,授行人,擢兵科給事 坐事 列 傅 ,居職二歲,三疏引疾。 落職、疑獻夫爲之,遂上疏列其不法數事,詞連霍 第 八 日視朝後,御文華殿閱章疏,召閣臣 4-四 十月彗見東井。 張璁最龍,罷相者屢矣。 及居言路,謇諤自負。 與應、博共事、持論頗平恕、故人不甚惡之。 夏 盲 帝優詔許之,令乘傳,予道里費。 雖執大政,氣厭厭不振。 御史馮恩詆獻夫兇奸肆巧辨, 獻夫亦引疾乞休,優韶 霍韜、黄宗明言 世宗嗣 面決。 ·位,疏言:「正德以來,壅蔽已極。 或事關大利害,則下廷臣集議。 事一不當,輒下之吏。獻夫 獨帝欲殺張延齡,常力爭。 韜。 播 不 獻夫疏辨,帝方眷獻夫, 家居十年卒。 龙。 弄威福,將 五一 ナレ 不利於 先已加柱

見帝

而

今陛

見,輒稱疾不報。

家

人烟黨橫於郡中

鄕

人屢訐告,僉事龔大稔

聽之。

獻夫還

朝,

孎

大稔。

國

歸,上之朝,至是復賜如故。

吏部尚書王瓊卒,命獻夫掌之。

獻夫家居,引體自尊,

監司

謁

之。 不 宜 謀及 奉 詔 褻近 偕 御 史鄭本公、主事汪文盛覈親軍 徑發 八中旨 聖意所予奪,亦必下內閣議而後行,絕 ·及京衞冗員,汰三千二百人,復條九 .壅蔽矯詐之弊。」帝嘉納 事 以

輦下爲

肅

凊

力爭 者。教被逮 在 副 上。 使 文武 牛鸞 不 請改後宮負郭莊田爲親蠶廠 嘉靖 可 獲 方 初 永平知府郭九皇。 諸疏 賊 面官履歷進御,正德後 ,偕御史樊繼祖等出按莊 中交通名籍,言請毀之以安衆心。 率諤諤,爲人傳誦 莊奉 、公桑園,一 漸廢,以言請復之。 夫人弟那 田、悉奪還民產。 屢遷兵科都給事 厢 切禁戚 海、肅 孝宗朝, 》里求請! 奉夫人弟顧福,傳旨授錦 中。 七年,調 劾中官趙霧、建昌侯張延齡,疏凡七 令吏、兵二部每季具 勘青羊山 及河南、山 吏科。 平敗 東奸 功罪,論奏悉當。 人獻 衣 兩京大臣及 世 民 千戶,言 H 王 府

爲巡撫。 議 事 南 敢 霍 北 決,帝卜之太祖亦不吉,議且 郊 當 之說,與分建二郊合,令字敬諭旨,言乃請分祀天地。 禮志。 元力。 ?時、帝銳意禮文事 吏部推代如圭者、帝不用、再推及言。 言自是大蒙帝眷。 帝大怒,下韜 以天 獄 寢。 郊壇 降璽書獎言,賜四品服俸,卒從其請。又贊成二郊配饗 地合祀非禮、欲分建二郊 會言上疏請帝親耕 I 興,卽命言監之。 御史熊爵謂言出如圭爲己地,至比之張綵。 南郊 并 延綏饑、言薦愈都 ,后親蠶北 廷臣持不可、字敬亦難 日月而 郊,爲天下倡。 四。大學士張字敬不 御 史李如圭 之,詹 帝以

帝 切 責 爵,令言 好辨。 而言 不 车 許 爵 且解新 命 帝 乃 11-

眉 侍 彭 定文 皆 欲 敬 澤 郎 輯 目 疏 驟 仍 排 廟 郊 辨 疎 用 孚 嶭 彭 朗 祀 禮 求 敬 掌院 澤 美鬚 典 侃 爲 去 頥 獄 爲 指 及 成 事 ",下言: 書 大 帝 太 百 0 、 髯 ,音· ·,擢言侍讀學士,充纂修官,直 常 禘禮、帝益喜。 僚, 顧 踰 諸 卿 月,代李時爲本 法司。 無敢 吐弘 不右 人 、厚、爲 與 记,兩· 楊,不 已,帝覺字敬 抗 兩解 省 操鄉音。 十年三月遂擢 人遂有 之。 言自 部尚 言 隙。 以 書。 曲 旣 受帝 毎 乃能 進 灦 言抗疏 去諫官未浹 經筵 办 與 講,帝必目 知 字敬 詹事公 学敬、 , 獨 劾学 日講, 不 而 兼 爲 獻夫 釋言。 敬 公歲拜六 屬 仍兼 翰 下 及 欲 林學 o 吏部 八月, 韜 吏 学敬 大用 卿 科都 士、掌院事、直 爲 尙 難、益 前 功 之。 書 四 給 大 此 郊 方 事 害 獻 未 学 I 以 中 言 敬 强 夫 成 有 寵 進言 忌彌 也 直 講 言 厚 孚 言 叉 如 自 敬、 甚, (贊帝 禮 故 亦 部 遂 獻 怨 與 言 更 帝

賜 閣 繡 臣 大禮」大 李時 一人詔 蟒飛 數召 時 止 、翟 大夫 魚 見, 獄 麒 獄 諮政 遠竄 鑾 鹏 得 猶 取 服 悪 罪 之,言 充 事 学敬 、玉帶 諸 下,善窺, 位。 臣。 引罪乃已。 ,恃言抗之。 兼 帝每作詩 帝旨、 帝大怒,令言劾。 金、上尊 一,有 朝 所 以是大 言旣 、珍饌、時物 傅 賜 言 以 得公卿 悉酬 言謂 賜 開 敏結帝 銀 無虛 童 和 希 間 禮、金 勒 聲。 月。 知,又 石 傯 以 ·密封 帝 無 進, 制 他 折 言事 作 腸 節 帝 請 禮 下 益 樂,多言爲 ,文曰「學博才優」。先後 士 喜 帝 寬 御 奏對 史 恕。 喻 應 希禮 尙 帝 制 責 書 時 冒 、石金請 倚 所 對 待 狀 議 立

時卒,言爲首 政多 火,延 臣 氣 少 讎 無加 傅兼 涿 言 /自言出 驕 不 郭勛 L 太子 柱 郎 獻 李時 十五 或 太 中 輔。 夫 者,言所 顧 傅。 張 復 帰臣 帳 年 元 十八年,以祗薦皇天上帝册 3 相 孝、 ,帝付言疏六亦焚。言當 以 繼 閏十二月遂兼武英殿 順 入, 恃先達且年長, 頗 李遂 自 入 天府 擬 輔 也。 0 與 尹劉淑 知帝眷言厚,亦 小 件, 相 即奏謫之。 事 • 韜 獨 欲 大學士入參機務。 言 表, 引 不敢與較。 有 罪, 所 相 皇子生, 加 미 攻訐。 與勛等合 少師、 否。言意 已 帝 韜卒 特進光祿大夫、上柱 而 賜 一謝,被 不悅 扈蹕 皆謝 言 不 甚 勝 別鼎臣 譙責焉。時 謁 事 渥 , 陵 議 事 一,還至 遂 詳 初加 禮諸 :網傳 不 敢 太子 沙河 李時 人獨 與爭。其冬, 國 中 太保,進 霍韜 一言庖 爲首輔 信 阴世人 由 在 是

解 取。 怒日 嵩 益 口 也。 懼 再請 命止行。 疏 一言自 削 武 定 小 令表質, 表質 謝 侯 勳階 郭 卑官,因 ·言乞俟還京。 請発 復 勛 帝自是不 以 得幸 以 追 少傳、太子太傅入直,言疏謝。 字敬 少保 銀章 ,害言寵。 尙 議郊 ·悅言。 手 帝報 書大學士 敕,爲 禮 進,乃怠慢不 罷,意大不懌。 而禮 帝幸大峪山, 子 致 孫 部尚書嚴嵩亦心妒言。言與嵩 仕。 白 世榮、詞甚哀。 言乃以手敕 恭 言進居守敕稍 嵩知帝指,固 進密疏 帝悅、諭令勵初忠、秉公持正、免衆怨。言 四百餘,幷銀章 不用賜章,其悉還累所 帝怒不 遲 以請,帝 解,疑言 帝責讓 扈蹕 乃 上之。 日 承天,帝謁 一言懼 毁 :「禮樂自天子出 損,令 降手敕。」 居數 請 罪。 禮 顯陵畢, 日, 部 帝 怒 追 言 大

列傳第八十四 夏言

師,進 言等請 J) 責 知 所 吏部 云 惶恐謝 衆 ٠, 尙 帝 怨者 書 復 讓 華蓋殿。 1,郭勛 言傲慢,并責 乃 已。 輩 也,再 未 江 幾, 淮 開臣。 雷 疏 賊平,璽書與 震 謝 奉 0 天殿 已,乃還所追 謂 自 處不敢後他 蒯 召言 賜 及鼎臣 銀章 金幣,兼 人,一 一,不 御書。 支大學士 志 時 至 孤 陜 立,爲 。 帝 西 [奏捷, 俸 復 詰 衆 復 讓,令 所 忌 少師 一。 禮 部 復 劾之。 不

「言、勛 乞罷, 疾。 勛 信少傅、太子 後 與言 命 旣蘊 日 非 帝益怒,令以少保、尚書、大學士致仕。 鼎 勛 帝 不允。 皆股 會郭 有 臣 忠謀 所 同 勛 隙 已歿、霍變再 急 事 無 勛 結 脞 也。及 大師 王 ,何堅自愛,負股 昭 疾,言歸 肱 以言官 廷 聖太后 令助己,三人日相 相 一禮部 相 將出都,詣 籍。 妒 重劾 卽 何 入,恂恂若屬 崩, 尚書、武英殿大學士,疾愈入直。 言雖在告,閣 給事 出 也 亦 1. 元 耳。」帝 韶 眷倚,姑不 西苑 引 問 中 太子 高 疾 不 搆。 齋宮叩 頷之。 對。 時者,言所厚 在 更然,不敢少 服制 告。 旣 帝 問 而 言官 首 問 京) 一刻 言報 韜死、言、勛 言 謝。 言始聞帝怒己,上御邊十四策 Щ 知帝 侯 歸 言 也,盡發勛貪縱不 疏有譌 帝 齟 崔 何 眷言 撰 時,日:「俟聖 元 聞 齒。 新 清詞 而 字。 **交惡自若。** 惡 有 憐 而 勛 之,特賜 及 寵,直內 霍 帝切 下, 因 他文,最當帝意。言罷 韜 入掌詹事 共 責言, 誕 法 、勃勛。 苑、忌勛。 酒 九廟 後,始敢 饌,俾還私 事 數 言 災,言方以 多 事。 府 勛 ,冀以 謝 取 、數修 辨 請。 罪且乞還家治 遂下 帝 語 從容 第治 解。 叉問 怨。 誖 治勛 勛 疾 ,獨翟變 謾,帝 問元 疾,俟 帝 在 獄 勛 復 何

獎美、賜宴禮部、尚書、侍郎、都御史陪侍。當是時、帝雖優禮言、然恩眷不及初矣。 悉其指授。 二十一年春,一品九年滿,遣中使賜銀幣、實鈔、羊酒、內饌,盡復其官階,靈書

謂非人臣法服,不受,又獨乘腰輿。帝積數憾欲去言,而嚴嵩因得問之。 官高忠監視,言不進敕稾。入直西苑諸臣,帝皆令乘馬,又賜香葉束髮巾,用皮帛爲履。言 居,言忘前語,念興作費煩,對如勛指。帝不悅。又疑言官劾勛出言意。及建大享殿,命中 慈慶、慈寧兩宮宴駕,勛嘗請改其一居太子。 言不可,合帝意。 至是帝猝問太子當何

佑、給事中沈良才等皆具疏論言,且請罪。帝大怒,貶黜十三人。高時以刻勛故,獨謫遠邊。 密,視等戲玩。言官不一言,徒欺謗君上,致神鬼怒,雨甚傷禾。」言大懼,請罪。居十餘日, 獻帝諱辰,猶召入拜,候直西苑。言因謝恩乞骸骨,語極哀。疏留八日, 下手詔曰:「日食過分,正坐下慢上之咎,其落言職閒住。」帝又自引三失,布告天下。御史喬 織。言官爲朝廷耳目,專聽言主使。朕不早朝,言亦不入閣。軍國重事,取裁私家。王言要 使悉陳言罪,當因振暴其短。帝大怒,手敕禮部,歷數言罪,且曰:「郭勛已下獄,猶千羅百 諷言官屢劾嵩。帝方憐嵩不聽也,兩人遂大郄。六月,嵩燕見,頓首雨泣,愬言見凌狀。帝 意,嵩日以柔佞寵。言懼斥,呼嵩與謀。嵩則已潛造陶仲文第,謀斷言代其位。 嵩與言同鄉,稱先達,事言甚謹。言入閣援嵩自代,以門客畜之,嵩心恨甚。 會七月朔 言知甚慍, 言旣失帝 日食旣,

於是嚴嵩逐代言入閣。

次骨。 貴州 選則高 嵩 出 其 上 。 狀,皆造言請死,炳長跪乃得解。 言負氣岸,奴視之。 所譴逐不盡當,朝士仄目。 覺嵩貪恣,復思言,遣官齎敕召還,盡復少師諸官階,亦加嵩少師,若與言並者。 不樂。遇元旦、聖壽必上表賀,稱草土臣。 旨,嵩聞益精治 巡撫王學益、山東巡撫何鰲爲言官論劾,輒擬旨逮訊。 言 簡之戍,唐龍、許成名、崔桐、王用賓、黃佐之罷,王杲、王暐、孫繼魯之獄,皆言主之。 海內士大夫方怨屬貪忮,謂言能壓嵩制其命,深以爲快。 、貴用事,家富厚,服用豪侈,多通問遺。 凡所批答,略不顧嵩,嵩噤不敢吐一 其 事 **嵩必延坐**,親納金錢袖中。 最後御史陳其學以鹽法事劾崔元及錦衣都督陸炳,言擬旨令陳 二人與嵩比而搆言,言未之悟也。 帝亦漸憐之,復尙書、大學士。至二十四年,帝微 語。 以故日譽嵩而短言。信進青詞往往失帝 久之不召, 監司府縣吏亦稍慢易之, 悒悒 所引用私人、言斥逐之,亦不敢救,衡 龍故與嵩善、暐事牽世蕃,其他 而言以廢棄久,務張權。文 帝數使小內豎指言所, 言至,直陵

決之。 河套 未幾,河套議起。言故慷慨以經濟自許,思建立不世功。因陝西總督會銑請復河套,贊 網面 嵩與元、炳媒華其間,竟以此敗。 稱於言。 言倚跳可辦,密疏薦之,謂羣臣無如跳忠者。帝令言擬旨,優獎之者再。 江都 人蘇綱者,言繼妻父也,雅 與銑善。 銑方請復

列

傅

喻 大驚 爲 言 亦 奸 知 銑 辨。 銑 有 始 茂堅 嵩 前 知 巧 蜚 大 喜, 綱 **喧車** 有 弄 語 疏 懼 而 詔 益 戴 一 左 嵩 言 權 聞禁中、謂言 帝 謝 而 獄 銳 香冠 父子 死 附 已入 罪, 不 都 意 [二噫 時年六十有七 知 麗 嵩 Ŕ. 御史屠僑等當言死, 出 嵩腦 若此。 事。 有 專政似司馬懿。在內 言嵩 與元、炳謀,坐銑 師 陛 ! 吾死矣。」 o 其年十月竟棄言市 下。 一、怒不 未嘗 帝 去時怨謗。 蓋嵩 忽 臣 異議, H] 降旨詰 生 與崔元輩詐 解。 死係嵩掌握,惟 再疏訟冤,言:「鸞方就逮,上 今乃 責、語 |交結近侍律斬、網成邊、遺官校逮言。|| | | | 嵩復代仇鸞草奏計言納號 二十七 援議 諸臣受其牢籠,知有嵩 盡 甚厲。 。妻蘇流 爲之以傾臣。 諉於臣。 貴 年正 一議能條以上。 一月 盏· 歸 嵩揣知帝 廣西,從子主事克承、從孫尚寶丞朝慶,削籍 命聖慈 帝責言强 奪言官階,以尚書致仕,猶 嵩靜言庸 曲 意,遂力言 帝 賜保 降諭 君 不 不 金,交關 1 脅衆, 知 從, 不兩 有 違 全。」帝 似 切 唑 河套 嵩 責茂堅等, 爲 下。在外諸 共工,謙 日 復 不省 奸 鸞何 不 鵩 利 可復 念獄 通 疏 恭 事 無意殺 以知 州 攻言, ,語侵言。 連 奪其俸,猶及 成 臣 下 聞 刑 受其箝制, 上 蘇綱,遂下 土 之也。 似王莽, 語,又何 銑 信亦力 部 所坐, 尙 書

貴 所 推轂徐階,後卒能去嵩爲名相。 人抗 言 豪 帝 邁 以 有 爲不黨,遇益厚,然卒爲嚴嵩 俊才,縱橫辨博,人莫能 隆慶初,其家上書白冤狀,詔復其官,賜祭葬,諡文愍。言 屈。 所擠。 既受特眷,揣 言 死 一嵩禍 帝 意不欲臣 及天下, 久乃多惜言者。 下黨比,遂日與諸 議 而

始無子。 妾有身,妻忌而嫁之,生一子。 且得官矣,忽病死。言

竟無後。

宋與所言是非,固 引其君於當道也。 中,乃至遭時得君,動引議禮自固,務快恩讎。 贊曰: 璁、夢、獻夫議尊興獻帝,本人子至情,故其說易入。 兩不相掩云。 言所奏定典禮,亦多可採。 於是知其建議之心,非有惓惓忠愛之實,欲 而志驕氣溢,卒爲嵩所擠。 原其初議未嘗不準情禮 究觀諸人立身本 之

校勘記

- 張錄 明史稿傳七七張瑰傳、世宗實錄卷六六嘉靖五年七月戊子條均作「張祿」。
- 嘗稱· 八年二月乙巳條、國朝獻微錄卷一六張文忠公字敬傳改。 少師羅山而 不名 羅山,原作「蘿山」,據明史稿傳七七張聰傳、 世宗實錄卷二二一嘉靖十
- **兼太子太傅** 太子太師」。 本書卷一一〇宰輔年表、 世宗實錄卷一九三嘉靖十五年十一月己卯條都作「象

列傳第八十四 校勘

記

HUNG TITL

列傳第八十五

以遠方外吏當之,此何理也?漢遣八使巡行天下,張綱獨曰:『豺狼當道,安問狐狸。』今樊 伸,大臣賢者未起用,小臣言事謫者未復,文武官傳陞,名器大濫。災異之警,偶泄雲南,欲 舍致毒之源,專治四肢之末。今內府供應數倍往年,冗食官數千,投充校尉數萬,齋醮寺觀 係朝廷,不係雲南。如人元氣內損,然後瘡瘍發四肢。 無停日,織造頻煩,賞賚踰度;皇親奪民田,宦官增遣不已;大獄據招詞不敢辯,刑官亦不敢 十六年,雲南畫晦地震,命侍郎樊瑩巡視,奏黜監司以下三百餘人。書上疏言:「災異 席書,字文同,遂寧人。弘治三年進士。授郯城知縣。入爲工部主事,移戶部,進員外 席書 弟春 篆 霍韜 子與瑕 熊浹 黄宗明 朝廷,元氣也。雲南,四肢也。 黃綰 陸澄

贵可

郎。

<u>慘職巡察,不能劾戚畹、大臣,獨考黜雲南官吏,舍本而治末。</u> 乞陛下以臣所言弊政,一切

列 傅 第

八 + Ŧi.

席

審

釐革。 他大害當祛,大政當舉者,悉令所司條奏而興革之。」時不能用。

尋以右副都御史巡撫湖廣。中官李鎭、張陽假進貢及御鹽名斂財十餘萬,書疏發之。 士始知學。屢遷福建左布政使。寧王宸濠反,急募兵二萬討之。至則賊已平,乃返。 武宗時,歷河南僉事、貴州提學副使。時王守仁謫龍場驛丞,書擇州縣子弟,延守仁教

之,全活無算。 嘉靖元年改南京兵部右侍郎。江南北大饑,奉命振江北。令州縣十里一廠,煮糜哺

別 宜定號曰『皇考興獻帝』。別立廟大內,歲時祀太廟畢,仍祭以天子之禮,似或一道也。 也。然尊無二帝。陛下於武宗親則兄弟,分則君臣。旣奉孝宗爲宗廟主,可復有他稱乎? 慈聖宜稱皇母某后,不可以興獻加之。獻,諡也,豈宜加於今日。」 爲天子,慈聖設無尊稱,可乎?故尊所生曰帝后,上慰慈闈,此情之不能已也。 宜稱曰『皇考興獻王』,此萬世不刊之典。 車晏駕之後。議者以陛下繼統武宗,仍爲興獻帝之子,別立廟祀,張璁、霍韜之議未爲非 十三子出爲人後,今上以興獻王長子入承大統。一英宗入嗣在袞衣臨御之時,今上入繼在宮 以 廟 初、書在湖廣、見中朝議「大禮」未定、揣帝向張璁、霍韜、獻議言:「昔宋英宗以濮王第 祀則大統正而昭穆不紊,隆以殊稱則至愛篤而本支不淪, 尊尊親親, 並行不悖。 禮臣三四執奏,未爲失也。然禮本人情,陛下尊 爲今日議, 至

列傳第八十五 席審

夫

得

持,必有一是。陛下擇其是者,而非者不必深較。 學具疏幷上之。 議,且乞遣官勘振荒狀。 力,書進又不由廷推,因交章詆書,至訾其振荒無狀,多侵漁。書亦屢辭新命,幷錄上大禮考 書汪俊以爭建廟去位, 比至德州,則廷臣已伏闕哭爭,盡繫詔獄。 議旣具,會中朝競詆張璁爲邪說,書懼 帝大喜, 特旨用書代之。 帝爲遣司禮中官,戶、刑二部侍郎,錦衣指揮往勘,而趣書入朝益 趣召 入對。 無何,詔改稱獻帝爲本生皇考,遂寢召命。 故事, 不敢上,而密以示桂萼,萼然其議。 禮部 唐馳疏言:「議禮之家,名爲聚訟。 乞宥其愆失,俾獲自新。」不允。 長貳率用翰林官。是時廷臣排異議益 三年正月, 會禮部尚 兩 議相

其年八月入朝,帝慰勞有加。 踰月乃會廷臣 大議,上奏日

爲伯。 後。 以伯爲父,以父爲叔,倫理易常,是爲 義固 帝以私意立定**陶王,始壞三**代傳統之禮。 禮經所載,乃大夫士之禮,不可語於帝王。伯父子姪皆天經地義,不可改易。今 已乖悖。 三代之法,父死子繼,兄終弟及,自夏歷漢二千年,未有立從子爲皇子者也。 今陛下生於孝宗崩後二年,乃不繼武宗大統,超越十有六年上考孝宗,天倫大 又未嘗立爲皇子,與漢、宋不同。 大變 宋仁宗立濮王子,英宗卽位,始終不稱濮王 自古天子無大宗、小宗,亦無所生、所 漢成

三代傳統之義,遠出漢、唐繼嗣之私者,莫若祖訓。 祖訓 曰「朝廷無皇子,必

禮,洗漢、宋悖經違禮之陋習,非聖人其孰能之。 敬益隆,始終無間,大倫大統兩有歸矣。 宗仍稱皇兄,莊庸皇后宜稱皇嫂。 入太廟,於正統無干,尊親兩不悖矣。一遵祖訓,允合聖經。復三代數千年未明之典 后,伯母也,宜稱皇伯母。 及文武諸臣皆議曰: 皇兄。今陛下於獻帝、章聖已去本生之稱,復下臣等大議。臣書、臣聰、臣傳、臣獻夫 兄終弟及」。 則嗣位者實繼統,非繼嗣也。伯自宜稱皇伯考,父自宜稱皇考,兄自宜稱 世無二道,人無二本。孝宗皇帝,伯也,宜稱皇伯考。昭聖皇太 獻皇帝,父也,宜稱皇考。章聖皇太后,母也,宜稱聖母。 尤願陛下仰遵孝宗仁聖之德,念昭聖擁翊之功,孝 奉神主而別立禰室、於至親不廢、隆尊號而不

議上,詔布告天下,尊稱遂定。

詳議以聞。」書復集衆議,極言不可,乃已。 諛小人,妄論山陵,宜下法司按問。」帝報曰:「先帝陵寢在遠,朕朝夕思望,不勝哀痛,其再 臣上言:「顯陵,先帝體魄所藏,不可輕動。昔高皇帝不遷祖陵,文皇帝不遷孝陵。 褫,希旨請遷獻帝顯陵梓宮北葬天壽山。工部尚書趙璜等斥其謬,帝復下廷議。 書乃會廷 帝旣加隆所生,中外獻諛希恩者紛然遝至。錦衣百戶隨全、光祿錄事錢子勛旣以罪 全等諂

唐以「大禮」告成,宜有以答天下望,乃條新政十二事以獻,帝優旨報焉。 大同軍變,

EIJ 殺巡 王守仁入閣, 撫 書持 張 文錦 不 F , , 請討 燬總兵官江桓 且曰:「今諸大臣皆中 之,與 (政府: 即, 件 0 而出 時執政 材, 故 帥朱振 者費宏、 無足與計 於 獄, 石珤、 天下 令 代恒。 事。 買詠 定 , 書 帝 亂 因 濟 ر]، 時, 弗 而 善 命 非守仁 之, 也, 乃 諭 不可。一 力 禮 薦 部 鑄新

書爲

大臣,當抒猷略,共濟時艱,何以

中材自諉。」守仁迄不獲柄

用

『天子七 飾 上,力言不可,書亦三疏如 藩 四 奸。 王 親 追崇帝號, 廟 四 乃議 年, 廟,三昭 德祖居北,後改 光祿寺丞何淵請建世室, 別立禰 何淵 三穆』。 廟,而世室之議竟寢 乃欲比之太祖、 同堂異室。 **周以**文、武有大功德,乃立 速議。 帝遣 太宗, 祀獻皇帝於太 議 中官卽 桃 則 立世 以太祖擬文 其家渝 「室於太廟,甚無據。」 廟 世室,與后 之,害復密疏 世室,太宗 帝 命禮官集議, 稷廟皆百 切 擬武 不報。 諫 0 世 世 帝 書等上 一不遷。 室。 不 頃 (之) 張 ·悅,責 今獻 議「王制 我太祖立 聰特 皇 以 帝以 、畏衆 奏

聞 ,禮官實無所據,惟聖 國之歡 五 年秋 心以祀 章聖太后將謁世 先王,此天子大孝也 明 、裁酌。 鄭, 且 禮官議不合。 世 廟 引。」報聞 旣成,宜 有 書以目眚在告, 肆赦 之典, 請 盡還議禮 上言:「母后謁 遣戍諸 廟, 臣 事 所 出 創

眷 顧隆異, 書 以 雖諸輔臣莫敢望。 禮 受帝. 知,倚爲親 臣。 而書得疾不能視事,屢疏乞休,舉羅 初進大禮集議,加太子太保,尋以獻帝實錄成,進少保。 欽順 自代, 帝輒慰留不

列

傅

第

八

+

五

諡文襄,任一子尚寶丞,異數

也。

其後疾篤、請益力、詔加武英殿大學士、賜第京師、支俸如故。 甫聞命而卒。 贈太傅,

重違書意,特減鑑死遣戍。其他庇陳洸,排費宏,率恣行私意,爲時論所斥。 **遂言:「臣以議禮犯衆怒,故刑官率右卿而重鑑罪,請敕法司辨雪。」及法司讞上無異詞,帝** 贓 私,因劾卿故入鑑罪。帝遣大臣按,不如書言。而書時已得幸,乃命逮鑑入京再訊。 書遇事敢爲,性頗偏愎。初,長沙人李鑑爲盜,知府宋卿論之死。 書方巡撫湖廣,發卿

職 可, 郎龍改授者也。 十二年由禮部右侍郎改吏部。 而 成、當進秩。 變亦留,擢編修。 遂有隙。 弟春、篆。 內閣費宏以春由他官入,與檢討劉夔並擬按察愈事。 後鋐有所推舉,不與春議,春怒詬鋐。鋐訐春前附楊廷和排議禮諸臣,遂落 春由庶吉士授御史,巡雲南。以兄爲都御史,改翰林檢討。 書大怒,疏言:「故事,無纂修書成,出爲外任者。」帝以書故留春,擢修撰, 書由是怨宏,數詆諆。及書卒,帝念其議禮功,累進春翰林學 詔舉堪翰林者, 春欲召還故翰林楊惟聰、陳沂, 尚書汪鋐不 夔亦故御史, 以避兄侍 預修武宗實錄 士。 嘉靖

篆爲戶科給事中。 黔國公沐崑劾按察使沈恩等,篆與同官李長私語崑奏多誣,長即劾

崑。 未上卒。 武宗責長誣重臣,下詔獄。 予祭, 贈光祿 少卿。 詞連篆,幷緊治謫外, 篆得夷陵判官。 世宗嗣位、復故官、

世宗踐 霍韜,字渭先,南海人。 作、除職方主事。 舉正德九年會試第一。 和方柄政、韜上言:「閣臣 謁歸成婚,讀書西樵山,經史淹洽。 職參機務,今止票擬,而

楊廷

裁決

近習。 列 源、伍希儒赴難有功不當罷黜,平逆藩功自安慶、南昌外,不當濫敍。 不 當 左右,衆議而公駁之。 預 朝議,撫按兵備官不當以軍功授秩廕, 輔臣失參贊之權,近習起干政之漸。 宰相得取善之名, 內臣免招權之謗。」因 自今章奏、請召大臣面決施行、講官、 興府護衛 軍不當盡取 言錦衣不當典刑 入京概授官 帝嘉納之。 職 獄, 臺諫 御 史謝 東 班 廠

及「大禮」議起,禮部尚書毛澄力持考孝宗,解私爲 大禮議駁之。 澄貽書相質難,韜三

上書極辨其非。 已,知燈意不可回,其年十月上疏曰:

不合,質之聖賢之道則不通,揆之今日之事體則 按廷議謂陛下宜以孝宗爲父,興獻王爲叔,別擇崇仁王子爲獻王後,考之古禮則 示順

考儀禮喪服章云「斬衰爲所後者」。又云「爲人後者,爲其父母報」。是於所後者,蓋

乎?故曰考之古禮則不合也。 父,可乎。吳諸樊兄弟四人以國相授受,蓋迭相爲後矣,是兄弟自具高曾祖考也,而可 也、孫將謂祖爲父、可乎。唐宣宗當爲武宗後矣、然武宗姪也、宣宗叔也、叔反謂姪爲 無稱爲父母之說,而於本生父母又無改稱伯叔父母之云也。 日「爲人後者爲之子」。果如其言,則漢宣帝當爲昭帝後矣。然昭帝從祖也,宣帝從孫 漢儒不明其義,謬爲邪說

子,瞽瞍殺人,皐陶執之,舜則竊負而逃,是父母重而天下輕也。若宋儒之說,則天下 以天下授英宗,宜舍本生父母而以仁宗爲父母也。臣以聖賢之道觀之,孟子言舜爲天 重而父母輕矣。故曰求之聖賢之道則不通也。 明,授以大業,陛下所以負展端冕,富有四海,子孫萬世相承,皆先帝之德。」蓋謂仁宗 天下者,天下之天下,非一人所得私也。除人之告其君曰:「仁宗於宗室中特簡聖

乎。武宗無嗣,無可如何矣。孝宗有嗣,復强繼其嗣,而絕興獻之嗣,是於孝宗無所 孝宗以伯, 君父一也,旣不忍孝宗之無嗣,獨忍武宗之無嗣乎。若曰武宗以兄,固得享弟之祀,則 夫陛下爲孝宗子矣,誰爲武宗子乎?孝宗有兩嗣子矣,武宗獨無嗣子,可乎。臣子於 武宗嗣孝宗歷十有六年,孝宗非無嗣也。今强欲陛下重爲孝宗之嗣,何爲 獨不得享姪之祀乎。旣可越武宗直繼孝宗矣,獨不可幷越孝宗直繼憲宗 也哉?

益 ,而於興獻不大有損乎?故曰揆之今日之事體則不順也。

之嫌 宗之統亦不絕矣。**然則**如之何而可乎。惟陛下於興獻王得正父子之稱,以不絕天性 繼 盡其誠,則於尊尊親親兩不悖矣。 之恩。於國母之迎,得正天子之母之禮。復於昭聖太后、武宗皇后處之有其道,事之 也,繼其統而已矣,固不屑屑於父子之稱也。惟繼其統,則不惟孝宗之統不絕,卽武 心。 然臣下之爲此議也,其故有三三日前代故事之拘也,日不忘孝宗之德也,日避迎合 今陛下旣考孝宗矣,尊興獻王以帝號矣,則將如斯而已乎。臣竊謂帝王之相

帝得疏喜甚,迫羣議不遽行。而朝士咸指目輯爲邪說。輯意不自得,尋謝病歸。

嘉靖三年,帝議尊崇所生益急,兩韶召韜。 韜辭疾不赴,馳疏言

愈失。 者也。 爲母,雖於禮未合,然宮闈之內亦旣相安。今一旦改稱,大非人情所堪。願陛下以臣 宗曰皇伯考,獻帝曰皇考,此天倫之當辨者也。尊崇之議,則姑在所緩,此大統之當崇 其弊至於利天下而棄父母,徒重天倫,其弊至於小加大而卑踰尊。 故臣謂陛下宜稱孝 今日大禮之議,兩端而已。 曰崇正統之大義也, 曰正天倫之大經也。徒尊正統, 臣之愚慮,則願陛下預防未然之失,毋重將來之悔而已。始陛下尊昭聖皇太后 乃廷議欲陛下上考孝宗,又兼考獻帝,此漢人兩統之失也。本原旣差,則愈議

列

斥,然後委曲申請,務得其歡心。陛下朝夕所以承迎其意,慰釋其憂者,亦無所不用其 極,庶名分正而嫌隙消,天下萬世無所非議,此臣愚慮者一也。 等建議之情,上啓皇太后,必中心悅豫無疑貳之隙。 萬一未喻,亦得歸罪臣等,加賜誅

事、御史俱調外任,練政體,監司、守令政績卓異,卽擢卿丞,有文學者擢翰林,舉貢入仕皆 帝深嘉其忠義,趣令趨朝。 明年擢少詹事兼侍講學士。 韜固辭,且請令六部長貳、翰林、給 與焉,則天下萬世稱頌懿德與天無極。萬一聖母意猶未喻,亦得歸罪臣等,加賜誅斥, 輕忽,凡正旦、賀壽,聖母每致謙讓不敢受納之意,俾宮闡大權一歸昭聖,而聖母若無 對,伏願聖母時自謙抑,示尊敬至意。莊肅皇后母儀天下十六年,聖母接見之儀,不可 然後委曲 嘗伏讀明韶,正統大義,不敢有違,知陛下尊昭聖,敬莊肅,此心可上質天地,下信士庶 廷臣惓惓以尊大統,母昭聖爲請者,蓋預防陛下將來之失,而追報孝宗之職分也。 聖,禮秩雖極尊崇,然其勢日輕。陛下之事聖母,**尊稱**雖或未至,然其勢日重。故今日 而預防之也。願陛下以臣等建議之情,上啓聖母曰,昭聖皇太后實大統嫡宗,至尊無 但恐左右之人不達聖意,妄生疑問,或以彌文小節,遂搆兩宮之隙,此不可不早慮 昭聖之嫡嗣,武宗一人而已。 武宗無嗣,莊肅皇后之屬望已矣。 臣謂陛下之事昭 申請,務得允從,庶宗統正而嫌隙消,天下萬世無所非議,此臣愚慮者二也。 臣

得 擢翰林、陞部院、木宜困資格。 帝不允辭,趣令赴職。 下其奏於有司,悉格

翼。 帝 詔不允。 尙書者。 陽 、楊廷和顓權植黨、籠翰林爲屬官,中書爲門吏, 且欲 六年, 京官補外以均勞逸,議未卽行,躬自蹈之,而又躐居學士徐縉上,何愧 臣嘗建議,謂翰林去留,盡屬吏部,庶不陰倚 還朝, 其年 九月遷詹事 命直經筵 日講。 兼翰林學 | 韜自以 士, 南音力辭 犅 復 固 辭,言「自楊榮 故 H 內閣 翰林遷擢不 講 為腹 請撰古今政要及詩書直解以進。 心,內閣 由吏部,而 陽士奇、楊溥 亦不陰結翰林爲 中書至有 如之。」帝優 以及 進秩

給事 禮定,決不受官,俾天下萬世知議禮者非利官也。 特欲尊崇皇考,遂以官爵餌其臣,臣等二三臣苟圖官爵,遂阿順陛下之意。 林院修書遷官、日講廢子、及巡撫子弟廕武職之非,而以爲己不能力挽,不 塘自代,帝不允。 。非,何以塞天下口。」 「非,何以塞天下口。」 中 明年四月進禮部右侍郎。 陳洸 冤,薦 監生陳雲章才可用。 再解,方允之。六月,「大禮」成, 因固辭 不拜,帝猶不允。 節力辭,且舉康海、王九思、李夢陽、魏校、顏木、 帝優詔褒答,不允辭。 三辭,乃允之。 <mark>苟疑議禮</mark>者爲 超拜禮部尚 韜復奏日:「今異議者謂 書,掌詹事 利官,則所議雖是,彼 府事 11] 臣嘗自慨,若得 隨衆 王廷陳、 趣。 韜 因言 | 循以 唑 且 翰 F 稱 何

蹈先後薦王守仁、 王瓊諸 人, 帝皆納用。 嘗因災異陳時弊十餘事,多議行。 張璁 桂

列傳

第

+

劾|韜 育素 削籍 功, **祀是置** 獄 萼之 中 令輸 無君 護前 能 上 議,將分 書前 父 政 贖還 自遂。 母 七 也 罪, 異 新 哀 祀 璁 處, 職 見帝怒,不敢辨,乃遺言書,痛詆之,復錄其書送法司。 天 謂言官陸粲等受楊 幷以其書進呈。 亦再 地, 郊 尋以母 外親蠶是廢內外防 建二郊,韜極言其非 申救,帝皆不 喪歸 0 帝大怒, 廣東愈事 納。 清指 閑。 南京御史鄧文憲言,宜察韜 賣蹈謗訕 使,兩疏 襲大稔計韜及方獻夫居 帝怒, 帝 不 悅, 力攻一清, 謫之邊方。 君 Ŀ, 責韜問 醜 正懷邪, 奪 上 解繁 自 其 恣。 職 鄉不 獄 رناه 逐下都 踰 言怒, Ifij 言亦 法 容 聰、夢 月 事 其戆, 一, 帝 疏辨, , 察院 疏陳 大稔 終 召 還。 念其議 且 獄 其 力 反被 天 、狀,且 詆 地 韜從 帝從 轁 逮 分 禮

等猶當 用登庸,而 十二年,韜起歷 奏請, 事 始獲參部 改道中 閣 用 臣 杜矯偽。」因守故事 李 大理 事 討 吏部 傳旨 少卿。 | 韜素 左、右侍 り用 剛愎, 鴻臚 久之, 出韜為南京禮部 屢 郎。 卿王 • 與 列 時部事 鋐 道中 道中 爭, 爲 及應天府 鍅等亦嚴憚之。 多主於尚書,兩侍郎 順 天府 尚 丞郭 丞。 書 登庸二人名上。 韜言: 旣 而 輔臣 率不預。 | 鋐罷, 帝 承 天 語 帝嘉其守法,乃 久不 **韜**爭於尚書汪 無 置 可疑,然臣 尚書, 以

怒,下淑相韶獄 順 天府 尹 劉 淑 淑相與韜善,言亦疑韜主之,遂訐韜扈蹕謁陵 相 坐 一所親 贓私 被 鞫 ,疑禮部 尙 書 夏言姻通 判費完陷之,計言請 ,遠遊銀山寺大不 節自

與解 俸一 二二 帝方不直韜,淑相復從獄中摭言他事,帝益怒, 言 乃純)表,逼使行。 奏,而 益 因 級。 忿爭 皇帝 怒,奏韜 次 韜 論言:「請諡故少師費宏爲文憲,不敍宏累被幼狀,按律,增減緊關情節者斬 得與尙 劾 南京諸給事、御史自如。 當議 鈞 廟 相刻韜遷南部怨 且. 號 大罪十餘 書同 乘轎時, 下, 人 韜上疏自理。 請禁小臣 臣 列以證,語頗 一安得 事。 言被劾不 一乘轎 用。 且言彭時、宋濂皆於正德問諡文憲,不避 望,擅取海子魚,與鄉人羣飲郊壇松下,侍郎袁宗儒期 下廷議。 會南京 侵韜 給 ·預,都御史王廷相 韜 事 以爲言,帝復申飭,衆情滋不悅。 中李 給 帝爲停韜俸四月,相等亦停二月 韜 事 充濁 疑充濁倚言爲內主,計充濁爲奸黨,復摭言 中曾鈞騎馬,不避 、曹邁等交章,言近侍之臣不當避道 考訊之。 會禮部侍郎黃宗明、張璧請禁飭 辭服韜主使,乃斥淑相 尚 書劉龍、潘珍 曹邁 廟號,韜 及同 轎 龍 陋 官 爲 不 尹相 與 介雜 民、降解 知 喪不 鈞 小 月. 故 他 等遂 豆 互評 憲 事 如 o

也。 報 提等自 罷 頣 於是鶴鳴 印 指,使天下 ,人皆曰閣臣抑之。 既與言交惡,及言柄用,韜每欲因 辨,亦劾韜 上疏自白 知威福出朝廷,而大臣有李林甫、秦檜者,不得潘弄於左右。」其意爲言發 ,並摭韜居鄉不法諸事。 帝並 給事中李鶴鳴考察謫官,尋復故,人皆曰賄得。 置 事陷之。 帝兩置之。 上言:「頃吏部選劉文光等爲給事中,尋 無何,韜劾南京御史襲湜、郭 宜 諭 東部毋受

列

遺、折 播,宜 臣言 頌勛 進鮮船 據實以奏。」韜對,請問諸郭勛。 祿 ,請假 不勝, ·言:「六飛 讓,晉秩不辭,或有 |有以禁戢之。|帝既下韶安羣情,乃詰||韜 取 內臣 夫 年簡補宮僚, 臣 隸 最後見 貪橫狀, 帝亦不問。 風 直者,第問之夏言, 憲職,循途按之,當備列 南 狩 郭勛 時,臣下多納 命韜 與言有隙, 狐 鼠 鑽結 以太子少保、禮部 明年十 帝責其支詞, 令自述。 院固 賄 乃陰 不 法。 以奏。」章下所司。 月卒於官,年五十有四。 比 竉 權 勛 至各官取賄實跡, 文官惟袁宗儒,武官惟郭勛 , , 曰:「朕昨南巡,卿不在行,受賄事 務令指實。 尙 怨 與 共齡蛇 氣 書協掌 召災,實 言。 一詹事 韜窘, 韜懼 有 時中 府 勛具悉始末,當 所 事 不當帝旨,尋 贈太子太保、諡 乃言:「扈從諸 自 o 外訛言帝 疏辭 其意亦 不 加 ·受饋。 復 秩, 不欺 爲言發。 赴京 南 得 臣 且 幸, 文飯 詆 今訛 無 自 列 何 不 韜 大 如 旣 所 受 言復 因 臣 必 館 屢 遇 欲 顯

萼結 可祀 女 家 入 大 \pm 儿廟 寺 會試 計。 旣 韜 觀 學 而 罪 博 且嘗 比 才高 其不顧公論 遂 郭 娼 「薦「大禮」大獄得罪諸 不 勛 戶市良 量編 以 唐順 舉 進 人女,毀淫祠 隘,所至 如此。 之等爲門生。 士出毛澄 與 人競。 門下 建 臣 ,及廢籍 ,素執弟子 社學, 其議禮時,詆司馬光。 帝頻心厭之,故不大用。 散僧尼, 李夢陽 禮、議 康海等。 表忠節 禮 不合,遂不復稱爲座主。 O 後議薛瑄從祀,至追論光不 旣去,士民思之。 在南 先後多所建白,亦頗 都,禁喪家宴飲,絕婦 始與璁、 及總裁 涉 或

廣西僉事。

子 與 瑕,舉進士。 授慈谿知縣。 鄢懋卿巡鹽行部,與瑕不禮,爲所劾罷。 起知鄞縣,終

家 副 御 史熊蘭 總 衆 **海樂副** 兵 熊浹,字悦之,南昌人。 張 草奏, 傑倚江彬勢,贓累鉅萬, 使胡澧。 授御史蕭淮 撫、按莫敢言。 上之。 正德九年進士。 誘殺熟番上功啓邊釁,箠死千戶以下至 濠倉卒舉 |陝至, 盡發其狀, 傑遂褫 事,卒敗,本兩 授禮科給事中。 職 人早發之力。 寧王宸濠將爲變, 五百 出核 人。 松潘 浹與 又嘗率 邊餉。 同邑

考孝宗 得以兼盡。」疏至,會興王及妃已稱爲帝后,下之禮官。 則尊爲皇太后,而少殺其徽稱,以示 崇之大典,無一而可也。 臣 愚謂興獻王 改 而 從 世宗 今稱乎? 而 踐作,廷議 母慈壽,則興獻母妃當降稱伯叔父母矣。 若仍舊稱了而不得尊之爲后, 追崇禮未定。 |脥馳疏言:「陛下起自藩服,入登大寶,倘必執爲後之說, 不敢 拿以帝 上同於慈壽。 則於慈壽徒有為後之虛文,於母 號,別建 不知陛下承懽內庭時,將 一廟,以示不敢上躋於 此於大統固無所妨,而天性之恩亦 仍舊 列 妃則又缺算 聖。 「稱乎, 母 抑 妃

都 御 史 嘉靖· 協理院事。 初 由 右給 事中出爲河南參議。外艱歸。 明年四月遷大理寺卿,俄遷右副都御史。 六年,服闋,召修明倫 大典成,轉左。 大典。 八年二月逐 超擢右愈

擢右都御史,掌院事。

並下兩人詔獄。 帝方深疾孝、武兩后家、柱實武宗后家夏氏僕、故帝必欲殺之。 下應召 福 自殺之,其鄰人之詞亦然。 京師 詔獄。浹是應召議,執如初。 民張福訴里人張柱殺其母,東廠以聞,刑部坐柱死。 侍郎許讚等遂抵柱死,應召及鄰人俱充軍,杖福姊百,人以爲冤。當是時, 韶郎中魏應召覆按,改坐福。東廠奏法司妄出人罪,帝怒, 帝愈怒,褫脥職。給事中陸粲、劉希簡爭之,帝大怒, 不服,漏姊亦泣訴官,謂母

二十一年召爲兵部尚書,掌都察院事。居二年,代許讚爲吏部尚書。 浹家居十年。 至帝幸承天與近臣論舊人,乃召爲南京禮部尚書,改兵部,參贊機務。

二品六年滿,加太子太保,坐事奪俸者再。 帝於禁中築乩仙臺,問用其言決威福,浹論其妄。帝大怒,欲罪之,以前議禮故不遽 俠知帝意終不釋,遂稱病乞休。帝大怒,褫

職爲民。又十年卒。

思之。 浹 隆慶初,復官,予祭葬,諡恭肅。 少有志節,自守嚴。 雕 由議禮顯、然不甚黨比、尤愛護人才。故其去吏部也、善類多 列傳第八十五 黄宗明

黄宗 明,字誠甫,鄭人。正德九年進士。除南京兵部主事,進員外郎。 嘗從王守仁論

寧王宸濠 反,上江防三策。 武宗南征,抗疏諫,尋請告歸

陛下 惟 當 下爲入繼大統者,臣等考經之論也。人之言曰,兩議相持,有大小衆寡不敵之勢。臣等則曰, 聰、博、黃館及宗明聯疏奏曰:「今日尊崇之議,以陛下與爲人後者,禮官附和之私也。 獻皇帝,聖母章聖皇太后,此萬世通禮。 太祖 議,終日相視莫敢先發者,勢有所壓,理有所屈故也。臣等大懼欺蔽因循,終不能贊成大孝。 言者徇 理 明父子大倫,繼統大義,改稱孝宗爲皇伯考,昭聖爲皇伯母,而去本生之稱,爲皇考恭穆 天下,尊孝宗皇帝爲皇考,昭聖太后爲聖母,而興獻帝后別加本生之稱,朕深用悔艾。今 何 兄終弟及之文,奉武宗倫序當立之韶,入承大統,非與爲人後者也。前者未及詳稽,遽 而 嘉靖 私植黨,奪天子之父母而不顧,在陛下可一日安其位而不之圖乎?此聖諭令廷臣集 不親御朝堂,進百官而詢之日三。朕以憲宗皇帝之孫,孝宗皇帝之姓,興獻帝之子,遵 二年起南京刑部郎中。 大哉舜之爲君,視天下悅而歸己,猶草芥也,惟不順於父母,如窮人無所歸。 張璁、桂萼爭「大禮」,自南京召入都,未上。三年四月, 爾文武廷臣尙念父子之親,君臣之義,與朕共明大 以陛

奉 偷 詔 於 者乎, 天下 ° 此即周禮詢羣臣詢萬民之意也。」奏入,帝大悅,卒如其言。宗明亦遂蒙帝眷。 如 此, 在朝 百工有不感泣而奉詔者乎,更以此告於天下萬姓,其有不感泣而

不懼。 謫 詔 卿。 書責主謀者益急。 福 建 + 明 右參政。 况名搒掠已極,當嚴冬或困斃,將爲仁明累。」帝大怒,謂宗明即其主使,並下詔獄, 年 年擢兵部右侍郎。其冬, 出爲吉安知府,遷福建鹽運使。六年召修明倫大典,以母憂歸。 帝終念宗明議禮功,明年召拜禮部右侍郎。 **宗明抗疏救**,且曰:「連坐非善政。 編修楊名以劾汪鋐下詔獄,詞連同官程文德,亦坐繫。 今以一人妄言,必究主使,廷臣孰 服闋,徵拜光祿

逮。 者遼陽之變,生於有激。今重賦苛徭悉已釐正,廣寧復變,又誰激之。 新撫臣韓邦奇勒兵壓境,揚聲討罪,取其首惡,用振國威,不得專事姑息。」帝不從,經卒被 宗明尋轉左侍郎,卒於官。 遼東兵變,捶辱巡撫呂經。而帝務姑息,納鎭守中官王純等言,將逮經。 法不宜復赦。 宗明言:「前 請令

初,議禮諸臣恃帝恩眷,驅駕氣勢,恣行胸臆。 宗明雖由是驟顯,持論頗平,於諸人中

獨

無畏惡之者。

",字宗賢,黃巖 人,侍郎孔昭孫也。 承祖廕官後府都 事。 嘗師謝鐸、王守仁。

初,爲南京都察院經歷。

明斥其謬。 今復 修 與璁、萼及黃宗明合疏爭,「大禮」乃定。 奏入,帝大喜,下之所司。 絕孝宗 三 倫 以 張 大典 也。 唑 璁、桂萼爭「大禮」,帝心嚮之。 下爲孝宗之子, 尋遷南京刑部員外郎,再謝病歸。 由 是, 使興獻帝不得子陛下 繼孝宗 其月,再上疏 之統, 三年二月,縮亦上言曰:「武宗承孝宗之統十有六年, 則武宗 申前 ٠, 縮自是大受帝知。 乃所 說 以絕 帝念其議禮功,六年六月召擢 不 俄 應有 與獻帝 聞 帝下 廟 矣。 也。 詔稱 及 是使 明年, 本生皇考,復抗疏極 不幾於三 孝宗 何淵請建世室,館 不得子武宗, 一綱淪 光祿 九法 沙 乃所以 辨。 斁 /卿,預 战 叉

學士,直經筵。 遷 謝 大理左少卿。 源 ,多以考察黜。 王守仁中忌者,雖封伯,不給誥券歲祿,諸有 以任子官翰林,前 其年十月,應、轉逐諸翰林於 縮訟之於朝, 此 且請召守仁 未 有 也 外, 輔 引己 政 功若知府邢珣、徐璉、 守仁得給賜 所善者補之,遂用 如 制, 縮 陳槐,御史伍 珣 等亦 爲 少 詹 敍 事 錄 兼侍講 希儒、 縮尋

附璁、專議「大禮」,且交關中貴崔文,得復故職。 大典成,進詹事。 錦衣 大典成,諸人皆進秩, 詔例還爲百戶。 能遷獨不與,大恨。

列

傅

奶田 囑 之, 罷 別 加 主 下 事 能 翁 遷 洪) 法司 -<u>#</u>; 遣 誣 之戍 王守仁 洪 亦 旃 編 席書得 原 籍 爲 召 民 用 , 詞 連縮 及璁。 |縮疏 辨, 且 乞引 避。 帝 優旨

不 令 月 出 與 綰 經 爲 與 地量深 筵 南 京 醴 縮 部 大 相 右侍郎,徧 悲 得。 上疏 璁欲 醜 用 攝 詆 爲 諸 吏部 清 部 即 而 侍郎, 不 <u></u> -床 其 П 一年召 名。 一 令 典試 帝 拜 禮 心 南京, 部 知 左 其 侍 為 並 一清 爲楊 郎 也 一清所 以 浮 抑 詞 文 責 以其 南 其 音

賜 縮 奪 也 供事 守念 龍黜 郎 初 17 以避 o 占 鄒 縮 一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
<p 令鋐 宇 與 福 璁深 益 覆殿, 引 帝終念館 疾,韶館覈實。 相 結。 政館,且? 鋐 逐 至 幼館 議 是,夏言長 禮 掇 功 扱 蔽 及 八 仍 他 不 留 事 報 禮 璁 任 , 而 部, 調 帝 如 守征 散 復 帝 削 命 方 三秩出 調 縮 竟 嚮 自是 外。 去。 用 一之外。 縮上 顯 縮 吏 與 部 力 璁 疏 潛 尙 會 貮 書 自 附 禮 矣 之, 汪 理 部 鋐 , 與 因 請 希 、璁左。 詆 璁指 祈 鋐 穀 爲 導引官,帝 疏 其 璁 發其 佐 鷹 南 醴 留 詔 部

懼 璁 軍 民 外 瘡 |璁怒, 縮獨言 初 大同 勾蒙古為 源甚, 力持不欲遣。 軍 非策。 代王清遣 **變**, 助, 殺總兵官李瑾, 塞上 及源清龍,侍郎 大臣 一大震。 帝委曲窳解之, 綏 耐 巡 <u>بر</u> د 撫 據 張 城 潘 疏下 費往 倣 拒 乃特以命館 急請 禮部 守。 代。 總制 1 未至,而 夏言 兵, 侍 源清怒, 以 郎 且令察軍情, 為宜 郎 劉 中 源 許 清、提督 詹榮等 馳疏 ٠, 而 力 極 已定亂 勘功罪,得便宜行 詆 郤永議屠之。 一抵前 倣 用兵之謬, 叛卒未 城 盡 語優 並 H 獲 恟

以 以勞增俸一等,應及兵部庇源淸,陰抑綰。縮累疏論,帝亦意嚮之,源淸、永卒被遠。 設保甲四隅,創社 鳴金倡亂,無應者,遂就擒。 縮復圖形購首惡數人,軍民乃不復虞詿誤。 館馳至大同,宗室軍民牒訴官軍暴掠者以百數,無告叛軍者。綰一無所問,以安其心。 不問,而密以牒授給振官,按里核實,一日捕首惡數十人。卒尚欽殺一家三人,懼不免,夜 爲叛軍使蒙古歸者,縮執戮之,反側者復相煽。 八母憂歸 .學,敎軍民子弟,城中大安。還朝,列上文武將吏功罪,極詆源清、永。 縮大集軍民, 曉以 禍 福。 罹害者陳牒,綰佯 遂令有司樹木棚, 有

往。」 例請 御史同 承天,趣縮詣行在受命。縮憚往,至徐州先馳使奏疾不能前,致失期。帝責縮 欲因以覘之,乃曰:「**安南亦**朝貢之國,不可以邇年叛服故,不使與聞。其擇大臣有學識者 而舟詣京師爲大不敬,令陳狀,已而釋之。 給諧 縮起家 廷臣屢以名上,皆不用。特起縮禮部尚書無翰林學士爲正使,論德脹治副之。 十八年,禮官以恭上皇天上帝大號及皇祖諡號,請遣官詔諭朝鮮。 事,東、禮、兵三部擇郞官二人備任使。 任 如 其官。 子,致位卿貳。 帝怒,褫尚書新命,令以侍郎閒住,使事 初附張璁,晚背璁附夏言,時皆以傾狡目之。 館數陳便宜,請得節制 帝悉從之。 最後為其父母請贈,且援建儲恩 亦 竟寢。 兩廣、雲、貴重臣,遺給事 久之卒於家 時帝方議討安南, 不馳赴行 帝 方字

列傳第八十五 黃綰

言,請除禮部主事。而帝見澄前疏惡之,謫高州通判以去。 誅戮之刑 輩亦羞稱之,不與爲伍。 故自愈等八人外,率無殊擢。 後, 入都,明倫 號稱太妃,迎養宮中。 聖父宜稱『皇考興獻大王』。 諸希龍干進之徒,紛然而起。 方「大禮」之與 ,

懲朋黨欺蔽之罪。

而最陋者南京刑部主事 大典已定,聰、博大用事,澄乃言初爲 也 ,首繼璁上疏者爲襄府棗陽王祐楒。 庶繼體之道不失,天性之親不泯。」時世宗登極歲之八月也。 即興國之陵廟祀用天子禮樂,祝稱孝子皇帝某。 失職武夫、罷閒小吏亦皆攘臂努目,抗論廟謨。 人誤,質之臣師王守仁乃大悔恨。 歸安陸澄。 至致仕教諭王价,遂請加諸臣貶竄 其言曰:「孝廟止宜稱『皇伯考』, 初極言追尊之非,速服闋 聖母宜上徽 即璁、萼 萼悅其 自時厥

乞附名,應如其請。」帝從之。 未正,亦在 不過六人。 經歷黃綰、通政司經歷金述、監生陳雲章、儒士張少連及楚王、棗陽王二宗室外,所附 及璁、萼、獻夫、韜,所正取者不過五人。禮科右給事中熊浹、南京刑部 切不錄。 嘉靖四年七月,席書將輯大禮集議,因言一近題請刊布,多繁建言於三年以前,若臣書 不取。 有同時建議,若監生何淵、主事王國光、同知馬時中、巡檢房濬、言或 其錦衣百戶聶能遷、昌平致仕教諭王价建言三年二三月,未經採入。 其他罷職投閒之夫,建言於聰、博等召用後者,皆望風希旨,有所覬覦,亦 因認「大禮」已定,自今有假言陳奏者,必罪不宥。 郎中黃宗明、都察院 未純、義多 取者

道,下詔獄嚴訊,令供主謀。 從豐坊之請,入廟稱宗,以配上帝,則應輩已死,不及見矣。 撤共塑像,損其禮樂,增啓聖祠,皆非聖祖之意。請復其初。」帝得奏,大怒。責以毀上不 得預昭穆之次,是幽之也。」又謂:「分祀天地日月於四郊,失尊卑大小之序。 爲兄終弟及。陛下承獻皇帝之統,當奉之於太廟,而張孚敬議禮,乃別創世廟以祀之,使不 至十二年正月,蒲州諸生秦鏜伏闕上善,言:「孝宗之統訖於武宗,則獻皇帝於孝宗實 **螳服妄議希恩**,實無主使者。 乃坐妖言律論死,繫獄。其後又 去先師王號,

狡,乃不足道矣。 亦非諸人倡議之初心矣。唐、韜在官頗有所建樹、浹、宗明能自斂戢,時論爲優。 赞日一席書等亦由議禮受知,而持論差平。 然事以激成,末流多變。 蓋至入廟稱宗,則 至縮之傾

明以卷一门儿十八

列傳第八十六

楊一清 王瓊 彭澤 毛竹淵 汪文盛 鮑象賢 翁萬達

奇童薦爲翰林秀才。 楊一淸,字應寧,其先雲南安寧人。父景,以化州同知致仕,攜之居巴陵。 憲宗命內閣擇師教之。年十四舉鄉試,登成化八年進士。父喪葬丹 少能文,以

徒,遂家焉。

談經濟大略。 服除,授中書舍人。久之,遷山西按察僉事,以副使督學陝西。 在陝八年,以其暇究邊事甚悉。入爲太常寺少卿,進南京太常寺卿。 一清貌寢而性警敏,好

中國茶飲以去疾。 利,番馬不時至。 弘治十五年用劉大夏薦,擢都察院左副都御史,督理陝西馬政。西番故饒馬,而仰給 一清嚴爲禁,盡籠茶利於官,以服致諸番,番馬大集。 太祖著令,以蜀茶易番馬資軍中用。 久 而寖弛,奸人多挾私茶闌出爲 會寇大入花馬池,

傳第

人十

六

楊

淆

五二二五

帝命一清巡撫陝西,仍督馬政。甫受事,寇已退。乃選卒練兵,創平廣、紅古二城以援固 原,築垣瀕河以捍靖虜,劾罷貪庸總兵武安侯鄭宏,裁鎭守中官亢費,軍紀肅然

出塞。 清總制三鎭軍務。 雄 軍爲之節度,多張疑兵脅寇,寇移犯隆德。 武宗初立、寇數萬騎抵固原、 一清以延綏、寧夏、甘肅有警不相援,患無所統攝,請遣大臣兼領之。 尋進右都御史。一清遂建議修邊,其略曰: 總兵曹雄軍隔絕不相聞。 一清夜發火酸,響應山谷間。 一清帥輕騎自平涼畫夜行,抵 寇疑大兵至,遁 大夏請即命一

弘治 餘里。 毁牆 固邊防 輒 捍 四 後 敵 五 時。 末至今,寇連歲侵略。 小堡及靖虜至環慶治塹七百里,謂可無患。不一二年,寇復深入。 入,則固原、慶陽、平凉、鞏昌皆受患。成化初,寧夏巡撫徐廷璋築邊牆綿亙二百 陝西各邊,延綏據險,寧夏、甘肅扼河山,惟花馬池至靈州地寬延,城堡復疎。 臣 在延綏者,余子俊修之甚固。由是,寇不入套二十餘年。 增設衛所,以壯邊兵;經理靈、夏,以安內附,整飭韋州,以遏外侵。 欲戰則彼不來,持久則我師 久官陝西, 頗諳形勢。 都御史史琳請於花馬池、韋州設營衛, 寇動稱數萬,往來倏忽。 坐老。 臣以爲防邊之策,大要有四一修濬牆塹,以 未至徵兵多擾費, 後邊備疎,牆塹日夷。 總制尚書秦紘 是紘 既至召援 所修不足 僅修 寇

今河套卽周朔方,漢定襄,赫連勃勃統萬城也。 唐張仁愿築三受降城,置烽堠千

當千里之蔽 備 面 百 而 河 遮 所,突厥 千 此 餘 邊 患所 里之衝 不敢踰 或 初 以 相 `, 逐使河套沃壤爲 舍 山牧馬。古之舉大事者,未嘗不勞於先,逸於後。夫受降據 受降 尋而不可解 而 衞 東 勝 也 寇巢穴。 已失 誠宜 復 面 2 守東勝 深山 一之險。 大河, 了, 因 其後 河 勢乃 又輟 爲固,東接大 在彼 東勝 以 而 就 同 寧夏外 延綏 西屬寧夏, 三面 險 則 泛反南 以一

使河

套

方千

里之地,

歸我耕牧,屯

田

數百

萬

畝

省

內

地

轉輸,策

之上

也。

如

或

不

能,

及

今增築

防邊,敵

來有以待之,猶

愈無策

募;自 先 間 宜 因 議。大發帑 百 人 條 爲 後 僅 罰 具便 墩臺,連 四 ,石澇池 1環慶 米 + 六百石 里。建 宜 金數 以 西 接 延綏 至定邊營百六十三里,平衍 寧夏 + 誣 至 ·萬,使 寧州州 安邊營石勞池 清冒 東路,花馬池 宜增兵備 一清築牆。 破 邊費,逮 至横城三百里,宜設墩 無險, 一 人; 下 而劉 ·錦衣 横城 宜腦者 敵至 瑾 獄 慽 0 以北,黄河南岸有墩三十六,宜修 仰客兵, 清不附己, 大學 百三十一 士李 宜置衞 臺九百座,暖譙 東陽、王鏊力教得解。 里,險崖 一淸遂引 興武營守禦所 峻 疾歸。 阜 九百 可 剷 [間, 守] 其成者,在要害 削 兵不 者三十二里, 復。 仍 軍四 足,宜 致仕歸, 帝 千五 口 其

清故部將 安 化 仇 王 宣鐇 鉞 已 捕 反。 執 之。 詔起 清總制 **淸馳至鎭,宣布德意。** 軍務,與總兵官神英西討, 張永旋亦至, 中官張永監其軍。未至, 清與 、結納、 相得甚歡。

列

傳

第

八

Ŋ

是永勃然起 呂强 之,得召還,拜戶部尚書。 信,公頓首據地泣 極 慨 知 也。」一淸遂促席畫掌作「瑾」字。 水與瑾 |陳海內愁怨,懼變起心腹。 日:「公亦上 有隙 一乘間 一信臣,討賊不付他 ,請**死上前**,剖心以明不妄,上必爲**公動**。 苟得請,即行事,毋須 扼腕言曰:「賴公力定反側。 論功,加太子少保,賜金幣。 上英武,必聽公誅違。 永難之曰:「是家晨夕上前,枝附根據,耳目廣矣。」一淸慷 人而付公,意可 知。 」竟如一清策誅瑾。 然此易除也,如國 **瑾誅,公**益柄用,悉矯前弊,收 今功成奏捷,請問論軍 尋改吏部 一家內 永以是德一清,左右 息何。」永日 事,因發瑾奸, 臾緩。」於 天下心。 一一何謂 萬一不

饋謝 直言 給 加 事中王昂 少保、太子太保,廕錦衣百戶。 有所入,緣手卽散之。 朝有 清於時政最通練,而性闊 清 所 因引疾乞歸,帝慰留之。 論 知,夕卽登薦,門生徧 上書言 選法弊,指一清植私 視 朝太遲、享祀 大盜躪中原,一清疏請 再推 大。 天下。 太慢,西內 黨,帝爲 大學士楊廷和憂去,命一清兼武英殿大學士入參機務 愛樂賢士大夫,與共功名。凡爲蓮所搆陷者,率見甄 內閣,不用。 嘗再帥關中,起偏裨至大將封侯者,累累 滴昂 創梵字,禁中 命將調兵。 用尚書斯貴,而進一清少傅、太子 淸更申救,優旨報聞。 宿邊兵,畿內皇店之害,江南織 前後 凡 數 上,皆報 乾清宫災、韶求 可。 然不絕 、太傅。 盜平,

者,嗾 倖, 極 陳 帝 带 張 武 弗 政 永 學 省 |尋得罪 中 生 朱 有「 寧 大周 罷 狂 與 言 江彬 而 訐 惑 義子錢寧用 輩聞 聖 清陰事 聽 之, 一匹 而 夫 大怒。 搖 事 以寧 0 國 是, 寧故善一 使優 爲 禁廷 内 人於. 主。 雜 清,有搆之者 帝 給事 介冑 前 御 爲 之夫 史周 蜚 京京 語 金、陳軾 因 「蓄怨 師 刺 無潛 譏 0 等交 清。 籬 會災異, 之託 章 時有考察罷 劾 」語,譏 大周安言, 清 自 切 近

交薦 兩 一清, 世 宗 」, 賦 爲 乃遣 詩 世 賡 子 官賜 和 時 以 一數。 獻 金幣 王嘗 存問,諭 言楚有 清從 以 容諷 \equiv 宣 一傑,劉 召 止、帝 期 大夏、李東陽 沙越 遂不爲江、浙 使 有言。 及一清也, 凊 陳 謝 特 心識 予 之。 子官 及 刨 中書 位, 舍 廷

嘉靖

年

十二月戊午

韶一清以

少傅、太子

太

《傅改

兵部

尙

書、左都

御

史,總制

陝西

邊

軍

務

請究、

主

使

市

不

聽

清乃

力請

骸

骨

歸

賜

敕

褒

諭

給夫

/廩

如

制。

帝南

征,

幸

清第

0

則 刺 故 鼠 相 西 行 邊,自 海 時 為 É 西寧洮河害,金獻民言撫便,獨 一清始。 諸 將 肄習行 溫 詔褒美, 陣、嘗日 比之郭 無事 子儀。 時 當 一清請剿。 如 有 清至是三爲 事 隄 防 士 有 魯番 事 總制 求貢, · 時當 部 如 陳 無 曲 九 皆 事 嚋 鎭 踴 欲 靜 躍 絕之, 喜。 亦不

秩 何 、獻皇帝 召一清 張 璁等 實 (錄成)加太子 爲 力排 吏部尚書、武英殿大學士。 費宏,御史吉棠因請還 太師、謹身殿大學士。 一清內閣 旣 文 見,加 一清以不預纂修辭 給 小 韴 事 仍 中 章僑 兼 太子 、御史侯秩 不 太傅, 非 等爭之。 王 故 憲 事 也。

列

啃 築邊牆, 清, 加 推 繩 特 明 愆 進 一清曩時 成, 糾違」, 左 柱 加 正 國 令密封言 品品 華蓋殿 議 一清因力從 俸。 大學 事 士。 與 段之。 張 費宏已去,一清遂爲首 璁 論 帝爲 張永 一發杯 前 功 金, ,起爲提督 命侍郎王 輔。 團 帝賜 營。 廷 和往, 銀章二, 給事 然 中 陸粲 久之亦 日 請 耆德 增

明倫

{大

}典

邊事 発常 易 也 國 朝 初,「大禮 叉 日 計 講 勸 一大小 侍 席書早赴召,以定大議。 班,朔望朝參,令晨初始入閣 議 無不 起,一清方家居, 傾 聽 見張 璁等旣驟顯,頗引一 璁疏,寓書門人喬宇曰:「張生此議,聖人復起,不能 視 事。 御書、和章及金幣、 淸。 帝亦以 牢 一清 醴之賜 老臣 ,思禮 甚 加 所言

賄狀,帝立罷璁、專,且暴其罪。 桂萼 語。 主寬平。 可。 閣 多所更建。 入 因 璁怒,上疏 璁 内閣 乞骸骨。 與 用 桂 是多 夢旣 亦 不相能。 陰祗一清,又嗾黃綰排之甚力。 帝爲 齟 攻去費宏,意 一清引故事 斷, 兩解之。一清 願 一清屢求 遊賢 稍 (者路。) 一清必援己, 裁抑,其黨積 其黨霍韜攘臂曰:「張、桂行,勢且及我。」遂上疏力攻一淸, 去,且言:「今持 又因災變請戒飭百官和衷,復乞宥議 帝復溫旨褒之。 一清顧請召 不 平。 論者尚紛更,臣 清疏辨,言聰以 錦衣聶能 而 謝遷, 給 事 遷評 中王準、陸粲發璁 心怨之。 璁, 獨主安靜,尚 能遷故 璁欲置 禮路 遷未至, 璁已入內 排己,且 臣罪,璁 之死, 夢招 刻覈, 傍及璁他 益 臣 清

列傳第八十六 王瓊

讚代。 之,贈太保、諡文襄。 假,實以堅帝意俾之去。 子所賣」,宜發背死。 受張永弟容金錢,爲永誌墓,又與容世錦衣指揮,遂落職閒住。 承一清風指 言其受張永、蕭敬賄。 讚乃實韜言,請削一清籍,帝令一清自陳。 ,構成萼罪。 遺疏言身被汚衊,死且不瞑,帝令釋贓罪不問。 一淸再疏辨,乞罷。 帝果允致仕,馳驛歸,仍賜金幣。明年,璁等搆朱繼宗獄,坐一淸 帝果怒,令法司會廷臣雜議。 帝雖慰留之,而聰復召還,韜攻益急,且言法司 **璁乃三上密疏,引一清贊禮功,乞賜** 出刑部尚書周倫於南京,以侍郎 一清大恨曰:「老矣,乃爲孺 後數年復故官。 寬 許

兩,或比之姚崇云。 中機宜。 清生而隱宮,**貌寺人**,無子。博學善權變,尤曉暢邊事。羽書旁午,一夕占十疏,悉 人或訾己,反薦揚之。惟晚與聰、博異,爲所軋,不獲以恩禮終。然其才一時無

事爲志。 王瓊,字德華,太原人。成化二十年進士。授工部主事,進郎中。出治漕河三年,臚其 繼者按稽之,不爽毫髮,由是以敏練稱。 改戶部,歷河南右布 政使。

正德元年擢右副都御史督漕運。□明年入爲戶部右侍郎。 **衡府有賜地,燕不可耕,勒**

明

年春 糗,則屈指計某倉、某場庤糧草幾何,諸郡歲輸、邊卒歲採秋靑幾何,曰:「足矣。 也。」人益 善鈎校。 償 民 出 ,所司 租以爲常 ,廷推吏部侍郎 奏遲,尚書顧佐奪俸,而瓊改南京。 爲郎時悉錄故牘條例,盡得 以瓊爲才。 ,王反誣民趙賢等侵據。 ,前後六人,皆不允。 其斂散盈縮 瓊往按,奪旁近民地子之,賢等成邊,民多怨者。 最後以瓊上,許之。 已,復改戶部。 狀。 及爲尚書,益明習國計。 八年進尙書。 坐任戶部時邊臣借太倉銀未 瓊爲人有心計, 邊帥請芻 重索妄

請於河間設總兵一人,大名、武定各設兵備副使一人,責以平賊,而檄順天、保定兩巡撫、嚴 今內 數受陰齊,累加至少師兼太子太師,子錦衣世千戶。及營建乾清宮,又廕錦衣千戶者二,寵 請發兵剿 要害爲外防,集遼東、延綏士馬於行在,以護車駕。 邊 遇冠諸尚書。 方猶可,未有內地而論首功者。 地征討,惟以蕩平爲功,不計首級。」從之。帝時遠遊塞外,經歲不還,近畿盜竊發。 十年 代陸完爲兵部尚書。 瓊請密敕勘糧都御史許廷光,出不意擒之,無一脫者。 時四方盜起,將士以首功進秩。瓊言:「此嬴秦弊政。 今江西、四川妄殺平民千萬、縱賊貽禍、皆此議 中外侍以無恐。孝豐賊湯麻九反,有司 四方捷奏上,多推功瓊, 所致。 行之 自 瓊

十四年,寧王宸濠反。 瓊請敕南和伯方壽祥督操江兵防南都,南赣巡撫王守仁、湖廣

巡 親 撫南、贛,假便宜提督軍務。 撫秦金各率所部趨南昌,應天巡撫李充嗣鎭京口,淮揚巡撫叢蘭扼儀眞。 征 了持三日不下。大學士楊廷和趣之,竟下親征詔,命瓊與廷和等居守。 先是,瓊用王守 比宸濠反,書聞,舉朝惴惴。 瓊曰:「諸君勿憂,吾用王伯安 奏上,帝意欲

赣州,正爲今日,賊旦夕擒耳。」未幾,果如其言。

又陷雲南巡撫范鏞、甘肅巡撫李昆、副使陳九疇於獄, 彬等力也。陸完敗,代爲東部尚書。 所誅賞,多取中旨,不關內閣,弗能堪。 廷和,帝愈不直瓊,下廷臣雜議。 瓊才高,善結納。 厚事錢寧、江彬等,因得自展,所奏請輒行。 坐交結近侍律論死,命戍莊浪。 瓊忌彭澤平流賊, 明年,世宗入繼,言官交劾瓊,繫都察院 中外多畏瓊。 聲望出己上, 構於錢寧, 中澤危法。 瓊復訴年老,改戍綏德。 其能爲功於兵部者,亦 而大學士廷和亦以瓊 獄。 瓊力計

詔獄。 瓊 兼 和者都 一不果。 張璁、桂萼、霍韜用事,以瓊與廷和讎,首薦之,不納。至嘉靖六年有邊警,萼力請用 御史代王憲督陝西三邊軍 萼復言瓊前攻廷和,故廷 帝亦憫瓊老病,令還籍爲民。 臣羣起排之。 御史胡松因劾導謫外任,其同官周在請宥松,並下 帝乃命復瓊尚書待用。 明年遂以兵部尚書

衆 二千求內 土 魯番 屬。 據 哈密,廷議閉關絕其貢,四 沙州 番人帖木哥、土巴等,素爲土魯番役屬者,苦其徵求,亦率五千餘人入 年矣。 至是,其將牙木蘭 爲
會速
檀滿
速
見
所
疑
,
率

列

按行 以數 時中 患。 附 叉 數數 ·議,如瓊 塞 萬 初 失 畓 入犯莊 下。 騎寇寧夏。 利 人 來 ,乃獻還哈密,求通貢, 乞歸羈留使 寇聞 論。 浪 ,徙帳遠遁。 連 ,瓊部諸將遮擊之, 霍韜難之,瓊再疏請詔還 爲 已又犯靈州, 參將雲昌等所敗。 諸軍分道 瓊督遊擊梁震等邀斬七十餘人。 斬數 出, 其引 7 縦野 番使,通 級。 瓦 臣 刺寇 , '燒,耀兵而還。 俄由紅城子 而 貢 語 肅 如 多 州 故。 謾。 者, 文, 瓊 遊擊彭濬擊退之。 自 是 奏乞撫納,帝從兵部尚書王 殺部餉 西域復 其 秋, 主簿 定,而 集諸道精卒三萬 張 文 北 賊旣 寇常 明。 失援, 明年 爲 邊

請 復 百六十, 令致仕。 獵 番 優詔 境上, 先是, 侵暴,恐瓊去,相率乞守臣奏留 撫降七十 獎之。 俄寢 陽 南京給事中丘九仞劾瓊 欲 前 東 詔 ·餘族。 遣 瓊令備 慰 諭。 錄 其西。 功, 會番 加 寇果 太子 大掠 帝慰留之。 大保。 臨洮 入,大敗之。 於是巡: 瓊集兵計 瓊在邊, 撫唐澤、 及璁、萼罷政, 諸番 若籠、板爾 戎備 巡按 1蕩平, 甚飭。 胡明 諸劾璁、萼黨者咸首 西 諸 **哑** 盆靖。 寇嘗 善具陳其功, 族, \subseteq 入 山西得 焚其巢,斬首 甘肅 乞如 軍民 利, 瓊, 素苦 踰 乃 歲

帝大怒,盡逮數等下詔獄,慰諭瓊。 初 帝 惡楊廷 至 十年冬,遣行 和,疑廷臣悉其黨, 人齎敕召 瓊爲 故連用桂萼、方獻夫爲吏部。 未幾,數等亦還職。 吏 部尚書。 南京 御史馬敫等十人力武 花馬池有警,兵部尚書王 及獻夫去,帝不欲授 瓊先 憲請 朝 他 遺

瓊言花馬池備嚴,寇不能入,大軍至,且先退,徒耗中國。 憲竟發六千人,比至彰德,

寇果遁。明年秋卒官。贈太師,諡恭襄。是年,彭澤已先卒矣。

本兵時功多。而其督三邊也,人以比楊一清云。 當正、嘉間、澤、瓊並有才略,相中傷不已,亦迭爲進退。而瓊險忮,公論尤不予。然在

徽。澤鷲出迓,目吏**負其裝。**父怒曰:「吾負此數千里,汝不能負數步耶?」入,杖澤堂下。 不聽。出爲徽州知府。澤將遣女,治漆器數十,使吏送其家。澤父大怒,趣焚之,徒步詣 杖已,持裝徑去。澤益痛砥礪。政最,人以方前守孫遇。遇見循吏傳中。父喪歸 登弘治三年進士,授工部主事,歷刑部郎中。 彭澤,字濟物,蘭州人。幼學於外祖段堅,有志節。會試二場畢,聞母病,徑歸,母病亦 勢豪殺人,澤置之辟。 中貴爲祈免,執

赴,而劉惠、趙鐩等亂河南,命澤與咸寧伯仇鉞提督軍務討之。 以激勸將吏。 使,歷河南按察使,所至以威猛稱。擢右僉都御史,巡撫遼東。進右副都御史,改保定。 正德初,起知真定。閹人數撓禁,澤治一棺於廳事,以死怵之,其人不敢逞。遷浙江副 澤體幹修偉,腰帶十二圍,大音聲,與人語若叱咤。 陳便宜十一事,厚賞峻罰, 始至,大陳軍容,引見諸 未

列

將校,責以畏縮當死。 甫 四 月 ,賊盡平,語詳鉞傳。 諸將校股栗伏罪,良久乃釋。 錄功,進右都御史、太子少保,廕子錦衣世百戶。 遂下令鼓行薄賊, 大小數十戰,

勢復 喻思 史、太子太保,廕子如初。 移師討平之,且平成都亂卒之執知州、指揮者。 俸猖 振。 專代洪鍾總督川、陝諸軍,討四川賊。 時鄢本恕、藍廷瑞、廖惠、曹甫已平,惟廖麻子、 獗 澤督諸軍圍之,卒就擒。澤遂移漢中 如故。澤偕總兵官時源數敗賊,部將閻勳追擒麻子於劍州。 - , 請班師。 請班師益力,詔暫留保寧鎭撫。 未報,而內江、榮昌城復熾。 思俸竄通、巴間, 進左都御 澤又

行。 與鑑謀, 共薦澤 投謾書甘肅,要索金幣。 澤材武 澤至甘州 澤復請還者再,乃召還。 遣哈密都督寫亦虎仙以幣二千、銀酒鎗一賂之,令還哈密城印。 澤久在兵間,厭之。以郷土爲辭,且引疾,推璋及咸寧侯鉞可任。 知兵, 召還理院 ,土魯番方寇赤斤、苦峪諸衞,遣使索金幣,請還哈密。 然性疎闊負氣。 事。 總制鄧璋、甘肅巡撫趙鑑以聞,請遣大臣經略。大學士楊廷和等 巡按御史馮時雍言城未歸,澤不宜遽召。 未行,會土魯番據哈密,執忠順王速檀拜牙郎,同 經略哈密事頗不當,錢寧、王瓊等交齮龁之,遂因 不納 澤以番 未得報, 帝優詔慰勉。乃 人可利陷也, 以其印 朝奏事 此得

初,

兵部缺尚書,廷臣共推澤,而王瓊得之。且陰阻澤。言官多劾瓊者,由是有隙。

澤

臣,摧鋒陷陣非臣所能獨任。」瓊乃奏遣成國公朱輔。 間,挑澤醉罵使聞之,寧果大怒。會寇大入宣府,廷議以許泰將兵, 又使酒常凌瓊,瓊愈欲傾之。 及詔下,罷泰不遣,又不命澤總制,獨令提督兩遊擊兵六千人以行,意以困澤。 澤時時爲錢寧,瓊以語寧,寧未信。 會寇遁,澤還理院事。 瓊乃邀澤飲,匿寧所親屏 澤總制東西兩邊軍務。 澤言「臣文

謀。 驛給 會副 壩。 代巡撫, 州 分兵據沙州 勘失事狀,還報無所引。 梁儲等持之,乃已。 可得也。」滿速兒悅,使其壻馬黑木隨入貢,以覘虛實,且徵賄。 寇圍 使陳九 澤初不知而遣之。滿速兒以城印來歸,留速檀拜牙郎如故。 夫 寫亦虎仙者,素桀黠。 韶斥澤爲民 廩 寧,而 慮他變,質其使於甘州,而驅虎仙出關。 如 制 **嚋繫其使失拜煙答及虎仙** 自率萬騎寇嘉峪關。 分兵綴存禮軍。 ,昆、九疇逮訊。 澤旣去,瓊追論嘉峪之敗,請窮詰增幣者主名。 會失拜煙答子訟父冤,下法司 瓊遂劾澤妄增金幣,遺書議和,失信啓釁,辱國喪師,昆、九疇俱宜 雖居肅州,陰通土魯番숼速檀滿速兒,爲之耳目,據城奪印皆其 寧軍盡沒,遂墮城堡,縱殺掠。 昆謫官、九疇除名。 遊擊芮寧與參將蔣存禮禦之。 等,內應絕,乃復 虎仙懼弗去。 議 釋寫亦虎仙等。 水和。 澤兵遂罷。 滿速兒聞之怒,復取哈密 錢寧從中下其事, 韶澤提督三邊軍務往禦。 虎仙復啗使入寇,曰:「肅 寧以七百人先遇寇沙子 澤已還,鑑亦遷去,李昆 瓊因請遣給 葬乞骸骨歸,馳 大學士 事御 史

守竟罷。 弱。 不可。罷弗遣。 地盜甫息,敕守臣練卒伍,立保甲,懲匿盜不舉者。 保。鎭、巡居中調度,毋相牽制。諸邊各以農隙築牆濬濠,修墩臺, 奉兪旨者, 昆、九疇亦復官。 帝咸嘉納。 一宗入繼,錢寧敗,瓊亦得罪。 多廢格。 四川巡撫胡世寧劾分守中官趙欽,澤因請盡罷諸鎮守。 韶遣中官楊金、鄭斌、安川更代鎭守,復令張剛、劉瑤守涼州、居庸。 部事積壞久,澤覈功罪,杜干請,兵政一新。初,正德時,廷臣建白戎務 澤、鬜臚列成書,次第修舉。又請敕九邊守臣,策防禦方略,毋畫境自 御史楊秉中請召澤,遂卽家起兵部尚書、太子太保。 且撫西南諸苗蠻,申海禁,汰京軍老 飭屯堡,爲經 時雖不從,其後鎭 **外計**。內 澤持

密失國,由澤賂番求和所致,語侵楊廷和、陳九疇等。 訐 帝 疏乞休。 衣千戶劉瓚等, 詔書黜汰, 復求還官, 司禮中官蕭敬請補監局工匠千五百人, 澤皆持不可, 楊廷 類 並從之。 嘉靖 和下獄,澤復劾道。 詔 言者復交劾之,乃加 下,給事御史交章劾澤阻言路,壞祖宗法。 元年,澤言天下軍官,部皆有帖黃籍,用以黜陟,錦衣獨無,於是置籍如諸衞。 帝將授外戚蔣泰等五人爲錦衣,澤爭,不納。 帝因諭言官,惟大奸及機密事專疏奏,餘只具公疏,毋挾私中傷 少保,賜敕 乘傳歸。 錦衣百戶王邦奇懷澤嘗抑己,上書言哈 帝乃從吏部言,停前諭 張璁、桂萼方疾廷和,遂逮九疇廷訊, 在部多所執持。 會御史史道以 澤不自安,累

成邊。澤復奪官爲民,家居鬱鬱以卒。

澤孜 以作忠臣之氣。」不從。)
孜奉國,復爲讒言搆罷。 總制 尚書唐龍言:「澤孝友廉直,先後討平羣盜,功在盟府。 隆慶初,復官,諡襄毅。 今殁已五年,所遺二妾,衣食不給。 陛下起之田間,俾掌 請覈澤往勞,復官加卹, 邦政。

請幷誅敬、霦,中官爲屛氣。 擢 御史,巡按福建、河南。世宗即位,中官張銳、張忠等論死,其黨蕭敬、韋霖陰緩之。 毛伯溫,字汝厲,吉水人。 祖超,廣西知府。 伯溫登正德三年 進 士,授紹 興府 推官 伯溫

計,解官候勘。 歸。 用薦起故官,撫山西,移順天,皆未赴。 嘉靖初,遷大理寺丞。擢右僉都御史,巡撫寧夏。 已,復褫職。 改理院事,進左副都御史。 李福達獄起,坐爲大理時失入,褫職 爲趙府宗人祐椋所

遂 起伯溫右 會安南 十五年冬,皇嗣生,將頒韶外國。 世 都御史,與咸寧侯仇鸞治兵待命。 孫黎寧遣陪臣鄭惟僚等愬莫登庸弑逆,請興師 禮部尚書夏言以安南久失朝貢,不當遣使,請討之。 以父喪辭, 不許。 復 響。 明年五月至京,上方略六 帝疑其不實,命暫緩

列

傳

第

引

不

出

至 至

師 疾 敕 兩廣 禪除始 雲南守臣勘報,而命伯溫協理院事。 起 視 事 其冬遷工部尚 書。 御史何維柏請聽伯溫 終制,不許。 伯溫

瓚不敢決,復請廷議。 略上,且言須兵三十萬,餉百六十萬石。 銀右 破狀 視 庸 帝 聞 意爲 都御史,剋期啓行。 ,復傳檄安南令奉表獻 發兵進討, + 七 可否。 年春 ,黔國公沐朝輔等以登庸降表至,請宥罪許貢。先是,雲南巡撫汪文盛奏登 造使潛 朝論多主不當興師,顧不敢顯諫。 議上無成策,帝不懌,讓瓚,師復止。 。 帝以用兵事重,無必討意,特欲威服之。 地。 帝已敕 及是,下朝輔奏付廷議,愈言不可許。 遵前 韶進兵,文盛又納安南降人武文淵策,具言登庸 欽州知州林希元則極言登庸易取,請即 制下數月,兩廣總督侍郎張經以用兵方 命伯溫仍協理院 而兵部尚書張瓚無所畫, 乃改伯溫兵部尚書 事。 日出師 可

防 致亂後,無敢議修者。 所 一字,給以閒田 轄鎭邊、鎭川、弘賜、鎭河、鎭虜五堡,相近二百餘里,極邊近賊帳。 明 年二月,帝幸承天。 一永除 其赋。 伯溫 韶伯溫總督宣、大、山西軍務。 曰:「變所由生,以任用匪人,非建議謬也。」 卒營之。 邊防賴焉。 錄功,加太子少保。 俄選宮僚,加兼太子賓客。 自巡撫張文錦以築堡 募軍三千

罷 縮。 是時 再下廷議,咸言當討,帝從之。 登庸懼討, 數上表乞降。 帝亦欲因撫之,遣侍郎黃綰招諭 閏七月命伯溫、鸞南征。 文武三品以下不用命者, 縮多 所 要求, 帝怒,

列傳第八十六 毛怕溫

威, 南 宥 子 以 許 而 兩 安南 都 罪 珀 爲 廣 軍 納 聲援。 統 代。 福 令從 郡 其 登庸 定, 使 建 縣降者以 몲 司 事 由帝 籍, 0 檄 湖 大 九 以 〉懼,遺 雲南 伯溫 年秋 廣 幷 登 本不 狼 其 庸 所 等至 巡 土 欲用 還 使詣萬達乞 爲 地授之。 伯溫 官 撫 欽州 都 廣西 汪 兵 兵故 統 等進 文盛 凡 使, 四 于二 ,會總督張經,總兵官安遠侯柳 也。 峒 懸 駐 世 帥 降 重 地 南 萬 襲,置十三宣撫 兵 購購 論 寧, 駐 五. 權令還 詞 功, 千餘 蓮花 澄庸 甚 檄 加 哀。 安南 灘, 人, 太子太保 父子 國 萬達送 聽 臣民, 亦 分三 7,而宣 司, 命 分 o \equiv 哨, 令自 之位 諭 馳 道 諭登庸籍 以天 疏 自 進 署置。 溫 憑祥 以 珣 所 朝 聞 部 興 署已定, 參政 帝 伯溫 伯 土 龍 滅繼絕 溫 大 地、 山间 一翁萬 受 悦。 承 人 思 命 之義, 制 民 會鸞 陵州 達、 歲餘 詔 許之, 納 改 張 入二 款 有 不發 安 罪 岳 罪 宣 南 卽 11: 丽 等 召還,卽 登庸 國 以奇 天 如 爲安 子 詔 恩 書 徵 父 兵

部 劉 內 軍 不悦 官 養 及 內 直 年 、尙膳諸監,素爲]府力士、匠役,以裕 ·, 戎 言,廟 備 年正月還朝, 虚 I 墮。 方 、興、物 伯溫會 中貴盤 力 復 國儲。 難 延臣 理 踞者 繼 院 , 議 功 伯溫 事 上防 命 盡在革中。 o 暫 邊 因 邊 止。 關 上

定 二十四 數 其 有 濫當革者二十餘條, 年 帝 警, 一 事 稱善,立命清汰。 伯 軍 月 溫 張瓚卒 令一 請築京 新。 一伯溫 師 言官 外 凡 宿 錦 代為 城。 建議,請 弊頗釐,而 衣、騰驤諸 兵部 帝已 報 竅 (實新 瓚 可,給事 左右近 衞 貪 御馬 續 軍 習 京 中

郎韓最 幷械 天啓初,追諡 總督翟 <u>一</u> 也。 三年 鵬造成 帝遂削伯溫籍,杖最八十,戍極邊。 寒懋。 秋,順天巡撫朱方以防秋畢請撤客兵。 ,斃方杖下。 御史舒汀言,方止議撤漸兵,而幷撤宣、大,則伯溫 伯溫歸,疽發背卒。 未幾,寇大入,直逼畿輔。 穆宗立,復官,賜卹。 帝震怒, 與職方

力薦於朝,二人遂得任用。 伯 溫氣字沉毅,飲啖棄十人。 臨事決機,不動聲色。 安南之役,萬達、岳策爲多。伯溫

察使。 官諫武宗南巡,杖闕下。 府、被執、誣文盛使刺王。下獄訊治、久之得白、還官。事詳淮王傳。 汪文盛,字希周,崇陽人。正德六年進士。授饒州推官。有顧嵩者,挾刃入淮王祜棨 **嘉靖** 初,歷 福州知府,遷浙江、陝西副使,皆督學校。 擢雲南按 入為兵部主事,偕同

景瑂等皆分據一方與登庸抗,天兵至,號召國中義士,諸方並起,登庸可擒也。 服,多據地構兵。 兵事一決於文盛。 十五年冬,廷議將討安南。 有武文淵者,據宣光,以所部萬人降。 副使鮑象賢言剿不如撫,文盛然之。 以文盛才,就拜右僉都御史,巡撫其地。 獻進兵地圖,且言舊臣阮仁蓮、黎 會聞莫登庸已篡位,安南舊臣不 黔國公沐朝輔幼, 文盛以開

幣。 亦僞。 自 攻破 以官 功成於伯溫,然伐謀制勝,文盛功爲多。 授 自 兵 陳 文 縣 疏 淵 鎭守營,方瀛 地,當交、廣 ,彼必鼓勇 奸 可 少緩,令致仕。 人唐弼請開大理銀礦,帝許之。 文盛以聞,朝議 四品章服,子弟給 使當 面 爲用。」帝悉從之。 水陸 救 之失利。 八百 衝,爲安南 不許。 卒,賜卹 冠帶。 、車里 登庸 旣 、孟艮 如 而 腹 文盛 制 毛伯溫至南寧,受登庸降如文盛議,安南遂定。 裏。 部衆 文盛乃檄安南所部以 多 又招安南旁近諸國 登庸 多來附, 兵象,可備徵調。 文盛斥其妄,下之吏。 及論 益懼,請降, 功,伯溫 文盛列營樹棚蓮花灘處之。 及 兩廣鎭巡官俱進秩,而 土地歸 助討,皆 願修貢, 召爲大理卿。 (俱未) 者, 聽命。 因言黎寧阮 襲職 仍故 職,幷諭 , 乞 発 其 乃奏言:「老撾 九 蓮花灘 氏子,所持印 文盛 廟災,道病 澄庸 保勘,先授 是役也 止

変
銀 者,蒙 歸 地 命 廣

盛劾 仕,卒。 府 尹 嚴 從子 嵩 裁 天啓初、 宗伊 諸 及 其 司 ,字子衡,爲文盛後。 供億,歲省民財萬 孫鵠冒功事 り追諡 一恭惠。 宗伊 議 計 不撓。 嘉靖 萬 曆 十七年進士。 件嵩, 初 , 進南京大理 自 **発歸。** 除浮梁知 隆慶 卿。 初,起 三遷戶部尚書總督 縣,累官兵部郞中。 南京 吏部郎 中,歷 信息場, 楊繼 應天

鮑象賢,歙 列 傅 第 Д 人。 + 六 由進 € 士授御史,歷雲南副使。 伯 溫 毛伯溫檄文盛會師,以象賢領中

屢

擇那氏 斬之。 去。 往招 遷 回籍聽勘。 右 隆慶初卒。 降被殺。 副都御史,巡撫陝西,代石簡撫雲南。初,元江土舍那鑑殺知府那憲以叛,布政使徐樾 後立之。遷兵部右侍郎,總督兩廣軍務。賊魁徐銓等糾倭橫海上,傲副使汪柏等擊 廣西賊黃父將等擾慶遠,擣其巢,大獲。 家居十年,起太僕卿。 簡攻之未克,坐樾事罷,而象賢代之。乃集土、漢兵七萬以討,鑑懼 復以右副都御史巡撫山東。 予象賢一子官。 召拜兵部左侍郎。 入佐南京兵部。 ,仰藥死, 年老引 被劾,

討安南 是誅寰、應。擒回,招還九司,誘殺楷,佯緊訟公丁者給公丁,執諸坐,以兩軍破平其巢。 土 咸 官 舍趙楷殺從子燧、煖,又結田州人韋應殺燧弟寶,斷藤峽瑤侯公丁負固 日 寧侯仇鸞鎭兩廣,縱部卒爲虐。萬達縛其尤橫者,杖之。閱四年,聲績 **弑逆罪**,安能問 ,擢萬達廣西副使,專辦安南事。萬達請於總督張經曰「莫登庸大言『中國不能 萬達,字仁夫,揭陽人。嘉靖五年進士。授戶部主事。 內 應,我且 不自保。 我。』今憑祥州土舍李寰弑其土官珍,思恩府土目盧回煽 先擒此數人問罪,安南易下耳。」經曰:「然,惟君 再遷郎中,出為 大著。 此曹同 九司 之所爲。」 梧州知府。 會朝 亂,龍州 惡共濟, 議將 於 叉

萬達 也。 留 議 之, 割 懾 解 匹 娋 峒 之 其 命 縛 以 屬 以參 不 南 厚遇, 敢 寧 政 降 不 涖 從, 遣之去,忧以 知 廣 峒 其 中 豪黃賢 西 能 策 E 也 相 而 0 天 毛 芟夷 朝 登庸 伯 兵 溫 絕滅 威 始 集 懼 兵 登庸 歷 終 進 陝 爲 遷 剿 浙 大懼 西 下 萬 策。」伯溫然之。 左 江 達 一乃指 右 右 Ŀ 参 一書伯溫, 政。 伯 政 使。 溫乞降。 經 言言 以 會獲 征 揖 安 是役 安南 南 讓 非 而 也,萬達 課 萬 告 者 達 成 T 功 不 功最 南傑, 一上策 П

賞不逾常

格

然帝

遷

几

JII

按

察使。

布

大、 引 戰 騎 永。 輒 同 林 東路 九萬 去。 縛 犯 死 Щ ·; 毋 萬達 大同 西、保定 張 天 萬 事 敢 家 城 三年 帝 中 謹 聞 達 復 口 偵 與 已許之, 陽和 離 賜 誻 候, 總兵官周尚文備 軍 擢 敕 次 入 處 務 右 獎賽。 |開 鐵裹門,故總兵官 明 者 爲 副 賞罰。 兵部 牆六 劾罷 都 Щ 嚴殺 口 御 屢疏 + 撓其議, 諸 宣府 史, 降禁, 毎當 四 處爲 請修 巡撫 里, 陽 總兵官 防秋, 牆 和 違 築 以 敵 陜 張達 , 而 百二 輒 大同 邊牆 臺 西。 發卒 郤 抵 遣 一十八 + 力戦 永 死 舊 騎 尋進 乘 議 副 有 四 章 里,堡七,墩臺 斬崖削坡五 圳 得 自 出 總兵姜奭, 兵部 之。 陰遣 降 大同 一邊,不 邀 人,撫 學,頗 右 叉 東 卒 侍 當 犯 路 之如 傾硃於油 郎 + 薦 復 有 鵓鴿谷、參將 陽 兼 里。 百五五 於 何 斬 和 所 右 邊 獲。 卿、趙卿 親 僉 士 內 工 至宣府 察離 都 樂牆。 五 以是 四,宣府 宼 御 十餘 登 張 史, Щ, 猛 次 沈 西 鳳、諸 帝 者硃 日 知 希 陽 見官 代翟 西路 成。 不聽 敵 儀 河, 其處。 生 情 西陽河 鵬總督宣 兵大集,乃 工邦直 須 進右都 趙卿 乃自大 帑 寇 銀 製萬 遂代 卒 洗 等 歸

列

傅

史。發代府宗室充灼等叛謀,進左都御史。

已,會宣、大、山西鎭巡官議上邊防修守事宜,其略曰:

轉南 要,次則居庸、倒馬、龍泉、平刑。邇年寇犯山西,必自大同,犯紫荆,必自宣府。 宣府,次山西之偏、老。大同最難守者,北路。宣府最難守者,西路。山西偏關以西百 十餘里。凡二千五十餘里,皆峻山層尚,險在內,所謂次邊也。外邊,大同最難守,次 海冶,千二十三里。 五十里,恃河爲險,偏關以東百有四里,略與大同西路等。內邊,紫荆、寧武、雁門爲 北二路,東抵東陽河鎮口臺,六百四十七里。 、插箭嶺、浮圖峪,至沿河口千七十餘里。又東北,歷高崖、白羊,至居庸關一百八 而東、歷寧武、雁門、至平刑關八百里。四又轉南而東、歷龍泉、倒馬、紫荆之吳王 山西起保德州黃河岸,歷偏頭,抵老營,二百五十四里。 凡千九百二十四里,皆逼巨寇,險在外,所謂極邊也。 宣府起西陽河,歷中北二路,東抵永寧四 大同西路起丫角山,歷中 Щ 西 老營堡

皆防,城堡兵各有分地,冬春徂夏,不必參錯徵發。 聲援。比棄極衝,守次邊,非守要之意。宣府亦專備西、中二路,而北路空虛。且連年 三鎮防秋,徵調遼、陝兵馬,糜糧賞不訾,恐難持久。倂守之議,實爲善經。 先年山西防秋,止守外邊偏、老一帶,歲發班軍六千人備禦,大同仍置兵,等、雁爲 若泥往事臨時調遣, 近者數十里, 外邊四時

遠者百餘里,首尾不 相應。 萬一如往年潰牆而入,越關而南,京師震駭,方始徵調,何

益事機。擺邊之兵,未可遽罷。

險與彼共。 曰「王公設險以守其國」。 垣塹之險,險爲我專。 「設」之云者,築垣乘障、資人力之謂也。 百人之堡,非千人不能攻,以有垣塹可 憑也。 山川 之險, 修邊

之役,必當再舉。

夫定規畫,度工**費,**二者修邊之事。 慎防秋,併兵力,重責成,量徵調,實邊堡, 明

出塞,計供億,節財用,八者守邊之事。

因 條十事上之,帝悉報許。 乃請帑銀六十萬兩,修大同西路、宣府東路邊牆,凡八百里。 I

成,予一子官。

又議掣山西兵幷力守大同,巡撫孫繼魯沮之。 暇耕牧,邊費亦日省。 萬達精心計,善鈎校,牆堞近遠,濠塹深廣,曲盡其宜。 初,客兵防秋,歲帑金一 百五十餘萬,添發且數十萬,其後減省幾半。 帝為逮繼魯,悉納萬達言。 寇乃不敢輕犯。 牆內戍者得以

得寡, 阿不孩使石天爵等款鎭遠堡求貢。 萬達 且不能無亡失,故令天爵輸誠。 更事久,帝深倚之,所請無不從,獨言俺答貢事與帝意左。先是,二十一年,俺答 言小王子等九部牧青山,豔中國綠帛,入掠止人畜,所 朝議不納。 天爵等復至,巡撫龍大有執之。 大有進

列傳

第

八

+

六

翁

萬

遣。 掠,威詭能定貢市,遂釋還。俺答阿不孩復遣使款大同左衞塞,邊帥家丁董寶等狃天爵前 漸 ,復殺之,以首功報。

萬達言:「北敵,弘治前歲入貢,疆場稍寧。 輕中國,侵犯四十餘年。 官,將吏悉遷擢,磔天爵於市。 誘而殺之,此何理也。 石天鹤之事,臣嘗痛邊臣失計。 請亟誅實等,榜塞上,明告以朝廷德意,解其蓄怨搆兵之謀。」帝 寇怒,大入屠村堡,信使絕五年。 今復通款,卽不許,當善相諭 會玉林衛百戶楊威為所 自虞臺嶺之戰覆我師,

羈縻, 卒。 究爲辭。 責萬達十日內回奏。 **其瀆奏**, 臣等封疆臣,貢亦備,不貢亦備,不緣此懈也。」兵部尚書陳經等言敵難信,請敕邊臣詰實 屢被殺戮,猶請貢不已者,緣入犯則利在部落,獲貢則利歸其長。處之克當,邊患可弭。 頃之,復至,詞益恭。萬達又爲奏曰:「敵懇懇求貢,去而復來。 未幾,俺答阿不孩復奉印信番文,欲詣邊陳款。萬達爲奏曰:「今屆秋,彼可一逞。 使無擾。 卒不許。 已而使狎至,牢拒之,好言慰答而已。 請限 蓋是時曾銑有復底之議,夏言主之,故力絀貢議,且以復陰事行諸邊臣 萬達還其使,與約。 以地、以人、以時。 悉聽,卽許之貢,不聽則曲在彼,卽拒絕之。」帝責 至期,使者不至。萬達慮帝督過,以使者去 **俺答以通好,散處其衆,不設備,亦不** 今宣、大興版築,正當 殺哨

議之。

萬達議日

戰之後,彼或保聚,或佯遁,笳角時 趨利 未熟 耶、退耶、兩相守耶? 延綏 可任者也 久矣,欲 野之利。 河套本 則 知。 ,套地遂淪失。 輜重在後。 一舉復之,毋乃不易乎!提軍深入,山川之險易,途徑之迂直,水草之有 弘治前,我猶歲搜套,後乃任彼出入,盤據其中,畜牧生養。 我馬出塞三日已疲,彼騎一呼可集。 ·中國故壤。 卽得 然正統、弘治間、我未守、彼亦未取。 數萬衆出塞,亦必數萬衆援之,又以驍將通糧道,是皆至難 小利、歸師尚艱。 成祖三犂王庭, 殘其部落, 動,壁壘相持,已離復合,終不渡河。 倘失嚮導,全軍 我軍數萬衆,緩行持重 含黃河,衛東勝。 一殆矣。 乃因循畫地 被遷徙遠近靡常。 字,捐天險,失沃 後又撤 可則備 譬之爲家,成業 我軍於此、戰 **益固**,疾行 東勝 無、皆 而不 以就

肥瘦 征, 馳擊於黃沙 之衆,千里襲 秋冬馬肥、彼强、我利於守。 我與敵 夫馳擊者彼所長,守險者我所便。 白草間, 共之。 人,一舉失利,議論蜂起,烏能待三。 即彼弱,然坐以待,懼其擾擊我,及彼强,又懼 大非計。 議者欲整六萬衆,爲三歲期。 春蒐食, 秋守邊, 三舉彼必遠遁,我乃 弓矢利馳擊,火器利守險。舍火器守險,與之 即三舉三勝,彼敗而守,終不渡河 春夏馬瘦,彼弱,我利於 其報 復我。 拒河守。 且六萬 夫馬

傅

第

八

版築亦無日。

塞下喘息未定,邊卒瘡痍未起,橫挑强寇以事非常,愚所不解也。 自邊輸河、飛輓之艱不可不深慮。若令彼有其隙、我乘其敝、從而圖之、未嘗不可。今 瞭望者不與,當三十萬衆不止也。 也。 也。 因 其近塞,乘不備,勝則條歸,舉足南向即家門。復食,則深入其地,後援不繼,事勢異 築垣二千餘里,豈不日可成。堡非百數十不相聯絡,堡兵非千人不可居,而遊徼 往城諸邊。近我土,彼原不以爲利。套,自其四時駐牧地,肯晏然已乎。事體異 日伺彼出食,據河守,先亟築渡口垣牆,以次移置邊堡。彼控弦十餘萬,豈肯空食 者見近時搗巢,恒獲首功,昔年城大同五堡,寇不深競,以爲套易復。然搗巢, 況循邊距河,動輒千里,一歲食糜億萬。自內輸邊,

議上,不省。

其後,俺答與小王子隙。小王子欲寇遼東,俺答以其謀告,請與中國夾攻以立信。

達不敢聞。使者再至,爲言於朝,帝不許。

事。 帝怒,切責之,通貢議乃絕。其年八月,俺答犯大同不克,退攻五堡,官軍戰 趨山西,復敗還。踰月,犯宣府,大掠永寧、隆慶、懷來,軍民死者數萬。萬達坐停俸二 二十七年三月,萬達又言諸部求貢不遂,慚且憤,聲言大舉犯邊,乞令邊臣得便宜從 彌陀 Ш 刦

宼 翁太師 俄錄彌陀山功,還其俸。 滴 ,搴其旗,寇據險不退。 、大同 水崖,指揮董陽、江瀚、三唐臣、張淮等戰死,逐南下駐隆慶石 至矣!」是夜東去。諸將追擊,連敗之。帝偵萬達督戰狀,大喜,立進兵部尚書兼 遊擊袁正却之,寇移而南。會尚文萬騎至,參將田琦騎千餘與合,連戰曹家莊 俺答將復寇宣府,總兵官趙卿怯,萬達奏以周尚文代。 萬達督參將姜應熊等馳赴,順風鼓譟,揚沙蔽天。 河營,分遊騎 寇驚 東掠。遊 未至,

右副都御史。

尋召理部事。

以父憂歸

萬達至,具疏自明。 京師八千里,倍道行四十日抵近京。時寇氛熾,帝日夕後萬達至。 怨,讒言搆於帝。 不悅萬達,言寇患在肘腋,諸臣觀望,非君召不俟駕之義。 終制。 明 年秋,大同失事,督撫郭宗皇、陳耀被逮,詔起萬達代宗皇。 未達,而惟答犯都城。兵部尚書丁汝變得罪,遂即以萬達代之。 萬達逐失眷,降兵部右侍郎兼右僉都御史,經略紫荆諸關 帝責其欺慢,念守制,姑奪職聽別用。 仇鸞時爲大將軍,寵方盛,銜宿 帝遂用王邦瑞於兵部。不數 萬達方病疽,廬墓間,疏 遲之,以問嚴嵩。 萬達家嶺南,距 嵩故 日

三十年二月,京察,自陳乞終制。 明 年十月,兵部尚 書趙錦以附 仇鸞戍邊,復起萬達代之。 帝疑其避事,発歸。 瀕行 疏謝, 未聞 命卒,年五 復摘 譌字爲不敬,斥 Ŧ

萬達事 親孝。 父殁, 負土成填。 好談性命之學,與歐陽德、羅洪先、唐順之、王畿、魏

列

僔

先 良 政善。 土卒, 尤善御將 通古今,操筆 士, 頃 得其死力。 刻 萬 言。 爲 嘉靖中,邊臣行事適機宜 人剛介坦直,勇於任事 履 建言中肯窾者,萬達 艱危,意 氣彌 厲 稱首 臨 陣嘗身 隆

慶中,追

諡襄毅。

岳,以 數。 然瓊, 贊 成安南之功,不失爲持重將。 日 其 楊 (權譎 清、 之尤歟! 王瓊俱負才略,著績 彭澤望甚 萬達飭邊備, 偉, 邊陲。 顧 處置 哈密 有人倫 整軍 , 實, 鑒,鋤奸定 抑 何 其爭復底, 舛 也。 難因以成功。 毛 伯 知 彼 溫 公知己, 能 任 翁 亦俱任 尤深識遠 萬達 張 智

校勘記

慮云。

- 擢 右 副 都 御史督漕運 督漕 運 明史稿傳四一王瓊傳作「治鹽兩 淮
- 瓊集兵討若籠板 }傳 、世宗實錄卷一一 酮 諸 四嘉靖九年 族 若 籠 六月庚辰 原脱「若」字 條補。 ·據本書卷三三〇 西 番 諸 衛傳、 {明 史稿傳 四 {王
- = 執忠順王速檀拜牙郎 拜牙 郎 本書卷三二九土魯番傳、 武宗實錄卷六弘治十八年十月丙辰

記

至平刑關八百里 平刑關,原作「平邢關」,據明史稿傳七四翁萬達傳、世宗實錄卷三二〇嘉靖

二十六年二月辛丑條改。下同。

TE TE

江瀚 原作「江潮」,據本書卷三二七韃靼傳、國権卷五九頁三七二九改。

世宗實錄卷三七五

嘉靖二十八年二月壬子條作「江翰」。

明史卷一百九十九

列傳第八十七

李鉞子惠 王憲 胡世寧 子純 繼 李承勛

王以旂 范總 王邦瑞子正國 鄭曉

李孟 嵐、五臺間,乃亟 敗,起故官,出爲鞏昌知府,尋遷四川副 內寇武廷章等。 金加俸。 陽、都督神英。 正德改元,天鳴星變。偕同官陳數事,論中官李興、甯謹、苗逵、高鳳等罪,而請斥尚 李鉞,字虔甫,祥符人。 遷陝西按察使,擢右僉都御史巡撫 召入 畫戰守。 武宗不能用。 理院 事。 寇果犯岢嵐,鉞與延綏援將安國 弘治九年進士。除御史。巡視中城,理 以喪歸。 使。 山西。 巡撫林俊委鉞與副使何珊討敗流賊方四等,賜 劉瑾惡餓劾其黨,假他事罰米五百石輸邊。 寇入白羊口。 、杭雄敗之。 鉞度宣、大有備,必窺岢 河東鹽政、歷有聲績。 加俸一級。 尋討平 書

列

傳第八十

七

李

鉞

職 宼 遊 引 原 擊時 ,責鉞圖 果至,又 去。 寇 世 入犯, 陳、 宗 以 其 卽 一後效。 敗去。 周 間 援 付 尚文等, 兵未 增築墩堡,謹烽堠,廣儲蓄, . 歷 鉞自劾乞休,不許。 已 兵部 集。 而言官論邠州 分伏要害遏其歸, 左、 鉞 下 右侍 令大開 郎, 失事罪,請罷總 諸 出 盜楊錦等剽 營門,畫夜 總制 斬 選壯 獲多。 陝西三邊軍 勇爲備 不閉 延綏 鉞策 兵官 劉淮 寇失 ,殺指揮霍相 務。 宼 未幾, 疑有備 利 、巡撫王珝等,並及鉞 鉞長 必 寇復深入平涼、邠州 東犯 軍 ٠, 旅 未 |鉞| 延綏,檄諸將設伏待。 敢 料 逼 擒 敵 多 功 中。 礮 擎之, 詔 初 奪淮 鉞令 至 寇 固

進 都御史,總督漕運,巡撫鳳陽 嘉靖 二年,以塞 上無警召還。 諸府,入 給事 中劉 掌都察院 世 揚請留鉞 事 陝西,而 久任諸邊巡 撫 。帝卒召鉞,

言。 安 禮 勛 几 衞 部 以 家 |酸執奏如初,而疏有「猿攀狐娟」語。 會 錦 爲 及 八 四 人牧馬所 衣 亚 年代金獻民為兵部尚 人官錦衣。 革職百戶李全奏乞復任,鐵請治其違旨 宴列 會武, 官。 尙 書下,疏爭之。 中府爲主, 故皆列諸尚書之次。 鉞累疏 南京守備 力争, 書兼 已三人,復命卜春添 帝皆不 **鉞言:「中府官之有會武宴,** 督團營。 ·納,至貴以抗旨, 帝惡之,復責對狀,奪俸一月。 中官刁永等多所陳乞, 法注以 罪,帝不問。 宴圖 往。 可徵。不 **令對狀。** 御馬監闊 猶 於是官旗鄭彪等皆援全例以 禮部之有恩榮宴也。 得引團營故事。」帝竟從勛 帝皆許之。 餓引罪乃罷。 洪因 軍政,請 叉錄 自考 武定侯郭 司 恩榮, 禮扶 騰 驤

子少保,遺官護喪歸葬。 鉞 既屢諫不用,失上意,且知爲近倖所嫉。 久之, 賜諡恭 簡。 會病,遂再疏乞休,許馳驛,未行卒。 贈太

子惠,正德十二年進士,官行人。 諫武宗南巡,死於廷杖。 贈監察御史。

旋,以中旨代王瓊爲兵部尚書。 **禦寇功, 廕錦衣世百戶。** 理寺丞。 都督朱泰捕之,復以功廕錦衣。 憲,字維綱,東平人。弘治三年進士。歷知阜平、滑二縣。召拜御史。 遷右僉都御史,清理甘肅屯田。 遷戶 ,部右侍郎,改撫陝西,入爲兵部右侍郎。 世宗即位,爲給事中史道劾罷 武宗南征,命率戶、兵、工三部郎各一人督理 進右副都御史,巡撫遼東,歷鄖陽、大同 近畿盜起,偕太監脹 正德初,擢大 軍儲。 以 應州 駕

擊之, 敗寇,璽書褒論。 仗無算。 嘉靖四年,廷推鄧璋及憲爲三邊總制,[三言官持不可,帝竟用憲。 都指揮卜雲斷其歸路。 帝大喜,加憲太子太保,復予一子廕。 吉囊數萬騎渡河從石臼墩深入,憲督總兵官鄭卿、杭雄、趙瑛等分據要害 寇至青羊嶺,大敗去。 至是凡三廕錦衣世百戶矣。 五日四捷,斬首三百餘級,獲馬 部將王宰、史經連 中官織花絨於 **馳器**

列

行,曰:「我甫入中臺,何見驅 總 陝,憲請罷之。 乃改 憲南京 因 兵部 九廟成 尚書。 請釋還議禮得罪者,頗爲 **亟也。」給** 已, 入爲 事中夏言、趙廷瑞劾憲託疾避難,復罷 左都御史。 朔州 士大夫所 告急, 廷推 稱。 憲總督宣、 張 璁 、桂萼欲 歸 大。 用 王 憲 瓊爲 不肯

營 重大小之差,臚析以上。 首、當先、殿後、奇功、頭功諸等,其後濫冒日 分伍操練法,諸將不得藉 憲與 大同 未幾,帝追念憲, 兵變, 禮臣 夏言等請如成化、弘治間 憲初言首亂當誅,餘宜散遣。 召爲兵部尚書。 韶著之會典爲成式。 內府 供事,規避營操。 小王子入寇,條上平戎及諸邊防禦事宜。 例,答敕止國王一人,仍限貢 多。 而 **尋樂督團營。** 大學士 帝皆嘉 憲定軍功襲替格,自永樂至正德 張孚 納。 敬與 西番諸國 舊 制 總督劉源清 , 期 軍 ·功論 來貢,稱王號 、人數。 敍, 力主用 議 有 乃定。 叉請立京 生 者百 酌其 擒 兵, 斬 憲 餘 輕

居數 乃不 從其 车 奏,論者多尤憲。 **政堅前** ·,憲引年歸,卒。 源清攻城不能下,北寇又內侵, 會帝悟大同 贈少保,諡康毅。 重鎭,不宜破壞,乃寢其事, 子汝孝,副都御史。 請別遣 大臣禦北寇, 見丁汝變傳。 亂亦旋定。 己得專攻城。 源淸竟得罪去。 憲亦議

胡世寧,字永清,仁和人。 弘治六年進士。 性剛直,不畏强禦,且知兵。 除德安推官。

岐王 初 復 就 上書 藩, 從官 極 言 時 驕, 政 世寧裁 闕 失。 之。 時孝宗已不 他 日復請湖 豫 田,持 猶 頷 之。 不 可 再 遷 遷南· 鄎 中。 京刑部、 與 李承勛 主事 0 應 魏校 詔 陳 邊 備

時 稱 南都 四 君子」。

泰畏 降。 叛 歲 族 文昌 黄 以 遷 土官承襲, · 文昌 上,朔 廣 夜 西 遯,委世寧空城中,危甚。 太 四 望謁府。 世 平 長 殺 知 東率要賄不 府。 知府,占三州二十七村。 父兄有故,按籍 太平 知州 ·時奏, 李濬數殺掠吏民, 以故諸酋怨叛。 諸土

信他世寧, 請官於朝。」土官大悅。 副總兵康 世寧密檄龍英知 世 發兵 泰偕世 寧令:「生 拨, 寧入 乃得還。 子 思 卽聞 明 州 ,執其兄弟三人。 趙元 府。 文昌 瑤 1懼,歸 應世 擒之。 及者,年 所 侵 思 地 明 而

諫 不 畫 能 策擒 拔 母 喪 引去。 盜 歸 ,討平王浩八。 服闋赴京。道滄州, 再 知寶慶府。 以 暇 岷王及鎮守中官 城廣昌、南豐、新 流寇攻城急。 E 城 世寧卽馳 潤皆嚴憚之。 入城, 遷江 畫防守計。 西副使。 贼攻七日夜, 與 都御史愈

民廛 江 剿 西 撫 地, 患 當 是時 說 非盜 採辦擾 相 賊。 持,臣 寧王 旁郡 寧府威 宸濠 愚以爲無難 ,蹂籍偏窮鄉。 驕横 日張,不逞之徒羣聚而導以 有 異 決 也。 志 ,莫敢言,世 臣恐良民不安,皆起爲盜。 已撫者不 寧憤甚。 誅,再叛 非法,上下諸司承奉太過。 者毋赦, 正德九年三月上疏 臣下 初起者 畏禍,多懷 亟剿,如 日「江西之盗, 數假 是 二心,禮 而 火 已。 災 樂 奪 顧

列

傳

第

治 宜,至所言違制擾民,疑出僞託,宜令王約束之。 刑 其國 政漸 不自朝廷出矣。 毋撓有司,以靖亂源,銷意外變。」章下 請於都御史愈諫、任漢中專委一人,或別選公忠大臣鎮撫。 兵部。 得旨報 尚書陸完議,令諫往計城情撫剿之 可 敕 王 止

黨 鳳、邢寰等交章教,楊一 師, 潘 錦 鵬執送江 衣官校逮捕 也,與左都御史石玠等上言,世寧狂率當治。 自投錦衣獄 宸濠聞,大怒。 西。 世 寧。 鵬盡繫世寧家人,索之急。 獄中三上書言宸濠逆狀,卒不省。 列世寧罪,偏賂權幸,必殺世寧。 世寧已遷福建按察使,取道還里。宸濠遂誣世寧逃,馳使令浙江 清復以危言動錢寧,乃謫戍瀋 李承勛爲按察使, 。命未下,宸濠奏復至,指世寧爲妖言。 章下都察院。 陽。 **繋**歲餘, 言官程啓充、徐文華、蕭 保護之。 右都御史李士實,宸濠 世寧乃亡命 一巡按 抵京

延玉 宗即位,疏以司馬光仁、明、武三言進,因薦魏校、何瑭、邵銳可講官 傑、中官趙欽。 不 兵,立賞罰 能制 ग् 居四年, 宸濠果反。 輔弼 李翰 格 ,嚴隱匿禁,修烽堠,時巡 貨以假道。 知府劉蒞、 甫兩月,召為東部右侍郎。 徐鈺先為諫官有直聲宜擢用。 番殺官軍, 憚不敢詰。 世寧起戍中爲湖廣按察使。 激,以振軍威,通道路。 未上,以父憂歸 官軍 殺番,輒 尋擢右僉都御史巡撫四川。 時韙其言。 抵罪。 韶悉行之。 林俊、楊 松潘所部熟番,將吏 世 寧陳方略,請 又刻罷副總兵張 一清、劉忠、林 道問 選 將 世

歎。 非所以光聖德。 下赫然示威,辱以箍楚,體贏弱者輒斃。傳之天下,書之史册,謂鞭撲行殿陛,刑辱及士夫, 生成之德,明,日月之臨,皆不可一日無。 禮 無私之心,照臨於上,無先存適莫於中。」帝雖不能從,亦不忤。 旣免喪家居,朝廷方議「大禮」,異議者多得罪。 無何,聞 未上,語聞京師。 ,廷臣伏闕爭,有杖死者,馳疏言:「臣向以仁、明、武三言進,然尤以仁爲本。仁**,** 新進一言偶合,後難保必當。舊德老成一事偶件,後未必皆非。 旣有議遷顯陵祔天壽山者,世寧極言不可,乃並前疏上之。 武則雷霆之威,但可一震而已。 世寧意是張璁等,疏乞早定追崇「大 今廷臣忤旨,陛 望陛下以 帝深嘉

藥物。 尙 寧啓告密之漸。 世寧**乞罷,**不許。「大禮」成,進秩一等。復陳用人二十事。 五十四人以中官請,悉授職。世寧言賞過濫,不納。 書。 尋召爲兵部左侍郎。條戍邊時所見險塞利害二十五事以上。 獻大學秦誓章、洪範「惟辟威福」、繫辭節初爻講義,並乞留中。給事中余經遂劾世 屢疏引疾。 改南京吏部,就遷工部 又請善保聖躬, 毋輕餌 工匠趙奎等

官。 條 上憲綱十餘條,末言:「近士習忌刻,一遭讒毀,則終身廢棄。 諸如此者,宜許大臣申理。」帝採其言,惟祺報寢。 ,復召爲左都御史,加太子少保。 辭宮銜,許之。 世寧故方嚴。 執政請禁私謁,世寧日:「臣官以察 愈事彭祺發豪强罪,受誇奪 及掌憲,務持大體。

爲 別 抵 罪 名。 白 一一一一一一 爲 帝 言 非 益信 乏, 接 其 世 帝 貌 嬣 軱 聽 咸 其言 王 悟 瓊 修 , 中官 無 郤 由 陳 剛 悉 九疇,將 聰 其 誣 才 漕 行。 卒 致 掠 帝 之 御 死 以 服 0 爲 然, 以 坐二千人, 世 逐 寧救, 弗 禁。 得 世: 戍 俄 寧 改 劾 刑 其妄。 部 尙 書。 已, 毎 聰情 重 獄

常常

朝

逐

守 崇憲 寧 鑑 不 狎 不 拜。 惜 叉 也 河 與 帝 H 西 三王等耳。 戎 棄 職 兵 優旨答之。 備 張 比 部 九 大 謝絕哈密。 重 以以 寧、交阯 年 邊 璁等皆主 尚 將 秋 三事 書王 疲 權 卒。 我 增 o 安定在 事 中 瓊議,格 何有 贈 周 武 |r|a 土魯 牙木 國, 少保,諡 稱 備 罷 於哈密。 哈密 番 疾 耗 蘭本 更賞罰 以 貢 篤, 財 不 世 使乞 內 老 端 曲 用 寜. 力 近近 師 、獨留 先衞 聽 以馭 代, 魰 歸 況 , 乘 甘肅 哈密 戎得 初 土 加 傳 人, 牙木 太 封 夷 歸 , 今存亡 反 忠 挾 子 城 足 順 太保 給 闒 **I**: 以 邊備 易 廪 歸 邀 不 寪 降 遣。 索 隸 順 不 我 人 可 如 外 717 絕弊! 非 牙木 居 知,我 藩 制 臣 辭 納 兵部三 以 不 降 而 源、 蘭 爲 得 歸 此, 自罕慎以 0 數 命 此 正 切 月 月 王瓊 與 • 醪 彼安得 不 ブケ 、水去 國 誤 復 問 陳 初 上 起 來三 , 兵 帝 獨 惜 所 其 索 南京 政 封 事 重 人 之, 不 十事 才 哈 Ó 元 、兵部 許 上 唐 密 墜 世 魯 , 寧言 所言 趸 悉 何 和 尙 番 日 朝 怛 也 順 定武 書 所 參 先 謀 爹 寧順 執 破 固 事 宜 胳

世

πſ

尃

副 使施儒 世 寧 、楊必進考察被黜,御史李潤 風 格 峻 整, 居官康 疾惡 若讐, 、副使范輅爲時所抑,連章 而 薦達賢 士如 不及。 都 一薦之。 御 史馬 與 昊、陳九 人語,吶不 坐 出 累

談。 助。 地,世寧言勝非隴氏子,芒氏不當復立。始以議禮與張璁、桂萼合,璁、萼德之,欲援以自 及具疏,援据古今,洞中窾會。 諸大臣皆忌之。 人窮,盜賊滋起,咎在吏、戶、兵三部不得人。 世寧言吾輩不得以厚賂故,誣朝廷,傳爲色變。 世寧不肯附會,論事多牴牾。 導議欲銷兵,世寧力折之。 昌化伯以他姓子冒封,下廷 帝始終優禮不替。 與李承勛善,而持議不苟合。 兵部尤重,請避賢路。」又以哈密議,語侵璁, **萼方爲吏部,而** 承勛欲授隴勝官,復芒部故 世 寧引疾,言「天變

有子不 草疏論宸濠,繼請曰:「是且重得禍。」世寧曰:「吾旦許國,遑恤其他。」及世寧下獄,繼念其 部 父, 病死 將入 子純、繼。 見繼。 自識,何也。」自是擊賊,輒令繼從,與策方略。 繼爲指陣法,進退離合甚詳,凡三日。 純以父任知肇慶府,有才行。 繼幼不慧,不爲世寧知。世寧在江西出討賊, 世寧歸閱,大異之。 世寧十不失三,繼十不失一。 知其故,嘆曰:「吾 世寧方

Ž.

|李承勛,字立卿,嘉魚人。 父田,進士,官右副都御史,巡撫順天。 列 傳 第 八 + 七 李 派 勛 有操執,爲政不苛。

承 勋 舉 弘治六 年 進 士 由 太 湖 知縣 遷南 京刑部 主 事 0 歷工部 郎中, 遷南 昌 知 府

泣,誓 憲營, 勛 前 州 擅易 ,降者自 諸道 正 衆乃 以 德 敗首王 死 兵不 六 內出 報 復集。 年 ·,赣州 浩八獄詞,坐下 敢 ,賊遂潰。 承勛 前。 都 令奇密入砦,說降其 御 賊 承勛督民兵剿 史陳金 犯 新 已,從金斬賊渠羅 淦 一、執參 吏。 即檄承勛討 大理 行數有 政趙 卿 黨 士 之。 燕 功。 賢 爲 光權、 忠卽訊,得白。 內應, 華林 贼黨 靖安 胡雪二, 而 王 贼 賊 奇 親 殺 據越 率 聽 副 撫, 所部登 使 華林財 王 周 領 搜得 憲 瑪 憲軍 Щ 瑙岸 平。 其 衷刃, 縱使還。 奇夜拔棚, , 大潰。 鎭 É 守 華林 中貴黎安誣承 承 官 賊 勛 又陷瑞 軍 單 |奇感 騎 奮 而

諸部 要害, 邊備 固 百 人,朋 加太子 射獵 錄 久 舉 身負希 功, 弛 治 屯 地, 行卓異,超遷浙江按察使。 ,開原尤甚。 少保 進 田 秩 插 先士 千 承勛 五 等。 白 疏 頃。 卒。 請 又數 修築。 士馬纔十二, 凡爲 叉城 陳軍 中固 城塹各九萬 會世宗立, 良 利病, 、鐵嶺 牆堡墩臺圮殆 歷陝西 斷斷 咸 發帑銀四十餘萬 報 千四四 陰 河南左、 可。 Щ 、遼河之交,城 百餘丈,墩堡百 以疾 盡。 右布 將 歸 士依 政使, 兩。 起故 城 蒲 八十 承勛 塹 河 以右 自 撫順 蒞南院 有 命 守, 副都御史巡撫遼東 步 , 扼 0 將 城 招 四 外 要衝 三遷 逋逃 數 人 各 百 邊 刑 里悉為 軍守 Ŧ 部 防 尙 甚

帝 以京營多弊、欲振飭之。 逐加承勛太子太保,改兵部尚書兼左都御史,專督團營。尋

帝褒 官馳 宋轉 貴 兼掌 勛 工不 田 之芒部 恣 賦 納 告 就 都 對 一、次對 察院。 承勛 之役 功 之。 以所 , 宜 敕 令 奏奪京營把總湯清 言 措 蠲 責 故 知 L:「有司 數。 勛 置 以疾,三疏乞休,且言:「山西潞 事,不 水 乖 利者各陳所 Щ 方 下清 例 時 陬 再 十月始徵賦。 ·召見大臣。」帝 僻壤,俾悉戶 法司 勝 再 見, 叛 職 气宜 o 而 郭勛 命 俾 曉。 侍 今 不 伍. 允辭 爲 九月矣,恐官 郎 文定深 有司 潘 求復,語 城城 下 希 不能 計 曾度可 · 其議 以四道兵討 毋 奉宣 侵承勛。 吏督 於 專用 否。 所 一德意者,罪之。撫按失 趣, 可。 兵。 其 承勛 尤要者 之,不統於一 陰圖 豐、沛 時秦、晉、 因 乾沒。 水退,給 ら 在 河工, · 決壅蔽 楚、 人,故: 宜 二年三易 4 及 蜀 舉奏,并 中王 其未 歲祲 患。 無 準等 功。 徴,遣 做唐 大臣, 韶発 坐。 JII 劾

冒 中 申 心 議 役 飭 商 官 制 數 兵部 質, 出 議 可。 千人。 鎭 者 尋 各盡 者, 命 淧 尙 中 書胡 相 兼 率暴橫。 所 官言襲彰義門破 獨 督團營。 顧 懷 御 世 不 寧致仕 馬 發,拱手 議 監未汰,復因 苟不合,聽其 承勛因 言官攻張 一,韶承 聽。 諫官李鳳毛等言,先後裁二十七人,又革錦衣官 也先, 宜 勛還部 璁、 及未 給 別奏。 東市剿曹賊,皆四衞功,以直 桂萼黨, 事 代之。 議前 中田 庶足盡諸臣之見,而 備 秋奏,多所裁 并及承 疏言:「朝廷有大政及推 條 所 議,布告與 勛。 減。 承 勛 而 議 所 べ連章 請以騰 議 者 內 者公。」帝 求退, 故易集, 俾先諗其故, 舉文武 驤四 帝復 衛屬部, 五 隸兵部不便。 然其言,下 大臣,必下廷 溫 百人,監局 旨答之。 然後 覈詭 詔 华

承勛言:「彰義門之戰,禍由王振。東市作賊,卽曹吉祥也。」帝卒從承勛議,歸兵部。 行。」承勛竟不請。給事中趙廷瑞並劾之。會寇退,罷。 大同,議遣大臣督兵。衆推都御史王憲,憲不肯行。給事中夏言謂承勛曰:「事急,公當請

時,恐釀大息。 財,俾邊鄙無虞。」帝嘉納焉。 哈最近京師,不善撫,卽門庭寇。雲南安鳳之叛,軍民困敝,臨安、蒙自盜賊復興,曠 警備。甘肅軍餉專仰河東,宜於蘭州糴貯,以備緩急。曩河西患土魯番,今亦卜喇又深入。 兩寇雲擾,孤危益甚。底寇出入,並經莊浪。急宜繕塞設險,斷臂截踵,使不得相合。 十年春,大風晝晦,帝憂邊事。承勛言:「去歲冰合,敵騎盡入河套。延、寧、固原皆當 交趾世子流寓老撾,異日歸命請援,或據地求封,皆未可測。 惟急用人理 兀良 日淹

賜白金、綵幣、米蔬諸物。 奉國,知無不言。 承勛沉毅有大略。 世寧卒半歲、承勛亦卒,帝深嗟悼。 帝所信任,自輔臣外,獨承勛與胡世寧,大事輒咨訪。二人亦孜孜 承勛官四十年,家無餘貲。 其議「大禮」,亦與世寧相合云。 贈少保、諡康惠。所賚子、常典外,特

王以旂,字士招,江寧人。正德六年進士。 除上高知縣。 華林賊方熾,以旂訓鄉兵禦

江 西 賊不 遠,罷試 敢 犯。 無 名。 徴授 功 御 此 史, 出按 **璟又言,帝親**征,道 河南。 宸濠 反,鎭 且 守太監劉璟倡議停鄉試。 供頓 銀四 萬兩 以旂言河南去 巡撫議予之,

以旂執不予。

改左都 贓科 ',臣不 世宗卽位,欲 御史,代陳經爲兵部尚 預聞,此啓矯僞之漸也。」帝 加興獻帝皇號,以族抗言不可。 河漕。踰年,渠水通,進秩一 書兼督團營。 不 聽。 累遷兵部右侍郎。 等。 已,上弭災要務,言:「司禮 尋拜南京右都御史。 除、呂二洪竭,漕 召爲工部尚書, 取 中旨免張漢 一舟膠。 命

代之。 部將 力主 匹。 屯寧夏塞 一跳議。 錄延綏 蔡勳 其長狠台吉等約束所部, 邊總督曾銑議復河套,大學士夏言主之。 套寇自西海還、肆掠永昌、鎮羌總兵官王繼祖禦却之。 外,將大入。官軍擊之,斬首六十餘級,寇宵遁。 、馬宗援三戰皆捷。 將 議上,帝意忽變,嚴旨咎餓,令再議。 士破敵功,再廕一子。 前後斬首一百四十餘級。 終市無譁。 以族 以聞。 數下 以旂等惶恐, 優旨獎跳,令以旂集廷臣 詔 論功,廕以旂一子。 大寶二鎭文武將吏, 延綏、 已,復來犯,幷及鎭番 盡反前說。 寧夏 2開馬 र्गा 帝逮 已 以旂 而 鉄, 議。 鎭 宼 令以旂 復 以旂等 一山丹 त्त 數萬復 賜金 五 于

在 鎭六年,修延綏城堡四千五百餘所,又築蘭州邊垣,加官至太子太保。 列 傳 第 八 + 王 以 旂 五二六七 比卒,軍民爲

罷市。贈少保,諡襄敏,再予一子官。

右布政使。 去,總名由此顯。 民爭謳頌戀,語聞禁中。 大饑 ,巡撫都御史潘垻駁諸請振文牒,候勘實乃發。 嘉靖三年伏闕爭「大禮」,下獄廷杖。 范鏓,字平甫,其先江西樂平人,遷瀋陽。 遷兩准鹽運使,條上鹺政十要。歷四川參政,湖廣按察使,浙江、河南左、 帝爲責戶部及惧與巡按御史匿災狀。 由戶部郎中改長蘆鹽運司同知,遷河南知府。 總登正德十二年進士,授工部主事,遷員外 **總不待報,輒開倉振之,** 塌歸罪總以自 全活十餘萬。 解,被劾罷 歲

練步騎,廣儲蓄,繕治關隘亭障,寇爲遠徙,俘歸者五百人。 任耕種便。」帝從其請。 田之制。 二十年擢右副都御史,巡撫寧夏。總爲人持重,有方略。旣涖重鎭,不上首功。 自武定侯郭勛奏以軍餘開墾田園給將領,委奸軍爲莊頭,害殊大。 上疏言:「邊將各有常祿,無給 宜給還軍民, 一意

總署部事。 居數年,引疾歸。 頃之,奉詔總理邊關阨隘。 起故官,撫河南。 奏上經略潮河川、居庸關諸處事宜,請於古道門外 尋召爲兵部右侍郎,轉左。 尚書王以旂出督三邊,

爲紫荆 薊州 撫 以 鎧仗,番上者悉予行 昌營遊擊於山 宜, 蜂 恐他變。 懷來路,增置新軍二千餘人,資團練。 言,下守臣議 路文武 谷、宮香 戍 兵番 鎭督諸將 密雲之迤 窩 請於紫荆之桑谷, 嶺 所轄燕河、太平 增墩 臣 直 倒馬二關 莫若 修築。 1鑪石 守 西 要害。 領 臺一 海關。 爲 等地, Щ 分 爲外屏,濬濠設橋,以 海 最 各營士馬, 兼側 加潮 衝 關 又薊鎭五 ·

、馬蘭、密雲四路,修築未竟者,括諸司贖鍰竣之。 糧,毋俾荷戈枵腹。 宜斬崖 移參將分駐石門杜家莊 若燕河之冷口 增置能將 河 三屯等營缺軍, 倒馬之中窯關峪,龍泉之陡石嶺諸要害, 川提督爲守備,增副將居庸關,領天壽山 塹。 里垛、 近按伏之兵,迭爲 居庸關 員, 划車、 ,馬蘭之黃崖,太平之楡 募軍三千 應速募, 防 又議紫荆 外諸 衝突。 又言:「諸路緩急,以密雲之分守爲最 开連口、 口 ,俾保定總兵駐紫荆。 馬不足者補 ,在宣府爲 ·屯駐, |||倒馬、 戰守。」兵部言:「軍戍久,戀土。 一西南 慕田 聽 网 薊 龍泉等關及 內 山對處, 入。 谷等地 木嶺、 遼撫臣 地,在居庸則爲邊藩,宜敕東中 其常成之兵 創築城垣, 、黄花 、擦崖子,皆所急 , 各設敵 調 宜設墩臺 薊、 Щ 度, 鎭。 海 而 遼懸絕千里,移 浮 關 臺, 援燕河 、古北 介胄不備 圖 增設敵樓營舍 設橫嶺守備,塞 以控 峪、插箭嶺尤 惡谷、紅土 各關 · 一餘 也。 口經略 中流 猝 移置, 要害, 如總 宜敕

建

分

帝才鏓甚。 會兵. 部 尙 書趙廷瑞罷,即命總入代。 鏓以老辭, 且言隨 事通變, 乏將順之

列

傳

第

八

罪。 歸久之乃卒。 宜 然總罷,帝召翁萬達, 帝怒,責總不恭, 隆慶元年復官。 削其籍。 甫至 以憂去,丁汝夔代之。 時嚴嵩當國,而總本由徐階薦,天下 明年,俺答逼都城,汝夔遂誅死,而 推爲 長者,惜其去不 以 鏓

年成進士。 王 邦瑞,字惟賢,宜陽人。早有器識。 改庶吉士。 與王府有連,出爲廣德知州 爲諸生,山東盜起,上剿寇十四策於知府。

祖 名以上,貶濱州知州。 犯,設伏敗之。 母: 一憂去。 嘉靖初, 服除,復提學陝西,轉參政。 祖憂去。補滁州。 改南京大理卿。 再遷固原兵備 屢遷南京 未上,召爲兵部右侍郎。 副使。 母憂解職。 東部郎中,出為陝西提學愈事。 徑、邠巨盜李孟春,流劫河東、西,剿平之。 起擢 右僉都御史,巡撫寧夏。 改吏部,進左。 坐歲貢不中式五 寇乘冰 以

咸 罪,且濬九門濠塹,皆報可。 寧侯仇鸞統之。 納四郊避寇者。 俺答犯都城,命邦瑞總督九門。 邦瑞亦改兵部左侍郎,專督營務。 兵部尚書丁汝夔下獄, 邦瑞 見營制 邦瑞屯禁軍郭外,以巡捕軍營東、西長安街,大啓郭 **人**弛,極陳其弊。 命邦瑞攝其事,兼督團營。 復條上興革六事。 遂罷十二團營,悉歸三大營**, 这退,請治諸將** 中言宦官典兵,古 以 功

部,分理京營事。 大患, 請盡撤提督監槍者。 未幾,帝召兵部 帝報從之。 尙 書翁萬達未至,遲之,遂命邦端代。 又舉前編修趙時春、工部主 事 申 燧 知 兵, 條上安壤十二 並 改兵 事

安攘 讓。 卿, 營,乃黜陟各鎭。 京營副 斷自宸衷, 大計 鸞又欲節制邊將,罷樂薊鎭邊垣 仇鸞搆 將成 ,遂嚴旨落職,以冠帶辦事。 邦瑞於帝、帝眷漸移。 勳代鳳鳴,密雲副將徐仁代珏。 所以慎 今曲 徇鸞詩, 防杜漸,示臣 臣恐九邊將帥悉奔走托附, 會鸞奏革薊州 下不敢專也。 居數 邦瑞皆以爲 日,大計 旨從· 中下。 總兵官李鳳鳴、 且京營大將與列鎮將不 自陳。 不可。 邦瑞言:「朝廷易置將 鸞大慽,盆 竟除名,以趙錦 非國之福 大同總兵官徐珏 也。 肆讒 排。 帝 相 統攝 不 帥 會 悅, 邦瑞 必采 任, 下 何緣京 ·旨譙 之公 而薦 復 陳

日三非邦瑞 邦 瑞 去,鸞益横,明年誅死, 不可。」乃起故官。 葬。 旣至,疏便宜數事,悉允行。 錦亦 坐黨比遺戍, 於是帝漸思之。 踰年卒。 踰十年, 贈太子少保、諡襄毅, 京營缺

邦瑞 嚴毅有識量。 歷官四十年,以廉節著。 子正國,南京刑部侍郎。 遣行

人護

喪

歸

鄭 曉,字 列 傅 第 室甫,海鹽 人。 邦 嘉靖元年舉鄉試第一。 明年成進士,授職方主事。 日披故牘,

八

-

1

 \pm

瑞

郯

晓

廷 盡 杖 知 天 大同 下 阨 兵變,上疏極言不可赦。 塞 士 馬 虚 實强 弱之數。 尚書 金獻民 屬撰 九邊 圖志, 張孚敬柄政、器之、欲改置翰林及言路、曉皆不應。 人爭傳寫之。 以爭「大禮 父

憂歸,久之不

起。

拜 華,曉避位 丞,無故事 趙文華 大學 刑 部 士嚴嵩因欲 許 右 讃為 爲考功, 侍郎。 。」嵩益怒。 III 吏部 已。」讚以謝嵩。 曉言於讚曰:「昔黃頑為 俄改兵部,兼副都御史總督漕運 去所不悅者,而曉 **尙書,調之吏部。** 以推謫降官周鈇等,貶曉和州同 嵩欲以子世蕃爲尚寶丞, 曉曰:「治中遷知府, 去喬佑 歷考功郎中。 文選, 等十三人,多嵩所厚。 調李開先考功,皆山 夏言罷相,帝惡言官不糾劾,詔考察去 知。 稍遷太僕丞,歷南京太常卿。召 嵩 大城曉,調文選 東 人, 詔 例 不 也。 許。 遷尙 嵩 今 調 欲 寶 用 文

從之。 狠 灣、麻洋 知官兵虛 山,前後斬首九百餘。 大江 中 、雲梯諸海口 南北皆中倭,漕艘幾阻 實。 國 奸 曉懸 民利倭賄,多與通。 重 賞捕戮之。 皆增兵設堠。 贼潰去。 募鹽徒驍悍者為兵,增設泰州海 錄功,再增秩,三賓銀幣。 通州 曉請發帑金數十萬,造戰舸,築城堡,練兵將,積芻糗。詔 遂破倭於通州,連敗之如阜、海門, 襲其 人顧表者尤桀黠,爲倭導。 防副使、築瓜洲 以故營砦皆據 軍呂泗、圍之 城,公 要害, 廟 盡

時賊多中國人。 曉言:「武健才諝之徒,困無所逞,甘心作賊。 非國家廣行網羅,

倭恃 數萬 靈,兼謀 出 身之階, 華人為 人,又遣 臣 . 宿 恐有 耳目,華人借倭爲爪牙,非詳爲 使出 將,築城練 如 孫恩、 海宣布威 兵,經略 盧循輩出乎其 德。 數 久之,倭始 牟 ・,猶未 間, 禍滋 不爲 义安。 區畫,後 大矣。 患。 乃招 患未易弭也。」帝頗採 今江北雖平, 漁 洪武時倭寇近海 丁、島人、鹽 而 風 徒、 帆 州 納之。 蜑戶 出 縣。 沒, 籍 以高皇帝威 倏忽千里 爲 水軍至

棘,而 尙 書。 尋 所簡聽征京軍三萬五千人,乃令執役赴工,何以 召爲 俺答圍 吏部左侍郎,遷南京 大同右衛急,帝命兵部尚書楊博往 吏部 尚書。 帝以 督 曉 大師 知兵,改右 備戰守。 ガ以 曉攝 都御史協 乞歸之營伍。」帝立從之。 兵部。 運戏 曉言 政。 「今兵事方 尋 拜 刑部

希顏 者譏其失出云。 亂 院置重 尋還 事 視 典,嵩故寬假之。 ,曉並予輕比,嵩則 刑 、部事。 嚴嵩勢益熾。 惟巡撫阮鶚、總督楊順 置 重典。 曉素不善嵩。 南都叛卒周山等殺侍郎黄 而 、御史路楷,以嵩曲 其 時 大獄 如總督王忬以 (燃官 庇, 曉不能 海寇汪直 失 律, 盡 中允 通 法, 倭爲 郭 議

史鄭 者。 事 後諸 存仁 故 存仁亦據律執奏。 事 謂 ·,在京軍民訟,俱投牒通政司送法司問斷。 司不復遵守, 訟當自 下而 獄訟紛拏。 上,檄州 章俱下都察院會刑科平議。 縣, 曉奏循: 法司· 故 有追取,毋 事, 帝報 諸司 輒 許,於是刑 議未上,曉疏 發。 有應鞫者,亦參送法司 **曉聞**,率 部 間 辨。 侍郎趙大祐 捕 囚畿府。 嵩激帝怒切讓 無 傅 頤 而 自 巡 守故 按 l決遣 遂

御

列

傅

落曉職,兩侍郎亦貶二秩。

保,諡端簡。 老遊處,見者不知其貴 曉 通經術,習國家 履淳自有傳。 典故, 人也。 時望蔚 既卒,子履淳等訟曉禦倭功於朝,詔復職。 然。 爲權貴所扼,志不盡行。 旣歸,角巾布衣與鄉里父 隆慶初,贈太子少

著效. 蹇」,世寧近之矣。 邊計,才力均有過人者。 了

亦不愧名臣云。 贊曰 一李鉞諸人皆以威略幹濟顯於時。 王邦瑞抵抗權倖,躓 胡世寧奮不 顧身,首發奸逆, 而復起,鄭曉諳悉掌故,博洽多聞,衆資文武,所在 **鲅與王憲、王以旂之治軍旅,李承勛、范鏓之畫** 危言正色, 始終 節。 易 稱「王 臣 蹇

校勘記

廷推鄧璋及憲爲三邊總制 傳、王憲傳及世宗實錄卷五六嘉靖四年十二月丁酉條改。 鄧璋, 原作「鄧廷璋」,據本書卷二〇二廖紀傳,明史稿傳七九廖紀

與李承勛魏校余祐 当 余祐 原作 「余祜」。 本書卷二八二及明史稿傳一五九魏校傳都作「余

靖安賊據越王嶺瑪瑙岸 瑪瑙岸,本書卷二八九周憲傳作「瑪瑙砦」,讀史方興紀要卷八四作

「瑪瑙寨」、清二統志卷二三八作「瑪瑙崖」。

29 开連口 明史稿傳七九范鏓傳作「升連口」、讀史方輿紀要卷一一作「升連口」。

 Γ 五. 紅土谷 原作「紅生谷」。 明史考證幡逸卷一七:「按邊防考,紅土谷在黑谷關八十里,與惡谷、

香鑪石等處連接。 明嘉靖時始於此緣崖置塹以爲固。 此作『紅生谷』誤。」其說是,據改。

[八] 瓜洲城 原作「瓜州城」。據明史稿傳七三鄭曉傳改。

明史卷二百

列傳第八十八

姚鏌 子淶 張賞 伍文定 一
那
珣
等 胡瓚 張文錦

詹榮 劉源清 劉天和 楊守禮 張岳 李允簡

郭宗皇 趙時春

督學政。

正德九年擢貴州按察使。十五年拜右副都御史,巡撫延綏。 宣成書院,延五經師以教士子。桂人祀山魈卓旺。鏌毀像,俗途變。 嘉靖元年,吉囊入涇陽。 姚鏌,字英之,慈谿人。弘治六年進士。除禮部主事,進員外郎。 鏡遣遊擊彭

英出西路,釋指揮下雲於獄,使副之。夜半邀擊, 上邊務六事,皆議行。 遷福建副使,未幾改 擢廣西提學僉事。立

斬其二將,乃遁。 **墾書褒諭**。 尋召爲工部右侍郎,出督漕運,改兵部左侍郎。

列傳第八十八 姚鎮

亦攻入 剿。 進變 乃 羅 王受等詐言猛 使沈 、丹梁 命參議汪 許馳驛歸 左都 希儀 蘇 四 思恩府。 年 受數求 與張 遷右 御 用希儀 必東、 史,加太子少保,任一子官,諸將進秩有差。 經、李璋、 不死,借交阯兵二十萬且至,夷民信之。 都御史, 赦,鎮不許,將大討之。 巡按 計、結猛婦翁岑璋使爲內應、大破之,斬猛 **僉事申惠與參將張經以兵萬人與其** 御史石金劾鎮失策問上,並論前 提督兩廣軍務兼巡撫。 張佑 、程鑒各統兵八萬,日 會廷議起王守仁督兩廣軍 田州土官岑猛謀不軌。 分道討。 總督盛 地。 蘇等薄城、經突 襲請改設流官,陳 必東、惠移 子邦彦。 態期。 而鏌與總 , 令鎮與 帝以 璋誘殺 圍 疾 鏌調 兵官朱麒等攻破定 鏌 他 走,城逐 善後 [ii]有功, 駐。 永順 猛 事 ,獻其首。詔 七事,制 猛黨 許 陷 襲引疾乞 保靖兵, 便 盧 王受 Ī. 蘇、 可 撫

阻 復 臧 韜 () 釀成 心思恩。 、獻夫 撓養寇。 恨 南北忠。 廣東提學道魏校毀諸寺觀田數千畝、盡入霍韜、方獻夫諸家。 蟆上其狀。 甚 金亦再疏 與張璁、桂 時宏雖去,猶借鎮以排之也。 抵鎖。 韶先賞貴等,而 夢合排鎮。 帝先入璁等言,落鎮職 以 謂 撫剿事宜俟守仁處置。 大同當征 **餺旣得請,方候代,千夫長章貴、**[三] 而反撫, 閒 住 田 州當: 旣 撫而 而 鎮奏辯石金前疏,武 反征,皆 蟆 至 廣, 貴宏謀 追還之官。 徐低 國不 金 攻

其後,蘇、受復叛,帝漸思饃。 十三年,三邊關總制。 大學士費宏、李時同召對。 宏薦

奠, 時亦助之。 遂命以兵部尚書總制三邊軍務。 未赴,宏卒,鏌辭。 帝不悦, 仍落職別

| 饃旣罷,薦者至二十疏,不用。 家居數年卒。

當 輕易。 子淶,字維東。 召修明倫大典,黎辭不與。 嘉靖二年殿試第 累官侍讀學 __` 授翰林修撰。爭「大禮」,廷杖。 又議郊祀合祀,不

張嵿 ,字時俊,蕭山人。 成化二十三年進士。 弘治初,修憲宗實錄, 命往蘇、松諸府採

軼 事。 事竣,授上饒知縣。 遷南京兵部主事、就進刑部 郎 中。

正

德初,遷興化知府。

隆平侯張祐無子,弟祿與族

人爭襲、訴於南京法司、

久不

決,

復

訴京師。 劉瑾方擅政,遂削尚書樊瑩、都御史高銓籍。 **嵿以郎承勘,爲民**

右副都御史巡撫保定諸府,件中貴,移疾歸。 其居, 演執不可。 瑾敗,起知南雄。 大志,遣人魄之。 擢江西參政,進右布政使。 **遺發視,則棗梨薑芥,蓋隱語也。** 舉治行卓異,遷左。 未幾,召爲光祿卿。以 寧王宸濠欲拓地廣

世宗卽位, 命以 右都御史總督兩廣軍務。 廣西上思州賊黃鏐糾尚兵劫州縣, | 漬討擒

斬千餘 寇新會。 兵夾擊,俘斬五百餘人。 是役者。 擒斬一萬四千餘人,俘賊屬五千九百餘人,猛三等皆授首。 廣東 **嵿遣將出海擒之,獲其二舟,賊乃遁。** 捷聞, 新 佛郎機國人別都盧剽劫滿剌加諸國,復率其屬疎世利等擁五舟破巴西國,遂入 寧、恩平賊蔡猛三等剽掠,衆至數萬。 獎 変 程鄉賊梁八尺等與福建上杭流賊相應。 歸善李文積聚奸宄拒捕、討之,久弗克。」遺遣參政徐度等剿之,俘 **嵿合兵三萬餘人擊新寧諸賊,破巢二百,** 自嶺南用兵,以寡勝衆未有若 遣都指揮李皐等會福建官

尋召掌南京都察院事,就改工部尚書。 六年大計京官, 拾遺被劾, 致仕。 後數年卒。

劉瑾入備 馬,議論慷慨。 伍文定,字時泰,松滋人。 重賄,興大獄 授常州推官,精敏善決 ,巡撫艾樸以下十四人悉被逮。 父琇,貴州參議。 獄 稱强吏。 文定登弘治十二年進士。 魏國公徐備與民爭田, 文定已遷成都同知,亦下韶獄,斥爲 文定勘歸 有膂力, 之民。

事 儲珈計之,軍華埠。 江 西姚源城王浩 八等流劫浙江開化,都御史俞諫檄文定與參將李隆、都指揮江洪、僉 而都指揮白弘與湖州知府黃衷別營馬金。 城黨劉昌三破執弘,官軍

民。

瑾敗,起補嘉興。

等上文定忠勇狀,詔所司獎勞。 田 大 挫。 洪以奇兵深入,中賊誘,與指揮張琳等皆被執。文定等殿後得還,賊亦遁歸江西。 浩八突華埠,洪、文定擊敗之,追及於孔埠。 擢河南知府, 計擒劇賊張勇、李文簡。 隆、珊亦追至池淮,至一破其巢,進攻淫 以才任治劇,調吉 諫

計平永豐及大茅山賊。已,佐巡撫王守仁平桶岡、橫水。

恨。 最,擢江西按察使。 忠義,爲逆賊報讐,法當斬。」忠益怒,惟文定仆地。 文定出謁,遂縛之。文定罵曰:「吾不恤 宸濠 反,吉安士民爭亡匿。 張忠、許泰至南昌,欲冒其功,而守仁已俘宸濠赴浙江 文定斬亡者一人,衆乃定。乃迎守仁入城。 九族爲國家平 丙辰之戰,身犯矢石,火燎鬚不 文定求解任,不報 大賊,何罪? 汝天子腹心,屈辱 動。 知府邢珣、 忠等失望,大 **賊平**,功 徐

端,漁獵 忠自稱天子弟,暉稱天子兒,泰稱威武副將軍,與天子同僚。 費,矜釋忠、泰所陷無辜及寧府宗人不預謀者,以清冤獄。 寧皆已伏法,三人實其黨與。 尋遷廣東 盈百萬,致餓殍遍野,盜賊縱橫。 右布政使。 未赴,而世宗嗣位。 乞速正天誅,用章國典。」又請發宸濠貲財,還之江西,以資經 雖寸斬三人,不足謝江西百姓。 上忠等罪狀,且曰:「曩忠、泰與劉暉 帝並嘉納之。 折辱命吏, 誣害良民, 今大憝江彬、 至江西, 需求萬 錢

論功,進右副都御史,提督操江。 嘉靖三年計獲海賊董效等二百餘人,賜敕獎勞。

傳

第八

十八八

伍

文定

謝 病 歸。 六年召拜兵部右侍郎。 其冬擢右都御史,代胡 世寧掌院 事 0

勢尙 詆文定好 極 爲巡撫歐陽 命提督 之,以侍郎梁材督餉。 知以下官,與銓合兵圍 論 口 雲南 京營。 撫。 大喜功,傷財動衆,乃令致仕 而文定決意進兵,一 重所破,遂移師征 文定至湖廣,疏乞省祭歸。 軍民訛言,幾復 雲南。 普奴 韶進文定兵部 無顧惜。 生 左都御 變。 已, 飛網 Fi 史李承 尚書兼前 四川巡按御史戴金復上言:「叛
爾 愚以爲文定可罪也。」尚書方獻夫、李承勛因 **輓糧,糜數十萬**。 嵩 亂, 勛極言川、貴殘破,不當用兵, 明 幷以屬文定。 職,提督雲南 明 年, 武定 及 有詔罷師,尚 四川 文定未至雲南, 貴州 不肯已。又 湖廣 遂召還, 亂之初, 銓等已 軍 殺 討 同

旁撓。 文定忠義自許,遇 廟堂專務姑息,以故功不克就。 事敢爲,不與時俯仰。 九年七月卒於家。 芒部之役,價小醜數亂, 天啓初 · 追諡: 欲爲國伸威,爲議者 忠襄

南京 仁征橫水、桶岡,珣常為軍鋒。 工部,遷贛州 邢 助,當塗人,弘治六年進士。 知府。 招降劇盜滿總等,授廬給田,撫之甚厚。 功最,增二秩。 正德初,歷官南京戶部郎中。 宸濠反,以重賞誘總。 後討他 件劉瑾,除名。 總執其使送珣,遂從 盗,多藉其力。 **達** 誅, 守 起

珣 共平宸濠。

者二十二人,珣、随 事定 徐 珣、璉遷江西右參政。 璉 朝邑人。 與焉。 文定同年進士。 吏部 世宗錄 以軍 功未酬、請進秩布政使致仕、從之。 功,各增秩 由戶部郎中出爲袁州知府。 二等。 嘉靖 二年大計,給事御 從討宸濠,獲首 二人 史劾 監 功千餘。 司 不職

竟廢

址,進士,歷御史,終山 浦者、役公府。 珣子埴嘗學於 随一見異之,令與子同學,爲娶妻。 張璁。 東鹽運使。 嘉靖 初登鄉薦。 以清操聞 璁貴顯,屢欲援之,辭不應。 後登第爲給事中。 其家 授浦 世 城 世 知 記地 縣。 有徐

雲南 府。 不負國也。」 右布政使。 宸濠反, 遣使收府印, 德孺斬之。 戴德孺,臨海人。 即日戒嚴。旋與守仁共滅宸濠。 舟次徐州,覆水死。 弘治十八年進士。 後贈光祿寺卿,予一子官。 與家 歷工部員外郎。 人誓曰:「吾死守孤城。 以憂去。世宗以德孺馭軍最整,獨增三秩,爲 監燕湖稅,有清名。 脱有急,若輩沉 再遷臨江 池中,吾 知

考功法逐之去。 珣 守仁之再疏辭爵也,爲諸人訟曰 當事者以嫉守仁故,痛裁抑之。 或賞或否,又往往借

德孺諸人外, 宸濠變初起,勢焰猖熾,人心疑懼退阻。當時首從義師,自伍文定、邢珣、徐璉、戴 又有知府陳槐、曾興、胡堯元等, 知縣劉源淸、馬津、傅南喬、李美、李楫

列

之冥冥之中者。 希儒 造者多所删削。 爲兵檄以撓其進止,壞其事機,或爲書反問以離其心腹,散其黨與。 帳 及楊材、王冕、顧佖、劉守緒、王軾等,鄉官都御史王懋中,編修鄒守益,御史張鰲山、伍 下之士,若聽選官雷濟,已故義官蕭禹,致仕縣丞龍光,指揮高睿,千戶王佐等,或詐 謝源等。 或摧鋒陷陣,或遮邀伏擊,或贊畫謀議,監錄經紀,所謂同 舉人冀元亨爲臣勸說寧王,反爲奸人搆陷,竟死獄中,尤傷心慘目,負 今聞紀功文册,改 功一體者也。

目皆賊兵,隨處有賊黨,非眞有捐驅赴難之義,戮力報主之忠,孰肯甘虀粉之禍,從赤 之誅,蹈必死之地,以希萬一難冀之功乎! 夫宸濠積威凌劫,雖在數千里外,無不震駭失措。 而況江西諸郡縣切近剝牀, 觸

虚 辱 一受陞職之名而因使退閑,或冒蒙不忠之號而隨以廢斥,非獨爲已斥諸權奸所誣搆 而已也。 今臣獨崇封爵,而此同事諸人者,或賞不行而幷削其績,或賞未及而罰已先行,或 羣憎衆嫉,惟事指摘搜羅以爲快,曾未見有鳴其不平、伸其屈抑者 、臣竊 挫

奏入,卒寢不行。

痛之。

士,授吏科給事中,出爲福建僉事。 蔡天祜, 字成之,睢州人。父晟, 濟南知府,以應惠聞。 歷山 東副使,分巡遼陽。 天祐登弘治十八年進士,改庶 歲歉,活饑民萬餘。闢濱海

圩

祖數萬頃,民名之曰「蔡公田」。累遷山西按察使。

再赦。 擒斬艦等十一人,函首送瓚,請班 府, 脅王奏乞赦。王急攜二郡王走宣府。[四] 巡按御史王官言:「亂卒方囂,大兵壓境, 虚 稍 鐸 苗登家。 之叛也。 胡瓚偕都督魯綱統京軍三千人以往。瓚等未發而進士李枝齎餉 人,請止京軍勿遣。帝責以阻撓,令必獲首惡郭鑑等。旣而 殺大同人,為軍犒也。」夜中火起,圍枝館,出牒示之乃解 定。 以母憂不至,乃擢天祐右僉都御史,巡撫大同。 嘉靖三年,大同兵亂,巡撫張文錦遇害。 會尚書金獻民、總兵官杭雄出師甘肅,道大同,亂卒疑見討,復鼓譟。 兵部言元惡不除無以警後,請特遣大臣總督宣、大軍務,以制其變。 請亟止禁軍,容臣密圖。」乃命瓚駐兵宣府。 |費| 非 盡 殲 不 可。 帝乃切讓天就,召風還京,以故總兵朱振代之,敕瓚仍駐宣府。 師。 甫二日,鑑父郭疤子復糾徐氊兒等夜殺勇家人,又燬 詔曲 天祐從數騎馳入城、渝軍士獻首惡、衆心 赦亂卒, 頃之,天祐奏總兵官桂勇已捕五 瓚次陽和,勇、天祐 改巡撫宣府都御史李鐸撫之。 尋復殺. 銀至。 知縣 **亂卒曰:「此承密詔** 王文昌,圍代王 乃命戶部侍郎 天祐懼,急請 令千戶苗登 十四四 是趣

列

傳第

八十

復潛入城,焚振第。 人心乃大定。事聞,賚銀幣。 疤子**潛**逃塞外,必爲後患。帝將遣使勘,會瓚還京言逃卒無足患,帝乃罷勘官勿遣。 疤子 居 無何,天祐捕戮徐氊兒等,聲等遂班師。明年正月,侍郎李昆、孟春, 明旦,天祐閉城大索。獲疤子及其黨三十四人,悉斬以徇。 已,進副都御史,巡撫如故 總兵官馬永交章言 盡宥脅從,

引價,每引萬加銀五千,被訐。帝宥之。 二年,奉詔起用。 未至京,得疾告歸卒。 年九十五 至是,御史李宗樞復追論前事,天祐因引疾去 天祐以藩祿久缺,又歲當繕邊垣,用便宜增准鹽 居

中,因具得其情,卒賴以成功。 天祐有才智。 兵變時, 左右皆賊耳目, 在鎭七年,威德大著,父老爲立安輯祠。 幕府動靜悉知之。 天祐廣招星卜藝士往來軍

胡瓚,字伯珩,永平人。進士。官終南京工部尚書。

爲民。 [豫必反,與都指揮楊銳爲禦備計。 張文錦,安丘 瑾 誅,起故官。 人。 再遷郎· 弘治十二年進士,授戶部主事。 中。 宸濠果反,浮江下。 督稅陝西,條上籌邊裕民十事。 正德初,爲劉瑾所陷, 文錦等慮其攻南都, 遷安慶知 府。 令軍士登城詬 逮緊詔 度寧王宸 温默,斥

宸濠乃留攻,卒不能克。 事具楊銳傳。 璽書褒美,擢太僕少卿

走,匿 公署。 賈鑑,裂其屍,走出塞,屯焦 河、柳溝、樺溝。 無序。 游惰有室 請募新丁,僚吏咸以爲言。 堡為外蔽 郭鑑等大懼,復聚爲亂,焚大同 甘州五衞殺巡撫許銘,朝廷處之輕,頗無忌。 博野王府第。 出故總兵朱振 大同北四望平衍,寇至無可禦。 也。 元 閒當發,大恐。 年拜右副都御史,巡撫大同。 今城外卽戰場,何以示重。〕議於城北九十里外,增設五堡,曰水口、宣寧、只 參將賈鑑督役嚴,卒已怨。 亂卒欲燔王宮。 於獄,脅 文錦怒曰:「如此,則令不行矣。 川 請子身往,得分番。 爲 墩。 帥。 文錦 府門, 王懼,出文錦。 時嘉靖三年八月也 恐與外寇 文錦曰「寇犯宣府不能近鎭城者,以葛谷、 文錦 入行都司 及堡成, 欲徙鎮卒二千五百家戍之。 性剛。 又不聽,嚴趣之。 連, 至是,卒郭鑑、 郭鑑 縱 令副將時陳等招之入 以拒 獄 等殺之,亦裂其屍,遂焚鎭守總兵 囚 一賊得重名,遂銳意振刷, 鎭親兵先往, 又焚都御史府門。 柳忠等乘衆憤 鑑承風,杖其 孰敢後 城, 、隊長。 ',遂倡亂 即索治 文錦 !親兵素 衆憚行, 白陽 操切頗 踰 首 諸 垣 亂 邊 諸

洪謨言:「文錦 功, 禮 事 部 聞,帝命侍 爲 之請, 僨 事 郎 終不許。 朝 李昆 廷 赦 戮之可 文錦 亂 卒。 妻李氏 也。 昆 假 爲 手士卒, 復 文錦 上 一疏哀 請 卹 傳之四方, 請。 典 不報。 帝 怒, 損國威不 命執 久之, 齎 文錦父政訟 疏 小。」復降旨詰責。 者治之。 副 其子守安慶 都 御 史陳 自

列

傳

第

是,廷臣不敢言。萬曆中,始贈右都御史。 天啓初,追諡忠愍。

際乃開城門,延繼祖入,復捕斬二十六人。錄功,擢光祿寺少卿,再遷太常寺少卿 俾募死士自効。會源清已罷,巡撫樊繼祖許之。昇、麟遂結心腹,擒首惡黃鎭等九人戮之。 逆志,乃陽令寧持官民狀詣源淸所,爲叛卒乞原,而陰以際謀告,請宥昇、麟死,畀三千金, 樂者。外圍益急,樂密約都指揮紀振、遊擊戴滕、鎮撫王寧同盟討賊。察叛卒馬昇、楊麟無 殺總兵官李瑾。總督劉源淸率師圍城,久不下。榮素有智略,善應變。叛卒掠城中,無犯 **詹榮,字仁甫,山海衞人。嘉靖五年進士。授戶部主事,歷郎中。督餉大同,值兵變,**

寇,死者十之一。際言:「彼以好來,而用之鋒鏑,失遠人心,且示中國弱。」韶奪信官, **槥死** 二十二年,以右僉都御史巡撫甘肅。魯迷貢使留甘州者九十餘人,總兵官楊信驅以禦

者送之歸。番人感悅。

翁萬達嚴兵備陽和,而遣騎邀擊,多所殺傷,寇乃引去。 與尚文破之黑山陽,進右副都御史。 踰 年,以大同巡撫趙錦與總兵官周尚文不相能,詔樂與錦易任。 寇復大舉犯中路,參將張鳳等陣歿。 代府奉國將軍充約行剽,榮奏奪 俺答數萬騎入掠,榮 榮與尚文及總督

其祿。 瓦 路邊牆 五 百 餘 百三十八里,堡七,墩臺 充灼等結小王子入寇,謀據大同。 里,闢治之皆膏 ·腴田,可數十萬頃,乃奏請召軍佃作, 当 Ħ. 十四 ō 榮告尚文捕得,皆伏辜。 又以守邊當積 栗,而近 復其租 邊弘 榮以大同 徭,移大同一 賜 諸堡三十 無險, 歲市 乃築 所, 延 東

廷瑞罷 休。 帝怒,奪職 樂 先 ,榮署部務,奏行秋防十事。 以靖亂 閒住。 功,進兵部右侍郎,又以繕邊破敵,累被獎賽。 越二年卒。 已而 **| 翁萬達入爲尚書,遭母喪,榮復當署部務,辭疾乞** 召還理部 事,進左。 尙 書趙

費市

牛

赋

之,秋冬則聚

而

過寇。

帝立從焉。

寇入犯,與尚文破之彌陀山,斬

部長

代者不能 二人在,寇未必至此。 當樂 任 之撫大同也,萬達爲總督, 寇 無歲不入躪邊,人益 萬曆中,榮孫延爲順天通判,上書訟榮功。 思樂等。 尚文為總兵。 明年,俺答薄京師, 三人皆有才略,寇數入不能得志。 萬達、榮皆已去。 贈工部尚書,予卹 論 如 者謂 制。 自後

伯歸 拒 日 賊。 上饒募兵,源淸邀戮之。 :「事急,火吾家。」一 劉 源 賊七 清,字汝澄,東平人。正德九年進士。 一殿下者,奪運舟於龍津,天祐與戰,殺數人。 僕逸, 賊檄至,立斬其使。 手刃以 徇 縣中諸惡 授進賢知縣。 會餘干知縣馬津、 少與賊通者,悉杖殺之。 贼黨募兵過龍津, 天祐追殺之, 宸濠反,源淸積薪環室,命家 龍津驛丞孫天祐亦起 宸濠妃弟婁

列

傅

力也。 焚其舟。 賊平,源清徵爲御史。 婁氏家衆西下,亦爲天祐所遏, 嘉靖改元, 津亦入爲御史。 擒七十餘人。賊兵不敢經湖東以窺 津, 滁州人。 終福 建副使。 兩浙者,

葬遷大理丞,謝病歸。

覺。 下,源淸劾罷之。 副總兵劉淵令曰「止擒元惡」,以旗遶城 六年夏,以右僉都御史巡撫宣府。 進副都御 史。 滴水崖賊郭春據城叛, 河呼。 其黨皆散,春等自剄死。 稱王。 源清遣卒捕之, 總兵官卻永虐 爲所

大索。 和,做等密捕亂卒杖死十餘人,繫賊首王保等七十餘人以獻,請旋師。 源清 欲已,以囚屬御史蘇祐 撫慰之始定。 天城 左孤店濠四十里,趣工急。 同總兵郤永討之。 十二年,以邊警遷兵部左侍 城中訛 振前 言城 爲亂卒所擁,實不反,詣源淸自明。 且屠、亂卒遂鼓噪、殺千戶張欽。 源淸榜令解散。 囚妄言前總兵朱振失職首亂,且多引 卒王福勝等焚殺瑾,因焚巡撫潘傲署。 郎,總制宣、大、山西、保定諸鎭軍務。 而榜言五堡變,處之過寬,五堡遺孽大懼 會僉事孫允中自源清 不能 白 無辜。 了發憤 自殺 源清遣參將趙綱 源清懲昔胡瓚事 大同總兵官李瑾沒 所至,論源清意, 師 次陽 帝 入城 命

卒出前參將黃鎭等於獄,奉爲帥,死守。 永兵至 城 下大掠,五堡遺孽遂盡反。 傲與鎭國將軍俊隱等登城, 迎戰,殺遊擊曹安。 官軍攻據四關,晝夜圍擊。亂 止毋攻。 俊騰出見永

京、都督江桓統京軍八千以往。 激變,速旋師,亂可已。源清亦詆做媚賊。 中不敢歸。 不能決。 請緩兵,皆不聽。 源清因多設邏卒, 允中縋城出, 言將士妄殺狀。 遏王府及有司軍民章疏, 已忽悟,罷弗遣,專責源清、永討賊。 張字敬主源清,侍郎顧鼎臣、黃綰言用兵謬,帝 源清叱曰:「汝爲贼游說耶」欲囚之。 TII] 請益師至五萬。 做馳疏言, 將士妄殺 帝命侍 郎 錢 如

崩、 應。 角,官軍殊死戰,互有殺傷。 顏居。」「那顏」者,|華言大人也。 城中人聞之,皆巷哭。 亂卒復叛,勾外寇爲助。永遇之,大敗而遁。 投。首惡黃鎭等亦分日出見,乞通樵採路,永許諾。 至,郎中詹榮等已悉捕首惡 爲毒烟熏死者相籍。 城圍久 源清請募九邊兵,增總制官禦之, 大因, 毁王府及諸廨舍供爨。 復請壅水灌之。帝大不懌,奪其職閒住,以兵部侍郎張瓚代之。瓚未 寇知叛卒不足賴,倒戈擊之,大詬而去。 兵部復下安撫令, 己得一意攻城,帝不許。 叛卒遂引寇十餘騎入城、指代府曰:「以此爲那 翌日採薪者出,永悉執之。城中人益懼 明日,外寇攻東南二關,叛卒與掎 源淸亦樹幟招降,叛卒稍稍自 源清乃百道攻,穴城 是時,寇游騎南掠至

保障功,當蒙八議之貸。 黃綰勘功罪,言源淸、永 帝怒,下忙等韶獄,逮源清治之。 實罪魁, 具劾其婪賄不貲狀。 獄久不決, 館憂去, 乃滅死斥為 兵科會忭 等言,宸濠 亂 源清有

列

傳第

八十

八

詹

俺答薄京師,即家起之,未赴而卒。 隆慶初,贈兵部尚書。

清疏救,法司奏當贖杖還職,中旨謫金壇丞。 府,多惠政。 所部,辭不往。堂奏天和拒命,詔逮之。部民哭送者萬人。錮詔獄久不釋,吏部尚書楊 他曹二十四人補之,天和與焉。 劉 天和,字養和,麻城人。 正德三年進士。 出按陝西。鎮守中官廖堂奉詔辦食御物於蘭州,天和謂非 刑部主事孫繼芳抗章教,不報。 授南京禮部主事。 劉瑾點御史十八人,改 屢遷湖州知

州 丁壯及山、陝流民於近邊耕牧,且推行於諸邊。 嘉靖初, 擢山西提學副使。 累遷南京太常少卿。 尋奏當興革者十事,田 以右僉都御史督甘肅屯政。 利大興。 請以庸

動,天和誅不順命者。 改撫陝西。 請撤鎮守中官及罷爲民患者三十餘事,帝皆從之。 又討平湖店大盜及漢中妖賊,就進右副都御史。 洮、 岷番四十二族蠢

飛雲橋,殺其下流。 月訖工。 母憂,服闋以故官總理河道。 加工部右侍郎。 疏山 東七十二泉,自鳧、尼諸山達南 故事, 河南八府歲役民治河, 黄河南徙、歷濟、徐皆旁溢。 **旺河,濬其下** 不赴役者人出銀三兩。 天和疏 流。 汴 河,自朱仙鎭至沛 役夫二萬, 天和因歲 不三

饑,請盡蠲旁河受役者課,遠河未役者半之。 詔可

近乃出短兵。 三四十人。一人輓之,推且翼者各二人。戰則護騎士其中,敵遠則施火器,稍近發弓弩,又 於用。天和請做前總督秦紘隻輪車,上置砲槍斧戟,廂前樹狻猊牌,左右虎盾,連二車可蔽 |年改兵部左侍郎,總制三邊軍務。 敵走,則騎兵追。復製隨車小帳,令士不露宿。 兵車皆雙輪,用二十人,遇險即困,又行遲不適 又毒弩矢,修邊牆濠塹。

敗之。 池。 復邀擊,敗之鐵柱泉,斬獲共四百四十餘級。 時角寇至黑水苑,尚文盡銳夾擊,殺吉囊子小十王。 **鹧宵行,與參將吳瑛合。寇果東入黑河墩,週酹伏兵,大創而去。** 進天和左都御史。 之,寇多死。 無鬭志。 寇戰不勝,走河上,遇伏兵,多死於水。 古囊十萬衆屯賀蘭山後,遣別部寇凉州,副將王輔逐奪其纛。 進天和 尋入寇家澗、張家塔,爲鹛、暎所敗。 而諸將多畏縮,天和斬指揮二人,召故總兵周尚文令立功。 右都御史。寇復大集兵將入犯。 吉麌犯河西,天和禦却之,進兵部尚書。寇將入平房城,天和伏兵花馬 論功,加天和太子太保,廕一子錦衣千戶,前 吉囊乘虛寇固原,剽掠且壓。 天和策寇矙西有備必東, 犯寧夏者,總兵官王效復破之。帝大喜, 寇退寧夏,巡撫楊守禮、總兵官任傑等 既又入蒺藜川,爵尾擊 寇莊浪, 密機延緩副將白 會陝西總兵官魏 會淫潑,弓矢盡 總兵官姜奭屢

列

後資 銀幣十數。 遷南京戶部尚書,召爲兵部尚書督團營。 言官論天和衰老,逐乞休歸 家

居三年卒。贈少保,諡莊襄。

其 刺曰:「悞矣,吾中外姻連無是人。」仲文恚,其罷官有力焉。 天和 初 舉 一進士 一,劉瑾 欲與敍宗姓,謝不往。 晚年內召,陶仲文以刺迎,稱戚屬。 天和 返

銀幣。 計擒 摭事奏。 公安賊魁。 楊守禮,字秉節,蕭州人。 初,守禮貶敍州,爲愈事張文奎所辱。 詔二人俱解職歸。 坐事 一滴敍州 通 判。 正德六年進士。 累遷右副都 至是,文奎遷四川 除戶部主事。 御史,巡撫四川。 嘉靖初,屢遷湖廣僉事。 · 參議,恐守禮修隙,先以所 與副將何卿 平諸 番亂 以

敗之。 副都 連却吉囊,三賜璽書銀幣。 御史,巡撫寧夏。 守禮才器敏達,中外以爲能。 會天和召還,進守禮右都御史總督軍務代之。 寇犯固原, 尋上疏乞休,帝惡其避難,降俸 爲總督劉天和所敗。 居家未久,工部尚書秦金等會薦,起河南 錄前 欲自寧夏去, 功,進兵部尚書。 級 守禮 與 總兵任傑等邀 參政。 總兵官李義、 再遷右

其秋,寇三萬騎抵綏德。 遊擊張鵬却之,總兵官吳英等追至塞外,東路參將周文兵亦

大,寇方避實擊虛,而我能以寡勝衆,宜錄其功。 至,夾擊敗之。 **俺答薄都城,廷臣首以守禮薦,詔趣上道。** 巡按御史殷學言,寇入內地五百里, 寇退,止不行。 乃加 請治諸將罪。 守禮太子少保,學謫外。 **外之卒。** 部議延綏游兵俱調宣、 守禮 尋以憂

下,謫南京國子學正。 寢疾豹房。 張 后,字維喬,惠安人。自幼好學,以大儒自期。登正德十一年進士,授行人。 請令大臣侍從,臺諫輪直起居,視藥餌,防意外變。不報。與同官諫南巡,杖闕 武宗

爲 毋實以人。」時大喜,告題。 以 諦 廣西提學僉事。 禮。 計擒首惡,置之理。入賀,改提學江西。不謝璁,璁黜廣西選貢七人,謫岳廣東鹽課提 遷 世宗嗣位,復故官,遷右司副。 帝使使往 廉州 張璁求始祖所自出者實之,禮官皆唯唯。 知府。 [安南詰莫登庸殺主, 岳言於總督張經曰:「莫氏篡黎, 行部柳州,軍缺餉大譁,城閉五日。 督民墾棄地,敎以桔槹運水。 應不謂然,以初議上。 帝竟令題皇初祖主,如 岳言。 母老乞便養,改南京武選員外郎,歷主客郎中。 廉民多盗珠池。 岳言於尚書李時日: 岳令守城 啓門, 召詰 譁者 予餉去。 尋 岳居四年,未嘗入一珠。 可無勘而 「不如爲皇初祖位, 知也。 璁銜之,出 方議大

列傅

第

八

+

八

楊守

鹂

張岳

陳遂紹。 書不 受製 溫 伯 交州 內 也。 幼弟愿而 遇 上 亂 溫 馳奏留 害,暠篡。 不 語 能 此賊 未嘗 付其 詞 可討六 數 決。 辱 之, 有 相 負篡逆名,常練兵備我, 日 孫 或 而 , 伯溫 所侵犯,可且置之,待其 黎所居卽古日南 之,卒弑愿自立,國 已,毛伯溫 福 乃改 未幾國 海,而自營海東府 留使者毋前。」經不可。 爲 日 廣 書貽執政曰「據邊民報,黎賙 「
変事屬君矣。」 人擁 東參政, 來視 立 **譓**, 暠奔 諒山。 師 地,與占城隣,限 分守海北。 張經 分爲三。 地 又時揚言求 都齋 亂定乃貢。 一以軍事委屈 許 登 居之。 知欽州 黎在 庸 澄庸降, 惠立七年爲莫登庸 如 大海 南,莫居 入貢。 林 岳 蓋安南諸府, 若必 襲封 議 希元 一、登庸 加 后俸 用 邊人以非故王 會岳 又以翁萬達才, 無嗣, 上書請決討莫氏, 中, 兵, 不 陳在 遷浙江提學副 能 勝負利鈍 級 惟 以兄子譓 踰 り賜銀 所逼, 海 西北 之南,故 東 也, 地最 0 進二 幣。 非 出 爲 後諒 居 兩存。 弗 岳 子。 岳 大, 使, 尋以征 人 升 所 敢 貽 Щ 於伯 卽 華。 聞。 敢 又遷 陳暠 書 亦 知。 所 近登庸 正之, 爲登庸 瓊州 謂 多数 溫 愚 登 作 一庸立 執 以 王 復 叛 叉以 爲 Щ 政 压 譓 伯 條 彼 郡 賙 得 與

進 治 兵部 鄖 陽 塞上 右侍郎。 多 旋 移 事 撫 ,言官薦岳邊才。 江西 平廣西馬平諸縣瑤賊 進右副 都御史, 伯溫 言:「岳 ,先後俘斬 總督 H 兩 南,翁萬達 廣 四千、招 軍 務無巡 撫二萬餘人、誅賊魁 可北也。」途擢 撫。 計 破 廣 東 岳右僉都 封 僮 韋金田等,增 蘇 御 史, 撫

功

加俸及

賜

如之。

衡 俸 級 郴 爲 桂 刑 部 積三十年不能 右 侍 郎 以 御 平 史 徐 岳 南 大合兵討擒之。 金言· 命 留 任 連 蒞鎭 Щ 贼李 四 年 金 ٠, 巨寇悉平, 召拜兵部 與 賀 縣 賊 倪仲亮等, 出

許保 功。 酉陽 俸。 壯 苗 議 四 頭 持 復 年 宣 故 螳 長 Щ 敷從 亦 亂 乃使總兵官沈 湖 黑苗 籌 慰 官 爈 克。 議 貴 内 元 冉 压 中 欲 貴 FF 司 跳 餘 撫, 州 元 乃授 撓 有 不 隸 謀 贼 嗾 岳 巡 欲 Щ 獲。 貴州 压 速治 露 許保、黑苗 撫 獻 其 日 岳持 劾其阻兵, 李 思 希儀、參將石 魁 蜡 岳以 岳 義壯 州 之, 龍 北接 爾 一發其 潜苗 FIJ 益 許 捷 徐階 告警, 及 堅。 保 四 突 奸 聞,言貴 許 ĴΙΪ 冠 思州 罷 居之。 持不 保。 帶 許保襲執印 酉陽,廣袤 元賄嚴 乃命 之。 邦憲等分道進, 可。 出 湖苗 湖 劫 先義壯 岳 東屬鎭溪 漸平, 廣兵亦 執 世 總督湖廣 乃奪右都御史, 暫息,而貴苗反 知 蕃責岳絕苗 數 江 府李允簡。 撫貴 自 湖 破 知 里。諸苗 千 苗 擒首 縣徐文伯及石阡 躬入銅仁督之。 、貴州 州 戶 聽 者, 所算子坪 撫, 惡 黨。 李通海等。 數反,官兵不 邦憲 愈都: 以兵部侍 請 四川 如 遣 故 邦憲竟得 兵邀奪 御 土兵 軍 長 史王學益 官司 務,討之。 饄 推官鄧本忠以 先後 歸 郎 班 压 允簡 黑苗 督 農 師 能 , 以 隸 斬 師 龍 制 黑苗未獲, 湖 還, 朝 贼 與 以獻 進右 許保 廣 議 魁 邦 侍 允簡 許之。 五. 古 憲等旋破 西屬 鄎 去, 都 及 嚴 十三人, 萬 患乃 竟 御 其 嵩, 銅仁、平 鏜 不 死。 岳 史。 黨 未 征 敢報 坐停 吳黑 主 撫

列

后博覽工文章,經術湛深,不喜王守仁學,以程、朱爲宗。 岳 卒於沅 州 喪歸,沅人迎哭者不絕。 已,敍功,復右都御史,贈太子少保,諡襄惠。

還,至淸浪衞而 保挾以求厚贖。 李允簡,融縣人。 卒。 允簡則傳語邦憲令亟進兵。 韶贈貴州副使,賜祭葬,官一子。 由舉人起家。以郡境多寇、遣孥歸、獨與孫炳文居。 在贼中自投高崖下,贼拽出,棄之途。 祖孫皆被執,許 思人异

風 不御肩輿。 察納忠言,勿專以嚴明爲治。帝大怒,下詔獄,杖四十釋之。歷按蘇、松、順天。 紀 擢御史。 郭宗皐,字君弼,福山人。嘉靖八年進士。選庶吉士。 坐奪俸兩月。尋出爲雁門兵備副使,轉陝西參政,遷大理少卿。 會廷推保定巡撫劉變還理院事、宗皐論變嘗薦大學士李時子,諂媚 十二年十月,星隕如雨。 未幾,哀沖太子薨,大同 專詔與選者皆改除,得刑部主 兵亂。 宗皐勸帝惇崇寬厚, 無行,不任 行部乘馬,

都御史代之, 寇已去。宗皐言:「密雲最要害, 宜宿重兵。乞敕馬蘭、太平、燕河三屯歲發千 一十三年十月,寇入萬全右衞,抵廣昌,列營四十里。順天巡撫朱方下獄,擢宗皐右僉

宗皐聞敵騎四十萬欲分道入,奏調京營、山東、河南兵爲援。已竟無實,坐奪俸一年。 府巡撫李仁易鎮。尋進兵部右侍郎,總督宣、大、山西軍務。 銀,增築燕河營、古北口。帝疑有侵冒,令罷歸聽勘。旣而事得白,起故官,巡撫大同,與宣 事,京營歲發五軍詣薊鎭防秋。宗皐請罷三軍,以其犒軍銀充本鎭募兵費。又請發修邊餘 以五月赴密雲,有警則總兵官自將赴援。居庸、白楊,地要兵弱,遇警必待部奏,不能及 請預擬借調之法,令建昌三屯軍,平時則協助密雲,遇警則移駐居庸。」俱報可。 故

俸。 事狀,因言全軍悉陷,乃數十年未有之大衄。帝乃逮宗阜及燿,各杖一百,燿遂死,宗阜戍 陝西靖虜衞 明年再犯大同,總兵官張達及椿皆戰死,宗皐與巡撫陳燿坐奪俸。 他答三萬騎犯萬全左衛,總兵官陳鳳、副總兵林椿與戰鷂兒嶺,殺傷相當, 給事中唐禹追論死 宗皐坐奪

歲給廩隸。 書參贊機務。 隆慶改元,從戍所起刑部右侍郎,改兵部,協理戎政。 十六年,宗阜年九十,又遣行人存問。 給事中莊國禎劾宗皇衰庸,宗皇亦自以年老求去,詔許之。 是年卒。贈太子太保,諡康介。 旋進南京右都御史,就改兵部尚 萬曆中,再存問,

年爲嘉 趙 婦五 時 春 年,會試第一。 ,字景仁,平涼人。 選庶吉士。 幼與羣兒嬉,輒列旂幟,部勒如 以張璁言改官,得戶部主 兵法。 事。 年十 尋轉兵部 낊 舉於 踰四

禮,乃罔上欺君,壞風傷政。」 一餘及御史楊東又進鹽華,禮部尚書李時再請表賀。 河清受賞,都御史汪鋐繼進甘露,今副都御史徐讚、 九 (年七月上疏曰:「陛下以災變求言已旬月,大小臣工率浮詞 仲斌等不足道,鋐、讚司風紀,時典三 訓導范仲斌進瑞麥,指揮張楫進嘉禾, 面 謾。 蓋自靈寶 知 縣言

帝責其妄言,且令獻讜言善策。 時春惶恐引咎未對。 帝趣之,於是時春上言:

當今之務最大者有四,最急者有三。

下治。 宜做古人輪對及我朝宣召之制,使大臣、臺諫、侍從各得敷納殿陛間,羣吏則以其職事 而 召問之。 害 工自愛、不敢不勵。 最 則利不必興,功百而費半則功不必舉,如是而天下享安靜之福矣。 大者,日崇治本。 曰信號令。無信一人之言,必參諸公論。毋狃一時之近,必稽之永遠。苟利十 日 **勵廉恥**。 大臣宜待以禮,取大節略小過,臺諫言是者用之,非者寬容之,庶 君之喜怒,賞罰所自出,勿以逆心事爲可怒,則賞罰大公而天 日廣延訪。

其最急者,日惜人才。凡得罪諸臣,其才不當棄,其過或可原,宜霈然發命,召還

臣

故秩。 者 IE. 了。裨將得以戮士卒,大將得以戮裨將,總制官得以戮大將,則**人心**震悚,而 一治教。 且因南郊禮成、除謫戍之罪,與之更始。 請復古冠婚、喪祭之禮,絕醮祭、禱祀 日固邊圉。 之術。凡佛老之徒有假引符籙、依託 敗軍之律宜嚴,臨陣而退 所向 用 命。

經懺、幻化黃白、飛昇遐景以冒寵祿者,卽賜遣斥,則正道修明而民志定。

時春憤曰:「此秦檜續耳。身爲大將,而效市僧,可乎。」片鸞,爲所搆,幾重得罪。 僉 京 事,進副使。 師被寇、朝議以時春知兵、起兵部主事、贊理京營務、統民兵訓練。 覽之,益怒,下詔獄掠治,黜爲民。久之,選東宮官屬,起翰林編修兼司經局校書。 帝 有疾,時春與羅洪先、唐順之疏請東宮御殿,受百官正旦朝賀。 大將軍仇鸞倡馬市, 帝 大怒,復黜爲民。 稍遷山東

數謂 以武 免,冰軍竟覆。 遁,緩追卽不及。」 遂策馬前。 及於大蟲嶺,伏兵四起,敗績。 諜報寇騎二千餘, 功自奮。 人:「使吾領選卒五千,俺答、丘福不足平也。」作禦寇論,論戰守甚悉。旣秉節鉞,益思 三十二年擢僉都御史,巡撫山西。時春慷慨負奇氣,善騎射。慨寇縱橫,將帥不任戰, 其年九月、寇入神池、利民諸堡,時春率馬步兵往禦之。至廣武,諸將畢會。 被論,解官聽調。 去兩舍。 時春擐甲欲馳,大將李淶固止之。 時春喜談兵,至是一戰而敗。然當是時將帥率避寇不擊。 倉皇投一墩,守卒縋之上乃得 時春大言曰:「賊知吾來必

列

傳

五三〇二

爲督撫者安居堅城,遙領軍事,無躬搏寇者。 時春功雖不就,天下皆壯其氣。

時春讀書善强記,文章豪肆,與唐順之、王愼中齊名。 詩,伉浪自喜類其爲人。

贊曰:姚鏌等封疆宣其擘畫,軍務暢其機謀,勳績咸有可紀。 伍文定從王守仁平宸濠

之難,厥功最懋。 趙時春將略自命, 出輒躓。 夫危事而易言之,固知兵者所弗取乎。

校勘記

- 使沈希儀與張經李璋張佑程鑒各統兵八萬 班史稿傳一九二冊州傳都說「鏌偕總兵官朱麟發兵八萬,以都指揮沈希儀、張經等統之」。 各統兵八萬, 則共爲四十萬。 按本書卷三一八及 傳文
- 行「各」字。
- <u>≕</u> ∪ 千夫長韋貴 嘉靖六年八月乙丑條改。 章貴,原作「章貫」,據本書卷三一八及明史稿傳一九二田州傳、世宗實錄卷七九 下同。
- 珊亦追至池淮 興紀要卷九三金華府開化縣下有「池淮溪」,其地有「池淮畈」。 池淮,原作「地淮」,據武宗實錄卷一〇〇正德八年五月癸巳條改。 按讀史方

[] 王急攜二郡王走宣府 四六嘉靖三年十二月庚子條稱代王「及大順王充耀、河西王充爔夜亡走宣府以避之」。作「郡 郡王,原作「郡主」。明史稿傳八一蔡天祐傳作「郡王」。按世宗實錄卷

主」誤,今改。

校 勘

明史卷二百

列傳第八十九

陶 琰 子遊 王綽 李充嗣 吳廷舉 弟廷侗 方良永

弟良節 子重杰 王爌 王屼 徐問 張邦奇

族父時徹

韓邦奇 弟邦靖 周金 吳嶽 譚大初

成進 內晏如。 士,授刑部主事。 陶琰,字廷信,絳州人。 遷福建按察使,浙江左布政使。 弘治初,進員外郎。 父銓,進士,陝西右參議。 歷固原兵備 副使。 **赕舉成化七年鄉試第一,四十七年** 練士卒,廣芻粟。 歷九年,部

避黨,行厚賂,欲中高危法。 正德初,以右副都御史巡撫河南,遷刑部右侍郎。 琰往按,直高。 **ن**超怒,假他事下睒韶獄,褫其職,又罰米四百石 陝西遊擊徐謙計御史李高。 謙故劉

列傳第八十九 陶琰

輸邊。 **谨誅**,起左副都御史,總督漕運兼巡撫淮、揚諸府。

故官。 渠魁。 金振 巡視浙江。 救,而大築蕭山至會稽堤五萬餘丈。 六年轉南京刑部侍郎。 凡三督漕,軍民習其政,不嚴而肅。 遂城開化、常山、遂安、 蘭谿,境內以靖。 復命總督漕運,七疏乞歸。 至則比等已滅,浩八聽撫。 明年,賊劉七等將犯江南,王浩八又入衢州。進隊右都御史, 會寧、紹颜海地颶風大作,居民漂沒萬數。 奏設兵備道守要害,防浩八黨出沒,遣將擊斬其 世宗嗣位,起 琰出帑

工部尚書。 有司歲時存問。 **晱性清儉,飯惟一疏。每到官及罷去,行李止三竹笥。** 其冬,改南京兵部,加太子少保。未浹歲,屢引年乞休。加太子太保,乘傳歸, 又九年卒,年八十有四。贈少保,諡恭介。 尋加戶部尚書。 嘉靖元年召拜

官伏闕爭「大禮」,再受杖,謫戍楡林。 乞改調近衞。不許。 子滋,以進士授行人。諫武宗南巡,杖闕下,謫國子學正。 十五年赦還,卒。 兵部尚書王時中等言,琰老病呻吟,冀父子一相見, 嘉靖初,歷兵部郎中。 率同

中。 正, 擬言紵非正供, 且請停上清宮役。詔皆罷之。累遷工科都給事中。 劾三邊總制王越附汪直、李廣、不可復玷節鉞。 王縝,字文哲,東莞人。父恪,寶慶知府。 **縝登弘治六年進士,選庶吉士,授兵科給事** 出理南畿屯田。 有司徵松江白紵六千

|州新城,| 旟言||泰陵工作方興,不當復興無益之役。 帝乃止。 進者,誠不可示後世。宜散遣先朝諸畫士,革工匠所授官。」帝不能用。中官張永請改築通 武宗初立,內府工匠以營造加恩。與率同官言:「陛下初登大寶,工匠末技已有以微勞

臣。 西賊王浩八。 不報。 正德元年出爲山西右參政。歷福建布政使,遷右副都御史,巡撫蘇、松諸府。 已,調鄖陽巡撫,遷南京刑部右侍郎。 乾清宫災,疏請養宗室子宮中,定根本,去南京新增內官,召還建言被黜諸 協平江

世宗即位,陳正本十事。嘉靖二年就擢戶部尚書。 卒官。

授戶部主事。 **僉事,歷雲南按察使。** 李充嗣,字士修,內江人。給事中蕃孫也。 以從父臨安爲郎中,改刑部。 坐累。謫岳州通判。 登成化二十三年進士,改庶吉士。 久之,移<u>隨</u>州知州,擢陝西 弘治初,

鷹、錦雞、走狗諸物,皆借名科斂。外又有拜見銀、須知銀及侵扣驛傳快手月錢、河夫歇役 乞嚴行禁絕。」詔但禁下人科取而已。 之屬,無慮十餘事,苛派動數十萬。其左右用事者,又私於境內抑買雜物,擅權商賈貨利。 **谨,假進貢名,要求百端,繼者以爲常。 |充嗣言:「近中官進貢,有古銅器、窰變盆、黃鷹、角** 足則勸貸富室。時流民多聚開封,煮糜哺之。踰月,資遣還鄉。初,鎮守中官廖堂黨於劉 |徳九年舉治行卓異,累遷右副都御史,巡撫河南。歲大祲。請發帑金移粟振之,不

時已就進戶部右侍郎,乃賜敕嘉勞。 嗣任之。」乃自將精兵萬人,西屯采石。 聲言京邊兵十萬旦夕至,趣供餉,以紿賊。 十二年移撫應天諸府。 寧王宸濠反,充嗣謂尚書喬宇曰:都城守禦屬於公,畿輔則充 遣使入安慶城中,令指揮楊銳等堅守。 賊果疑懼。事定,兵部及巡按御史胡潔言其功。 傳檄部內,

霈、顏如瓊佐之。 有建議修蘇、松水利者,進充嗣工部尚書兼領水利事。 開白茅港,疏吳淞江,六閱月而訖工。語詳河渠志。 未幾,世宗嗣位,遺工部郎林文

科道官,毋縱內臣苛索。 亦加十三萬石。 嘉靖元年論平宸濠功,加太子少保。 帝用充嗣言,減從故額。 帝俱從之。 尋改南京兵部尚書。 又請常賦外盡蠲 蘇、松白糧輸內府。 七年致仕,卒。 歲辦之浮額者, 正德時驟增內使五千人,糧 **外之**, 韶贈太子 內府徵收, 監以

學宮、書院。 史汪宗器亦 上官屬修中貴人先祠,廷舉不可。 吳廷舉,字獻臣,其先嘉魚人,祖戍梧州,遂家焉。 惡廷學,曰:「彼專抗上官,市名耳。」會廷學毀淫祠二百五十所,撤其材作堤,葺 宗器謂有所侵盜,執下獄。 市舶中官市葛,以二葛與之,曰:「非產也。」中官大怒。御 按之不得間,慚而止。 成化二十三年登進士,除順德知縣。

事 總督潘蕃討平南海、清遠諸盜。 ,逮緊詔獄。 爲縣十年,稍遷成都同 劉瑾矯詔,枷之十餘日,幾死。 知。 憂歸,補松江。 正德初,歷副使。 戍雁門,旋赦免 用尚書馬文升、劉大夏薦,擢廣東僉事。 發總鎭中官潘忠二十罪。 忠亦許廷舉他 從

復 及得還,浩三果殺其兄浩二,內亂。 從愈 楊 諫破之。賊首胡浩三旣撫復叛,廷舉往諭 一清薦其才,擢江西右參政。 官兵乘之,遂擒浩三。 敗華林賊於 連河。 ,爲所執。 從陳金大破姚源賊。 居三月、盡得其要領、誘使攜。 其黨走裴源,

使,復佐陳金平府江賊。 與副 [使]李夢陽不協,奏夢陽侵官,因乞休。 不俟命竟去,坐停一 擢右副都御史,振湖廣饑。 已,復出湖南定諸夷疆地。 歲俸。 起廣東右布政 寧王宸濠

有逆謀,疏陳江西軍政六事,爲豫防計。

求罷。 己昔居憲職無一言,乞罷黜以儆幸位。時完早得罪,瓊及儲已能去, 世宗立,召爲工部右侍郎,旋改兵部。 帝頗不直廷舉,調南京工部,而慰諭冕。冕固請留之,不聽 上疏詆陸完、王瓊、梁儲及少傳蔣冕,而自以爲 廷舉借以傾冕。

波、景腆、廷舉具白志聰貪黷狀。 波 尋就改戶部,遷右都**御史**,巡撫應天諸府。 出,倒曳之車後。 嘉靖元年,廷舉乞休。 典史蕭景腆操兵教場,急率兵救。 尋以災異復自劾求罷,勸帝修德應天,因奏行其部興革十二事 帝乃降波五級,調景腆遠方,志聰 長洲知縣郭波以事挫織造中官張志聰。 百姓登屋,飛瓦擊志聰。 亦召還。 志聰奏逮 志聰伺

帝慰留。 不慊,故爲此奏。 各條所見,並詢家居老臣,采而行之,彙爲一書, 禮,勒致仕 三年,以「犬禮」議未定,請如洪武中修孝慈錄故事,令兩京部、寺、臺、省及天下督、撫 已,復辭, 給事中張原、劉祺交劾之,不報。 且引白居易、張詠詩、語多詼諧,中復用嗚呼字。 以詔後世。 尋改南京 時已定稱本生考,廷舉窺帝意 工部尚 帝怒,以廷舉怨望無人 書,辭不拜,稱疾乞休。

坦。 廷舉 田病痢,僕死, 面 如 削 瓜。 自煮藥飲之。 衣敝帶穿,不事藻飾。言行必自信, 負以如厠。一 晝夜數十反。 人莫能奪。 其在 |太學時, 兄事羅 臣

舉好薛瑄、胡居仁學,尊事陳獻章。 居湫隘,亡郭外田,有書萬卷。 及卒,總督姚鎮定其喪。

隆慶 中 一追諡 清惠

弟廷弼,舉於鄉。 廷舉枷吏部前,廷剛臥其械下。 刑部主事宿進爲奏記張綵,乃得釋。

還授 刑部主事。 方 良永,字壽卿,莆田人。 進員外郎,擢廣東僉事。 弘治三年進士。督逋兩廣,峻却饋遺,爲布政使劉大夏所器。 瓊州 敗符南蛇爲亂,大夏時爲總督,傲攝海南兵

備,會師討平之。御史坐良永失利。 大夏已入爲本兵,爲白於朝,賚銀幣。

正德初,父喪除,待銓闕下。外官朝見畢,必謁劉瑾。

鴻臚導良永詣左順門叩頭畢,令

東向 .揖瑾,良永竟出。或勸詣瑾家,良永不可。及吏部除良永河南撫民僉事,中旨勒致仕。

旣 去,瑾怒未已,欲假海南殺人事中之。刑部郎中周敏力持,乃不坐。 **選** 誅, 起湖廣副使。

尋擢廣西按察使。 發巡按御史朱志榮罪至謫戍。 遷山東右布政使。旋調浙江,改左。

錢寧以鈔二萬鬻於浙,良永上疏曰:「四方盜甫息,瘡痍未瘳,浙東西 雨雹。 寧厮養賤

流 假義子名,躋公侯之列。 賜予無算,納賄不貲,乃敢攫民財,戕邦本。 有司奉行急於詔

列 傅 第

八

+ 九

方 良

永

乞休去。 志,公卿、臺諫無敢出一語。 先行之浙江、山東, 死,不以聞。乞陛下下寧詔獄,明正典刑,並治其黨,以謝百姓。」寧懼,留疏不下。 旨,胥吏緣爲奸,椎膚剝髓,民不堪命。 尉捕假勢鬻鈔者,以自飾於帝,而請以鈔直還之民,陰召還前所遣使。 山東爲巡撫趙璜所格,而良永白發其奸,寧自是不敢鬻鈔矣。 良永以外僚訟言誅之,聞者震悚。 鎮守太監王堂、劉璟畏寧威,受役使。 良永念母老,恐中禍,三疏 寧初欲散鈔偏天下, 臣何敢 寧方得 謀遣校 愛

其說以自附於象山,而上達於孔子。 毁,稱純孝焉。 州疾作,連疏乞致仕,未報遽歸,卒。卒後有南京刑部尚書之命。暨訃聞,賜 請破格褒寵。 詔月給 世宗 良永侍父疾,衣不解帶者三月。 三石。 即位,中外交薦。 **外之,母卒,詔賜祭葬。** 尚書喬字、孫交言, 良永家無贏貲, 宜用侍郎潘禮、御史陳茂烈故事, 賜廩米。 素善王守仁,而論學與之異。嘗語人曰:「近世專言心學,自謂超悟獨 拜右副都御史, 撫治鄖陽。以母老, 再疏乞終養。 母病,良永年六十餘矣, 目賢聖教人次第爲小子無用之學,程、朱而下無不受 皆異數也。 服除,以故官巡撫應天,即家 手進湯藥無少怠。 卹 如 賜 制、諡簡肅。 都御史姚鏌 敕。 居倚廬哀 到,推

弟良節,官廣東左布政使,亦有治行。 子重杰、舉於鄉、以孝聞。 擯

()而不知其入於妄。]

王爌,字存納,黃巖人。 弘治十五年進士。 除太常博士。 正德時、屢遷刑科都給事中。

劾都 武定侯郭勛鎭兩廣,行事乖謬。 御 史彭澤。 帝責澤,置勛不問。 韶自陳, 勛强辨, 爌等駁之。 御史林有年直言下獄,浙江僉事韓邦奇忤中官被逮, 都察院覆奏,不錄廣言,廣並

爌皆救之。 於外,爌得惠州推官。 帝幸大同久不反,爌力請回變。 又與工科石天柱救彭澤,忤王瓊。

中旨調

兩人

世宗立,召復都給事中。 旋擢太僕少卿,改太常。 嘉靖三年遷應天府尹。 歲大祲,奏

免其賦。居四年,遷**南京刑部右侍郎,以母老**歸養。

家居十年,起故官。 尋擢南京右都御史。守備中官進表,率以兩御史監禮。

爌曰:「中

官安得役御史。」止之。 奉賀入朝,謁內閣夏言。 言倨甚,大臣多隅坐,爌獨引坐正之。言

不悅,爌逐謝病歸。

爌與御史潘壯不相能。 肚坐大獄,詔爌提問。 爛力白壯罪,至忤旨。人以此稱 順長者。

卒,贈工部尙書。

軏 開 平衛 人,弘治十二年進士。 正德. 初,歷工 部 員外郎 屢遷 山東 左布 政 使。

搆 都 兵,使人誘 御 史,巡撫 嘉靖 初 殺壽,奪其印。 匹 入為順天府 Щ さ部 土官知府隴慰 尹 0 **軏請討之。** 房山 地震, 死,庶子政 乃會貴州兵分道進, 軏 言召 災 與嫡子壽 有 由,語多指斥。 爭立,朝 擒政於水 議立壽 件旨 西, ·切責。 招降四十九砦。 政 倚 尋遷右副 鳥撒

書獎勞。

部 屼 如 以 律。 尚書梁材採 釐 餘 地歸 歸 時將 之官。 出 之民。 覈 營仁壽宮,就拜,抓工部右侍郎,督採大木。 勛 奸人 其言,兼幷者悉歸官。 戚 莊 勘御馬監草場, 馮賢等復獻 田 一,請 如 周 制,計 中 釐地二萬餘頃, 官 李秀, 밂 稍 秩 進 左侍 秀為請 別 親 郎 疏 募民以佃。 於帝, ,以定多寡, 工罷,召還。 **軏抗疏勃** 房山 非詔 改戶部。 之。 民以 賜 而隱占者俱追斷。 牧馬 帝 雖 宥 地 覈 秀,竟治賢等 獻 九 中 門首 官 |韋恒, 蓿 地,

府 西 保等攻執 苗攻剽畢節諸衛 分置 初 四 洸 長官司 ,奪其印 、欲復立 授隴氏疎屬 帝 命伍文定圖之。 隴氏後。 阿濟等為長官,而 巡 撫王廷 以朝議 設流官,兵部尚書李鉞等然之。 不 相 等破保,光 合, 召還。 擢 重 慶 通 圳 得還。 御史戴金因言 程光 爲試 保子 知 普奴 府 遂改芒部 一芒部改流之 復 隴 連烏撒 氏 爲 舊 鎭 部 水水 沙 雄

議,諸司 成執不可。

勒爲民。 卿、沈希儀等二十一人,皆擢用。 以 兵部 久之卒**。** 尚書李承勛薦,起故官,總督倉場,再遷南京戶部尚 紳儀表。 帝乃責湜妄言。 居四年,以老乞罷。 **外之,就改兵部,參贊機務。** 疏中言享年若干,帝以爲非告君體, 書。 御史龔湜劾軏 詔舉將 材 老悖,吏 薦鄭

州知府。 藪,自好者不樂居。問曰:「吾欲淸是官也。」終任不取一錢。累遷廣東左布政使。 徐問,字用中,武進人。弘治十五年進士。授廣平推官。 地濱海多盜,問盡捕之。 調臨江。修築壞堤七十二。轉長蘆鹽運使。 遷刑部主事,歷兵部,出爲燈 運司 故利

潛踪,所誅戮率無辜赤子。興大兵,費厚餉,以易無辜命,非陛下好生意。宜敕邊臣布威信, 半土司,深山密菁,瑶、憧、羅、僰所窟穴。邊將喜功召釁,好爲掃穴之舉。 王師每入, 巨憝 大兵分道入,誅之。 南丹、泗城欲助逆,檄廣西撫按伐其謀。 嘉靖十一年以治行卓異,拜右副都御史,巡撫貴州。 捷聞,賜金綺,召爲兵部右侍郎。疏陳武備八事。又言:「兩廣、雲、貴 又檄|鉞弟|到復父讐,事平得承襲。|鉞援絕。 獨 山州賊蒙鉞弑父爲亂。 問督 問 聞

列

傅

嚴阨塞,謹哨探,使各安邊境,以絕禍萌。」帝深納其言。尋引疾歸

二十一年召爲南京禮部侍郞。久之,就遷戶部尚書。 復引疾去,卒於家。

問淸節自勵。 居官四十年,敝廬蕭然,田不滿百畝。好學不倦,粹然深造,爲士類所宗。

隆慶初、諡莊裕。

討。 文成,送入學。世宗由 三四年,諸生競勸。 出為湖廣提學副使。 張邦奇,字常甫,鄞人。年十五,作易解及釋國語。 時世宗方爲興世子,獻皇遣就試。乃特設兩案,己居北而使世子居南。 此知邦奇 下教曰:「學不凡、顏,行不會、閱,雖文如雄、褒,吾且斥之。」在任 登弘治末年進士,改庶吉士,授檢

幾, 選外僚入坊局,改右庶子,遷南京祭酒。 嘉靖初,提學四川,以親老乞歸。久之,桂萼掌銓,去留天下提學官,起邦奇 以身爲敎,學規整肅。 就遷吏部侍郎。 福建。 丁外 未

相,其人安在。」帝憬然曰:「尚未用也。」服闋,卽召爲吏部右侍郎,掌部事。 帝嘗奉太后謁天壽諸陵、語及擇相。 太后曰:「先皇嘗言提學張邦奇器識,他 推轂善類,人不 日可為宰

艱婦。

請寬,邦奇不從。 可干以私。 銓部升除,多受教政府,邦奇獨否,大學士李時銜之。 帝欲卽授邦奇尚書,爲兩人沮止。 **尋改掌翰林院事,充日講官,加太子** 郭勛家人犯法,异重賄

賓客,改掌詹事府。

念邦奇,時與嚴嵩語及之。當曰:「邦奇性至孝,母老,不樂北來。」帝信其言,遂不召。二十 三年卒,年六十一。贈太子太保,諡文定。 九載考績,晉禮部尚書。以母老欲便養,乃改南京吏部。 復改兵部,參贊機務。 帝猶

事母。 爲,夕必書於册。 邦奇之學以程、朱爲宗。與王守仁友善,而語每不合。 所著學庸傳、五經說及文集,粹然一出於正。 性篤孝,以養親故,屢起輒退。其母後邦奇卒,壽至百歲。 躬修力踐,跬步必謹。畫之所 邦奇事寡嫂如

族父時徹,少邦奇二十歲,受業於邦奇。 仕至南京兵部尚書。 有文名。

韓邦奇, 字汝節,朝邑人。 父紹宗,福建副使。 邦奇登正德三年進士,除吏部主事,進

員外郎。

六年冬,京師地震,上疏陳時政闕失。 件旨,不報。 會給事中孫順等劾臣僚不職者,並

內豎假 及邦奇。 !飯僧,聚千人於杭州天竺寺,邦奇立散遣之。 吏部已議留,帝竟以前疏故,黜爲平陽通判。 其儀賓託進貢假道衢州,邦奇詰之日: 遷浙江僉事,轄杭、嚴二府。 宸濠令

「入貢當沿江下,奚自假道? 歸語王,韓僉事不可誑 也。

遂奏邦奇沮格上供,作歌怨謗。帝怒,逮至京,下詔獄。 出,民不聊生。邦奇疏請禁止,又數裁抑堂。 時中官在浙者凡四人,王堂爲鎭守,晁進督織造,崔琟主市舶,張玉管營造。 邦奇閔中官採富陽茶魚爲民害,作歌哀之。 廷臣論救,皆不聽,斥爲民 爪牙四 堂

東。 命 Щ 入為 東 與 Щ 副使,遷大理丞,進少卿,以右僉都御史巡撫宣府。 春坊右庶子。 時遼陽兵變,侍郎黃宗明言邦奇素有威望,請假以便宜,速往定亂。帝方事姑息,不從, 嘉靖初,起山東參議。乞休去。 西巡撫任洛換官。 七年偕同官方鵬主應天鄉試,坐試錄謬誤,謫南京太僕丞。 至山西,爲政嚴肅,有司供 尋用薦,以故官蒞 具悉不納,間 山西。 入佐院事,進右副都御史,巡撫遼 再乞休去。起四 日 出俸米易肉一斤。 Ш 復乞歸。 提學副 使, 起

御 史,進兵部尙書, 居四 年,引疾歸。 参贊機務。 中外交薦,以故官起督河道。 致仕歸。 三十四年,陝西地大震,邦奇隕焉。 遷刑部右侍郎,改吏部。 贈太子少保, 拜南京右都

證恭簡。

邦奇性嗜學。 自諸經、子、史及天文、地理、樂律、術數、兵法之書,無不通究。著述甚

富。 所撰志樂,尤爲世所稱。

中李鐸等以爲言,乃奪職爲民。世宗卽位,起山西左參議,分守大同。 被劾,以守官廉得觅。 發帑,不許。 未幾,邦奇亦以參議蒞大同。 弟邦靖,字汝度。 復抗疏千餘言,不報。 年十四舉於鄉。 進員外郎。 父老因邦靖故,前迎,皆泣下。 乾清宮災,指斥時政甚切。 乞歸,不待命輒行。 與邦奇同登進士,授工部主事。 軍民遮道泣留。 武宗大怒,下之詔 邦奇亦泣 歲饑, 権木浙江, 領不充, 抵家病卒,年三十 人相食, 獄。 奏請 給事

邦奇嘗廬居,病歲餘不能起。 邦靖藥必分嘗, 食飲皆手進。 後邦晴病亟,邦奇日夜持

弟泣,

不解衣者三月。 及歿、衰経蔬食、終喪弗懈。 鄉人爲立孝弟碑。

西邊虛憊,而土魯番險遠,且青海之寇窺伺西寧,不宜計哈密。 横道路,當罷。 「京糧歲入三百五萬,而食者乃四百三萬,當痛爲澄汰。 周金,字子庚,武進人。正德三年進士。授工科給事中。 都督馬昂納有妊女弟,當誅昂而還其女。」朝議用兵土魯番,復哈密。 中官迎佛及監織造者濫乞引鹽,暴 已,卒從金議 累遷戶科都給事中。 疏言: 金言

列 傳 第

八

+ 九

耳。」金從容諭以利害,衆乃散解去,得無變。 府總督侍郎馮清苛刻。 召諸軍官數之曰:「是若輩剝削之過。」欲痛鞭之。 廣 屯 積芻,以時給其食。 嘉靖元年由太僕寺少卿遷都察院右僉都御史,巡撫延綏。邊人貧甚。 諸軍請糧不從,且欲鞭之,衆轟然圍濤府署。金方病,出坐院門, 改撫宣府, 進右副都御史。 軍士氣稍平, 擁而前請曰:「總制不恤我 大同叛卒殺張文錦,邊鎮兵皆驕。 金爲招商聚粟, 宣

帝卒下新芳刑部,黜官。 兵二千揃之。 改撫保定。 知府及佐貳皆走,一城盡空。 巡按御史李新芳疑廣平知縣謀己,欲挟之。 金發其罪狀,而都御史王廷相庇新芳,與相爭。 知府爲之解,並欲執知府,發

書,就轉戶部。二十四年致仕歸,歲餘卒。 金遷兵部右侍郎。 未幾,進右都御史,總督漕運,巡撫鳳陽諸府。 贈太子太保、諡襄敏。 **外之,擢南京刑部尚**

利民。 數千,拒之。 吳嶽,字汝喬,汝上人。嘉靖十一 以憂去。 Ш 知 服除,改保定,治如廬州。 廬州府。 稅課歲萬金,例輸府,緣以代郵傳費。 年進士。授戶部主事,歷郎 歷山西副使、浙江參政、湖廣按察使、山西右布 西 中。 Щ 薪故供官爨,嶽 督餉宣府,吏進 一羡金 驰以

政使,並以清靜得民。

遷右 愈都御史,巡撫保定六府。 奏裁徵發冗費十六七,民力遂寬。 甫浹歲,引疾去。外

之,以貴州巡撫徵。尋進左副都御史,協理院事。

卒。 倖,南都縉紳憚之。 臣敢留考察罷黜官,有故事乎。」應嘉遂得譴。 韶贈太子太保,諡介肅 隆慶元年歷東部左、右侍郎。 上疏陳六事,帝頗納其言。 京察竣、給事中胡應嘉有所申採。 遷南京禮部尚書, 尋改兵部,參贊機務。 就改 嶽詣 東部 未上, 內閣抗聲曰:「科 給由 抑浮薄, 過家,病 杜僥

時,王廷守蘇州,以公事遇京口 療清望冠一時, 視躬嚴整。 0 尚書馬森言平生見廉節士二人,嶽與譚大初耳。 激召爲金山遊,攜酒一缻,肉一 去廬日,假一蓋禦雨,至卽命還之。 斤, 菜數束。 延笑曰:「止 嶽知廬州

之,起故官河南。 大初曰:「失額罪小,殃民罪大。」嚴嵩親黨奪民田,治之不少貸。 給 事 中。 譚大初,字宗元,始興人。 數 論 事。 未上,擢南京右通政。 歷兵科左給 事中,出爲江西 嘉靖十七年進士。 俄遷應天府尹。 副 使。 授工部主事。 清軍,多所釋。御史孫慎以失額爲疑, 將赴南都,而穆宗即位,乞以參政 遷廣西右參政,投劾歸。久 憂歸。 起補戶部,改戶科

[]

傅

第

八

-|-

九

吳繳

力薦瑞。已而屢疏乞休,不允。拜南京戶部尚書,引疾去。家居,田不及百畝。卒年七十 致仕,不許。 諡 莊 懿 隆慶元年召拜工部右侍郎,尋遷戶部左侍郎,督倉場。 海瑞爲僉都御史,大初

錢寧,周金之弭亂卒,所豎立甚偉。至琰子之直節,廷弼、邦靖之篤行,尤無忝其父兄云。 清操峻特,卓然可風。南都列卿,後先相望,不其賢乎。琰之督漕,充嗣之守禦,良永之遏 贊曰:當正、<

嘉之際,士大夫

一方爲圓,

貶其素履,

羔羊素絲之節

意以微矣。 陶琰諸人

校勘記

成化七年鄉試第一 成化七年,明史稿傳七五陶琰傳作「成化十六年」。

